



6


8-c

18





**CANDIDATUS**  
**RHETORICÆ**  
**P. FRANCISCI POMEY**  
**SOCIETATIS JESU.**





CANDIDATUS  
RHETORICÆ,  
SEU  
APHTHONII  
PROGYMNASMATA


In meliorem formam, usumque redacta,  
& nuperrimè aucta.

AUCTORE  
P. FRANCISCO POMEY  
E SOCIETATE JESU.

Hac nova Editione diligentissimè  
emendata.



VENETIIS, M. DCCVI.  
Apud Andream Poleti.  
SUPERIORUM PERMISSU.



TYPOGRAPHUS  
A D  
RELIGIOSISSIMOS  
PRÆCEPTORES



Rudita scientia-  
rum in Comi-  
tia descendit  
recens Candi-  
datus, Patres Sapientif-  
simi ; hic Romanorum  
consuetudini insistens al-  
bo Purioris Eloquentiæ  
amictu Rhetoricæ orna-  
mentis intexto superin-  
dutus vestra implorat  
studia, ut vestro in Ma-  
gistratu aliquem locum

\*

3

asse-

assequatur ; Infimis itaque hujus Candidati precibus Candidis Suffragiis favere ne indignemini ; Tunc enim non irritò labore , Præceptores Religiosissimi , vestris famulari conabitur Auditoribus Candidatis scilicet gloriæ , & immortalitatis . Interim meum candidi Animi obsequium excipite , & diu Valete .

C A N .

CANDIDATUS  
ELOQUENTIÆ.

**Q**uemcunque præferatis veste Colorem Humaniorum Alumni Lectissimi, vos Candidatos dicam Eloquentiæ, meum hunc vobis CANDIDATUM RHETORICÆ dedicans, Scitis prætextam; apud Romanos veteres, solitos induere candidam, qui honores in Republica peterent, huiusque modi ac coloris insignes habitu, suffragia rogasse in comitiis, & prebensasse magistratus. Haud opus est, priscum illum morem, alba cum veste induatis, vos ut appellem Candidatos. Nihil in vobis præter ingenii candorem, requiro candidi, solam requiro diligentiam, ut consequamini quod ambitis. Ambitis enim, dissimulare non potestis, & vel atrati, (si quis fortè vestrum atratus est) quotidie Candidatorum obitis officia. Quid enim aliquid aliud, queso, agitis, cum per Campum non Martium, sed Apollineum, circumcursatis frequentes, & assidui, non paucis

\* 4

die.

diebus , sed multis annis ; Dum Latii  
Primores, Reique publicæ literariæ Se-  
natores, & Consules convenitis, rogatis,  
osculamini, deducitis domum, reditis-  
que in comitia; & favoris captandi cau-  
sa, eorum dicta scriptaque laudibus ef-  
fertis, prædicatis orationis elegantiam,  
majestatem extollitis, splendorem cele-  
bratis, sententiarum expenditis pondus,  
verbaque singula colligitis, memoriaque  
commendatis ; Ambitis, inquam, pre-  
bensatione illa continenti & sedula, su-  
premam in Regiæ Suadæ curia digni-  
tatem? nec ambitionem tegitis vestram?  
Nam quid esset, cur tegeretis? In hac  
Republica virtus est, non crimen, Am-  
bitus ; reorum loco sedent, qui non am-  
biunt, moderatio hîc probro vertitur ;  
privatæque vitæ amor, odium est pu-  
blici boni ; Neque verò verendum est,  
ut vos de Ambitu quis arguat, arceat-  
que aditu honoris, ad quem vos Pa-  
rentes educant, & Patria evectos cu-  
piunt . Ego certè, vestram, hoc inge-  
nere, ita laudo cupiditatem laudis bo-  
nestissimæ, ut omni etiam, si qua in his  
comitiis vigeo gratia, velificari omnium  
votis ,

votis, meorum sit votorum maximum, nec voce hortari solum, sed stylo etiam stimulare singulos, ut nullum faciatis prebensandi finem. Idcirco meum hunc vobis Candidatum Rhetoricæ offero, qui ut habet in mandatis, per omnes vos deducat Latinas tribus, & Centurias; doceatque, quibus sint verborum urbanitatibus demerenda suffragia, qua circuitione figurarum, quibus sententiarum officiis, quo ornatus & orationis ambitu, sit ambiendus obtinendusque, quem postulatis summus honor: denique vobis indicet, qua possitis arte fieri de Candidatis Purpurati, Patritiique de plebeiis, & ab humilibus Gramaticæ subselliis, sublimia Oratorum suggesta scandere, abjectaque puerili prætexta, inter Patratos Eloquentia considerare. Hunc igitur pro ingenua vobis comitate, humaniter accipite. Humaniorum Literarum Studiosi, & studentii vestris commodis ac gloriæ vicissim Studere; ac studendo, semper valete.

# LECTORI CANDIDATO.

**Q**uid corrugas nasum , malevole ? Aphthonius hic non est , inquis , sed liber Rhetoricus : Nec enim de Periodo , Figuris Oratoriis , & Amplificatione , somniavit usquam bonus Aphthonius . Ann' tu ? At ego somniavi , & meum haud vanum esse puto , anileque somnium . Quid ? Annon faciendi Chrias , ut fileam de cæteris , Aphthonius præscripsit artem ? Præscripsit sanè . Age sanè , in Chriis effingendis , quid putas esse faciendum amabo te ? Dictum factumve , quodpiam , inquit , amplificandum est oratione . Dicis quod est : At tunc id præstare valeas , si tornare nescis Periodum , si Rhetoricarum usum Figurarum ignoras , nec Amplificandi præcepta calleas ? Haud , quidem , ais , harum rerum ignarus id quisquam præstet . At hæc sunt , inquam , quæ idcirco existimavi , Aphthonii præmittenda esse præceptionibus . At enim , Aphthonius hic ille non est .

Certè



Certè non est hic , Aphthonius ille ,  
calvus , capularis ac horridus , sulcata  
fronte , barba hispida , obsoleto habi-  
tu , vultu vultuoso , quem nemo Gram-  
maticus , sine risu , nemo Rhetor sine  
indignatione aspectare poterat : adeò  
negligentiâ temporum ( malo enim  
tempora , quàm homines accusare )  
squallidus , luridus , pædore oblitus ,  
macieque deformatus perreptabat , ab-  
jectus , contemptusque per academias .  
At iste , qui nunc primùm prodit in pu-  
blicum , Juvenis Aphthonius est ore  
venustulus , ornatu comprulus , fermo-  
ne comis , moribus hilaris , studiosissi-  
mus Adolescentium studiorum , Rhe-  
torices in primis Candidatorum perami-  
cus , totusque ad eorum fictus obse-  
quium . Audin' malevole ? At , quid  
mihi cum malevolo ? Te hic solum  
compello obsecroque Lector benevole ,  
æqui bonique consulas , quod in tui gra-  
tiam , ad hujus Aphthonii commenda-  
tionem , contuli , penè dixi coactus ac  
reluctans ; Dicam enim ingenuè , non  
studio inductus meo ; sed iudicio inci-  
tatus alieno , hac appuli mentem , sex-  
que annis ipsis oblectatus multorum po-  
stulatis ( non audeo dicere precibus )  
cessi denique , & posthabita utilitati  
\* 6 tuæ,

tuæ, commodi mei ratione, à quatuor mensibus, invitam, & renuentem operi adhibui manum. Nunc, priusquam te valere jubeam: unum est, alterumve, quod te monitum velim. Primum Elementa Rhetoricæ, me præfixisse huic Libro, ut ne quem alium requires, pro re tam levi. Alterum ab Aphthonii Progymnasmatibus, exordiri noluisse hoc Opusculum, quod ea quæ prioribus edisserui, necessaria planè sint, ad eorum, quæ sequuntur intelligentiam, & quasi Loci Communes, unde non argumenta solum peti possint ad Amplificationes & Chrias, sed diversarum rerum materia multiplex. Cæterum pro una vel indole, vel ratione studiorum, undelibet initium legendi aut studendi facias, licet; undeunque enim, & ubique gratificari tibi studeo. Jam Valete.

# I N D E X

## TITULORUM

### ELEMENTA RHETORICÆ

Tredecim Capitulis comprehensa.

I.	<b>D</b> E Rhetoricæ natura .	pag. I
II.	De Rhetoricæ materia .	3
III.	De quæſtionibus illuc pertinentibus .	
	4	
IV.	De triplici cauſarum genere .	6
V.	De partibus eloquentiæ .	7
VI.VII.VIII.	De locis Oratoriis , à 9. ad 18	
IX.	De Exordio .	19
X.	De Confirmatione .	21
XI.	De Argumentatione .	23
XII.	De ejus ſpeciebus .	23
XIII.	De Peroratione .	27

## PROGYMNASMA I.

### De Periodo.

CAP. I.	Natura Periodi .	29
II.	Ars Periodi contexenda .	32
III.	Exempla Periodorum .	40
IV.	Uſus Periodi .	47

PRO.

## ROGYMNASMA II.

### De Figuris.

<b>CAP. I.</b> <i>Figurarum natura; &amp; divisio.</i>	48
II. <i>De Tropis.</i>	49
III. <i>De Figuris Verborum.</i>	52
IV. <i>De Figuris Sententiarum.</i>	58

## PROGYMNASMA III.

### De Amplificatione.

PARSI. <i>Amplificandi præcepta.</i>	126
PARS II. <i>Amplificandi ratio.</i>	131
<b>CAP. I.</b> <i>Ars inveniendi Argumenta.</i>	132
§. I. <i>Primus modus per locos Rhetoric.</i>	133
§. II. <i>Secundus modus per adiectiva nomina.</i>	138
§. III. <i>Tertius modus ex iis quæ cadunt sub oculos;</i>	148
<b>CAP. II.</b> <i>Ars tractandi Argumenta.</i>	155
§. I. <i>Primus modus per Figuras illustriores.</i>	156
§. II. <i>Secundus modus per omnes casus.</i>	170
§. III. <i>Tertius modus, per modos omnes ac tempora.</i>	171
PARS III. <i>Amplificationum Exempla.</i>	176
<b>CAP. I.</b> <i>A Definitionibus conglobatis.</i>	177
II. <i>A partium enumeratione.</i>	184
III. <i>Ab Effectis.</i>	190
IV. <i>A Consequentibus.</i>	196
V. <i>Ab Adjunctis.</i>	202
<i>A con-</i>	

VI.	<i>A contrariorum frequentatione .</i>	206
VII.	<i>Ab exemplorum frequentatione .</i>	211
VIII.	<i>A comparatione .</i>	217.

## PROGYMNASMA IV.

De Fabula , & Narratione generatim .

CAP. I.	<i>Virtutes Narrationis .</i>	224
II.	<i>Ornamenta Narrationis .</i>	227

## PROGYMNASMA V.

De Fabula .

CAP. I.	<i>Fabula definitio ac Nomina .</i>	232
II.	<i>Fabulae varietas .</i>	234
III.	<i>Fabulae sensus .</i>	235
IV.	<i>Fabulae Utilitas .</i>	236
V.	<i>Fabulae usus , &amp; artificium .</i>	239
VI.	<i>Fabularum Exempla .</i>	241

## PROGYMNASMA VI.

De Narratione .

CAP. I.	<i>Quid &amp; quotuplex sit .</i>	259
II.	<i>Qualis esse debeat .</i>	262
III.	<i>Narrationum Exempla .</i>	264

## PROGYMNASMA VII.

De Chria .

CAP. I.	<i>Quid &amp; quotuplex sit Chria .</i>	296
II.	<i>Chriae partes .</i>	299

De

III. <i>De Cbris Exordio .</i>	301
IV. <i>De Cbris Paraphrastico .</i>	324
V. <i>Transiciones, ad connectendas Cbris partes .</i>	333
VI. <i>Exempla Cbriarum .</i>	338
VII. <i>Cbriarum Argumenta varia .</i>	358

## PROGYMNASMA VIII.

### De Sententia .

CAP. I. <i>Quid sit , &amp; quoruplex .</i>	382
II. <i>Sententiæ Exemplum .</i>	384

## PROGYMNASMA IX.

### De Etopœjā, ac Thesi .

CAP. I. <i>De Etopœia .</i>	389
II. <i>De Thesi .</i>	393

## PROGYMNASMA X.

### De Loco Communi, Destructione, & Confirmatione, Laude, & Vituperio .

CAP. I. <i>De Loco Communi .</i>	400
II. <i>De Destructione , &amp; Confirmatione .</i>	404
III. <i>De Laude , &amp; Vituperio .</i>	405

# I N D E X

Rerum hoc Opusculo  
contentarum.

## A

<b>A</b> Djectivorum nominum usus ad amplifi- candum.	139
Adjunctio, figura.	56
Adjuncta.	202
Adolescentis laus.	74
Adolescentium Virtus. 192. Et præclara in Scholis Indoles.	203
Adolescentes mali morati.	104
Adolescentiæ Vituperatio.	217
Agni, & Lupi fabula.	237
Alatissimi essemus, quid sequeretur.	199
Allegoria. 51. 58. S. Ambrosii laus.	313
Amor omnia vincit.	326
Amplificatio.	à 126. ad 202
Animus pulcher in pulcro corpore.	184
Animalia parva placent.	341
Antitbesis.	60
Antonomasia.	50
Apes prædabunda.	51
Apostrophe.	61
Aranea, & Bombyx.	246
Argumentatio.	23
Argumenti inventio.	133
Aristotelis laus.	305

Ars

<i>Ars quid sit.</i>	I
<i>Assentatio ludific.</i>	203
<i>Audaces fortuna juvat.</i> 329. S. Augustini laus.	314

## B

<b>B</b> <i>Arba laus.</i>	179
<i>Beatitas in virtute sita.</i>	187
<i>Belli mala.</i> 196. S. Bernardi laus.	313
<i>Boetii laus.</i>	309
<i>Bombyx, &amp; Aranea.</i>	246

## C

<b>C</b> <i>Æsar's laus.</i>	307
<i>Cain interrogatus.</i>	89
<i>Calvini elogium.</i>	180
<i>Castitatis laus.</i>	12
<i>Castus adolescens.</i>	73
<i>Casus nominum, ad amplificationes.</i>	170
<i>Catelli descriptio.</i>	394
<i>Causarum genera.</i>	6
<i>Cbria.</i>	296
<i>Ciceronis laus.</i>	303
<i>Cominoratio, figura.</i>	79
<i>Communicatio, figura.</i>	67
<i>Catacbresis.</i> 51. <i>Comparatio pueritiæ cum</i> <i>Adolescentia.</i> 192. <i>Præceptorum utriusque</i> <i>220 Grammaticæ, &amp; Philosophiæ.</i> 222	17
<i>Comparatio quotuplex.</i>	53
<i>Complexio, figura.</i>	69
<i>Concessio</i>	355
<i>Concordiæ bonum.</i>	Condi-



<i>Conditionum æqualitatem, consequentia .</i>	198
<i>Conduplicatio, figura .</i>	54
<i>Confirmatio pars orationis .</i>	21
<i>Consequentia .</i>	198
<i>Consul, quid sit .</i>	181
<i>Contraria .</i>	14. 206
<i>Conversio .</i>	53
<i>Correctio .</i>	70
<i>Corvi Fabula .</i>	243
<i>¶ Curtii laus .</i>	308

## D

<b>D</b> <i>Definitiones conglobata .</i>	177
<i>Deformitas form .</i>	285
<i>Descriptio pigri .</i>	390
<i>Dilemma .</i>	27
<i>Discordie mala .</i>	372
<i>Disjunctio .</i>	56
<i>Doctrinae laus ,</i>	129
<i>Dubitatio .</i>	74

## E

<b>E</b> <i>Brius in feretro .</i>	271
<i>Educationis vis .</i>	41
<i>Effectus .</i>	16. 189
<i>Eloquentiæ partes . 7. laus .</i>	177
<i>Entbymema .</i>	24
<i>Epipbonema .</i>	26
<i>Ethopæia .</i>	389
<i>Exclamatio .</i>	76
<i>Exemplum, argumentatio .</i>	24. 25
<i>Exordium .</i>	19
<i>Expolitio .</i>	79
<i>Fabula .</i>	

## F

<b>F</b> <i>Abula.</i>	224
<i>Felix descriptio.</i>	395
<i>Filia, quæ Patrem lacte aluit.</i>	161
<i>Figura oratoria.</i>	à 48. ad 124
<i>Filii nostri facta nostra.</i>	87
<i>Femina iracundæ facinus.</i>	121

## G

<b>G</b> <i>Eograpbiæ laus.</i>	118
<i>Gloriæ ac laudis amor.</i>	184. 185. 215
<i>Gradatio.</i>	54. 82

## H

<b>H</b> <i>Elenæ raptus.</i>	256
<i>S. Hieronymi laus.</i>	312
<i>Honori omnes serviunt.</i>	184
<i>Hyperbaton.</i>	51
<i>Hyperbole.</i>	ibid.
<i>Hypothesis.</i>	4

## I

<b>I</b> <i>Esus infans.</i>	60
<i>Ignavus Imperator.</i>	121
<i>Ignorantiæ Vituperatio.</i>	130
<i>Immortalitas à literis.</i>	70. à Gloria & laude.
	205. 214
<i>Imprecatio.</i>	86
<i>Indocti contempti.</i>	36
<i>Inductio.</i>	24
<i>Interpretatio.</i>	86
<i>Interrogatio.</i>	88

Invi-

<i>Invidia pictura .</i>	180
<i>Ioseph fratres deprecans .</i>	72
<i>Ironia .</i>	90
<i>Isocolon .</i>	57

## L

<b>L</b> <i>Aus Eloquentiae .</i>	117
<i>Laudem omnes ambiunt .</i>	211
<i>Laus fugientes sequitur .</i>	212
<i>Licentia .</i>	97
<i>Lingua nihil pejus .</i>	378
<i>Nihil melius .</i>	376
<i>Literae praestant immortalitatem .</i>	80
<i>Loci Oratorii .</i>	6. 134
<i>Lugdunensis felicitas .</i>	44
<i>Lugdunenses colles , &amp; fluvii .</i>	66
<i>Luxus fons malorum omnium .</i>	41
<i>Luxus divitum .</i>	100

## M

<b>M</b> <i>Atres miserae .</i>	292
<i>Metalepsis .</i>	51
<i>Metaphora .</i>	50
<i>Metonymia .</i>	ibid.
<i>Modestiae laus .</i>	170. 178
<i>Mundi contemptus .</i>	191

## N

<b>N</b> <i>Arratio . à 224. ad 227. &amp; à 230. ad 267</i>	
<i>Nominum usus ad amplificationem .</i>	
135	
<i>Nuptiae infelices .</i>	207
<i>Nuptiae flagitiosae .</i>	292
Occu.	

<b>O</b> ccupatio, figura.	101
Onomatopœja.	50
Orator, & Rhetor in quo differant.	5
Otium malorum fons.	41

<b>P</b> aronomafia.	57
Parricida.	85
Partium enumeratio.	11. 184
Pauperum luctus.	81
Peccati gravitas.	42
Periodus.	à 29. ad. 47
Peroratio.	27
Phœrontis Fabula.	252
Pigri descriptio.	390
Plausus tantùm in morte dandus.	375
Pœnitentia apostrophe ad oculos, &c.	64
Polysyntheton.	55
Præceptores puerorum, & adolescentium, viri feliciores.	222
Præteritio.	99
Principes nunquam soli peccant.	367
Prosopopœia.	105
Pueritiæ laus.	217
Puerorum mala indoles.	202
Pulcher animus.	184
Pulchritudinis laus. 178. 184. 188. ejus fallacia. 207. potentia. 208. ejus rara concordia cum pudore.	362
Pyramus.	264

Ratio.

## R

<b>R</b> <i>Atiocinatio.</i>	23
<i>Religiosa vitæ ratio, &amp; triumphus.</i>	172.
<i>in ejus Vituperatores.</i>	93
<i>Rempub. conservare.</i>	129
<i>Repetitio.</i>	52
<i>Reticentia.</i>	112
<i>Rhetorica quid sit I. &amp;c.</i>	
<i>Romanus populus, quid sit.</i>	182

## S

<b>S</b> <i>Alomonis Regis laus.</i>	338
<i>Senecæ laus.</i>	306
<i>Senex deformis.</i>	186
<i>Sententia.</i>	402
<i>Sermocinatio.</i>	112
<i>S. Simeon Stylita.</i>	82
<i>Similiter cadens, &amp; desinens.</i>	57
<i>Solis occasum consequentia.</i>	197
<i>Sorites.</i>	26
<i>Status questionis.</i>	21
<i>Stulti innumeri.</i>	338
<i>Subjectio.</i>	115
<i>Supellex humani luxus.</i>	62
<i>Susanna.</i>	76. 77
<i>Sustentatio.</i>	119
<i>Synecdoche.</i>	50. 57
<i>Synonymia.</i>	55

## T

<b>T</b> <i>Antali Fabula.</i>	250
<i>Faciti laus.</i>	315
<i>Tem-</i>	

<i>Tempora verborum, ad amplificandum.</i>	176
<i>Thesis quid sit, &amp;c.</i>	390
<i>Timor Dei, initium Sapientiae.</i>	42
<i>Transductio.</i>	54
<i>Transitio.</i>	123
<i>Tropi.</i>	49

V

<b>U</b> <i>Bera B. Virginis.</i>	63
<i>Venti compell.</i>	63
<i>Virgilii laus.</i>	304
<i>Virginis pius dolus.</i>	277
<i>Virgines se deformantes.</i>	285
<i>Virginitatis laus.</i>	144
<i>Virtutis laus.</i>	79. 177. 184. & seq. 313
<i>Virtute praeclatus.</i>	73
<i>Virtuti invia nulla via.</i>	358
<i>Vitis effecta.</i>	190
<i>Vitia sine magistro discuntur.</i>	360
<i>Viriosus.</i>	100
<i>Vituperatio Adolescentis.</i>	330. Ignorantiae.
130	
<i>Voluptas esca malorum.</i>	390
<i>Uxor dives quaeritur.</i>	80

ELEMENTA  
RHETORICÆ

CAPUT

*De Rhetoricæ natura.*

BIBLIOTECAM  
ROMANAM  
VITTORIO EMANUELE



Quid est Rhetorica?

R. Est Ars benè dicendi. Sic appellata, à verbo *benè dico*, loquor, ex quo *benè* vocabulum, & *benè dictum*, sententia: unde *benè* Rhetor, Orator, Causidicus, & *benè* dicere Rhetorica, seu Ars Oratoria.

Quid est Ars?

R. Facultas est, quæ certis quibusdam præceptis continetur, in unum finem spectantibus, quæ si optimè cognita, penitusque perspecta fuerint, nunquam fallunt.

Undenam orta est Ars?

R. Ex animæ versione Naturæ, seu Eloquentiæ naturalis. Cum enim alii temerè, alii callidiùs dicant: potuerunt notari ea quæ meliora sunt, ex quibus Ars fieri potuit.

Quid est, benè dicere?

R. Est, optimis sententiis, verbisque lætissimis dicere, quod qui facit, implet Oratoris officium.

Quod est officium Oratoris?

A

R. Est

R. Est appositè dicere ad persuadendum.  
 Quis est finis Oratoris?

R. Est reipsa persuadere dictione.

Qui non reipsa persuadet dicendo; potestne perfectus Orator dici?

R. Etiam, modò ea proferat, quæ ad persuadendum idonea sunt.

Etenim, mihi non videtur ille perfectus Artifex, qui finem suum non assequitur; atqui Orator ille qui non persuadet dictione, finem non assequitur suum; quis igitur perfectus esse potest, etsi appositè dicat ad persuadendum?

R. In aliis artibus verum id quidem est, quod dicis: at in arte Rhetoricæ, non item.

Affer discrimen.

R. Discrimen est, quòd finis aliarum artium sit opus quodpiam externum, ab artificis voluntate pendens: sic pendet à sola voluntate Pictoris ut imago fiat, & ab Architecti arbitrio: ut domus extruatur, & ita de aliis. At verò, quia finis Oratoris non pendet solùm à voluntate dicentis, sed etiam à voluntate audientis, qui persuadendus est; nulla unquam ratione, persuaderi ab illo ille poterit, nisi velit, quia natura liber est, & nemo, præter Deum, (qui propterea solus Orator dici potest, usquequaque perfectissimus) ipsius libertati vim afferre valet.



C A P U T I I.

*De Rhetoricæ Materia.*

**Q**uibus de rebus, ex Officio tenetur Orator dicere?

R. Illis de rebus, quæ sunt materia suæ artis?

Quæ est Materia cujusque artis?

R. Ea est, circa quam versatur Ars; v.gr. Medicinæ Materia, sunt *morbi*; Picturæ Materia sunt *colores*, & sic de aliis, quia circa ea versantur, & occupantur artes illæ.

Materia verò Rhetoricæ Artis, quænam est?

R. Res illæ sunt, quæ in disputationem cadere possunt.

Quæ sunt illæ res?

R. Omnia prorsus, quæ in mundo sunt: quia nihil omnino est, de quo disputare Orator non possit.

Debet igitur scire Orator, naturam & virtutes, qualitatesque rerum omnium, ut de singulis differere queat?

R. Ita est, indeque colliges, artem oratoriam, omnium esse præstantissimam, & qui in ea excellant, per paucos esse: callere enim debet Orator cæteras artes liberales, ac scientias, ut satisfacere valeat quæstionibus, quæ de illarum unaquaque fieri possunt.

## CAPUT III.

De quæſtionibus ad Rhetoricæ Materiam  
pertinentibus.

**Q**uotuplex Quæſtio fieri poteſt de una-  
quaque re?

R. Duplex. Alia eſt infinita, quæ *Theſis*.  
Græcè, & *Propoſitum* Latine dicitur; alia  
finita; quæ Græcè *Hypotheſis*. Latine *Cau-  
ſa*, & *Controverſia* nominatur.

Quid vocas Quæſtionem infinitam, ſeu  
Theſin?

R. Quæ nullis finita, & adſtrieta eſt Ad-  
junctis, ſeu Circumſtantiis; quales ſunt, per-  
ſona, locus, tempus, &c.

Quid vocas Quæſtionem finitam, ſeu Hy-  
potheſin?

R. Quæ aliquâ Circumſtantiâ definitur,  
ac terminatur.

Da utriuſque Exemplum.

R. Si quærat; *Sitne addiſcenda Rhetorica ars*. Quæſtio illa infinita eſt; quia ge-  
neratim id quæritur, nullius mentione fa-  
cta perſonæ, vel loci, vel temporis. At ſi  
quæram. *Sitne feminis addiſcenda Rhetorica*: Vel, *Sitne addiſcenda ante, an poſt Phi-  
loſophiam*: Vel, *Sitne addiſcenda, in Aca-  
demiis, an in privatis adibus*. Tales Quæ-  
ſtiones finitæ ſunt, quia Adjuncta hujus-  
modi, infinitam illam, & Generalem Quæ-  
ſtionem circumscribunt, & Theſin revo-  
cant

cant ad Hypothesin. Hoc est; quod Generale est, cōtrahūt ad id quod est Particulare.

Quomodo Hypothesis revocatur ad The-  
sin?

R. Sumendo id, quod Generale est, v.gr. Si laudaturus Diligentiam, excusam in laudem Virtutis, quæ Diligentiae genus est: Si vituperaturus Ebrietatem, de Vitii sceditate disputem.

Quæstiones omnes, suntne ejusdem rationis?

R. Nequaquam. Alia enim dicitur *Actionis*: cujus finis est, *Agere*. Ut; *Sine bellum hereticis indicendum*. Alia *cognitionis*; cujus finis est, scire tantum, & cognoscere aliquid. Ut; *Cujusnam mensis die luna deficiet hoc anno*. Hoc enim cum investigat Rhetor, seu Orator, id solum agit, ut hoc intelligat.

Cur dicis *Rhetor*, seu *Orator*? Duo illa, idem ne sunt?

R. Passim pro eodem usurpantur, tamen si mutant.

In quo differunt?

R. In eo, quod *Rhetor* dicatur ille, qui artem oratoriam docet. *Orator* verò sit, qui in judiciis, & concionibus causam agit. *Declamator* verò, qui aut docendi alios, aut exercendi se gratia, fictam causam agit, ut in veris postea causis sit exercitatio. Unde causæ hujusmodi fictæ ac ludicræ, vulgò *Declamationes*, dicuntur.

## C A P U T IV.

## De Triplici Causarum genere.

**Q**uot sunt causarum genera, in quibus  
versari Orator potest?

R. Tria hæc: Judiciale, Deliberativum,  
& Exornativum, seu Demonstrativum;  
Græcè Epidicticum.

In quas partes dividitur *Judiciale Ge-  
nus*?

R. In duas; Accusationem scilicet, &  
Defensionem.

Quas habet partes; *Deliberativum*?

R. Duas; Suasionem, & Dissuasionem.

Quæ sunt partes *Demonstrativi* generis?

R. Duæ: Laus, & Vituperatio.

Quale tempus respicit *Judiciale Genus*?

R. *Protoricum* tempus: nemo enim ac-  
cusari, vel defendi potest; nisi ob rem, quæ  
jam gesta est.

Quale tempus spectat *Deliberativum*?

R. Futurum, neque enim delibera-  
mus nisi de futuris.

Quale verò *Demonstrativum*?

R. Non præsens modò, sed Præteritum.  
Laudari siquidem, aut vituperari quis po-  
test vei ob ea, quæ gessit jam, vel quæ gerit.

Quem ob finem accusatur aliquis?

R. Ut puniatur.

Quam ob causam defenditur?

R. Ut nullam subeat poena m.

Quam

Quem finem spectat, qui suadet?

R. Utilitatem aliquam, ab ea re, quam suadet, emanaturam.

Quid intendit animo, qui dissuadet?

R. Ut detrimentum evitetur.

Quare vituperatio fit?

R. Ut vitii turpitudine abhorreatur.

Quare laudatio instituitur?

R. Ut virtutis honestas ametur.

C A P U T V.

*De Partibus Eloquentiæ .*

**Q**Uæ sunt Eloquentiæ Partes, seu (quod idem est.) Quot sunt munera Oratori propria?

R. Quinque sunt. Inventio, Dispositio, Elocutio, Memoria, Pronunciatio.

Quid est Inventio?

R. Est excogitatio rerum verarum, aut verisimilium, quibus probabile reddatur, quod probare contendit Orator.

Quid est Dispositio?

R. Est, rerum inventarum in ordinem distributio.

Quid est Elocutio?

R. Est, idoneorum verborum ad res inventas accommodatio.

Quid est Memoria?

R. Est, rerum inventarum, ac verborum firma recordatio.

Quid est Pronunciatio?

A 4

R. Est,

R. Est, corporis, & vocis ea moderatio, quam res inventæ, ac verba requirunt.

Quibus rebus comparantur, quinque illæ Partes Eloquentiæ?

R. Quatuor his rebus: Natura, Arte, Exercitatione, Imitatione.

Quid exigit Natura ad Eloquentiam?

R. Multa, tam ex parte animi, quam corporis.

Quid requirit ex parte animi?

R. Celeres motus ad inveniendum, exornandum, & recordandum aptissimos.

Quid ex parte corporis postulat?

R. Latera firma, canoram vocem, solutam linguam, oris & totius corporis conformationem.

Quid Ars ad Eloquentiam confert?

R. Perficit ea, quæ sunt à Natura.

Quomodo perficit?

R. Primò, dum monet, quò omnia sint referenda, quæ ad finem nobis propositum spectant. Secundò, Dum indicat, an recta sint, quæ habentur à Natura, & Studio. Tertiò, Efficit, ne fortuitò dicamus, & ut semper parati simus.

Quid efficit Exercitatio?

R. Ea perficit, & conservat, quæ Ars expolivit in Natura.

Quis Exercitationis modus est?

R. Iste. Primò sumi debet causa tractanda similis earum, quæ ad Oratorem deferuntur: Secundò non dicatur ex tempore, sed

sed sumatur spatium ad cogitandum, ut accuratius dicatur.

Quæ imitationis utilitas, & ratio est?

R. Utilitas est maxima quia sine ea, nemo satis proficere potest. Ratio verò Imitandi, hæc est. Proponatur aliquis summus in arte imitandus, quem tota mente intueamur. Deinde, quæ in eo summa erant, diligenter conemur exprimere.

## C A P U T VI.

*De inventione seu de Locis Oratoriis.*

Quid est locus Oratorius?

R. Argumentorum sedes, seu nota, qua indicatur, quid in rebus peruestigare debeat Orator.

Quid est argumentum?

R. Est probabile inventum ad faciendam fidem.

Quid est Fides?

R. Firma animi, iis quæ dicuntur, credentis opinio.

Quid est opinio?

R. Est imbecillis assensio: Tam fides autem, quam opinio, Argumentatione gi- gnuntur.

Quid est Argumentatio?

R. Est Explicatio, & dilatatio argu- menti.

Quotuplicis generis argumenta sunt?

R. Duplicis. Alia *Infita*, seu *Intrinsa-*

*ca* ; Alia *Remota* seu *Extrinfeca* , quæ etiam, *Assumpta* dicuntur, & *sine arte* , non quodd sine arte tractentur ; sed quodd ea non parit Oratoris ars , & quodd foris afferantur.

Quid vocas Argumenta Intrinfeca?

R. Ea , quæ petuntur à loco qui est in re, qui propterea Intrinfecus dicitur.

Quid sunt Extrinfeca seu Remota Argumenta?

R. Ea, quæ petuntur à loco, qui est extra rem, qui idcirco Extrinfecus appellatur.

Quot sunt Loci Intrinfeci?

R. Sexdecim. *Definitio* , *Enumeratio* partium , *Notatio* , *Conjugata* , *Genus* , *Forma* , *Similitudo* , *Dissimilitudo* , *Contraria* , *Adjuncta* , *Antecedentia* , *Consequentia* , *Repugnantia* , *Causæ* , *Effecta* , *Comparatio* .

Quot sunt Loci Extrinfeci?

R. Sex. *Præjudicia* , *Fama* , *Tabulæ* , *Jusjurandum* , *Tormenta* , *Testes* .

## C A P U T VII.

*De locis intrinfecis. Definitio.*

Quid est Definitio?

R. Est Oratio, quæ naturam illius rei, quæ definitur, explicat.

Quot partes habet Definitio?

R. Duas ; *Genus* , & *Differentiam* .

Genus



Genus est aliquid commune, non tantum ipsi rei, quæ definitur, sed etiam multis aliis. Differentia, est aliquid particulare, quod soli rei, quæ definitur convenit.

Da Exemplum.

R. Rhetorica est Ars bene dicendi. *Rhetorica*, res est quæ definitur, *Ars*, est illius Definitionis Genus, quia non tantum Rhetoricæ, sed etiam Grammaticæ, Picturæ, aliisque Artibus convenit. *Bene dicendi*, est Differentia; quia, bene dicere, proprium est solius Rhetoricæ.

Proba à Definitione, Rhetoricam esse artium præclarissimam.

R. *Ars Bene dicendi*, est artium præstantissima; Atque *Rhetorica* est *Ars bene dicendi*: Est igitur omnium præstantissima.

Enumeratio partium.

Quid est Enumeratio?

R. Est oratio, qua aliquod genus, seu totum in suas partes distribuitur.

Proba ab hoc loco, Regnum Galliæ frui summa pace.

R. *Nulla* hujus Regni provincia est, *nulla* civitas, *nullum* oppidum, *et* pagus est, ubi non tranquillissima pace Galli potiuntur; Igitur Regnum universum, placidissima pace fruitur.

Notatio, & conjugata.

Quid est notatio?

R. Notatio, seu Ethymologia, locus est, qui verborum originem, & significa-

tionem inquit.

Proba, ex hoc loco, Ciceronem verum fuisse Consulem.

R. Ille verus est Consul, qui salutem patriæ consulit: Atqui Cicero consuluit salutem patriæ, igitur verus fuit Consul.

Quid sunt Conjugata?

R. Ea, quæ ab uno orta vocabulo, variè commutantur. Ut, *Pudicitia*, à qua *Pudor*, *pudicus*, *pudicè*, *pudere*, oriuntur.

Fac argumentum à Conjugatis.

R. Christi vitam non imitaris; non igitur es Christianus. Cæterum hi duo loci, sunt omnium sterilissimi.

*Genus, & Forma.*

Quid est Genus?

R. Est quoddam Totum plures continens partes, communione quadam sibi similes, specie tamen differentes. Ut, *Virtus*, Genus est, quia complectitur *Prudentiam*, *Iustitiam*, *Fortitudinem*, *Temperantiam*, quæ sunt ejus partes, inter se quidem similes, quod earum quælibet, virtus sit, differentes tamen, quia earum natura diversa est.

F. c. argumentum.

R. *Virtutem* colit, ergo & *Temperantiam*. *Virtutis* est inimicus, ergo non est *Prudens*. *Amat Gallos*; ergo & *Lugdunenses*.

Quid est forma, seu species?

R. Est pars Generi subjecta. Argumentum

tum ita ducitur. Inest in hoc adolescente Castitas, ergo & virtus; atque ita de aliis.

*Similitudo. & Dissimilitudo.*

Quid est Similitudo?

R. Est Oratio, quæ traducit rem quampiam, ad aliud, ex re dispari, simile.  
(Cap. 2. Pb. n. 5.)

Da exemplum, & Argumentum?

R. 1. Ut quidam morbo aliquo affecti suavitatem cibi non sentiunt, sic facinorosi homines vera laudis gustum non habent.

2. Ut pulchritudo corporis, apta compositione membrorum, movet oculos, & delectat, hac ipso, quod inter se omnes partes; cum quodam lepore consentiunt; sic eorum quod elucet in vita, inopes approbationem eorum, quibuscum vivitur, ordine & constantia, & moderatione dictorum omnium atque factorum. (Cic. de off. 1.)

3. Beneficiis aliqui utuntur ceu Floribus tamdiu gratis quandiu recentibus. (Strab. de bello Belg.)

Quid est Dissimilitudo?

R. Est, quæ ex re aliqua, Dissimile Colligit.

Da exemplum, & Argumentum.

R. Tot incommoda scelerati perferunt, ut male agant; Tu nihil tolerare vis, ut sanctè vivas. Illi multa sæpe patiuntur; æternum ut sint miseri; Tu, æternum ut sis beatus, nihil patiere.

*Contraria, seu Opposita.*

Quot sunt, Contrariorum; seu Oppositorum genera?

R. Quatuor. 1. Adversa, quæ inter se maximè distant; ut, *Virtus*, & *Vitium*; 2. Privantia, quæ sunt, *Habitus*, & ejus *Privatio*; ut, *Vita*, & *Mors*. 3. Relata, quæ inter se conferuntur; ut *Dux*, & *Miles*; 4. Negantia, quorum unum negat aliud, ut, *Pius*, & *Impius*.

Quomodo argumenta fiunt à singulis?

R. Hoc modo. 1. Ab Adversis: *Vitium est foedissimum, igitur, Virtus est Pulcherrima*. 2. A Privantibus: *Mortem timet; ergo amat Vitam*. 3. A Relatis: *Dux adit pericula; igitur, & Miles adire debet*. 4. A negantibus: *Modestus est? cur illum ergo dicit Immodestum?*

*Adjuncta seu Res Circumstantes?*

Quid sunt Adjuncta?

R. Ea, quæ cum re conjuncta sunt.

Quot sunt Adjunctorum genera?

R. Tria. 1. Adjuncta rei gestæ, *Locus*, *Tempus*, *Vestitus*, *Comitatus*. 2. Adjuncta animi, *Vitia*, & *Virtutes*. 3. Adjuncta corporis; *Pulchritudo*, *Deformitas*, *Robur*, &c.

Fac Argumentum ab Adjunctis?

R. 1. *Vesperis visus est cum gladio in loco ubi cades facta est; Ergo cedis illius auctor. est.*  
2. *Est incredibili virtute præditus; non ergo foedus*

*scelus violavit. 3. Formosus est puer: Igitur amatur à multis.*

*Antecedentia, Consequentia, Repugnancia.*

Quid sunt Antecedentia?

R. Sunt ea, quæ necessariò cohærent cum consequentibus: in quo differunt ab Adjunctis, quæ cum illis non necessariò conjuncta sunt.

Affer argumentum?

R. *Ortus est Sol, ergo Dies est.* Sol enim necessariò Diem antecedit.

Quid sunt Consequentia?

R. Ea, quæ rem necessariò consequuntur.

Da argumentum.

R. *Cicatricem habet; Ergo olim accepit plagam.* Cicatrix enim necessariò consequitur plagam.

Quid sunt repugnancia?

R. Sunt ea, quæ nec certa lege, nec numero inter se diffident; in quo, à Contrariis, & Dissimilibus discernuntur.

Da exemplum.

R. *Amat illum, igitur non ei nocuit; non illum læsit, convitiis non infectatus est.* Repugnat enim, ut qui amat aliquem, ei noceat, illum lædat, &c.

*Causa.*

Quid est causa?

R. Est quæ suavi efficit id, cujus est causa: Ut *Vulnus, causa est Mortis*, quia vi sua

sua mortem parit. *Ignis*, causa ardoris est; quia vi sua generat ardorem.

Quot sunt causarum genera?

R. Quatuor. *Finis*, *Efficiens*, *Forma*, *Materia*.

Quid est *Finis*, seu *Causa Finalis*?

R. Ea est, cujus gratia fit aliquid. Ut *Finis* hominis est beata vita.

Fac argumentum?

R. *Homo natus est ad contemplantum, & intelligendum; non igitur ad passum, & voluptatem ortus est.*

Quid est *efficiens*?

R. Est id, à quo aliquid est. Ut, *Sol*, est causa *Diei*; qui illum efficit, toto cœlo luce diffusa.

Fac argumentum?

R. *Senectus caret epulis; Ergo, & vinolentia.* Nam vinolentiam efficiunt pocula frequentia.

Quid est *Forma*?

R. Est ratio rei; & nota, per quam res est id, quod est, & à rebus aliis distinguitur. (*Arist. 2. Phys. 3.*) Ut *Animus* est *Hominis forma*: Est enim causa cur *Homo* sit; eumque à rebus aliis distinguit.

Ducabilla argumentum?

R. *Animus hominis est immortalis; debet igitur ad immortalitatem eternitatemque vite aspirare.*

Quid est *Materia*?

R. Est, ex qua, & in qua, res sunt.

Ut marmor, statuæ; Corpus, hominis materia est.

Fac argumentum?

R. Corpus hominis mortale est, ab ejus igitur societate, & contagione, immortalis Animus advocandus est.

Effecta, Comparatio.

Quid sunt Effecta?

R. Sunt ea, quæ orta sunt de causis. Ut Dies est Effectus Solis.

Quot sunt Effectuum genera?

R. Totidem, quot Causarum; singulis enim Causis sua respondent Effecta.

Sume ab Effectis Argumentum?

R. Virtus parit laudem, igitur sequenda est, Voluptas infamiam gignit; ergo fugienda.

Quid est Comparatio?

R. Est, cum duo vel plura, in aliquo quod sit eis commune, comparantur (Roddul. Agr l. c 25.) Ut. Illustriorem quandoque palma meretur fuga quam pugna. Fuga & Pugna comparantur, in Palma, quæ utrique aliquando communis est.

Quotuplex institui potest comparatio?

R. Triplex, 1. A majori, ad minus, 2. A minori, ad majus, 3. A pari.

Quomodo ducitur Argumentum, A Majori?

R. Quando adhibetur in comparatione, hæc particula, multò minus. Ut, si quinque legiones hostilem exercitum vincere non poterunt;

*uerunt*; multò minus *duæ potuerunt*. Major quippe difficultas est quinque, quàm duas legiones vincere.

Quomodo Argumentum fit *A minori*?

R. Quoties adjungitur hæc particula: *Multò magis*. Ut, *Verbera patienter tulit*; multò magis *verba & convicia perferet*. Minus enim est verba ferre, quàm verbera.

Quomodo sumetur *A pari*?

R. Cum hæc particula, *Pariter*, vel exprimitur in comparatione, vel suppressa intelligitur. Ut *Beati omnes laborum tolerantia æterna sibi gloriam pepererunt iisdem nos pariter, ad tantum honoris fastigium, gradibus oportet conscendere*.

## C A P U T VIII.

### De locis Extrinsecis.

Quid est *Præjudicium*?

R. Est id, quod cum statutum fuerit asserti iudicaturis exemplum, quod sequantur.

Quomodo fit argumentum à *Præjudiciis*?

R. Si ostendat Orator id quod contendit, fieri debere; vel quia in similibus causis, aut rebus ad eandem causam pertinentibus, similia iudicia jam lata sunt, vel quia illud ipsum iudicium, quod ferri poscit, jam est ab iisdem, aut ab aliis Iudicibus



us pronunciatum.  
 Quomodo fit argumentum à *Fama*?  
 Ostendendo id quod in quæstionem  
 tur, ex Communi hominum Sermo-

rum esse.  
 Quomodo à *Tabulis*?  
 Si demonstretur, id, de quo agitur,  
 ablicis Tabulas relatum esse, adeoque  
 indubitato haberi debere.

Quomodo à *Jure Jurando*?  
 Si ostenderimus, illud idem cujus-  
 Juramento esse confirmatum.

Quomodo à *Tormentis*?  
 Demonstrando, vi Tormentorum  
 essam esse confessionem, vel à reo,  
 à consciis illius rei, quæ probanda

Quomodo à *Testibus*.  
 Si id ipsum, cujuspiam Testimonio  
 firmari docuerimus.

## C A P U T IX.

*Compositione, seu de Partibus Orationis.*

Ac primum de Exordio.

Uot sunt partes Orationis?  
 R. Quatuor. Exordium, Narratio,  
 firmatio, & Peroratio. Additur ali-  
 do quinta pars, Confutatio; sed hæc ad  
 firmationem spectat, & cum illa sem-  
 conjuncta est.

Quid

Quid est Exordium?

R. Est pars Orationis, animam auditoris idoneè comparans ad reliquam dictionem.

Quomodo comparatur animus auditoris?

R. Tribus modis, scilicet ut reddatur benevolus, attentus, & docilis.

Quomodo reddi poterit Benevolus?

R. Reddetur benevolus, 1. Si virtutes ipsius commemoventur. 2. Si Orator de se demisè, ac modeste loquatur. 3. Si Adversariis confitemur invidiam.

Quomodo reddetur Attentus?

R. Si nos esse dicturos promitemus, de rebus magnis, necessariis, & utilibus.

Quomodo fiet Docilis?

R. Si qua de re sumus dicturi, ostendamus.

Qualia esse debent Exordia?

R. 1. Accurata, & acuta. 2. Instruata sententiis, & apta verbis. 3. Sint ipsi rei, de qua agitur, convenientia. Ex his causæ locis peti debent, qui valeant ad levitè alliciendum, & incitandum auditorem.

Quæ sunt vitiosa Exordia?

R. Ista 1. Vulgare quod in plures causas potest accommodari. 2. Commune, quod in contrariam partem causæ potest convenire. 3. Commutabile, quod potest ab Adversario, leviter mutatum, ex contraria parte duci. 4. Longum, quod pluribus verbis, ultra quam satis est, producit. 5. Separatum,

ratur, quod tamquam membrum, ipsi causæ non est connexum. 6. Translatum, quod aliud conficit, quam causæ genus postulat. 7. Contra præcepta, in quo Exordiorum præcepta non servantur.

De narratione, dicetur suo loco fusiùs Progymnasmate 4.

## C A P U T X.

### De Confirmatione.

**Q**uid est Confirmatio?

R. Est pars Orationis, in qua firmamenta causæ afferuntur.

Quot habet partes?

R. Duas. Prima est, quæ propriè *Confirmatio* dicitur, in qua, ea, quæ pro nobis sunt, firmamus, ac stabilimus. Secunda est quæ *Confutatio*, seu *Reprehensio* vocatur; in qua, ea quæ contra nos sunt, refellimus & confutamus; utrumque autem commode fieri potest, cum causæ institutio, seu Status cognoscitur.


Quid est Status?

R. Est Quæstio, quæ ex primâ causarum conflictione nascitur.

Da exemplum.

R. Si Accusator dicat, *Milo insidias fecit* Defensor contrà, *Milo insidias non fecit*. Ex illa conflictione oritur hæc quæstio *An Milo insidias fecerit*. Atque hæc quæstio dicitur *Status*, quia in eo tota causa stat.

& si



& sistit; dicitur etiam *Judicatio*, quia in judicium venit.

Quod discrimen est, inter Statum, & Judicationem?

R. Quodd *Status* sit Quæstio illa jam dicta, nudè spectata, sine ratione & firmamento. *Judicatio* verò, sit eadem Quæstio, quando cum ratione, & firmamento conjuncta est; quia propriè, de Statu judicamus, cum ejus rationem, & firmamentum audivimus.

Quid est *Ratio*?

R. Quæ affertur à Defensore, ad depellendum crimen, quod in reum confertur.

R. Quid est *Firmamentum*?

Quod affertur ab Accusatore, ad probandum crimen.

Quotuplex est *Status*?

R. Triplex. Primus, An res sit. Ut, An *Catilina* conjuraverit. 2. Quid sit res. Ut, An *Cæsar* Tyrannus fuerit vel Rex. 3. Qualis sit. Ut, An *Clodius* cædes, & justa & honorata fuerit.

Quomodo tractandus est *Status*?

R. Per Argumenta ex locis petita, quæ ita in oratione collocanda sunt, ut firmissima in principio, mediocria in medio, excellentia in extremo loco ponantur.

Per quid, Argumenta in oratione collocantur.

R. Per Argumentationes.

C A P U T X I.

*De Argumentatione.*

**Q**uid est Argumentatio?

**R.** Est fusior argumenti artificiosa-  
que explicatio.

Quot sunt Argumentationis species?

**R.** Quatuor. Ratiocinatio, Inductio,  
Enthymema, Exemplum: quibus addi pos-  
sunt Epichierema, Sorites, & Dilemma.

Unde sumitur, quadruplex huiusmodi  
Argumentatio?

**R.** Ex locis Rhetoricis, sumendo res  
certas, aut probabiles, quæ valeant ad con-  
ficiendam aliquam Argumentationem.

Quænam res habentur pro Certis?

**R.** 1. Quæ corporis sensibus percipiun-  
tur. 2. Quæ communi omnium opinione  
comprobantur. 3. Quæ legibus causæ, &  
moribus receptæ sunt. 4. Quæ iam probatæ  
sunt, & ab adversariis concessæ.

Quænam res habentur Probabiles?

**R.** Eæ, quæ ferè semper accidunt; ut  
*Liberos à parentibus amari.* Et quæ speciem  
aliquam veritatis habent.

C A P U T X I I.

*De Argumentationis Speciebus.*

*Ratiocinatio.*

**Q**uid est Ratiocinatio?

**R.** Est Argumentatio perfectissima,  
suis

fuis omnibus constans partibus, certoque inter se ordine connexis. *Syllogismus*, alio nomine vocatur.

Quænam sunt ejus partes?

R. Tres præcipuæ. *Propositio*, *Assumptio*, *Complexio*.

Da exemplum.

*Omne vitium est fugiendum.* *Propositio*.

*Atqui, pigritia est vitium.* *Assumptio*.

*Igitur, Pigritia est fugienda.* *Complexio*.

Quod si *Propositioni* subjiciatur sua probatio, & suæ item *Assumptioni* adjungatur *Confirmatio*, erunt quinque partes, & ex *Tripartita*, fiet *Ratiocinatio Quinquepartita*.

Da exemplum.

R. *Omne vitium est fugiendum* *Propositio*

*Quia turpe, & perniciosum* *Propositionis*  
*est.* *Probatio.*

*Sed Pigritia vitium est.* *Assumptio.*

*Quia rationi adversatur, & Assumptionis.*  
*innumera damna creat.* *Probatio.*

*Igitur Pigritia fugienda est.* *Complexio.*

Estne semper servandus ordo ille *Propositionum*?

R. Non, sed eum, ad vitandam satietatem, variis modis mutare oportet; modò ab *Assumptione*, modò à *complexione*, ducendo initium.

*Enthymema.*

Quid est *Enthymema*?

R. Est pars *Ratiocinationis*, seu *Ratiocina-*

cinatio imperfecta.

Quomodo fit?

R. Tollendo unam ex primis propositionibus nimirum, vel Propositionem, vel Assumptionem.

Da Exemplum.

R. Ecce. *Pigritia est vitium.  
Igitur fugienda est.*

Vel hoc modo

*Omne vitium fugiendum est.  
Igitur Pigritia fugienda est.  
Inductio.*

Quid est Inductio?

R. Est Oratio, quæ ex multis rebus non dubiis, captat assensionem auditorum: Vel, Est Argumentatio, quæ ex pluribus collo-  
cationibus, pervenit quod vult.

Quot modis fit?

R. Duobus. 1. Enumeratione omnium partium, sub aliquo genere contentarum.

Da exemplum.

R. *Prudentia laudanda est, Justitia lau-  
danda est, itemque Fortitudo & Temperan-  
tia. Ergo, omnis virtus laudanda est.*

Quo alio fit modo?

R. Multis comparisonibus, per varias interrogationes, & responsiones.

Da exemplum.

R. En. *Quis optimus arborum fructus, ni-  
si qui suavissimus? Quod astrorum primum,  
nisi quod clarissimum? Quis Equus maximè  
insignis nisi qui velocissimus? Ita hominum*

B

genero-

generosissimus is erit non qui generis claritate sed, qui virtute maximè præstat.

Quid in Inductione hæc observandum?

R. Duo diligenter cavenda sunt. 1. Ut quæ sumuntur, certissima sint. 2. Ut id, cuius confirmandi causa, fit inductio, sit iis, quæ sumuntur, simile.

Exemplum.

Quid est exemplum?

R. Est Inductio Rhetorica, seu imperfecta, in qua ab uno simili argumentamur ad aliud.

Da exemplum?

R. Dr. *Horatius non fuit condemnatus quod sororem necaverit; Ergo nec Milo condemnandus, quod hominem occiderit.*

Quomodo differt à tribus aliis Argumentationum speciebus?

R. Differt à Ratiocinatione, & Enthymemate; quia in iis semper aliquid universale sumitur, aut concluditur; in Exemplo verò aliquid particulare. Differt etiam ab Inductione; quia inductio à pluribus similibus; Exemplum autem ab uno tantum simili procedit ad aliud.

*Epicherema, Sorites, Dilemma.*

Quid est Epicherema?

R. Est brevis Ratiocinatio, cuius omnes partes in unam conferuntur. Ut *Sine causa servus dominum accusat.* Quæ argumentatio, addendo alias partes, quæ subintelliguntur, ad Ratiocinationem reducitur.



tur. Partes autem subintellectæ in exemplo allato istæ sunt. *Non debet servus sine causa dominum accusare; iste hominis hujus servus est; Ergo, &c.*

Quid est Sorites?

R. Est Argumentatio quædam generalis, multas particulares acervatim convolvens, & amplectens. Unde Latine dictus est, *Acervalis*; Ut, *Quod est bonum, est expetendum, quod expetendum approbandum; quod approbandum, laudabile; ergo quod est bonum erit laudabile.*

Quid est Dilemma?

R. Est Ratiocinatio imperfecta, constans duabus partibus contrariis; quarum utramlibet concedat adversarius, reprehenditur. Ut, *Si implacabiles sunt iracundia, summa est acerbitas; si autem exorabiles, summa lenitas.*

## C A P U T XIII.

### De Peroratione.

Quid est Peroratio?

R. Est Orationis postrema pars: in qua Orator id, quod coram oratione contendebat, majori vehementia evincere, & obtinere nititur.

Quot præcipuas habet partes?

R. Duas, Amplificationem & Enumerationem.

Quomodo bene fit Amplificatio in Peroratione?

R. Primò. Si moveatur priùs ipse Orator, quàm alios moveat. 2. Si ea ritè observentur, quæ de Amplificatione infra dicemus.

Quomodo fiet Enumeratio?

R. Si, quæ fusè dicta sunt, eorum breviter repetitio fiat per capita, ne videatur altera oratio.

*Atque hæc de duabus prioribus Rhetoricæ partibus, Inventionem, & Dispositionem, dicta sufficiant ad rudem informationem Tyrorum. Quæ pertinent ad tertiam partem, quæ est Elocutio fusius explicabuntur deinceps: De duabus ultimis, Memoria & Pronunciatione, hoc unum habeo dicendum, quod non tam præcepta, quàm usum & exercitationem desiderant.*



# DE PERIODO

## C A P U T I

### *Natura Periodi.*

**Q**uid est Periodus?

R. Periodus Græcè, Latine Circuitus, seu Ambitus, & Comprehensio verborum, est oratio in quodam quasi orbe inclusa præcurrent, quoad insistat in singulis perfectis, absolutisque sententiis (Cic. Orat. 204.) *Vel* Periodus est Continuatio verborum, ac circumscriptio, in qua à primo membro sic suspensa fertur oratio, ut in ipso tantum fine conquiescat.

Quæ sunt Partes Periodi?

R. Hæ duæ, membrum, seu Colon Græcè, & Incisum; seu Cæsum, quod *Comma* Græci vocant.

Quid est membrum?

R. Est pars Periodi, perfectam quidem sententiam definiens, non ita tamen absolutum reddens sensum, ut auditor acquiescat, nec expectet subsequencia. Ut, *Si amico laboranti opem tulisses.*

Quid est incisum?

R. Est pars Membri imperfecta sensu. Ut, *In hac iniquitate rerum, in tanta per-*

*turbatione temporum.* Duo Incisa sunt, nullum reddentia sensum perfectum; quibus si tertium hoc incisum addas, *nemo est*, Membrum efficiens absolutum habens sensum; cui Membro si addas alterum illud; *quin ubi vis, quàm ibi ubi est esse malis*, Periodum habebis integram, quia sensus ita perfectus est, ut nihil præterea requiratur. Sed en tibi aliam periodum, non interruptam, ex duobus Membris compositam, singulis Membris tria incisa complectentibus.

1. *Quæ soli ubertas, & affluens rerum omnium copia, ad Capuam Pœnos emolliit,*

2. *Eandem, variis captos voluptatum illecebris, in Grecia Syriamque Romanos infregit.*

Quid est Periodicè dicere?

R. Est, Orationem ita membris distinguere, certisque quibusdam spatiis definire, ut conversiones habeat absolutas, & verborum numerosè cadentium concinnitate aures impleat audientium, animumque artificiosa sententiarum circumscriptione reficiat. Exemplo esse potest hæc mea Responsio; nam Periodicè tibi respondi. Contra; ille non Periodicè loquitur qui sic negligit orationem, ut dissoluta vagetur, ac fluat, saltuatimque ritu locustarum feratur extra numerum. Talis est sermo vulgi pervagatus, nullisque adstrictus numeris.

Quid est membratim dicere?

R. Est,

R. Est, orationem proferre singulis velut hærentem Membris, donec pleniùs absoluto sensu subsistat; Exempli causa.

*Hunc Principem Natura finxit ad regnum: Virtus ad pietatem erudit. Fortuna formavit ad Solium & Dignitas instruxit ad sceptrum.*

Quid est incisum dicere?

R. Est, crebris Incisis orationem distinguere. Ut si dicas: *Puerorum negotia non alia sunt, quàm nugari, garrere, ineptire, bucc, illuc vagari, lusu ætatem terere, cibo, potuque infarcire ventrem, aqualiculumque distendere.* Item, si virtutem Humilitatis laudaturus, hæc proferas.

*Germana: ac verè Christiana Humilitas modestiam amat; lætæbas aucupatur; acquiescit immodicus; ambit despici, abjectione gloriatur, proculcatione triumphat.*

Quæ sunt vitia Periodi?

R. Hæc præcipua: 1. Cum Periodus non satis est numerosa, & bellè fluens. 2. Cum, ut serviatur numero, inculcantur verba inania, & otiosa, quæ sint quasi harmoniæ subsidia, & complementa numerorum. 3. Cum eodem sæpiùs modo, artificioque oratio circumfertur: ut si frequentiùs iisdem sententia pedibus clauditur.

Quæ sunt Virtutes Periodi?

R. Virtutibus erit perfecta suis Periodus, si vitiis careat supra recensitis. Sed

audi Tullium. *Neque numerosa*, inquit, *esse debet Periodus*, ut *Poema*, ne de industria factum appareat, neque extra numerum, ut sermo vulgi. (Cic. Orat. 195.)

Quid orationi confert Periodus?

R. Ut suavius cadat ad aures, molliusque fluat in animum.

Quare suavior est, gratiorque oratio periodica dissoluta?

R. Ratio petitur ab ipsarum natura aurium; (quam rationem periodicè sic explico.) Utenim nihil in horto magis oculos retinet, quàm arbuscularum præclaro inter se ordine implicatarum confusa distinctio, quàm exactæ ad libellam ambulationes amœnissimæ, quàm suaveolentium pulvillorum descriptiones flexuosæ, quàm directi ad normam areolarum ordines, & collucentium ubique flosculorum ad viridantem regulam odorifera dispositio; Ita, nulla re magis aures nostræ, quàm numerosa, & ordinata dictione mulcentur.

## C A P U T I I.

### *Ars Periodi contexenda.*

Quomodo Periodus componenda est?

R. Ut respondeam tibi, ac satisfaciam; Observa prius, in Periodo spectari duo posse, *Numerum* scilicet, ac *Dilatationem*, de quibus seorsim agendum nunc est.

De

Quid est numerus in Periodo?

R. Est Richmus quidam, inquit Aristoteles ( *Lib. 3. c. 8.* ) non exquisitus ille quidem, neque canorus, qualis est in poematis, & canticis, sed ita dissimulatus, & latens, ut sentiatur tamen, & jucundo fine concludat.

In quo consistit ille Numerus?

R. In eo, ut verba omnia ita inter se apta, implexaque sint, ut quendam quasi concentum efficiant, datisque sibi velut manibus, Gratiarum in morem, circumducant chorum. Velut clarius loquar, Numerus iste pendet a certa quadam syllabarum quantitate, & idonea vocum collocatione, ac structura, commodaque verborum, & sententiarum dispositione, quæ cohærentem, leniterque fluentem reddat orationem, ut neque claudicet, neque fluctuet, sed æquabiliter, constanterque ingrediatur.

Quo pacto conciliabitur orationis Numerus?

R. Primò. Si Verborum commissura, & series, quod monui modò, ita cohæreat, ut nihil sit, quod offendant aures. Secundò. Si habeatur ratio pedum, quibus in choanda, sed maximè quibus terminanda Periodus est. Finitur autem venustè Periodus gravioribus, longioribusque verbis. Ut, *Ejus cadaver, infeliciſſimis lignis ſemiuſu.*

*missulatum nocturnis canibus dilaniandum  
 reliquisti* ( *Cic. pro Mil. 34.* ) *Quid dubi-  
 tas vitam supplicis creptam, fugæ solitudi-  
 nique mandare?* ( *In Catil.* ) *Miror te An-  
 toni quorum vitam imitare eorum exitum non  
 exhorrescere* ( *Phil. 2.* ) *Negat, Judicium  
 hominum in magistratibus mandandis, cor-  
 rumpti voluptatibus oportere* ( *pro Mur. 74.* )  
 Iisdemne pedibus, claudenda semper  
 Periodus?

R. Nequaquam: Effet enim vitium non  
 leve, ut supra docui, paribus ubique  
 spatiis, eodemque modo Periodum cir-  
 cumscribere. Verum ad Numerum illum  
 orationi accersendum plus exempla confe-  
 runt, quàm præcepta, & aurium judi-  
 cium potius adhibendum, quàm conside-  
 ratio mentis. Legendi proinde crebrò, &  
 attentè scriptores illi, qui hac orationis  
 laude præcelluere: ex hac enim lectione  
 id assequeris, ut Numerum istum periodi-  
 cum sensim animo imbibas, sentiasque,  
*orationem tuam, ut Tulli verbis utar, illo-  
 rum cantu quasi colorari.* ( *2. De Orat. 90.* )

#### De Dilatatione Periodica.

Quid est Dilatare?

R. Est, cùm aliquid pluribus verbis ex-  
 plicamus, quod paucioribus comprehendere  
 poterat.

Qua ratione periodicè dilatari aliquid  
 potest?

R. Istud est, in hoc argumento potissi-  
 mum,



num, quodque artis operā maximē requirit. Id verò, ut quāmpotero brevissimē, dilucidēque doceam: Advertē diligenter apud munus ad ea, quæ sequuntur.

2. Omnis propositio, quæ per Periodum dilatanda est, vel continetur vocabulo simplici, ut *Studeo*, *Ægrotō*, &c. (quæ partes quidem non habet distinctas, cum unica exprimantur voce, facili tamen distribui in partes possunt, quod multa significant) Vel distinctis constat vocibus, duabus nimirum, ut cum dico, *Indocti contemnuntur*, aut tribus, ut in hoc exemplo, *Deus remunerabit virtutem*: aut pluribus, ut si dicam: *Virtutis cultores non amicis tantum, sed etiam inimicis benefaciunt*.

2. Id ubi adverteris, partes singulas cuiusque propositionis dilatabis, illa explicando, vel per Synonyma, id est, per varias locutiones ejusdem significationis: vel per Definitiones, & Effecta, aliosve locos Rhetoricos, ut suo loco fusiùs edisseremus, cum de Amplificatione tractabimus. Nunc verò satis fuerit paucis exemplis, quæ præcepimus, subijcere sub aspectum.

Sit ergo nobis facienda Periodus ex hac unita voce, *Studeo*. Verbum hoc, & si solitarium, propositionis vicem obtinere potest; quid licet partes non habeat, Adjuncta tamen illius sunt loco partium. Quæ Adjuncta? Hæc nimirum 1. Persona, quæ studet 2. Finis, ob quem studet 3. Modus, seu Ratio studendi 4.

di 4. *Materia Studii*, seu Libri, quibus *Studet*. 5. *Tempus Studii*. Locus posset addi, in quo *studetur*, sed nihil opus est. Ac jam ab *Adjunctis* illis dilatemus una periodo adscriptum verbum.

*Studeo*.

[ *Persona*. ] Tametsi, haud inutili opere, multorum spatio annorum clarissimas Europæ Academias celebraverim; & in optimarum artium cognitione progressus fecerim non pœnitendos; [ *Finis* ] majoris tamen intelligentiæ consequendæ gratia, uberiorisque percipiendi ex doctrina fructus; [ *Modus* ] tam assiduo corporis labore, ea contentione mentis, ac meditatione, [ *Materia* ] libros omnes, qui venire possunt in manus meas, quantumvis spissos captuque difficiles sic evoivo, ita legendo contero, [ *Tempus* ] ut illud etiam tempus, quod animi relaxationi dari solet, reficiendisque viribus necessario tribuendum est, in studio literarum totum sæpe ponam, atque consumam.

Fiat jã ex hac duplici voce. *Indocti cõtemnuntur Periodus*, utramque dilatando & explicando per synonyma; primò, quod sit *Indoctum* esse; deinde quid contemni, quæ postquam variis locutionibus expressero, periodum texam, primam quidem simpliciter, & affirmando hoc modo

*Indocti contemnuntur*.

[ *Indocti*. ] Qui omnium disciplinarũ libera-

beralium imperiti, omnisque eruditionis expertes, in summa rerum præclarissimarum ignoratione versantur; [*contemnuntur*] postremum ubique gentium locum obtinent, omni prorsus exultatione inopes, nec despiciuntur solum ab omnibus, tanquam inutiles, ac vani, sed etiam, in infimâ dejecti conditionem mortalium, velut in pristinum ignorantiae compinguntur.

*Vel per negationem.*

[*Indocti.*] Qui nulla literarum cognitione præditi, nulla ornati laude scientiarum, nullo eruditionis splendore decorati sunt. [*Contemnuntur*] Ij, nullis etiam insignes honorum titulis, nulla nominis fama nobiles, nulla commendatione præstantes, ad nullos dignitatum gradus aditum invenire possunt: nulla que incitati spe adipiscendæ gloriæ, inhonorati ignobilesque vivunt, inglorii, contemptique jacent, nullo prorsus in loco sunt.

Deus remunerabitur virtutem.

*Ut ex illis tribus vocabulis Periodum componas singula per sententias synonymas, ut in superiori exemplo fecimus, explicanda erunt, hoc ferè modo.*

[*Deus*] Supremus rerum omnium Arbitrator. Deus hujus universitatis, quam ex nihilo condidit, Moderator sapientissimus cujus nutu reguntur omnia, cujus providentia temperantur, qui, infinita mentis suæ vi, singulorum hominum facta discutit,

tit, æquissimaque lance perpendit: [*remunerabitur*] iustis afficiet præmiis, æternaque mercede immensæ gloriæ compensabit [*Virtutem*] quidquid à nobis præclare susceptum, quidquid gestum egregie fuerit; ne levissima quidem actione, atque etiam cogitatione præterita, quam non exornet immortalis laude, & uberrimo, amplissimoque honore excellentissimi fructu non coronet, non remuneretur, non cumulet.

Sapientes Amicis, & Inimicis benefaciunt.

*Quatuor hæ voces simili ratione exponendæ, quatuor sequentis Periodi membra efficiunt.*

[*Sapientes*] Qui ex virtutis disciplina vitam agunt, & mores suos ad ejus amissim, regulamque dirigunt, nihilque sibi faciendum putant, nisi quod honestum, præclarum, & cum laude conjunctum est; [*Amicis*] non eos solum, quos aut studiorum similitudo, aut voluntatum consensio, aut necessitudo mutuis officiis constituta, benevolos, amicosque reddidit [*Inimicis*] sed illos etiam a quibus oppugnatur, & dissident, quos habent adversarios vehementes, obtretractoresque malevolos, [*benefaciunt*] beneficiis ornant; præclaris meritis sibi devinciunt, omnique officiorum genere, ac significatione benevolentiae prosequuntur.

De particulis texenda Periodo idoneis.

Non de quavis Periodo hic sermo est sed de illis solummodo, quæ duabus constant articulis. Antecedente scilicet, seu Protasi, & Consequente, seu Apodofi, sic inter se nexis ut alterum pendeat ab altero. Hæc porrò ratione, mutua inter ipsas partes quidam Coniunctiones inebunt, quas qui adversis, levi negotio Periodum fundet, concinnabitque.

In iis numerantur, quæ sequuntur. Quamquam, Etsi. Quamvis, quibus respondent in Consequente; Tamen, Veruntamen, Nihilominus. Item Istæ. Quemadmodum Sicut, &c. quibus opponuntur: Scilicet, Itæ, &c. Hæc denique: Non solum: Sed etiam: Quoties: Toties Quales Talis Unde: Inde: Quod; Eod. Cum. Tum. Quantum: Tantum, non minus, Quam, Si [quæ particula semper unum significat ab alia pendens, & consequens] Aliæque ejus generis bene multæ è quibus singulis facile esset, Periodos struere singulas, [utileque erit, id tyronibus imperare faciendum] sed unæ, alterave à Tullio petita sufficiant; quas idèd hæc adscribe præceteris, quod omnium absolutissima habeantur. Prima quadrimembris est, altera Trimembris.

Si quantum in agro, desertisque locis audacia potest; Tantum in foro, atque in judiciis impudentia valeret: Non minus in causa cederet C. cinna Ebutii impudentiæ; Quantum in vi facienda, cessit audaciæ.

Si

Si veritate amicitia, fide societas, pietas propinquitas colitur: Necessè est, iste, qui amicum, socium, affinem, famam, ac fortunis spoliare conatus est: Vanum se, ac perfidiosum, & impium esse fateatur.

*Quid Trimembrem vocas, quid Quadrimembrem Periodum?*

R. Plus dabo, quàm roges: Nec enim illud tantùm exponam tibi modò, sed etiam Exempla subjiciam Periodorum omnis generis: è quibus exemplis duplex manabit utilitas. Primum enim, quod de Numero Periodi audisti jam, tanquam manu exploratum tenebis. Deinde, quasi aliud agendo, & per transfennam adumbratamquamdam Amplificationis imaginem intuendam exhibebo, dum hac de re accuratius suo postea loco docearis.

### C A P U T III.

*Exempla Periodorum omnis generis.*

**P**eriodus multiplex est. Alia dicitur, Quadrimembris, seu Tetracolos, quatuor membris constans. Alia Trimembris seu Tricolos, tria membra complectens. Alia Bimembris, seu Dicolos, duo tantùm habens membra: Alia denique unius membri esse potest, dicta Monocolos.

Rursus: Alie Quadratae sunt, seu Rotundae, omnium perfectissimae, sic dictae, quòd quaternae partes, ex quibus construuntur, ita

*in sese recurrant, rotundissimi orbis instar, ut duo ultima membra duobus primis ex aquo respondeant, & à quocunque incipias suum semper sensum, suam Periodus venustatem, integritatemque retineat.*

*Item Alia Fusæ ac Volubiles, quæ pluribus contexta membris, longoque verborum circuitu decurrentes quagrigarum in morem, aut leniter fluentis instar amnis, sententiam vebunt. Alia demùm. Distinctæ Membris, crebris Incisis, quasi subsilientes desiliunt per aures in animum. Sed jam ad Exempla, quibus adscribo argumentum dilatandum in ipsa Periodo ad faciliorem imitationem.*

## P E R I O D I

## M E M B R I U N I U S.

**Infantium mores educatione formantur.**

Infantium tenelli mores sequax eorum, ductilisque in omnem partem indoles, cereaque illa quasi teneritudo, & tanquam argillæ, in quascumque figuras mollietudo formabilis, à domesticorum primo velut attractu multò veriùs, quàm natalium afflatu, influxuque siderum, plerumque finguntur.

**Luxus, & Otium malorum omnium origo.**

Luxus, & otium vitiorum omniū geminæ Mammillæ, continenti fluxu animis, cor.

corporibusque lacteam pestem instillantes, ærumnas acerbissimas, morbos exitiabiles, calamitates sempiternas, miseras innumera- biles; universa denique mala in huma- num genus important.

## B I M E M B R E S.

Peccati gravitas maxima.

1. Tanta inest peccato, vel levissimo gra- vitas, tanta scœditas, tanta pestis, 2. Ut ori- nium mortalium salus, & orbis universi conservatio unico sit, ut ita dicam, menda- ciolo post habenda.

Tanquam à facie Colubri fuge pec- catum.

1. Tanquam, si immanis horribilisque Coluber, hianti ore, oculisque igneis, pe- stem anhelans præsentissimam, toto in te impetu immineret irruens; 2. Sic omni contentione mentis, ac virium longè hor- ribilius, immaniusque quovis Colubro, & Dracone, monstrum extimeſce peccatum, ac fuge.

## T R I M E M B R E S.

Initium Sapientiæ Timor Domini.

1. Qui veræ laudis incensus desiderio, illustrissimum Sapientiæ decus ambit. 2. nihil in omni vita antiquius habere debet, ac potius, 3. quàm ut Æternæ mentis Numen non tam supplicii metu, quàm re- ligione officii, nullo planè delicto violan- da, castè sanctèque revereatur, ac ti- meat.

Vita



Vita turpis abominanda.

1. Tamen, quantum turpissimis in rebus homines scelerati voluptatis hauriunt in hac vita; 2. tantum, multoque etiam plus doloris, & cruciatuum non essent toleraturi in altera; 3. Eorum tamen nefarios mores, exitumque infelicem perhorrescere deberemus.

### QUADRI MEMBRES.

Vinum, & Mulieres apostatare faciunt Sapientes.

1. Quis hominum fuit unquam, aut esse potuit, hoc robore animi, atque hac indole virtutis, & continentiae? 2. quem intemperantia gulæ, quem computationes immodicæ, quem Vinum immoderate haustum de statu naturæ non ignominiose dejecerit? 3. Aut quis ea prædictus altitudine mentis, ea iudicii maturitate, ac sapientiæ laude præcelluit, 4. quem Fœminarum impudicus amor, & ad obscœnas voluptates libidinosa propensio abductum ab honestatis officio, rationis usu non spoliavit?

Quid sapientius quam nihil peccare.

1. Quid est, oro, à recta legum norma, & à communi sapientissimorum hominum vivendi ratione minus abhorrens, 2. Quam sic instituere vitam, & mores temperare, ut nihil reprehensione dignum appareat? 3. Aut quid magis honestum atque laudabile sanctissimisque naturæ institutis convenien-

venientius, 4. quàm eum vitæ cursum tenere, eamque sequi agendi regulam ut nihil in factis nostris, seu dictis, non dignum, & imitatione & admiratione cernatur?

## QUADRATÆ, AC ROTUNDÆ.

Ingratus.

1. Si tantum apud te valeret accepti beneficii grata recordatio, 2. quantum apud me valuit, tibi gratificandi studiosa propensio, 3. Eandem mihi nunc benevolentiam testareris, adversante fortuna meis commodis: 4. quam olim, rebus mihi ad voluntatem fluentibus, testaberis.

Bona fortunæ mala.

1. Si quantis abundant malis fallacia fortunæ Bona, 2. attenta mentis consideratione perpenderes, 3. Quod majori hætenus cura, sollicitudineque illa venatus es, 4. eò majori deinceps contemptu respueres, aspernareris, exhorreres.

## FUSÆ, AC VOLUBILES.

Lugdunensis inter arma Felicitas.

1. Quonam vestro fato evenisse dicam Lugdunenses, 2. ut ardentibus circumquaque bellorum incendiis, & per armorum strepitus, civilesque tumultus serpente lue præliorum ac jam late cuncta populante, 3. intacta, illibataque semper extiterit augusta hæc vestra, fortunatissimaque Civitas, 4. omnique opum genere abundans, deliciisque vitæ sine metu fruens,

& af-

& affluens, in ipsius felicitatis beato sinu placidissime conquieverit?

1. An quoddam suorum quondam sanctissimorum Martyrum clara victoriis, praesidiisque tuta, totaque etiamnum hodie laurea, sic in mediis fulminibus ridet, 2. An, quoddam ad supremam evecta regionem gloriae, extraque posita communium malorum tempestates, secura gaudet, laetaque triumphat, 3. dum firmissimae quaeque urbes aliae trepidant, dum provinciae circumpositae, validissimis quamvis munitae propugnaculis, consternuntur.

### MEMBRATIM CONCISAE.

Melleae Apum Praedae.

Vides, ut direptrices illae Apes, ac furculae per efflorescentes naturae thesauros, per nectareas plantarum divitias: per roseas agrorum gazas inexplebili rapacitate, velut agmine facto, turmatim, volatimque ruunt, rosellatim carpunt, hortulatim sugunt, areolatim hauriunt, alveolatim sternunt, fuspitulatim bibunt, mellificatim rapiunt, & legionatim praedas important.

En, ut iterum ex alveariis raucobombo personantibus, praeeunte Duce, strictis aculeis, alisque explicatis, eruptionem faciunt? Areolasque illas, aromatibus saluberrimis pretiosa suaveolentibus fragrantibus herbulis, venustissimisque depictas flosculis, circumvolitantes; in obvios quosque

que sine lege flores feroces irruunt, violaria violant, rosæ aurum diripiunt, lillii argentum exportant, thymum sugunt, casiam ebibunt, serpyllum expilant, crocum exsorbent, tilias, & hyacinthos exhauriunt.

### Formicarum mira Indoles.

Formicæ, non dispersæ per agros errant solivagæ aliarum more ferarum; sed in quadam republicæ societatem coeuntes conventus agunt, cætus celebrant, se mutuo honore colunt, se audiunt, se consulunt, sibi obtemperant, se hortantur, juniores juvant consiliis, infirmiores robore sublevant, pigriores stimulis admonent; laborantes hortatibus urgent, ægras curant, mortuas efferrunt, ætate provecas singulari reverentia prosequuntur.

Eas jure diceret, cum hominibus participare rationis usum, aded præinnata sibi sagacitate, rerum causas, & principia vident, earum progressus, & quasi antecessiones percipiunt, componunt similitudines; ventos præsentunt, imbres præsagiunt, naturam prospiciunt, & subtili consequentium comprehensione cum primis, præsentibus ventura illigant, præteritis futura conæstunt.

## CAPUT IV.

## Usus Periodi.

**Q**uomodo utendum periodo?  
 R. Dicam libenter, habet enim res ista multas cautiones sed duas ego dumtaxat appono breviter.

Prima, Ipso dicendi aditu, & orationis exordio fermè adhibentur Periodi tornatè elegantius, numerosque sententiarum tractu circumducte, suaviterque cadentes; quo nimirum insinuet se blandius oratio in animum auditoris ejusque benevolentiam, & attentionem sibi conciliet: Nisi fortè genus esset hujusmodi, quod istam dictionis lenitatem non admitteret.

Secunda cautio est; ut, cùm ubique, tunc hic maximè, habeatur ratio varietatis, ne fastidium pariatur audientibus: si pari semper gressu incedat, parimodo subsistat oratio. Quapropter curandum est, ut modò tractum ducatur, & numerosè fluat; modò distinguatur in membra, modò feratur per incisa. At, ubi ad Perorationem devenit, est, in qua excitandi sunt motus animorum non tam verborum, quàm sententiarum, nec tam numeri, quàm ponderis est habenda ratio. Ac, de his satis. Ad alia Orationis ornamenta veniamus.

48  
PROGYMNASMA II.  
DE FIGURIS

C A P U T I.

*Rerum Natura, & Diviso.*

**Q**uid sunt in oratione Figuræ?  
R. Quod in horto flores, in cælo Stellæ, in ore Veneres, in collo Torques, in digito Annuli aurei, & in annulis Gemmæ. Figuris enim Oratio quibusdam quasi flosculis distincta nitet, & tamquam stellulis conspersa lucet, & cœu gemmis radiata micat, & coloribus quasi illuminata, monilibusque fulgens pretiosis, pulchrè resplendet.

Quid est Figura?

R. est Conformatio quædam sermopis elegantior remota à communi sensu, & loquendi consuetudine. Itaque, quod præter communem usum loquendi dixeris, id cum figura dictum putabitur.

Quotuplicis sunt generis?

R. Duplicis. Aliæ dicuntur Figuræ Verborum; Aliæ Sententiarum, quæ à Græcis dicuntur *Schemata*, Latine, *Habitus modi ornatus*.

Quæ vocantur Figuræ Verborum?

R. Eæ, quæ in verbis tantum habent dignitatem, id est, quæ posita sunt in  
sola

sola conformatione Verborum, qua im-  
mutata, figuræ pereunt v. g. *Quid me expe-  
ctas?* *Quid meam fidem imploras?* Figura  
est, quæ dicitur Repetitio. Quod si ita im-  
mutem verba, *Quid me expectas?* *cur meam  
fidem imploras?* tunc non erit figura eadem  
quia non erit repetitio illius particulæ,  
*Quid.*

Quæ dicuntur figuræ Sententiarum?

R. Quæ non in verbis solum, sed in re-  
bus ipsis quandam dignitatem habent, hoc  
est, quæ ita positæ sunt in sensu, ac sen-  
tentia, ut quibuscunque verbis proferan-  
tur, eadem semper figuræ vis, ac maje-  
stas servatur. Sed priusquam has, illasque  
figuras, explicemus, pauca præmittenda  
de Tropis.

## C A P U T II.

### De Tropis.

**Q**uid est Tropus?

R. Est Verborum translatorum  
usurpatio.

Unde hoc nomen dicitur?

R. A voce Græca, *τροπή* idest, *verso*,  
idecirco, quoties vox aliqua à propria signi-  
ficatione in alienam convertitur, & trans-  
fertur, *Tropus* dicitur.

Quotuplex troporum genus est?

R. Duplex, aliud eorum est, quod uno  
C verbo,

*Progymnasma II.*

verbo, Aliud eorum, qui in pluribus verbis fiunt.

Quot sunt Tropi in uno Verbo?

R. Septem, Metaphora, Synecdoche, Metonymia, Antonomasia, Onomatopoeja, Catachresis, Metalepsis.

METAPHORA est Translatio verbi ab uno, cui proprium est, aliud, cui non est proprium. Ut *Homo ardens ira*. Nam *ardens* propriè igni convenit, & transferitur ad hominem, cui non est proprium; neque enim homo *ardet*, sed ignis.

SYNECDOCHE est 1. cum pars pro toto ponitur. Ut *puppis* pro *Navi* 2. Cum totum pro parte, ut, *fons*, pro *acquo* 3. Cum sumitur materia pro ipsa re, quæ ex illa fit, ut, *ferum* pro *Ense* 4. Cum antecedentia pro consequentibus usurpantur. Ut, *Boves ab agricolis reducuntur*, pro *Nox adveniat*.

METONYMIA, seu Transnominatio, cum pro effecta Causa; aut contra pro causa effectus ponitur. Ut cum, *Cererem*, pro *pane*; *Bacchum* pro *vino* dicimus, quia Ceres frumenti, & Baccus vini inventores sunt.

ANTONOMASIA, seu Pronominatio cum aliquid pro vero rei significatæ nomine sumitur. Ut *Everfor* *Cartaginis* pro *Scipione* qui evertit Cartaginem.

ONOMATOPOEJA, seu Fictio vocis, cum vox aliqua fingitur ob similitudinem, quam



quam habet cum ipsa re significata, ut *Magirus* pro ipso sono, quem boves edunt.

**CATACREISIS**, seu Abusio, cum scilicet abutimur significatione alicujus rei ad aliam significandam. Ut, *Parricida* de eo, qui matrem interfecit, qui propriè *Matricida* dicendus esset.

**METALEPSIS**, cum aliqua dictio, aliud à propria sua significatione, ex iis quæ antecesserunt, significat. Ut,

*Post aliquot mea regna vident, mirabor aristas.*

Id est *post aliquot annos*. Nam ex aristis æstates; ex æstatibus annos intelligimus.

Quot sunt Tropi, qui in pluribus verbis versantur?

R. Quatuor, Allegoria, Periphrasis, Hyperbaton, Hyperbole.

**ALLEGORIA** est, cum aliud verbis, aliud sensu ostenditur. Ut, *Cum magnas subiisset tempestates; rerum omnium naufragium fecit*. Hoc est: *Cum magna adisset pericula; amisit bona omnia*.

**PERIPHRAISIS**, seu Circumlocutio, cum id pluribus verbis explicatur, quod paucioribus dici poterat. Ut, *Ille, à quo vitam accepisti*, id est *Tuus pater*.

**HYPERBATON**, seu Transgressio cum perturbatur ordo verborum. Ut *Quædere pro, De qua re, in eam pro Cum me*.

**HYPERBOLE**, seu Superlatio, aut Excessus, est, cum sententia aliqua hanc

excedit, augendi rei gratia. Ut, *Nive candidior, Anteire cursibus auras.*

### C A P U T III.

#### *De Figuris Verborum.*

**I**N quo hæ Figuræ à Tropis differunt?

**R.** Quodd Tropi fieri nequeant nisi verbis translatis; at Figuræ Verborum, propriis verbis constare possunt. Ut, *Occidi occidi hostem patriæ* Figura est quæ Repetitio dicitur, non tamen Tropus est; quia Occidi; verbum proprium est, non translatum.

Quomodo fiunt Figuræ Verborum?

**R.** Tribus modis. 1. per additionem, cum scilicet, verbum verbo additur, Ut, *Veniet, veniet illud tempus.* 2. per detractionem, cum detrahitur aliqua vox. Ut; *Parentes, propinquos, amicos prodidit*: Detrahuntur enim conjunctiones. 3. per similitudinem, cum variæ inter se similes ponuntur. Ut, *Hoc vestimenti genus, fœminas non tam ornabat quàm onerat*; Hæc ternas lustremus Figurarum Classes, & incipiamus à prima.

#### FIGURÆ PER ADDITIONEM

##### Repetitio.

**REPETITIO** figura est, cum ab eadem voce periodi membra incipiuntur. Ut.

Quem populus Romanus damnavit, quem Senatus damnavit, quem omnium existimatio damnavit; eum vos sententiis vestris absolvetis? (4. *Ad Heren.*)

Vix hostem invenerat, jam urgebat: vix pectora viderat, jam terga cedebat.

Accusant ii; qui fortunas ejus invaserunt; causam dicit is, cui nihil præter calamitatem reliquerunt. Accusant ii, qui plagas inflixere. Causam dicit, qui accepit, Accusant ii, &c.

Conversio.

**CONVERSIO** est cum ab eodem verbo finiuntur periodi membra. Ut.

Illud ex te audire cupio, quare, cum ego te defenderim, non rogatus defenderim, immeritum defenderim, periculo meo defenderim, tu, horum omnium immemor, me oppugnas?

Doletis, Cives optimi, everfa esse vestra templa? Illa evertit hæresis. Lugetis, sacra majorum monumenta suis spoliata esse ornamentis spoliavit hæresis. Sacratos homines crudelissimè trucidatos? trucidavit hæresis.

Complexio.

**COMPLEXIO** Repetitionem complectitur, & Conversionem, cum videlicet oratio eodem verbo inchoatur, & desinit. Ut.

Quis accusavit? inimicus. Quis testes produxit? Inimicus. Quis tulit sententiam? Inimicus. Quis irrogavit poenam? Inimicus.

Qui sunt, quos Deus summè odit? Impudici. Qui sunt, quos etiam in hac vita dis suppliciis afficit? Impudici. Qui sunt,

qui-

quibus æterni post mortem cruciatus manent in inferis? Impudici.

Vis, ò Christiane, frænare libidinem?

Ora. Vis hostem pudicitiae frangere?

Ora. Vis constantiae coronam referre?

Ora.

### Conduplicatio.

**CONDUPLICATIONO** est. Cum idem Verbum vel initio, vel in ipso decursu orationis geminatur affectus exprimendi gratia, Ut.

Vivis, & vivis, non ad deponendam, sed ad confirmandam audaciam (Cic. in Catil.)

Bona, (miserum me consumptis enim lacrymis, tamen infixus animo hæret dolor.)

Bona, in quam Gn. Pompeii fuere acerbissimæ voci subiecta præconis. (Cic. 2. Phil.)

Nunc etiam audes in horum conspectum venire, proditor patriæ, proditor, inquam, patriæ venire audes in horum conspectum? (4. ad Hæ.)

### Traductio.

**TRADUCTIO**, Quæ & alio nomine dicitur *Polypeton*; est cum eadem vox diversis locis repetitur, casibus, aut generibus, aut temporibus, paulùm immutatis. Ut.

Ei sum infensus, ejus aspectum ferre nequeo, illum auribus, oculisque respuo, illo superstitè, vitam tranquillam agere non possum.

### Gradatio.

**GRADATIO**, seu Climax, est cum ab

uno

uno ad aliud fit progressio, aliqua repetendo eorum quæ iam dicta sunt. Ut.

Mihi doctrinam diligentia, doctrina gloriam, gloria æmulationem, æmulatio sempiternam laudem comparavit. Sed de Gradatione fufus in Figuris Sententiarum.

#### Synonymia.

**SYNONYMIA**, est coacervatio multorum verborum, eandem significationem habentium. Ut.

Illum tandem aliquando furem temeræ audacia, scelus anhelantem, pestem Senatui nefarie molientem, bonis omnibus exitium machinantem, emisimus, eiecimus, eliminavimus. Abiit, excessit, erupit, evasit. Illum redire non sinam, non feram, non patiar.

An verò vos soli ignoratis, vos hospites in hac urbe versamini, vestrae peregrinantur aures.

#### PolySyntheton.

**POLYSYNTHETON** est, cum multæ conjunctiones congregantur. Ut.

Teque tuique similes, tibi que charos, & aspernor, & averfor, & execror; nec timeo, minas, quas iactas, nec terrent me pericula quæ denuncias.

#### Figura per detractionem.

#### Synecdoche.

**SYNECDOCHE**, Figura est in narrationibus usitatissima; siquæ, cùm verbum

quoddam retinetur, quod facile intelligitur. Ut.

Hic, tumultuari famuli, lugere ancillæ, mæerere filii, conjux misera lamentari *Subauditur*, cæpit, vel cæpere, *Plura exempla, Progymnasma de Narratione subministrabit.*

### Adjunctio.

**ADJUNCTIO** est cùm ad unum verbum sententia plures referuntur. Ut.

Vicit pudorem libido, timorem audacia, rationem amentia.

Ea flagrat cupiditate, ut illam nec pudor ab infania, nec pudicitia à stupri fæditate, nec pietas à scelere, nec generis ac familiæ macula, à libidinum turpitudine avocare queat.

Nulla libido ab illius corpore; nulla vis à manibus, nullum flagitium à sceleratissimis ejus factis absuit unquam.

Non illum avaritia ab instituto cursu, ad prædam aliquam revocavit, non libido ad voluptatem, non amænitas ad delectationem, non denique labor ipse ad quietem.

### Disjunctio.

**DISJUNCTIO**, seu Dissolutio, cùm demptis conjunctionibus, multa copulantur. Ut.

Studia literarum, adolescentiam alunt, senectutem oblectant, secundas res ornant, adversis perfugium ac solacium præbent,

bent, delectant domi, non impediunt foris, pernoctant nobiscum, peregrinantur, rusticantur.

*Figura per similitudinem.*

**Paranomasia.**

**PARANOMASIA** seu Annominatio, est cum paululum immutata verba, atque desinens in oratione ponuntur. Ut.

Cum lectum petis, de letho cogita.

Quò quis amantior, eò plerumque amantior est.

Similiter cadens, & desinens.

**SIMILITER CADENS** est, cum dua, vel plures sententia, seu orationis membra, similiter, & eisdem casibus offeruntur. Ut.

Quid tam commune, quàm spiritus vivis, terra mortuis, mare fluctuantibus, litus eiectionis. (Cic. pro Rosc. 72.)

**SIMILITER DESINENS** est, cum plures sententia simili modo finiuntur. Ut.

Tam foelix imperator est, ut ejus semper voluntatibus non modò cives assenserint, focii obtemperarint, hostes obedierint, sed etiam venti, tempestatesque obsecundarint.

**Isocolon.**

**ISOCOLON**, seu Compar, cum varia orationis membra constans pari ferme numero syllabarum.

Tam difficile bellum Pompejus extrema hyeme apparavit; ineunte vere suscepit, media æstate confecit. (Cic. pro Manil. 35.)

G 3 Non

Non est difficile viatori per apertam planitiem, nullis sentibus interclusam, nullis fluviorum anfractibus impeditam, nullis decursibus lubricam, nullis saxetis asperam; sine prolapsione cursitare; At vero iter celerrimè conficere, dura constratum glacie, alta oblitum nive cautibus asperum, vepribus invium, torrentium concursu ruptum, non parvi laboris est opus,

## C A P U T IV.

### De Figuris sententiarum.

**H**is figuris, ut nihil in arte Rhetorica præstabilius, si usurpentur ea quæ par est moderatione, ac prudentia ita nihil ferè putidius, si temere ac pueriliter adhibeantur. Invid vitii non incurres, si quæ de singulis hic apponam, diligenter expendaris. Exempla præsertim si attentè leges, in quibus voluit in speculo tum ipsius figuræ naturam, tum multiplicem ejus efformandæ rationem conspicias. Consultè quippe in eorum quibusdam multa congero, quæ cortè refecanda ducerem si alius mihi scopus, quàm legentium profectus propositus esset.

### A L L E G O R I A.

**A**LLEGORIA, nihil aliud est, quàm multiplicata & continuata Translatio. Tametsi autem Figura hæc in verbis sita sit, in sententiis tamen dignitatem, & præ-  
cum



*cum habere potest, ob similitudinis gratiam, quam plerumque continet, & Translatio- nis leporem: Exempla habet Cicero specio- sissima.*

## E X E M P L A.

## Ratio Comitiorum.

Quod fretum, quem Euripum, tot mo-  
tus, tantas, tam varias habere putatis agita-  
tiones fluctuum, quantas perturbationes,  
& quantos æstus habet Ratio Comitiorum  
Dies intermissus unus aut nox interposita,  
sæpè perturbat omnia; & totam opinionem  
parva non numquam commutat auram  
moris. (*Pro Mur. 74.*)

## Magnitudo animi.

Neque tam tui timidus, ut qui maximis  
turbinibus, ac fluctibus, Reip. navim gu-  
bernassem, salvamque in portu collocas-  
sem, frontis tuæ nubeculam, aut Collegæ  
tui contaminatum spiritum pertimescere.  
Alios ego vidi ventos, alias prospexi ani-  
mo procellas, aliis impendentibus tempe-  
statibus non cessi; sed unum me pro om-  
nium salute obtuli. (*In Pison. 20.*)

*Hic duobus exemplis adjiciamus tertium se-  
quentem sententiam exprimens.*

Frustra regitis vestras laudes.

Nequicquam hæc honoris Soli, qui col-  
lucet in vestris animis, nubem moderatio-  
nis objicitis: jubar illud virtutum irradians  
castigatum modestæ velo, amabilius emi-  
cat, Frustra, nobilissimo laudum flumini à

vestrorum profluente meritorum fontibus, opponitis verecundæ dissimulationis aggeres, honestique molem pudoris. Quod illas coercetis arctius, severiusque cohibetis, eò magnificentius intumescunt exundantis gloriæ fluctus, brevisque fiet, ut revulsis obiectibus, extra vitæ ripas, temporumque limites sese diffundant, & exæstuent, omnemque posteritatem fluxu venerationis dignissimo, gloriosè circummeant.

### A N T I T H E S I S.

**A**NTITHESIS *figura est, qua verba verbis aut sententia sententiis opposita referuntur. Ut.*

Quis ferre possit, inertes homines fortissimis insidiari, stultissimos prudentissimis, ebriosos sobriis, dormientes vigilantibus? (*Cic. in Catil. 10.*)

Potestis ignotos notis, iniquos æquis, alienigenas domesticis, cupidos moderatis, mercenarios gratuitis, impio religiosis, inimicissimos huic imperio, & nomini, bonis ac fidelibus sociis, & civibus anteferre? (*Pro M. Fontejo. 22.*)

Ex hac parte pugnat pudor, illinc petulantia, hinc fides, illinc fraudatio, hinc pietas, illinc scelus, &c.

*His exemplis adnotamus unum paulo diffusius, & magis pium.*

### E X E M P L U M.

Jesus Infans.

Transivimus usque Bethleem cum Pastoribus,

ribus, & videamus, & veneremur Jesum in  
 præsepio, & demitemur in Infante virum  
 Principem in lervo, Sapientem in puero,  
 Rectorem orbis-juris factum alieni Demi-  
 remur, & adoremus Splendorem tenebris  
 offusum Potentiam constrictam vinculis,  
 Infinitatem terminis finitam. Immensita-  
 tem circumscriptam cunis, balbutientem  
 Sapientiam, Sublimitatem cum humilitate,  
 Fortitudinem cum infirmitate conjun-  
 ctam; Opificem mundi, puellæ opus,  
 Eum, qui sedet super Cherubin, reclina-  
 tum sub brutis animantibus. Qui ambulat  
 super pennas ventorum, jacere stratum in  
 spelunca pecorum. [ *Paranomasia* ] Qui  
 terram mari circumdedit, brachiis Mariæ  
 circumdatum. Adoremus, inquam, & stu-  
 peamus è Virgine prolem, hoc est flores ab  
 hyeme, flammam ab aquis, in rubo ignem,  
 rorem in velle: [ *Repetitio & similiter  
 cadens* ] hoc est, sine radice fructum, sine se-  
 mine messiem, sine fontem rivum, sine trunco  
 Arborem vitæ, Filium sine patre, Conju-  
 gem sine conjuge, ac denique Virginem  
 matrem; Monarcham famulum, subditum.  
 Regem. . . . . minem Deum.

## A P O S T R O P H E.

**A**POSTROPHE Latine Aversio, est  
 cum ab auditoribus, quos alloqui-  
 mur, ad absentem, vel presentem quempiam  
 seu vivum, seu mortuum, aut etiam ad eos  
 inanimas sermonem convertimus, quas vel  
 per-

*personas quasdam compellamus. His autem  
ferè modis à Tullio petitis figuratur Apo-  
strophe.*

Vos Albani tumuli, atque luci, vos,  
inquam imploro, & obtestor; vosque ob-  
rutæ aræ, quas ille substructionum insanis  
molibus oppressit, tunc vestræ religiones  
viguerunt, vestra vis valuit; Tuque, ex  
tuo edito monte, Latialis Jupiter, aliquan-  
do ad eum puniendum oculos aperuisti.  
(*Pro Mil. 26.*)

O Dii Immortales; vos enim hæc audi-  
re cupio, impius hic vestra sacra curat? Ve-  
strum numen horret? non illud auctoritati  
horum omnium? (*Pro Dom. 104.*)

Vos, vos appello, fortissimi viri, qui mul-  
tum pro republica effudistis sanguinem;  
vos in viri, & in civis invicti appello perit-  
culo Centuriones, vosque milites vobis non  
modò insistentibus, sed etiam armatis  
huic judicio præsidentibus, hæc tanta vestra  
virtus ex hac urbe expelletur? extermina-  
bitur? ejicietur? (*Pro Milon. 104.*)

Te nunc, Scipio; te tunc lectissimum  
adolescens appello, abs te officium tuum  
requiro, & flagito: cur pro hoc homine pu-  
gnas? cur eum defensum esse vis? (6. *In  
Ver. 79.*)

## EXEMPLA.

*Ad suppellestem humani luxur.*

Acceptis à Deo beneficiis abutimur, ut  
ejus nomen augustissimum, nostris malefi-  
ciis

clis offendamus. [*Interrogatio*] Quid enim est, quod nos vertimus in instrumenta vitiorum? quod muniamus nobis iter ad crimen? [*Repetitio.*] Vos appello, *Ædes sumptuosæ, aulæis ac picturis illustratæ pretiosissimis*: Vos *Vasa splendida, vos radiantes auro Abaci*? Vos *Thalami argento rutilantes, purpureaque Strata*, vos appello; Dicite, quot, in vobis flagitia, quot per vos scelera patrantur? Quot vobis testibus ac consciis, & quàm nefanda facinora committuntur? &c.

*Ad B. Virginis Ubra.*

Virginis mammam divinus Infans appetit; [*Expositio, & disjunctio.*] purissimum expande gremium, divina Mater aperi sinum, profer ubera, papillas admove, filio exundas præbe. Audit Virgo parens. Nati que nutibus obsecutura, roseum explicat sinum, dulcedinis expromit thesaurum, mammillam ostendit, papillam porrigit, & inferit in os pueri Jesus. O rosis, liliisque purius, candidiusque gremium! Stillate in labella pueri Dei, gemini ambrosiæ Fontes, mellifluæ manate Gemmæ, nectarei fluite Rivuli: effundite argenteæ Venulæ, quidquid suavitatis vobis inest, in suavissimum Puelli pectus; & implete venas liquore lacteo, commutando mox in sanguinem, olim pro salute nostra fundendum.

*Ad Ventos.*

Jacet in stabulo, Regum Dominus regens

cens natus, recubat nudus media hyeme ;  
 Virginis filius in spelunca, ventis nivibus-  
 que pervia, totoque contremiscit corporu-  
 sculo, Deus Infans. Ah! Venti, si quis vobis  
 favor inest, si qua pietas rigorem remittite.  
 Ah! frigidus inhibete flatus, sævi Aquilo-  
 nes. Ah! quæso, alias perflate plagas, Auræ  
 violentæ. Tu Zephyre mollicule. Tu sua-  
 vicule Favoni, vos, Auræ blandulæ, te-  
 pentibus, huc advolate pennulis, halituque  
 dulciculo, obsequio fovete delicato divi-  
 nas Pueri tenelli genas.

*Ad Cineres Sanctorum.*

Ingemiscite, si quis modò vobis sen-  
 sus est, Cineres sacri, Religiosi Tumuli.  
 Sepulchra sancta. Monumenta templorum  
 augustissima, pretiosis veneranda reliquiis,  
 ingemiscite: Quas enim Aras & Tem-  
 pla, pietate ac religione vestra, conse-  
 cratis. Ea nunc impii homines ac sacri-  
 legi polluant.

*Ad Oculos, & Manus.*

Supremæ Majestatis numen offendi mi-  
 ser, divina Mentis æternæ jussa contempni  
 impudens, sanctissimasque leges per sum-  
 mum sacrilegium violavi. O me scelestum,  
 vesanum, impium! Colliquescite oculi mei,  
 amissorum dolore facinorum, profundite  
 perennes aquas pœnitudinis; uberrimam la-  
 chrymarum vim continenti fluxu profun-  
 dite, & eluite, si potestis, assiduo, & amaro  
 fletu sordes criminum, ad quæ patranda du-  
 ces,

ces, heu! jam sæpè mihi, & antesignani  
fuistis.

Vos verò meæ horrete Manus, effe-  
trices antea, & administræ, ultrices  
mox futuræ tot scelerum: disturbate jam  
nefarias molitiones vestras, disturbate;  
[ *Disjunctio, Commeratio, Gradatio* ]  
plangite, quæ fecistis, flagitia, flagellis  
vos instruite ad vindictam, crebrisque,  
ac validis ictibus ferite, tundite, pulsate  
latera, laniate humeros, concidite pe-  
ctus, dilacerate corpus universum.

*Ad Astra, & Flores.*

Mentem illustrate nostram, lucidissima  
Sidera; cæcitatem splendore vestro depel-  
lite à nostris animis: impiumque torpo-  
rem motu micantissimo excitare. Vos  
enim mentis licet expertia, ad Dei tamen  
jubentis imperium per statas motum perio-  
dos indefessa vertigine, & admirabili  
cum celeritate ab ortu properatis ad occa-  
sum, vicissitudinesque anniversarias con-  
stantissimè conficitis: Nos verò immorta-  
lium spe premiorum invitati ab eodem  
supremo Numine ad conficiendum virtutis  
iter; heremus humi, volutamur in cæ-  
no vitiorum, ad inanes, turpissimasque  
voluptates adhærescimus.

Verùm hebetiores sunt nobis oculi qui  
spectare nequeunt tam altè, nimioque  
perstringuntur Astrorum fulgore cæle-  
stium? [ *Definitiones conglobata.* ] Er-  
go agi-

go agite, *Astra terrestria, camporum Stellæ odoriferæ, scintillantes hortorum Gemmæ, suaveolentia naturæ Monilia, Amœnitates animarum, odore vestro nos ad honoris amorem pellicite foliorum nitore ad vitæ decus excitate; colorum varietate gravissima eximiaque pulchritudine ad laudis studium; ad omne officii genus, ad rerum æternarum contemplationem impellite.*

*Ad Colles, & Fluvios Lugdunenses.*

Extincta lævium in Christianos Imperatorum tyrannide, respirare cæpit *Ecclesia Lugdunensis, Religiones ipsæ, atque Aræ, quas illi omni nefario ritu, ac scelere macularant, commovisse se videntur præ gaudio, cum immanes illas cadere belluas viderant. Vos Urbani Tumuli Martyrum quondam cædibus irrigui; vos imminentes huic urbi Colles sacro sanguine naufragi, vos appello, vobisque gratulor, Oppressi diu idolorum simulacris, emeristis tandem, & gestientes nunc lætitia, religiosi virorum, sæminarumque domiciliis inclyti collucentes triumphatis.*

Vos etiam appello: *Fluvii nobilissimi alluentes, & præterfluentes hanc urbem, quorum olim cursum, purpurati Carnifices, mactatis Christianorum cadaveribus retardarunt, cruenta tunc evolvebatis fluctuum volumina turbulenti; nec tam sangu-*



sanguine, quàm ira erubescences ac ipse  
mei; qui nunc, post addictos illos orco  
Tyrannos, limpidis, placidisque undis in  
cincinnos sese blandè crispantibus, exul-  
tanti fluxu, tranquillè decurritis in cœa-  
num.

## COMMUNICATIO.

**C**OMMUNICATIO est Exornatio, quæ  
causæ nostræ confidentes, aut ipsos con-  
sulimus adversarios, aut cum Judicibus,  
quid faciendum sit, quidve factum oporteat  
deliberamus. Ut.

Nunc ego vos consulo quid mihi facien-  
dum putetis; id enim consilii profectò ta-  
citi dabit, quod egomet mihi necessariò  
capiendum intelligo. ( 2. in Ver. 32. )

Tu denique, Labiene, quid faceres,  
tali in re, ac tempore, cùm ignaviæ ra-  
tio te in fugam impelleret, Consules ad  
patriæ salutem vocarent; quam tandem  
vocem sequi, cujus imperio parere potis-  
simum velles? ( Pro Rabir. 12. )

Quæro à vobis, Judices, &c. ( hæc,  
quæ res agatur, explicat, posteaque, sic eos  
consultat. ) Quid est, quod hac tandem in  
re, vobis possit videri? Profectò, si rectè  
vestram bonitatem atque prudentiam  
agnovi, non multum me fallit, si consu-  
lamini, quid sitis responsuri. ( Pro  
Quinct. 34. )

EXEM-

## E X E M P L U M.

*De Mundi contemptu.*

Adhuc hæres? Etiamnum fluctuas, levissime Adolefcens? necdum adduci potes, ad contemptum rerum caducarum? Verùm esto. Nullius sint apud te ponderis, quæ hætenus attuli; æquo animo feram, consilium despici meum. At te ipse saltem consule, te audi, obsecro, tibi obtempera. Quærò enim, abs te, si te, hinc Regina pulcherrima, omnibus abundans fortunæ bonis, omnibus instructa naturæ dotibus, comiter vocaret ad se, te ut haberet sponsum Regemque faceret, inde, proterva, sædaque Meretrix, te impudenter ad turpem invitaret amplexum; & illa quidem adiri non posset, nisi per angustum callem, vepribus impeditum, ac saxis asperum; ad hanc verò, via duceret amoena, & facilis; Quid tunc amabò faceres? utrius tandem vocem sequi, utri parere potissimum velles? Profectò, si benè novi tuam indolem, video, quid esses facturus? Exhorreret videlicet, hujus aspectum Prostituli, & per media senticeta advolares ad Reginae sinum. Cur ergò, id non agis, cum licet? cur consilio non uteris tuo? vocat te virtus ad æterna gaudia, & ad divinos amplexus, obscœna te, contra Voluptas, ad ærumnas sempiternas allicit, & illam aspernaris, ob levem viæ difficilioris laborem,

borem, & huic te mancipas quod iter vides conspersum flosculis. O cæcitatem!

## CONCESSIO.

**C**oncessio *Figura*, est cum videmur etiam aliquid iniquum, vel pati, vel adversario concedere fiducia causa. quod nimirum, illa etiam parte concessa, nos superiores fore confidamus. Hæc autem figura eleganter, plerumque utimur, cum ab uno ad aliud transfundum nobis est.

Id exemplo sequenti planum fiet, in quo, de industria, elegantiores congressi Concedendi formulas; ut sit uno sub aspectu subjiciam hujus figurae ideam multiplicem.

## E X E M P L U M.

*In adolescentem furunculum.*

Non dubitavi; inquis, quoniam se ultro, & inopinanti obtulit occasio, & apertam reperi parentis arcam, aliquot inde aureos educere. Improbè factum: neque enim oblata occasione male agendi, ut unquam licet. Verùm, quoniam tu id tibi arrogas, & concedi postulas, concedamus. At, cur postridie ad eandem arcam reversus es? Cur obsecratam recludere uncino es conatus. Cur diu frustra luctatus seram perfregisti: Non id egi, respondes, malevolo animo; curiositate inductus, quid intus esset, scrutari volui. O excusationem ridiculam. O curiosum innocer.

nocentem! At esto, tege nequitiam mendacio; prædare in paternis bonis, capfas exhauri, cistas expila, rem omnem familiarem dilapida; Num etiam fratri tuo ad furandum præferre facem oportuit? Non prætuli, ais: ipse potius exemplo mihi præivit suo. Tametsi adhuc mentiare, hoc tamen tibi do, atque concedo. Esto, sit ille tibi hac in re haud absimilis, sit fur, sit malitiosus, sit æque, ac tu, promptus ad omne facinus: At certè paratum restituere, quæ abstulerat, avocare non debuisti: neque enim me latet, quas ei minas intenderis, quæ pericula denunciaris, si redderet. Verùm, fide te illius non illum tua secutum esse vestigia; fac ejus impulsu, te tantum nefas perfecisse. Eine natu minori, & adhuc puero, te jam ætate firma, assentiri decuit? Quid respondebis?

## C O R R E C T I O.

**CORRECTIO**, est quæ verbum, aut sententiam retractat, & corrigit, ut aliquid addatur, quod augeat. Ut:

Atque hæc Cives, Cives inquam, si hoc non sine eo appellari fas est, hæc de patria sua cogitavit, (*Pro Muren. 8.*)

O stultitiam, stultitiamne dicam, an impudentiam singularem! (*Pro Celio 71.*)

Quæ fuit igitur, in hoc homine constantia:

stantia : Constantiam dico : nescio , an melius patientiam possem dicere . ( *Pro Ligar* 26. )

Cui unquam homini bono , bene dixit unquam ? benè dixit ; immo , quem fortem , & bonum civem ; non petulantissimè est insectatus ? ( *Pro Sex.* 120. )

In exercitu comparando , patrimonium suum effudit . Quamquam , non simus usi eo verbo , quo decuit ; non enim effudit , sed in salute Reip. collocavit . ( *4. Phil.* 134. )

Quæ convivia fieri putatis , in hujusmodi domo ? si domus hæc habenda est potius , quàm officina nequitiae , & diversorum flagitiorum omnium . *Pro Rose Amer.* 134. )

Aliis exemplis hic opus non est , quod hac Figura fieri paucis verbis soleat .

## DEPRECATIO.

**D**EPRECATIO *Figura est , qua opem alicujus , Dei , aut hominis imploramus . Ut .*

Hoc nos primum metu , Cesar per fidem & constantiam , & clementiam tuam libera , ne residere in te , ullam partem iracundiae suspicemur ( *Pro Deiot.* 8. ) Per dexteram te istam oro , quam Regi Dejotaro hospes hospiti porrexisti ; istam , inquam , dexteram , non tam in bellis & præliis , quam in promissis ,

missis, & fide firmiorem. (*Pro Sex. 54*)

**OBTESTATIO**, Deprecationis genus est cum scilicet in re gravi advocamus aliquem, vel hominem, vel Deum, in testimonium veritatis. Ut.

Unum restabat illud, quod forsitan non nemo vir fortis dixerit: restitisses, repugnasses, mortem pugnans optisses. De quo te, te inquam, Patria, obtestor, & vos Penates, Patrique Dii, me vestrarum sedium, templorumque causa, me propter salutem meorum civium, quæ mihi semper fuit mea charior vita, dimicationem, cædemque fugisse.

**E X E M P L U M.**

*Joseph, Fratres deprecans.*

Quid, heu! molimini Fratres mei? quid mihi machinamini? occidere me vultis? in puteum, me vultis agere precipitem? Ah! supplex omnes oro, singulosque humi provolutus obsecro, ignoscite: si quid à me, in vos peccatum est, inconsiderantiam fecisse penitet. O Juda, ò Ruben, ò Simon, misereatur vos meæ pueritiæ, [ *repetitio* ] per parentis nomen, per matris pietatem, per ego vos illum sinum & ubera, quæ vos aluere, precor per quidquid sanctum in cælis est, & in terris sacrum misello parcite; date veniam fratri, Fratres optimi. Per hæc genua, vos obtestor quæ teneo, & amplector; per istas manus, quas veneror osculis,

lis, lacrimisque rigo Ah! Puteus suavissime te appello, imploro vestram opem, Caelites?

## D I S T R I B U T I O.

**D**ISTRIBUTIO, seu Partitio, est cum id quod summam dici poterat fusius explicamus, & in suas partes distribuimus.

### E X E M P L A.

Lectissimum hunc Adolescentem non ingenta huic ætati levitas à suscepto vitæ consilio revocavit: [ *Repetitio, & Disjunctio* ] non improborum sodalium blanditiæ ad voluptates; non locorum, in quibus degit amœnitas ad delectationem, non majorum nobilitas ad ambitionem, non corporis, ingenique præstantia ad arrogantiam, non aliorum impuritas ad libidinem; non amicorum convictus ad compositiones intempestivas, non denique summa rerum omnium affluentia ad aliquod probum, infamiamque detraxit.

*Vir omni virtute præditus.*

Eminet in hoc homine altitudo animi in condonandis offensis, in liberali gratificandi voluntate, in detestandis avaritiæ sordibus, & malorum omnium seminario, cupiditate; neglectisque propriis emolumentis, & commodis; totum se ad aliorum salutem magnifico, excelsoque animo explicat, Cernitur in capeffendis rebus ar-

**D**

**duis**

duis magnitudo mentis; in rimandis negotiorum viis pervestigandisque quam aptissimis mira sagacitas; in gerendis acere consilium; in persequendis summas inter difficultates ad extremum usque constantia. Nihilque est, quod aut non alto quodam aggrediatur animo, aut cautissimis consiliis administret, aut strenuo labore perficiat; vir plane interritus periculis, infractus malis, invictus adversis, calamitatibus inexpugnabilis, quod labores impinger, ad pericula fortis, ad consilia prudens, ad casum, fortunamque felix.

## DUBITATIO

**D**UBITATIO, *ut scambanemus & ambigimus; quid dicendum, agendumve sit.* Ut.

Quid, si hæc criminatio ab te tota per summam fraudem ficta est? quæ te nomine appellemus? improbum? aut, ret si nihil esset à te confictum, tamen, in cæteris injuriis, quas innocenti intulisti; improbissimus reperiaberis, Non malitiosum? negas. Fraudulentum? jam id quidem interrogas tibi, & præclarum putas. Audacem? cupidum? perfidiosum? vulgaris, & obsoleta sunt: res autem nova, & inaudita. (*Pro Quint. 56.*)

Quid primum quaeratur? aut unde potissimum exordiar? aut quod, aut à quibus  
auxi-



auxilium petam? Deorumne immortalium? Populi ne Romani? Vestramne, qui summam potestatem habetis, hoc tempore fidem implorem? (*Pro Amer. 29.*)

Equidem, quod ad me attinet, quod me vertam nescio. Negem, hoc admissum fuisse crimen? Negem, testes auditos esse in scenam? Non est nostri Ingenii; vestrae clementiae est calamitoso adolescenti subvenire. (*Pro Cluen. lib. 4.*)

Apud vos, quemadmodum loquar, nec consilium, nec oratio suppeditat; quos, nec quo nomine quidem appellare debeam scio. Cives? qui à patria vestra descivistis: An milites? qui imperium auspiciūque abnuistis. Sacrae religionem rupistis. Hostes, corpora, ora, vestitum, habitum civium agnosco: facta, dicta consilia, animos hostium video. (*Scipio apud Liv. 1. 8. dec. 3.*)

Illustrem habet Dubitationis ideam Virgilius Didonem ab Ænæa derelictam, indeliberatione suspensam, ac dubiam sic inducens.

*En quid agam? rursusne preces iteris priores?*

*Experiar? (A. Æneid.)*

Cætera omitto, quæ tu, si libuerit, consules, dum prudentioris faminae Dubitationem huic attexo.

## E X E M P L U M.

*Susanna animi Dubia.*

Hæc non à declamatore ficta sed ab exclamante matrona facta Dubitatio est. Prius tamen, quàm exclamet, attonita hæret, stupenti similis, & quid cogitet, quidque loquatur, nescit infœlix. Excitata tandem imminente periculo, Quid agam? inquit; quò me vertam? Ad quem confugiam? [ *Dubitatio* ] Assensero? in me admisero scelus. Negavero? æternum incurram cum morte dedecus. Pro Superi! quas in angustias adducta sum. Cujus fidem implorabo? A quo auxilium petam? Resistam duobus una? impar sum. Confugiam ad preces? quis exaudiat. Clamem? morior. Taceam? in quinor. Fugiam? non licet. Cedam? Ah! perdo, quod mihi multò est ètarius vita. Sed, quid moror diutius misera? Quid dubius vita fluctuat animus? In vestras, scelestæ capita, satius est incidere, quàm in Dei manus. Perire præstat, quam peccare: Necem crimini præfero. His dictis, exclamat Susanna, acclamant Senes execrandi, accurrunt famuli, &c.

## E X C L A M A T I O.

**E**XCLAMATIO est orationis *Elatio* quæ motum animi vehementiorem efficit, rei que magnitudinem exprimit, interjectione adhibita, nonnunquam verò suppressa, ut cum

ut cum dicitur. Superi! Miserum me!  
*Ejurusus est vel ad laudem, vel ad vitupe-*  
*rium, vel ad commiserationem, ut patebit*  
*exemplo sequenti, in quo coacervatas reperies*  
*insigniores Exclamandi formulas, usurpatas*  
*à Tullio.*

## EXEMPLUM.

*Innocentia Susanna damnata.*

[ *Antirheses* ] Pudorem accusat impu-  
 dentia, vitam virtuti Susanna post habet;  
 puram sceleris mortem mavult oppetere,  
 quam usura contaminatæ vitæ frui. O ca-  
 stitatem admirabilem, atque omni laude,  
 prædicatione, literis, monumentisque  
 decorandam! O scēminam fortissimis for-  
 tiorem viris! O laudem præclarissimam;  
 O facinus omni præconio superios, om-  
 niumque sæculorum veneratione dignis-  
 simum; O mulieris pudicitiam! O decus  
 incredibile, & præter hanc unam, in  
 omni vita inauditum!

Non exhorruere impuri Senes minis,  
 precibusque sollicitare tantam virtutem;  
 Non reveriti sunt nefandi, afferre stuprum  
 matronæ integerrimæ; passique repulsam  
 in caput innocentis crimen conferre. O  
 scelus, ò lutum, ò sordes; ò libidi-  
 nem effrenatam, & indomitam: & ò  
 portentum, in ultimas terras amandan-  
 dum!

Adulterii infimulatur Castitas: falso  
 circumventa testimonio Virtus opprimi-

tur, nec declinare valet calumniæ laqueos. O patrii mores! O leges divinæ! ô jûs! ô fas! ô tempora! Huccine omnia reciderunt? O cæcitatem mortalium! ô fallaces hominum cogitationes! ô consilia præpostera! [*Dubitatio*] Illane Susanna rea traducitur, cujus nuper eximia laus versabatur in ore omnium? cujus pudorem ad cælum exquisitis encomiis efferebant? [*Apostrophe*.] Id futurum putasses Heroïna invictissima, cum adspirantem virtuti tuæ secundissimi rumoris auram videbas? cum honoris fructum amplissimum referebas magnis tui debitum meritis? O fallacem hominum spem! ô fortunam volucrem, ô inanes nostras cogitationes, [*Allegoria*.] quæ in medio spatio sæpe franguntur, & corruunt, & ante in ipso cursu obruuntur, quam portum aspicere potuerunt! Quam citò illa omnia, ex lætitia, & voluptate ad luctum & lacrymas defluerunt. (*Pro Sylia*. gr. 1195 nov.)

[*Correctio*.] Sed quid hic exclaimando tempus consummo [*Hypophora*.] Rapi-  
 tur ad supplicium pressa cæcæ Gæmmon-  
 niæ Victimæ; in fletus se omnes effan-  
 dunt, miserantur afflictæ vicem; Susanna  
 tortoribus stipata, erectis in cælum  
 oculis, viam signat imbre lacrymarum.  
 O spectaculum, non modo hominibus,  
 sed testis ipsis, & parietibus luctuosum!  
 [*Apostrophe*.] Proh Deus immortalis, cur  
 in ho-

in hominum sceleribus maximè aut conni-  
ves, aut præsentis fraudis poenas in tam  
longum tempus reservas? [ *Correctio.* ]  
Immo non reservat ultra; liberatur inno-  
cia, reteritur implicatum calumnia faci-  
nus execrabile, meritis Senes impudici  
poenas lubet. Qui hæc legimus, o nos  
beatos si fuerimus huius virtutis æmuli, o  
conditionem nostram felicem; o decus il-  
lusterrimum; o fortunatam vitæ rationem!

## EXPOLITIO, SEU COMMORATIO.

**EXPOLITIO** exornatio est qua commu-  
nitas verbis, eadem sententiâ variè  
versatur; Effertur, quo gravior, clariorque  
subjiciatur oculis.

## E. X. E. M. P. L. A.

Virtus ubique pulchra est.

Per expolitionem ita eloquar.

Quid est virtute præclarior? quid spe-  
ciosius? quæ fucps exple *Antitheses*,  
perinde fulget squalore obsita, ac radiis  
redimita gloriæ, cui non minùs venustatis  
est viliori vestitæ panno, quam dum co-  
ruscet splendore purpuræ; quæ tantum  
Majestatis habet in ceno jacens, quan-  
tum solio insidens; quæ juxta nitet ple-  
beo juncta; ac nupta Principi; nec blan-  
dus in adolescente lectissimo, quam in  
decrepito, strigosoque sene renidet.

Uxor dives quaeritur  
 Hac ætate non tam foeminarum formam consulunt viri, quam crumenam; [*Paranomasia*, 3] & oneratas malunt, quam ornatas parumque curant; quibus deformatur naturæ vitis, modò sint instructæ magnis divitiis. Adeo, vel in nuptiis ipsis, non tam de nuptiali thalamo quam de thesauro laboratur; tædisque jugalibus arca potius quaeritur, quam conjux; plurisque sit aureæ dotis fulgor quam decoris; & decoris, & argenti splendor, quam generis copioso censu sponsa dives, sit sensus licet expers, judicii que vacua, quam sapiens; & benè morata, si fuerit dotata malè.

Extingueretur memoria nominis nostri, si nullæ essent Literæ.

O vita hominum fluxa, caduca, volucris, fugax, & in mortem præceps [*Adjunctio, & similiter cadens*] nisi fluxam Literæ figerent; volucrem sisterent, fugacem retinerent, sustinerent præcipitem, caducam immortalitate donarent; extingueretur heu, fama nostra simul cum corpore; eodem cum ossibus tumulo præclare factorum recordatio conderetur; deflueret in cineres nomen nominisque memoria opprimeretur ruina vitæ, & in oblivionis aura gloria illa, quam tot sudoribus aucupamur, tenuissimi vaporis in modum evanescerent. Non evanescit autem, sed solida, totaque perstat, nec ullo dierum allisu, aut concursu an-

suorum, habefactari convellique potest; Sed potius, Eboris inflat, quod assiduo contactu nitorem contrahit, ætatum consequentium, perpetuo velut amictu, splendidiore existit beneficio Literarum.

Divitum Luxus à Luctu pauperum.

[ *Antistheses crebra* ] Quanta hodie, (declamabat non ita pridem in Divites Cato quidam Tragicus) quanta illorum hominum natio est, qui servire se crederent nisi in alios dominarentur; nec se ut homines haberi putarent; nisi colerentur ut Dii: nec felicitatem sperarent satis cumulatam se posse consequi, nisi quam creasset aliorum miseria. Luxum facit Locupletum Luctus inopum, illorum risus parricida ab istorum lacrymis oritur, & unius cupiditatem multorum egeilas temperare nequit, Sericæ vestes illæ, quas induimus sunt potius plebejorum spolia, quàm Bombycum; & illa nostra purpura non tantum murice, sed etiam miserorum cruore tincta; polybappa dici magis debet, quàm dibappa. Monilia non ornarent satis, gemmea licet atque aurea, nisi splendorem suum ab integrarum squallore familiarum accrescerent; nec armillæ decorarent brachia matronarum nobilium, nisi catenis manus infelices constringerentur. Torques istos, quos gestamus, quàm multos torquere creditis? Cer-

te negare non possumus, quin plurimorum patrimonia sæpe pendeant ab unius collo, & nudentur innumeri, ut unus pretiosius vestiatur. Quid jam de mensis nostris dicam? quid de indignissima fame pauperum inter epulas nostras nata? iis demum cibus acquiescimus divites, quos inopum sudor condivit; & palato tantum arrident, qui emuntur illorum sanguine.

## GRADATIO.

**G**RADATIO, seu Auxesis, seu Augmentum, non tantum Figura verbum est, sed etiam sententiarum, in qua sequens oratio semper addit aliquid ad præcedentem. Ut

Miserum est exturbari fortunis omnibus, miserius est injuria: Acerbum est, ab aliquo circumveniri: acerbius est, à propinquo: Calamitosum est bonis everti, calamitosius, cum dedecore, funestum est, &c. (*Pro Quin. 93.*)

Facinus est vinciri civem Romanum, scelus, verberari: prope parricidium; necare, quid dicam, in cruce tollere? (*7. Verr. 109.*)

## E X E M P L A.

*Simeon Stylita.*

[ *Allegoria.* ] Hac Gradationis figura quibusdam quasi gradibus, divini hujus hominis Columnam scandamus, & ab ejus cacumi-



lumine conetur evadere oratio in fastigium  
 summæ virtutis: & laudum verticem, quem  
 ille superavit, attingere [ *Correctio.* ] At quis  
 attingat? [ *Interrogatio.* ] Quis altitudinem  
 tantam metiatur animo? [ *Repetitio.* ] Quæ  
 mens, quæ cogitatio, quæ facultas illuc adre-  
 pro, quò se Simeon extulit? Lustremus sat-  
 tem, si ad minused evehere potest dicendi  
 vis; [ *Allageria.* ] Lustremus, inquam, nume-  
 rando virtutum gradus, per quos subli-  
 mem illam sanctimoniz columnam ascen-  
 dit: Principio ejus veluti fundamenta ja-  
 cturus; in semetipso descendit, nihilum re-  
 putavitq; despectusque suum; Ex hac despi-  
 cencia exarsit odium implacabile, & crucis  
 amor ac cruciatus: [ *Allageria.* ] Ex hoc  
 amaro capite dimanarunt rivi perennes de-  
 liciarum celestium: Has quò proprius ad  
 fontem, liquidioresque potaret, erexit  
 ahienū supra humana omnia: Neque id satis  
 esse ratus, erexit & corpus præruptæ rupis  
 celso in vertice domicilio posito. Jātere  
 mē ad huc sibi visus, humiq; serpere, Colli-  
 nam excitavit, triginta sex altam cubitos  
 fixitque supra illam sedem: [ *Correctio.* ]  
 Quid dico Sedem? non in illa sedit, ne se  
 deprimeret, sed semper stetit; Et ne vel sic  
 nihil hæssisset terræ, credi posset, cujusque  
 quā minimam posset, partem contingere  
 ret, uno tantum in pedem annuum unum in-  
 victus perstitit: invictum jure dixi, ut  
 enim hunc vicisse scias etiam post mortemq;

in eodem hæsit vestigio, exanimisque in statione manens, stetit in gradu Miles Christi, verè statarius.

## HYPOTYPOSIS.

**H**YPOTYPOSIS, *Figura est, quare quæpiam sic verbis exprimitur, ut non tam audiri, vel legi, quam geri, & locutis usurpari videntur. Differt autem Hypotyposis ab Etopœia, quod hæc tota sit in exprimendis animi motibus, illa verò corpus delineet potius quam mentem.* Ut.

Hæc posteaquàm acta sunt, procedit iste, inflammatus scelere, furore, crudelitate in forum venit. Navarcos vocari jubet, qui nihil metuerent, suspicarentur nihil, statim accurrunt. Iste hominibus miseris, innocentibusque injici catenas imperat: implorare illi fidem populi Romani, & quare id faceret; rogare, &c. (9. in Vir. 105.)

Hæc cum maximè loqueretur, sex lictores circumstant valentissimi, & ad pulsandos, verberandosque homines exercitissimi, cædunt acerrimè virgis. Eorum unus, converso bacillo, oculos misero tundere vehementissime cepit. Itaque ille, cum sanguis os, oculosque complectat, concidit. (Ibid. 14.)

Personabant omnia vocibus ebriorum, rotabant pavimenta vino, madebant parietes,

res, ingenui pueri cum meretricibus, scorta inter matres familias versabantur. (2. *Pbi* 104.)

Videor mihi hanc urbem videre, arcem omnium gentium subito incendio concidentem: Cerno animo sepulcrum patrum, miseros, atque insepultos acervos civium; Versatur mihi ante oculos, aspectus Cethegi, & furor in vestra cæde bacchantis. (4. *Catil.* II.)

## E X E M P L U M

*Parricida.*

Furiis actus Adolefcens pugionem arripit, sub veste abdit, egreditur domo, grandævum parentem, paulo antea in villam digressum, insequitur furore amens. [*Mazaborgi*] inflammatus odia, perque occultos, & comendarios calles prævertens facile affigitur. Ut videt filium Senex stridentis gladio irruentem, hæret attonitus, & mutus, cui niliebat, hæret paries, quasi consternatus. At ille, scelus anhelans, descende, inquit, delire senex, descende caput res, quin cadis statim, devota diris victimæ? Hic pater, quasi afflatus fulmine, atque immotus, & exanguis, & loqui volentem vox deficit. Denique tergiversantem filium exturbat jumento obtorto, que cito raptat in fossam proximam. Iosterea patri misero, quam stupor ademerat, restituit vecem timor, &, Quis inquit, filie furor in parentem incitat. Hoc cinea oculi

te commeritus sum, quod vitam dedi? Mel-  
tiris, respondit ille, non dedisti vitam, exi-  
tium mihi contra creasti sempiternum: Me-  
ministi, tuis me præstigitis abductum à coe-  
nobio semel, atque iterum? pestiferis blan-  
ditis tuis, & incantamentis abstractum à  
religiosa vita; revocatam ad mundi sordes;  
per te peristi miser; tu per me vicissim æquum  
est, ut pereas, imple. Hæc dicens guttur fer-  
ro transfigit, laceratq; grandi plaga ac demum  
conscenso equo fugit parricida Filius.

## IMPRECATIO.

*Imprecatio est Enecratio quidam;*

**I**mprecatio est Enecratio quidam, qua male alicui imprecatur. Ue.

Quin tu abis in malam rem, malumque  
cruciatum. (13. Philip. 48.)

Di te perdant, fugitive; ita non modo  
nequam, & improbus, sed fatuus, & amens  
es. (Pro Dejac. 21.)

Deus te infelicitet, aut, ut melius pro-  
cedat, te restituat sanitati, malefate Bla-  
tero, ita de re omnium præclarissima stul-  
te sentis.

Hæc de hac figura sufficiant, neque enim  
illam nisi peritæus est usus.

## INTERPRETATIO.

**I**nterpretatio Figura est que di-  
scriminat, aut factum alicuius, juxta sen-

*sententia, et viuentem nostram interpretamur.  
Interpretemur nobis Epaminondas Thebanorum  
Ducis verba ultima hoc exemplo.*

## E X E M P L U M.

*Facta nostra Filiis nostri fuit.*

Audite, quibus verbis Epaminondas, lethifero transfixus telo, moriens orbitatem soletur suam. [*Sermocinatio.*] Orbus, inquit, morior, viri Thebani, qui lectum circumstatis meum, non tamen sine liberis, vobis enim relinquo filiam. At illi, quam tu nobis, inquit, quam filiam relinquis, Imperator inclyte? Pugnā Leuctricam, respondet ille, qua patriæ fregi hostem: hæc mea Filiæ est, quæ parentem non sinet totum interire.

O Immortalitate dignus parens, & digna proles! o digna immortalitate sententia! [*Interpretatio.*] Hi namque sunt Filii veræ nostri. Pacta palmaria, quæ gerimus, [*Allegoria.*] hæc germana soboles castissimaque procreatio, non gremio concepta, sed animo non humi, sed honoris excepta sinu, quæ incubis jam adulta non eget fortunæ maminis, ut alatur, nec etatem poscit, ut crescat, nec robur viriam requirit, ut adolescat. In flore quippe jam matura est, quia virtutis absolutæ fructus est; nec balbutit infans, vel in ipsa sua infantia, quia vix dum nata parentis laudes sui loquitur, ipsiusque repræsentat, non speciem externam, sed indolem, animumque reddit ipsam, meritaque prædicat,

dicat, ereptaque morti memoriam futuris ætatibus præbet intuendam, colendamque proponit posteris. Degenerare hi non possunt à virtute paterna Filii; sed sicut, quod agebat ille, non

*Imbellem feroces.*

*Progenerant Aquila, Columbam. (Horat.)*

Sic magnæ res non nisi à magnanimis geruntur. [Antistheta.] Cum contra in procreatione liberorum haud raro fiat, ut parentes fama eximii natos pleiunque turpes, & magni pumilos, & cæci fœdes, probi-que suscipiant improbos.

**INTERROGATIO**

**INTERROGATIO** *Figura est qua assu-*  
mitur, non querendi, sed instandi, & ur-  
gendi causa ad varias animi motus ciendos  
opportuna, & usitatissima; cum nulla figu-  
ra sit quæ per Interrogationem non possit ex-  
primi. *Selectione hac apud Tullium. Exempla*  
*sunt.*

[*Expositio, seu commemoratio.*] Quid enim, Tubero, tuus ille districtus in acie Pharsalica gladius agebat? Cujus atus ille mucro periebat? Qui sensus erat tuorum armorum? Quæ tu, mens, oculi, manus ardor animi? Quid cupiebas? Quid optabas? (*Pro Ligat. 19.*)

[*Repetitio.*] Quid, ego illorum dierum epu-  
las, Quid cum tuis sordidissimis gregibus in-

temperantissimas perpotationes predicem?  
 Quis te illis diebus sobrium, quis agentem  
 aliquid, quod esset libero dignum, quis de-  
 nique in publico vidit? (*In Pison.*)

Stipulatus es? ubi? quo die? quo tempo-  
 re? quo presente? Quis spondisse me di-  
 cit? Nemo. (*Pro Co. Celio. 33.*)

Piratam vivum tenuisti, quem ad finem?  
 quamobrem? quam ob causam? quo exem-  
 plo? cur tam diu? etiamne privatus? etiamne  
 penè damnatus.

Ex quibus intelligis, huiusmodi minutis,  
 crebrisque interrogatiunculis urgeri vehemen-  
 tius adversarium, & quasi densa telorum  
 grandine obrui.

**E X E M P L U M.**  
*In Cainum fratris interfectorem.*

Quò, quò te agis, scelerate? Ex quo  
 loco te proripis? [*Reparatio.*] Cur solus? Cur  
 sine fratre? Cur non reducis, quem abduxe-  
 ras? ubi ille est? quo eum loco reliqui-  
 sti? scelestè non respondes? nihil dicis?  
 non loqueris? Unde triste hoc, inusita-  
 tumque silentium? Unde hic oris pallor,  
 & offerrata frons, & capitis iactatio, con-  
 tusque agitatio corporis? Dic, inquam,  
 barbare, quod concepisti nefas? quod  
 in te admisti facinus? quo te impiasti fla-  
 gitio? quid sibi vult in tuas vestes hic re-  
 spectus cruor? quid hæc manuum trepida-  
 tio? quid clamor ille tacitus, quæ in gaudio?  
 Clamat enim haustus terra sanguis, quem  
 effu-

effudisti: An non tu sanguis est fratris, que  
per inauditum scelus modo trucidasti?

(**I R O N I A**) **Q**ui si supra  
dixit: hoc est hoc est: dicitur: et sic loquitur.

**I R O N I A** est: cum aliud plane dicitur,  
quam verba significare videntur. Ita  
Tullius de Verre hominem crudelissimum, dum  
virum honestissimum innocentissimumque  
tempestate perfringda in medio foro nudum  
religari iussisset, virgis cadendum, ut omnes  
quidem, qui aderant, hanc spectacula, et exhi-  
mabant.

Tullius, inquit, hæc homines opinio: vir-  
gis iste caderet sine causa socium populi  
Romani, atque amicum? Non utique eo est  
improbis; non omnia in eo uno sunt vitia;  
namquam fuit crudelis, leniter hominem,  
elementerque accipit &c. (6. in Ver. 78.)

Sed stulti sumus, qui Africanum, Pom-  
pejum, nosmetipsos, cum Publio Clodio  
conferre audeamus. Tolerabilia fuerunt il-  
lis. P. Clodii mortem equo animo nemo fere-  
re poterat. P. Partium distributio. Lugur se-  
natui, interet equester ordo, tota civitas co-  
fecta seculo est, squallent municipia, affli-  
ctæ colonie: agri denique ipsi tam be-  
nificum, tam singularem, tam mansuetum  
civem desiderant. Hæc de hominis scela-  
rissimi mortis idem Tullius. (Pro Milone  
28.) vide Cicer. pro Quin. 36. pro Domo  
sua 104.





virtutum dignitati, religionis propagationi natus esse videreris. [*Laudum Enumeratio, per interrogationem, Repetitionem, & antithetam.*] Quis enim te religiosior fuit unquam, aut esse potuit, vel tum maxime, cum deserto coenobio, detractoque per summan pietatem cucullo, homines innumerabiles a se, vera vitæ ratione ad hilaritatem, ad comotationes, ad epulas, ad rerum omnium licentiam traducebas oratione, & exemplo? Quis temperantior, vel cum in popinis assiduus exhauriebas immania pocula, ebriusque vociferabaris è fuggastu, eructans spurcis sermonibus pietatem, & continentiam. Quis comior, commodiorque tum etiam, cum sanctissimos homines pro se indebas maledictis? Quis modestior, vel dum verbis magnificis, ne dicam arrogantibus, te omnibus anteponebas? Quis castior, vel dum volubaris in coeno turpissimarum voluptatum, nefariisque libidinibus dares operam? Nuptias junxisti quidem Sacerdos; verum est. [*Correctio.*] At cum sacrata virgine. Cauponas, & lupanaria frequentasti, ita est, sed quæ nimirum converteres in academias pudoris, & gymnasia castitatis. Summa tibi cum Dæmone intercessit familiaritas, videlicet, ut pace cum illo facta, facilius amplificares Christi cultum. [*Exclamatio ironica.*] O virum sanctum! O primum, ac pudicum hominem! O religiosissimum Sacerdotem! [*Objurgatio seu increpatio.*] Nefari-

rie, deterrime omnium mortalium, debacchator consceleratissime, nunc audes his flagitiis, his libidinibus ac turpitudine, & audacia, Catholicæ religionis dicere vindicem? &c.

*Præterire non possum Ironiam illam mirabilem ac divinam, quam habet Tullius in Pisonem; quaque, baud scio, an affecti quidquam possit, vel ad leporem elegantius, vel ad majestatem præstantius. Negaverat Piso, quod ignaviam suam, pudoremque tegeret, quod cæterorum more imperatorum, non obtinisset honorem Triumphi: negaverat inquam, se Triumphi cupidum unquam fuisse, contemnere se honorem illum, dixerat; quàm ejus vocem reprebendens Cicero, pro dignitate illum faciat, exagitatque proluxa illustrique Ironia, quam ut imitari discas facilius exprimere hic illam, examissimè conatus sum, & quàm accuratissimè potui. (Ann. 58. ad 63.)*

## I R O N I A.

In Religiosæ vitæ Vituperatores.

Audiamus callidos istos & caupona Philosophos, non tam verbis, quàm ructibus Religiosæ vitæ rationem explodentes. Ajunt vile hoc esse vitæ genus, & abjectum, naturæque repugnans quod hominem natura liberum; & sui juris arbitrio mancipet alieno, perpetuoque velut addictum carceri, non omni solum voluptate privet, ac vitæ commodis; sed etiam

iner-

inerti labore conficiat, vigiliis jejuniisque frangat, irrogatis, atque etiam susceptis sponte pœnis crudelissimè torqueat, beneque adigat ad violentam sibi mortem inferendam.

O gravem, argutamque Philosophiam! Quàm doleo præclari Doctores, quod tam subtilem maturius non exprompseritis sapientiam, priusquam innumerabiles viri, foeminaeque omnium conditionum, & ætatum contemptissimam istam vivendi conditionem amplecterentur! Neque enim integrum est, magnis Ecclesiæ Doctoribus, Basilio, Gregorio, Hieronymo, Chrysostomo, & Augustino consiliis, muti vestris. [*Congeries exemplorum.*] Errarunt illi non gustarunt hanc vestram Philosophiam: hanc enim imprudentes, & inconsultissimi homines austerioris, ignobilisque vitæ rationem tenuerunt. Bruno, Parisiensis Academiae lumen, pudet me tui; quid est, quod relicto celeberrimæ urbis splendore, confectisque studiis, præruptarum, inviarumque rupium horrendas solitudines petiisti? Antoni, Benedicte, Dominicæ, cur non hos audisti tam doctos homines, tam eruditos, tam præstantes, priusquam in illum errorem induceremini. O stulti Epiphani, Damasceni, Hilariones, Celestini, & Eucherii! O amentem Franciscum, & Ignatium! ô nullius consilii Albertum, Thomam, Bonaventuram, Ludovicum; qui

aspernati voluptatum illecebras, & pernicio-  
 sa rerum fluxarum blandimenta, ad Re-  
 ligiosa claustra conuolant, amplexaturi  
 Christi Crucem. Sed quoniam præterita  
 mutare non possumus quid cessant inanes  
 humili hæc præclara precepta date sapien-  
 tiæ adolescentibus innumeris, quid de hoc  
 ineundo severioris vitæ genere dies noctes-  
 que cogitant? Feruntur enim, mihi credi-  
 te omni contentione mentis ad cænobîa,  
 ardenti cupiditate incredibili Christianæ  
 servitutis subeundi iugum; non didicerunt  
 videlicet eadem quæ vos. Ergo agite, illos  
 adite, meditamini, quibus verbis in consan-  
 titudinem cupiditatem comprimitis, atque  
 restringatis. Valebitis apud levissimos ado-  
 lescentulos viri moderati, & constantes,  
 apud ignaros experti, hæc periti. Dicetis  
 enim, ut estis homines ad persuadendum  
 perfecti. Quid est, adolescentes decessi-  
 mi, quod vos horrida hæc, feralisque Re-  
 ligio tantopere delectet? quod tanto, ani-  
 mi ardore, ad ea feramini, in quibus ho-  
 mines errore ducuntur, quæ superi negli-  
 gunt, quæ Deus nec requirit, nec curat?  
 neque enim vitam hominibus largitus est,  
 accerferemus incommoda, levis feraque  
 nobis mala pararemus. Quid verò habet  
 sidem iste Religiosæ vitæ status? Quid fi-  
 bi volunt vota illa solemnia? Quid hispi-  
 dus, & absoletus habitus? Quid solitudo  
 & silentium? quid mendicatio? quid casti-  
 gatio

gatio corporis, frequensque jejunium? inania sunt hæc, mihi credite, deliria somniantium, ac terriculamenta puerorum, verberibus in sua corpora sævire, ambire laborem, latebras aucupari, honores spernere, abiectione gloriari, quibus ex rebus nihil est, quod ad oblectationem animi, solidamque felicitatem referre possitis. Quin nos aspicitis? quin exemplum nostrum sequimini? quin sectamini fugientis vitæ liquidissimas voluptates, & indulgetis genio, animoque obsequimini, deliciisque delicata membra fovetis? Hac vos oratione, non dubito, quin illos, jam pedem in cœnobia inferentes, possitis revocare, & ad paternas domos abducere. O tenebræ! ò cœnum! ò sordes! ò temeritatem, incredibilemque dementiam! Lotharius Imperator, abdicatis supremæ dignitatis insignibus, ad humilem hanc, contemptamque, ut vocatis, vitæ conditionem se abiecit, captans ab honoris proculcatione gloriam, & ab obscuritate loci verum splendorem nominis: Carolomanus, Carolo Martello progenitus, Austrasiæ, & Sveviæ Rex, rerum gestarum gloria clarus, pedum pastoritium scepro, vilemque cucullum coronæ aureæ præposuit: Eandem non dubitavit insistere viam Pipinus Italiæ Rex, Caroli Magni filius natus maximus: Eandem capeffivere Veremundus Castellæ, Ramirus Aragoniæ, Sigibertus, Chenedus,

redus, Inas, Elteredus Angliæ Regeseamdem Augustissimæ Reginæ Theodora, Cunegundes, Agnes, Elisabetha, Radegundes, Batilda, aliæque Principes, ac Heroinæ injerunt, vos oculatissimi rerum æstimatores, sapientiores, quàm Lotharii, prudentiores, quàm Pipini, generosiores, quàm Carolomanî, abundantiores consilio, eruditione, ingenio, & prudentia, quàm Augustini, quàm Gregorii, quàm Basilii, quàm alii omnes, qui implerunt orbem terrarum, virtutum meritis, & doctrinæ gloria, ea contemnitis, quæ illi idiotæ ( sic enim eos appellabitis, ) præclara duxerant.

## L I C E N T I A.

**L**ICENTIA *Figura est, qua utitur orator cùm ea, quæ gravia dictu sunt, aut periculosa, magna libertate dicturum se profitetur. Ut.*

Attende jam, Torquate, quam ego non defugiam auctoritatem consulatus mei; maxima voce, ut omnes exaudire possint, dico, semperque dicam; Adestote omnes animis, qui adestis corporibus, erigite mentes, auresque vestras, & me de invidiosis rebus, ut ille putat, dicentem attendite. Ego Consul &c. ( *pro Sylla* 33 )

Vos, Patres Conscripti ( grave dictu est sed dicendum tamen ) vos, inquam, Sulpitium vita privastis, &c. ( *10. Pb.* 8. )

Postremo, ( erumpat enim aliquando vera, & medigna vox ) si ad eorum voluntatem dicta, factaque nostra referuntur; optanda mors est, &c. ( *Ib* 19. )

### E X E M P L U M.

*Ad Reginam Lusitaniæ S. Elisabetham.*

[ *Congeries Synonymorum.* ] Coronam deposuisti, Regina Illustrissima, abjecisti sceptrum, exuisti purpuram, regnum abdicasti, exauctorasti sacramento subditos, è supremo gloriæ throno descendisti, admirationem movisti populis omnibus, expectatione suspensis, quò demum evasura sit virtus jam inusitata, tam divina, tam incredibilis. Et si enim sit illud, quod fecisti, longè maximum, ut illud vix cuiusquam mens, & cogitatio capere possit; longè tamen majora à te expectantur. Atque, ut dicam liberè, quod sentio, imò quod sentit Christianus orbis universus, Tibi jam non est integrum, quidquam moliri cæteris commune Heroinis, ac Regibus, Audaciùs fortè loquor, quàm deceat; & vereor, si pergam, ut transilire videar modestiæ fines, & temeritatis subeam notam: Dicam tamen, ut cæpi, apertèque proferam meas cogitationes. Sustinere, ac tueri non potes, ò Regina-  
rum maxima, quam concitasti expectationem summæ virtutis, nisi facinus hoc tutum, post hominum memoriam clarissimum,



num; præclarioribus deinceps illustres factis, & novis miraculum commendes miraculis. Hanc tibi ipsa legem, ac necessitatem imposuisti, ut tecum certes, te ipsam vicas, tibi domineris coronamque imponas tuo nomini, quam nec vis ulla nec fatum, atque adeo ne tu ipsa quidem, ut maxime velis, eripere tibi possis.

## P R Æ T E R I T I O.

**P**RÆTERITIO *Figura est, quæ fit cum profiteamur nos præterire, aut nescire, aut nolle dicere, quoddam maxime dicimus. Sunt enim quædam minus honesta, aut nimis communia, aut leviora quæ non nisi obiter perstringenda sunt.*

Sed jam stupra, & flagitia omittam: sunt quædam, quæ honestè non possum dicere; tu autem es liberior, quod ea in te admisisti, quæ à verecundo inimico audire non potes. (2. Phil 74.)

Nefarias ejus libidines commemorare deterreo: simul illorum calamitatem commemorando augere nolo, quibus liberos, conjugesque suas, integras ab istius petulantia conservare, non licitum fuit. (2. in Ver 41.)

Nihil ille à me, de pueritiæ suæ flagitiis audiet, nihil ex illa impura adolescentia sua: omnia præteribo, quæ mihi dictu turpia videbuntur: neque solum, quid istum

audire, sed etiam quid me deceat dicere, considerabo. (3. in Ver. 32.)

Sileatur de nocturnis ejus bacchationibus; lenonum, & alea torum nulla mentio fiat: damna, & dedecora prætereantur. (Ib.)

Nihil de illius luxuria loquor, nihil de insolentia, nihil de singulari nequitia, ac turpitudine, tantum de quæstu, & lucro dicam. (5 in Ver. 106.)

Mitto injuriam istam, mitto nefarias nuptias, mitto expulsum matrimonio filiam: nihil de ejus cupiditate quæror. (Pro Cluentio, 188.)

Omnia vetera prætermittam, unum illud il lustre, notumque omnibus subjiciam. (7. in Ver. 34.)

Possẽ multa dicere de liberalitate, de ejus abstinentia, de ceteris virtutibus: sed mihi ante oculos obversatur Reip. dignitas, quæ me ad sese rapit, hæc minora relinquere hortatur. (Pro Sextio 7.)

Est aliud præteritionis genus aculeatum & ironicum, quoties insectandus nobis est aliquis, hoc fere modo.

E X E M P L U M.

In sceleratum hominem.

Non sum tibi ita inimicus, ut tua omnia hic facinora, criminaque detegam, exponamque singillatim, quibus vitam flagitiis inquinari quàm, sæpè probrum castis, labem integris, infamiam bonis intuleris, quàm fueris in propinquos sceleratus, in amicos per-

perfidus, in patriam impius. Hæc omnia præteribo tui parentis gratia, cujus fui olim studiosus, nec ullo modo à me quisquam audiet, te domum tui expilasse patrui, interfecisse patruelem, sustulisse veneno aviam, matrem non semel verberasse? hæc inquam, non dicam, involvam potius æterno silentio.

**A L I U D.**

*Ejusdem Argumenti.*

Pudore deterreor, Auditores: nec gæneonis hujus impudici sordibus inficere orationem meam, & vestras aures audeo. Vereor, ut videar parùm honestè loqui, si quæ inhonestè fecit, subjiciam. Tacebo ergo illa omnia. Neque enim memorabo, qua impudentia nuper in alienas ædes iruens, suis stipatus affeculis, exturbarit domo sua dominum, paratas epulas abliguerit, lances, pocula, cæteraque vasa projecit in vicum per fenestram, mensas everterit, pavimenta vino resperferit, facibusque lecto subjectis, temulentus prodierit foras; Hæc, inquam, prætermittam, ne vestros animos offendam, & pudori meo vim inferam.

**O C C U P A T I O.**

**O**CCUPATIO *Figura est, per quam ea, quæ ab Adversariis, aut ipsis Auditoribus objici possunt, prævertimus, utroque rationem facti dictique reddimus. Hanc*

*autem Exornationem his fere formulis concinnamus.*

Quæret quispiam; cur respondit non interrogatus? Quid igitur? debuitne suo silentio fateri confictum crimen?

At enim quæ causa fuit, quodd id temporis domi remaneret? Remansit; quia comparari sibi illo die insidias noverat.

At etiam sunt qui dicant, cedendum esse tempori, præferendam quandoque esse honori vitam. Quis amens hoc dixit unquam? Quis aded rationis expers hoc asserere audeat?

Verum, intelligo, quid opponi possit, severius non esse agendum cum adolescentibus, ætati indulgendum: Itane verò, si remissis libidinis habenis, feratur in omne nefas a Joleſcentia, indulgendum est?

Video, quid dicturus sis, coactus, inquires, hoc crimen patravi. Quis coegit? Quis afferre vim potuit voluntati tuæ?

Atque etiam jactare audebis, liberalitatem in illo esse summam. O Deus Immortalis! Hocce est liberalem esse collectum per multos annos patrimonium uno die inlustris; ac popinis profundere?

*Sed audiamus Tullium, hac Exornatione depellentem quod ab Judicibus objici poterat, ipso statim orationis exordio, (nam in Exordiis maxime hujusmodi Figura locum habet, ac præsertim in causis Judicialibus, ad evellendas ex animis Judicum suspiciones,*  
*qua*

*quareo nocere possent) ut sic semoto obice, libe-  
rius in causam invehatur.*

Credo ego vos, Iudices, mirari, quid sit, quod cum tot summi oratores, hominesque nobilissimi sedeant; ego potissimum surrexerim, is, qui neque ætate, neque ingenio neque auctoritate sum cum iis, qui sedeant, comparandus. (*Pro Sax. Rosc. Amerino. I.*) Deinde causas affert cur ad dicendum accesserit, reliquo Exordio.

Eodem ferè modo suam Divinationem, in Verrem auspicatur, dum instituti sui causam redditurus, cur præter morem, & contra quàm, viri gravis officium postulare videbatur se ad accusandum contulerit, sic agit.

Si quis vestrum, aut eorum qui adsunt, fortè miratur, me, qui tot annos in causis, judiciisque publicis ita sum versatus, ut defenderim multos, læserim neminem, subito nunc, mutata voluntate, ad accusandum descenderim; is, si mei consilii causam, rationemque cognoverit, una & id quod facio probabit, & in hac causa profectò neminem proponendum esse mihi actorem putabit. Tum rationes subjicit, quæ illum ad id impulero. (*I. in Verr. I.*)

Idem. Calium defendens, sic amolitur, quod sibi objicit.

Dicet aliquis, hæc igitur est tua disciplina? sic tu instituis adolescentes? ob hanc causam, tibi hunc puerum parens commendavit, & tradidit, ut in amore, & vo-

luptatibus adolescentiam suam collocaret,  
& hanc tu vitam, & studia defenderes?  
*Tum deinde respondet sibi, multa de voluptate disputans. (Pro Cælio 39.)*

*Sed longè præclarius in Verrem agens, occupat, infirmatque ea, quæ respondere poterat Hortensius Verris Patronus.*

Quid agam? inquit, quò accusationis meæ rationem conferam? quò me vertam? ad omnes enim meos impetus, quasi murus quidam, boni nomen Imperatoris, opponitur. Novi locum, video ubi se jactaturus sit Hortensius: belli pericula, tempora Reip. Imperatorum penuriam commemorabit; tum deprecabitur à vobis, ne patiamini, talem Imperatorem; populo Romano, Siculorum testimoniis eripi, neve obteri laudem imperatoriam, criminibus avaritiæ velitis (7. in Verr. 2.)

*Hic addamus unum adhuc exemplum.*

## E X E M P L U M.

De Malè moratis adolescentibus.

*Post enumerata mala; quæ in Scholis committi solent à malis Auditoribus ut probare nullam eorum præceptores, in iis docendis percipere voluptatem, sic occupo, quæ contra afferri possunt.*

[ *Expolitio, seu Congeries Sententiarum.* ]

At dices: non omnes eo more vivunt Adolescentes; non tamen libidini parent, genioque liberiori se mancipant: nec voluntantur omnes, in turpissimo corno vitiorum; Sunt  
etiam,

etiam, qui laude florent. Emergunt aliqui è luto voluptatum, in quod lubricante gressu, deciderant: & videre licet non paucos hac indole virtutis, & continentiae, qui per ætatis abrupta, & declivia sustineant sese, statumque servant, nec officii loco moveantur. Sanè ita est: sunt hac temperantia, & moderatione naturæ non multi quidem, sed tamen aliqui. At demus esse plurimos: An propterea obire suum potest munus cum voluptate pius Doctor, si vel unum alterumve de suis sciat esse Discipulis improbum, sceleribus obstrictum, capitalem Numinis hostem, Cæli, terræque odium futurum, nisi resipiscat, ultricium flammarum immortale pabulum; Quid? mœrorem acerbissimum dissimulare nequit Divinus Magister, cum è duodenis, quos habebat, malum unum esse Discipulum comperit; Et nos tot inter nefarios, sacrilegos, & animi lætitiæ præferemus; Contabescit dolore Pastor; qui unam de centenis ovem aberrasse cognoscit à caula: Et aliquam nos gaudii partem capiemus, tam multis de grege nostro deerrantibus ab honesti via, tam multis à tartareo Lupo sædè laceratis, &c.

## PROSOPOPŒJA.

**P**ROSOPOPŒJA Est persona Effigies, qua rebus mortuis, ac sensus expers  
 E s gibus

tibus sermonem accommodamus, aut cum absentes tamquam praesentes, vita functos tamquam spirantes, ac loquentes inducimus. His autem formulis figurari ferme soles haec Exornatio.

Existat ex ipsa familia aliquis, ac potissimum caecus ille, qui profecto si extiterit, sic ager, & sic loquetur; Mulier, quid tibi cum hoc adolescente, &c. (*Pro Celio. 23.*)

Existat ergo ille vir, parumper cogitatione vestra, quoniam re non potest, ut conspiciatis eum mentibus quem oculis non potestis. An non ita loquetur? (*Pro Balbo 45.*)

Qui populus, si tecum congregiatur, & una voce si loqui possit, haec dicat: Ego tibi illum non anteposui, &c. (*Pro Plancio.*)

Etenim si mecum patria, si cuncta Italia, si omnis respublica loquatur: Marce Tulli quid agis? Tu eum exire patieris, &c. (*1 in Catil. 27.*)

Patria tua, tecum, Catilina sic agit, & quodammodo tacita loquitur: Nullum jam tot annos facinus, nisi per te, &c. (*Ibid. 18.*)

Quodd si nunc ille Brutus reviviscat, & hic ante pedes vestros adsit, nonne hac uteretur oratione? Ego Reges ejeci; vos tyrannos introducitis. Ego, &c. (*Tull. in Annon.*)

### E X E M P L A.

*Prosa popæja lingua exesit.*

Lingua hac illius est Adolescentis Christiani, qui tyranni jussu in hortu amantissimo super herbam Floribus pictum reclinatus consistit.



*strictusque introducta meretricis in os impudens , præcisum mordicus linguam expuit . Porro quamvis excisa sit hæc lingua , format tamen in verba voces , sicque vos Adolescentes alloquitur .*

Adeste mollitie languidi , fracti confectique voluptatibus , huc adeste , huc Effœminati , aures , animosque advertite illud ipsum os intuemini , quo expulsa sum ; dentes , quibus excisa , spiritum , illum quo vibrata , divinam illam vim , qua ejecta immissaque fui , in os luxuriosæ mulierculæ . Ejus ut impura purissimum Os meum respueret oscula : suammet Linguam expuit , cruentari morfu malens , quam suavio pollui ; pulcroque vulnere scœdari , quàm turpi complexu ; sanguine rubere , quàm admissi pudore flagitii , & elingue , mutumque reddi , quàm obscœnum At , nequaquam id futurum est unquam , meum ò crudele juxta , piumque Os ? E lingue quidem deinceps eris , at non mutum ; tametsi enim loqui sine me nequeas , eloquar ego tamen sine te , tuasque prædicabo sine voce laudes , & celebrabo pudicitiam , Utque me vox , spiritusque deficiant , & præstare tibi non valeã officium Linguae , Calamus fiam , agitaboque me in hoc florulento gramine , & cruore à meo vulnere in terram stillante , purpureos pingam characteres , nulla oblivione delendos , scribamque inauditum facinus nunquam nisi cum admiratione legendum .

## P. R O S O P O P Œ J A .

*Anni proximè elapsi .*

Revoceinus lapsum retro tempus , si possumus ; & tanquam è communi rerum caducarum sepulchro , excitemus Annum ab inferis , quem proximè vidimus lamentabiliter expirasse . Lamentaretur enim , hisque verbis nos objurgaret , si loqui posset , Amentes , inconsulti , stupidiorez pecudibus homines ! Quæ malæ , vos , intemperies transversus agunt ? Siccine , momenta temporis quo nihil pretiosius est , effluere sinitis ? Sic horas , sic dies , & menses , ipsosque etiam annos , ignave stolidèque collocatis ? O stultitiam incredibilem ! Annus ego qui nuper abii , quem nuper obiistis tam negligenter , qui concessus vobis singulari Dei beneficio fueram ut ope mea , exiguis mortalis hujus vitæ laboribus immortalis gloriæ fructum referretis ; Et tamen , consumpsistis , me , pro pudor ! quibus in rebus ? dicamne : vix audeo : dicendum tamen , quando mihi etsi mortuo , loquendi facultas tribuitur , in nugis , heu ! in otio , in puerilibus ineptiis me consumpsistis , per fumam incogitantiam , & inertiam . Leviora hæc sunt , me insuper turpissimarum luto libidinum , conspurcastis ; atque in omni flagitiorum dedecore voluptatum , raptum , transactumque per scelera , miserabiliter contrivisti . Egimus annum ,

inqui-

inquitis faustum prosperumque: vobis ipsi, meam jacturam, vestramque perniciem, quæ vecordia vestra, aut impudentia est, gratulamini. Egistis sanè me, scelesti, at quònam tandem, dicite; quæ ad loca? quæ ad flagitia me adegistis, & egistis? ad ganeas, ad lustra, ad effusas libidines, ad omne nefas. Hæccine verò illa est, malè sana capta gratulationis, materies, ut quem vivum adhibuistis annum tam turpiter, de mea indignissima morte gaudeatis.

**P R O S O P O P Œ J A.**

*Lecti, & Lucerna.*

*Lectus, & Lucerna inducuntur à Luciano. ( In Dial. mort. Catapl. ) accusantes apud Rhadamantum inferorum Judicem Magabentem Tyrannum Lacida filium Quod ille impudè ridiculè quæ finxit, fingamus nos ipse; & utrumque peccatori adducamus testem suorum criminum.*

Lectum illum, impure ganeo, quem tot maculasti flagitiis, audies olim, coram divino judice de te conquerentem: Nunc illum audi, te accusantem apud te, & accusationem extimesce:

Quid agis impudicè? ( inquit Lectus ) Quid scelerate, cogitas? Ideòne vivis, ut postquam pergræcatus es ad multam noctem; supra me vinolentus stertas, teque volutes ad multam lucem? Ideòne stratus tibi, instructusque sum, me ut sordibus inficias tuis, & testem me, atque

que administrum esse cogas tuarum turpitudinum? O lutum, ò fœtorem, ò spurcitiem execrandam! Aperiamne, quæ operire flagitia soleo? at meorum erubescit candor linteorum, pudetque dicere, quæ facere non pudet impudentem.

Dicitur, Lucerna, proferre in lucem, quæ Lectus tegit, reticetque.

O tenebræ? ( inquit Lucerna ) Cur me caligine involutam non oppressistis, ne luce mea iter aperire cogerer ad horrenda crimina contaminatissimi tenebrionis! O quoties accensam me dolui! quoties extinctam me volui! maximè, cùm obsecundante libidini nocte, invita me, sed tamen favente; eò ferebatur plenus stupri ac sceleris helluo, quò impellebat insana cupiditas. Aderam, heu me: cùm aliorum vitæ, aliorum pudicitiae insidiaretur; Aderam, suffusa rubore, & spectabam maligno lumine, cum per effrænatam licentiam, omnia pudoris, naturæque ornamenta perfringeret, cum spumaret ex ore scelus, cum incensus furore, & amentia, turpitudinem anhelaret.

( P R O S O P O P Œ J A .

*Bonorum; quibus bono utitur.*

Resiste, ò quisquis es, qui nimio rerum creatarum amore flagras: paucis te volunt Bona illa, quæ possides; aures præbe paulisper illorum querelis; dum tecum de se sic expostulant.

Quid

Quid agis amens? quò inflammata cupiditate præcipitas? quid in nostros amplexus lutulenter ruiis? Ah! furorem inhibe tantisper: formosa sumus, tu deformis; nos nitida, tu sordidus: omnibus nos perfecta numeris, omni tu vitiorum labe turpis, nos denique Bona, tu malus es. Si vis, tuis nos famulari commodis, & obsequi votis, & necessitati servire, & velificari delitijs, utiliaque tibi esse ac bona; esto etiam tu tibi ipse bonus: Non si bonos cupis habere famulos, te vicissim dominum quidem cupimus habere, sed bonum. (*Ex S. Aug.*)

Sic tecum agunt, quæ amas vitæ bona, homo inconsideratissime; his te interpellant, obsecrantque vocibus: quibus si occludis aures: istas saltem, ad Deum, Dominumque tuum, querimonias deferunt.

Effector rerum omnium præpotens, & sapientissime moderator: Quousque nos, Bona tua, quæ fecisti, & quæ laudasti ut *valde bona*? servire patieris tam malis dominis? Cur ancillas pulcherrimas, foedissimorum hominum servitio mancipasti? Ideòne, splendorem nobis concessisti, ac pretium, ut obscœnis, vilissimisque homunculis, & mulierculis, elegantiam dignitatemque conciliaremus? Ideòne voluisti nobis esse bona, ut amaremur dumtaxat à malis, ut à solis possideremur improbis.

RETI-

## R E T I C E N T I A.

**R**ETICENTIA eadem ferme figura est.  
 qua Præteritio, Ἀποσιώπασθαι.

Græcè dicta, cùm scilicet, dictis quibus-  
 dam sermo abruptitur, neque perficitur, quod  
 dici ceptum erat. Ut.

Tu istud aufuses dicere, homo omnium  
 mortalium, quæro, quoniam te digno  
 moribus tuis appellem nomine? ( 4. ad  
 Heren. 41. )

Tu, istud nunc audes dicere, qui nuper  
 alienæ domui : non ausim dicere, ne cùm  
 te digna dixerò, me indignum quippiam  
 dixisse videar. ( Ibid. 13. )

Huc pertinet illud Virgilianum, de Ne-  
 ptuno ( 3. Æneid. )

*Jam Cælum terramque, meo sine Numine  
 Ventis.*

*Miscere, Quantas audetis tollere molles?  
 Quor ego, sed motos præstat componere  
 fluctus.*

## S E R M O C I N A T I O.

**S**ERMOCINATIO, seu Dialogismus,  
 est ficta personarum colloquutio, sive so-  
 lus unus loquatur, sive plures inducantur si-  
 mul colloquentes.

Exemplum habet illustrissimum Cicero  
 ( Orat. Pro Comado 48. ) quo probat, cre-  
 dibile

credibile non esse virum honestissimum esse mentitum: illud omitto quia paulò longius; & aliud, subdo, in argumento venustiori figuratum.

**E X E M P L U M.**

*Affentatio ludificata:*

Mercator locuples novè auro minùs, quam ætate gravis, filiam habebat nubilem, & unicam. Eam cum nuptui tradidisset adolescenti nobili, pro dote, bona sua donat omnia. Peractis nuptiis, gratulantur sibi novi conjuges, insperatam felicitatem; illa, quòd viro nupserit illustri genere, hic, quòd duxerit uxorem benè nummatam. At non item gratulatur sibi senex, angitur contra intimis sensibus, dementiam deflet suam, haberi se ludibrio, secum ipse queritur, se contemni indignum in modum, à Filia, Generoque; sic, ut ne aspectu quidem dignentur obvium. Nèc abiicit tamen spem omnem levandæ ægritudinis. Consilium hoc init callidum. Amicum adit, quem posteaquàm salutavit, quo in loco suæ sint res, docet, & quid excogitavit, simul aperit. Ac nummos, inquit, in hanc rem, mihi non paucos, commoda in paucos dies: Libenter, inquit, ille. En, denique ex hac capsula, quantum voles. Summam iste capit non levem, domumque redit plenus ipsi maximæ. Vix ingressus cubiculum, generum audit suum scallat

las domus ascendentem; abdit se in suum  
 conclave Senex; utque tinnitu pretioso  
 inescet hominem, effundit aureos in men-  
 sam, & numerare nummos alta voce, cla-  
 roque sono incipit. Ad sonitum moneta-  
 lem accurrit, auscultat pro foribus, mira-  
 tur, inhiat. Denique egreditur senex; cui  
 ille; Unde inquit, mi pater, tam densus  
 tibi defluxit imber aureus? Quota, respon-  
 det, hæc summa est ex iis quæ debentur  
 mihi? hanc à debitore recepi hodie, mu-  
 tuo daturus, ex amicis meis cuiquam. E  
 vestigio uxorem ille adit, & O nos amen-  
 tes, inquit, nimiumque credulos! vetu-  
 lus noster etiamnum affluit auro: At illa;  
 Quis ais? auro affluit? faxo ad nos brevi  
 totum refluat, quantumcumque est, non  
 si in arcem ejus arca verratur, impressionem  
 sustineat. Nec plura; ad patrem devolat,  
 vultum ad blanditias componit, ne starea  
 tota fit, melleis verbis, & osculis paren-  
 tem salutat; Ut vales, inquit, mi parens  
 optime, mea faustitas aurea, & fælicita-  
 tis aurora, ò meæ vitæ gaudium. Ille do-  
 lum, dolo excipiens, valeo inquit; te  
 advenisse gaudeo id temporis; volo enim  
 testamentum condere, teque scribere hæ-  
 redem summæ cuiuspiam. Beas me, in-  
 quit illa; at cur me id celaras, pater fi-  
 liam tuam, tui observantissimam, quæ te  
 his oculis plus amo? Nimirum, ait senex,  
 non omnia sunt, quo vis evulganda tempo-  
 re; Ta-



re; Tabellionem accerere protinus; Acceritur; facit ille testamentum; summo deinceps honore colitur; moritur demum; sumptuoso effertur funere; aperto testamento, patet fraus; seque delusos dolent dolosi conjuges.

## S U B J E C T I O.

**S**UBJECTIO *Figura est, qua orator vel interrogat seipsum, & respondet sibi; vel cum alium interrogat, non expectat responsum, sed aliud de suo addit, Vide quàm multis variis fingi possit in his exemplis vel à Tullio petitis, vel ad ejus imitationem compositis.*

Quam offeres excusationem absentiae tuæ? Fuisse te morbo impeditum? at valebas, ut cum optimè: Negotiis distentum? at ludendo contrivisti diem totum.

Quare venenum dare vellet? ne aurum redderet? num petivit? nec crimen hæreret? num quis objecit? (*Cic. pro Cal.*)

Tu meam domum religiosam facere potuisti? Ecqua mente? qua invaseras? qua manu? qua disturbaras? qua voce? qua incendi jussuras? qua lege? quam non scripseras? &c. (*De Harusp.*)

Non appellabitur hostis reipublicæ, qui leges violarit? tu rescidisti; qui Senatus authoritatem contemplerit? tu oppressisti; qui seditiones foverit? tu excitasti.

Quis virtutes indagavit, vitiaque expul-

lit annon vitæ philosophia dux? Quis dissipatos homines in societatem vitæ convocavit? nonne Philosophiæ disciplina? Quis urbes peperit? leges invenit? nonne magistra morum Philosophia?

Quanta est, Deus immortalis! humanæ mentis pervicacitas! quam celeres ingenii motus! Vis pervadat terras ac maria? jam pervasit. Jubes in cœlos evolet? jam evolavit Cupis detinere? non potes. Quos enim obices obiices? pone terræ molem; penetrabit: oppone oceanum; transiliet: mundum ipsum universum obiice, momento superabit universa.

Quid tam novum, inusitatum, quam puerum duodennem, omnes omnium poetarum tenere fabulas? tenet accuratè: Rhetoricæ disciplinam callere penitus? penitus callet; Dialecticæ argutias & jurisprudentiæ tricas didicisse? didicit. Quid tam incredibile, quam id ætatis adolescentulum Latinam, Grecam, Hebraicamque linguam habere probe perspectas? cognitâsque? habet cognitâs. Quid denique tam admirabile, quam eo tempore, quo alii vix loqui expeditè sciunt, de Philosophiæ arcanis, & Theologiæ mysteriis, coram celeberrimo cœtu doctissimorum hominum cum laude disputare? adversantium petitiones eludere? palmam referre? disputavit, elusit, retulit. (*Vide Cic. pro L. Man. 61.*)

Quo-

Quoniam pacto hunc reum defendes? Avaritiæne crimina frugalitatis laude deprecaberis? at nemo illonequior, nemo libidinosior extitit. An dices virum esse fortem? at homo inertior, ignaviorque proferri non potest. An mores probi? quis contumacior? quis superbior? At hæc sine cuiusquam malo, quis acerbior? quis insidiosior? quis crudelior unquam fuit? (*Vide C. in Ver. 492.*)

*Dilatemus exemplo duæ in laudem Eloquentiæ, & Geographiæ:*

*Laus Eloquentiæ.*

Hanc artium Reginam, ipsamet Figura Subjectio laudat, sic eam alloquens. Sisto me, Regina flexanima, subjectissima tibi Figura Subjectio; ut si quid usquam est, quod tuæ nondum potestati fortè subjecerim, id totum nunc tuis pedibus accidens, subjiciam tibi, atque submittam. Subjiciant se quoque mecum, Artes omnes Disciplinæ, Scientiæ, Facultatis; nihilque possidere se profiteantur, quod tibi non subjectum velint. Triumphat igitur, ingeniorum Imperatrix, & voluntatis humanæ Domina, quod nihil sit, quod non planè perfectèque subjeceris. Etenim, quid nunc est quod tuis viribus se opponat? An procax hominum in omne nefas effusissimorum protervia? at eam reprimis, An Effrenatæ cupiditates ac libidines? at eas frangis. An juvenaliter exultans superbia? at coerces.

Ad

An audacia improborum? at cohibes. Flagitiosorum furores? at exarmas. Consceleratorum conatus? non refutas eos solum, sed rides. Quid? homines fortè pertinaciter obfirmati resistunt tibi? an non expugnas? Feri, & agrestes, nonne mitigas? Iminantes ac barbari? an non eorum naturam verbas, mentem torques, mores immutas, commoves animum, & in omnem partem convertis?

*Laus Geographia.*

Cùm simus omnes sic à natura comparati, ut loca, in quibus nunquam fuimus, ad eundi miro desiderio teneamur; quid melius cupiditatem hac in parte nostram explere potest, quàm disciplina Geographiæ? aut quæ usquam regio est; quò per hanc Artem nobilissimam, liberè pergendi potestas non fiat? Vis longè latèque patentes terrarum tractus tempore brevissimo peragrarè? jam peragrasti: excelsa montium iuga conscendere? jam conscendisti: agros oppidis collucentes, littora distincta villis, & urbibus perlustrare? jam perlustrasti. Optas steriles pervadere, mutasque solitudines Africæ? expetis usurpare oculis gemmeas Indici maris oras, aut amænissimas Americæ regiones auri, argenti que venis prædivites? Hæc omnia, dum loquor, si tantisper ad Geographiam te convertas, pervasisti, intuitus, es, objisti.

## SUSTENTATIO.

**SUSTENTATIO** *Figura est, qua suspensos tenemus aliquandiu audientium animos, alia minora recensentes, & reicientes, donec tandem id, quod quasi animo conditum servabatur, exponimus. Adhiberi autem solet hac exornatio, cum explicaturi sumus aliquid inusitatum, admirabile, aut inexpectatum nisi forte quis joculari velit, aut movere risum, ut facit Martialis, hoc Epigrammate.*

Quod convivaris sine me tam sæpè, Lu-  
perce,

Inveni, noceam qua ratione, tibi.

Irascar, licet usque voces, mittasque,  
rogesque:

Quid facies? inquis: quid faciam? ve-  
niam.

*Qua porro ratione fieri hæc figura debeat, præclaro te docebit Exemplo Tullius, his verbis insectans infamem Verris avaritiam ( 7. in Verr. 10. )*

Causa dicta, servi damnati sunt. Quid deinde? quid censetis? furtum fortasse, aut prædam expectatis aliquam? nolite usquequaque eadem quærere; in metu belli furandi qui locus esse potest? Etiam si qua fuit in hac re occasio prætermissa est. Tunc potuit nummorum aliquid auferre, cum accusati sunt: at verò jam damnatis servis, quæ prædandi potest esse ratio? produ-  
ci ad

ci ad supplicium necesse est, itaque produ-  
cuntur, ad pallum alligantur. Etiamnum  
mihi expectare videmini, Iudices, quid de-  
inde factum sit, quod iste nihil unquam  
fecit sine aliquo quæstu, atque præda. Quid  
in ejusmodi re fieri potuit? quod commo-  
dum est. Expectate facinus, quàm vultis  
improbum, unicam tamen expectationem  
omnium. Tum subiicit, quo pacto, Verres pe-  
cunia corruptus: reos solvi jusserit. Subiicia-  
mus, & nos alias ejusdem Exornationis idæas.

## E X E M P L A.

*Honor doctis exhibitus.*

Audite, quanto fuerint olim in pretio  
literæ quibus homines doctos honoribus  
ornarint, non ipsi modo Reges sed Tyran-  
ni. Platonem Syracusas venientem excepit  
Dionysius tyrannus atque pompa? quo ap-  
paratu? qua humanitatis magnificentia, &  
significatione benevolentiae? Expectatis  
hic forsitan, ei vias fuisse cylindro æquatas,  
ut Caligulae? aberratis: aureis resperfas ra-  
mentis, ut Commodi? hallucinamini: flo-  
ribus constratas, ut Heliogabalo? nihil mi-  
nus. Quid igitur? accipite, atque suspici-  
te. Platonem ipsum, aureis vectum qua-  
drigis, aurigans ipse Dionysius, in urbem  
triumphabundus introduxit. O splendo-  
rem litterarum, eximium! ô illusterrimum  
doctrinae decus! *nam huic figurae Exclamatio  
apud subnectitur.*

*Impe-*

*Imperatoris ignavia.*

Ducis hujus invictissimi magnitudinem animi, incredibilemque generositatem admiramini. Videte, quantum finitimis populis terroris injecerit; qua fortitudine inierit prælium, quanta sceleritate debellarit. Audierat, per exploratores, hostem celeritate usum, aliquot loca, improvise adventu cepisse, jamque oppugnari regni munitissimum oppidum. Ad eum repellendum, colligit totum robur imperii: quis ei victoriam non despondeat? Conscribit numerosum exercitum: quis non pertimescat? Vim tormentorum maximam rotat: quid formidolosius? Copias explicat, buccinæ concrepant, tympanorum, ac bombardarum horribilo strepitu, omnia latè loca perfonant; quis obsidionem solvendam non crederet? Denique magnis itineribus contendit ad illud oppidum, cum universo exercitu. Quid deinde sequitur? ubi in conspectu venit, videtque è stationibus suis erumpentes armatorum globos, accingentium se ad certamen, illicò receptui cuncti imperat, ipse admissis equo calcaribus primus omnium arripit fugam. O præclarum Imperatorem non tantum cum Scipionibus & Alexandris conferendum, sed etiam, si placet, superis anteponendum.

*Iracunda Fœmina facinus.*

Hæc nuper scœna, ancillulam cum ferire vellet, idque non posset commode,

quodd manus haberet impeditas, ( tenebat enim altera speculum , altera gemmeum torquem, & armillas aureas ) quid illam fecisse putatis ? Speculum illud, dicet aliquis, in ejus caput impactum, fortè comminuit ? nequaquam, nam pretiosius erat, quàm ut tam levi de causa frangeretur. Quid ? num pede illam percussit, aut cubito ? nimis hoc usitatum est cujus de vulgo mulierum. An probris, conviciisque laceravit ? & illud etiam nimis est vulgare. Quid igitur facere potuit ? neque enim alia videtur esse ratio explendæ iracundiæ, aut dolor ulciscendi. Imò alia est, sed insolita ac nova. Nimirum dentibus rem agere instituit. Ain'tu, dentibus ? quoniam verò modo dicam ; accipite. Puellam, quæ à tergo erat, ejus ut capillos comeret coram venire jubet ; patet illa : tum verò inhumanissima hæc mulier, in ejus os, rostro plusquam tigino irruens, nasum impetit ; miseramque denasasset dubio procul nisi avertens opportunè ancilla vultum, pro naso obtulisset aurem, quam furia penè totam mordicùs abstulit. O nequitiam inauditam !

*Impudice Fœminæ flagitium.*

Fingite anîmo facinus, quàm vultis horrendum, & execrabile, cogitate quidquid immanitatis, & turpitudinis, ad omnem intemperantiam erudita, moliri solet impudentia, vincet hujus fœminæ flagitium cogitationem vestram. Nolete hîc proinde  
refri-



refricare memoriam parricidiorum, incestuum, sacrilegiorum, quæ aut ab historicis conscripta, aut à poetis ficta vel legistis vel audistis Leviora illa simul omnia videbuntur, tamen si gravissima, si cum hoc uno componatur, quod vobis expositurus modò sum. Quod illud autem facinus tam abominandum? horreo dicere, pudore stupet animus, torpet lingua, hæret oratio, nec verba suppetuot, quæ id satis explicent Loquatur ipsa mulier nefanda; scelus nobis suum aperiat, minùs enim erubescet dicere, quod non erubuit patrare. Audite illam, simulque cognoscite, quo furore sæviat, effusa libido, cum semel admissa est; quam difficile coerceri, reprimique possit tartarea lues, cum medullas penetravit intimas totumque animum pervasit. Ego, inquit, insana, cum flagrare in cupiditate, nec amoris nefario obsequeretur fortuna, &c. *neque enim inficienda ccharta est narratio tam horrenda flagitii.*

## TRANSITIO.

**T**Ransitio non tam figura est quàm quidam veluti figurarum nexus, quo fit ut apud inter se copulata orationis membra continuè cobareant efficiantque unum quasi corpus. Dicitur autem Transitio, quod per illam ab una sermonis parte transitor ad aliam, quod quæ ratione fit præstandum,

non tam praeceptis, quam usu. Et lectione cont-  
discendum est. Moneo tantam nullam rem  
ferme esse, in qua oratoris ingenium industria-  
que magis eluceat quam in his Transitionibus;  
easque omnium illustrissimas vulgo censerī, quae  
orationis partes ita delicatè committunt, ut  
ipsae commissurae vix appareant. En tibi non-  
nullas de usitatioribus connectendi formulas,  
Et primùm particulas quasdam huic rei inser-  
vientes.

Ad hæc, illud etiam considerandum no-  
bis est.

Adde his, Accidit his; Accedit ad hoc:  
Hoc accedit, quæ ille gessit in exercitu.

Huc pertinet: Eodem pertinet. His fi-  
nitimum est; Huic proximum est illud &c.  
Ad hunc ordinem referendum est quod do-  
mi contigit.

Jam verò quid referam? &c. Age verò  
explicemus nunc, &c. Quid? quod factum  
etiam incessit?

Nihil jam dico de illo scelere. Omitto  
domesticas ejus sordes. Nam illud quid at-  
tinet commemorare?

Sed hæc de particulis connectentibus: nunc  
ad quasdam Transitiones transeamus, è variis  
Rhetoricæ locis deductas.

Sed hæc, utcumque ignoscenda; illud  
quis ferat?

Audistis gravissima, sed audietis gravio-  
ra.

Sed hæc privatim; nunc quæ publicè  
gesta

gesta sunt, videamus.

Sed hæc Juvenis peccavit, nunc ejus virtutes audietis.

Quid his immoror? ad id, quod est hujus causæ caput festinet oratio.

Habes quid in illum contulerim beneficiorum, nunc quam gratiam mihi retulerit, accipe.

Sed hæc vetera, illud autem recens. Cæsarem meo consilio interfectum. (*Phil.* 2. 25. )

Sed ne fortè ex multis rebus gestis M. Antonii, rem unam pulcherrimam transiliat oratio, ad Lupercalia venimus. Non dissimulat Patres conscripti, apparet esse commotum sudat, pallet. (*Ibi* 84. )

Sed arrogantiam hominis insolentiamque cognoscit (*Ibid.* )

At etiam ausus es; quid autem est, quod tu non audeas? (*Ibi* 16. )

Ad ejus Tribunatum, qui ad sese jam dudum vocat, & quodammodo absorbet orationem meam, contempto studio, cursuque veniamus (*Pro Sextio* 13. )

Sed nimis multa de nugis, ad majora veniamus. (*Phil.* 10. )

Sed nos pariter nimis multa de his Figuris: ad aliam hujus Libelli partem veniamus, & de Amplificatione jam differamus.

## DE

## AMPLIFICATIONE.

**A**MPLIFICATIONIS nomine, non hîc ego cum Cicerone intelligo graviolem quandam Affirmationem, quæ motu animorum conciliat indicendo fidem, & quæ non nisi ad magnas, gravesque causas adhibetur; hæc enim Tyronum, quos informare volumus, captum excedunt; Sed cum Isocrate, Artem illam intelligo, qua ex parvis, ampla (unde *Amplificationis* nomen deductum est) ex angustis, extensa, & lata, (ex quo *Dilatatio* nuncupatur) ex coactis compressisque, diffusa, & explicata fiunt; unde etiam rei *Explicatio* dici potest. Atque hoc ipsum est, quod hîc explicandum suscepî, quodque ut ordinatè fiat, Trifariam hoc Progymnasma dividam ac primum præcepta quædam, sed pauca, tum Rationem Amplificandi; denique Exempla quædam Amplificationum proponam.

## P A R S I.

*Amplificationis Præcepta.*

- I. **A**MPLIFICARE, non est, inani Verborum exaggeratione, rem augere  
supra

supra modum, eique plus attribuere, quam veritas concedit : Alioqui non video, quid discriminis esse possit, inter Amplificandum, & mentiendum. Sed

II. Amplificare quidpiam dicimus, quoties ea, quæ insunt in ipsa re, aut affinitatem habent cum illa, ex prominus dicendo subijcimusque sub aspectum. Sic suas Propola merces amplificare dici potest, cum quæ habet variis in cistellis recondita, convoluta, & complicata, evolvit, & disponit ordinatim singula, exponitque in Officina, suo quæque loco: Similiter Orator, dilatare dicitur aliquid, cum ejus partes omnes, alias aliis insertas ac permixtas explicat, ut singulæ appareant, & suum ab aliis segregatæ, seorsum obtineant locum. Quod planius ut fiat, Adverte.

III. Nullum esse argumenti genus, nullam sententiam, propositionem nullam, quæ, cum sit quoddam totum, seu physicum, seu morale, partes non habeat suas, vel physicas & veras, vel morales, hoc est, cogitatione distinctas. Primi generis partes habet hæc propositio, **ORBEM PERAGRAVIT UNIVERSUM** Orbis enim, veris partibus constat; terra scilicet ac mari; provinciis, regnis, variis regionibus. Secundi generis partes habet ista **CAINUS FRATREM INTERFECIT**. Nam execrandi hujus facinoris partes, saltem animo distingui inter se possunt,

sunt, Adjuncta nimirum singula, quas vulgo *Circumstantias* dicimus, cujusmodi sunt, Persona, locus, tempus, instrumentum, finis, &c. quæ huic sceleri, sunt loco partium. Observa porro:

IV. Cujus pronum esse, *veras* ac naturales partes totius cujuspiam invenire, quod nimirum cadant sub oculis; At quas *Morales* diximus, non ita facile deprehenduntur; quippe quæ ab ingenio nostro pendeant, & mentis acie, quasi producantur. Itaque requiritur ratio quædam, qua facilius investigari, & inveniri queant: Hanc verò rationem docet Rhetoricæ ars, quam tibi ut hoc loco tradam, verbis paucissimis adverte.

V. Præcipuos quosque Rhetoricæ locos, unde amplificationes petuntur, reduci posse ad locum unum illum, qui *Enumeratio*, seu *Distributio partium* appellatur; Quæcumque enim Amplificationes fiunt à locis singulis, nihil aliud sunt, quam *Enumerationes*: vel Definitionum, vel Adjunctorum, vel Antecedentium, & Consequentium, vel Contrariorum, & Repugnantium, vel Similitudinum, & Exemplorum, &c. quæ Definitiones, Adjuncta, Antecedentia, aliaque id genus, nihil sunt nisi Partes illius Compositi seu Propositionis, quam amplificandam suscepimus. Id, ut pateat, vel ipsis puerulis, luce clarius, superesse tantum videtur, ut.

VI. Exem-

VI. Exempla quædam brevissima, ad dictionum confirmationem adducam. Sit igitur hæc dilatanda propositio.

Flores oblectant.

*Ab Enumeratione Definitionum.*

*Nil dicam de verbo, oblectant; solum ejus Nominativum, Flores, dilatabo à Flo- rum Definitionibus, quæ sunt tanquam Partes illius nominis.*

Flores, exquisitissima naturæ omnium parentis Ornamenta, Ocelli hortorum examinis, odorifera telluris Astra, molles, vivæque Gemmæ, nectareæ roris, & mellis Officinæ, Nympharum Decor, & amores, Sedes Gratiarum, Blandimenta Cupidinum, amœnitatum omnium, illeceberrarumque puriorum picturatæ Pyxidulæ, oculos odoratumque incredibili delectatione demulcent.

Rempublicam conservavit Cicero.

*Ab Enumeratione partium.*

Cum perditissimorum hominum nefarios conatus repressit in contulatu, audaciamque refuravit, M. T. Ciceronis summa vigilantia, & divina dicendi vis; Senatus auctoritatem debilitatam, ac propè oppressam erexit, Patriciorum ordinem amplissimum amisso splendore reddidit, Equites Romanos asserit in libertatem, plebem vindicavit servitute crudelissima, Ignem ab Aedibus prohibuit, sacrilegia & rapinas arcuit ab Aris & Templis, à Mœnibus cui-

nam avertit, tyrannidem repulit à Curia;  
vim à Fœminis; ferrum à Viris, calamita-  
tem propulsavit ab omnibus, peste præsen-  
tissima Italiam liberavit, Remp. denique  
universam jam præcipitantem, & in cer-  
tum ruentem exitium, invicto robore susti-  
nuit, mirabili solertia excitavit, & in pristi-  
num summæ dignitatis gradum restituit.

*Vides tibi recensitas Partes Reip. singulas;*

Judas prodidit Christum.

*Ab Enumeratione Adjunctorum.*

*Partes illius propositionis hæ, adjuncta  
sunt. Quis prodidit, Quem, Quibus, &  
Cur prodidit; Quibus auxiliis, Quomodo,  
Ubi, & Quando prodidit. Ex quibus omnibus  
in unam collectis longiorem periodum, prodit-  
tionem illam sic expones.*

[*Quis*] Immanis ille furcifer ac latro,  
tetrum illud horribileque hominis mon-  
strum ex omni scelere concretum, ex om-  
ni coagulatum malitia, vilissimus ille,  
detestabilisque servus, homuncio transfu-  
ga; [*Quem*] Ducem, Dominum, ac Deum  
suum, omnis sanctimonix fontem, omnis  
Thesaurum sapientix, hujus universitatis  
Effectorem, summumque Arbitrum [*Ubi*]  
in horto divinis dudum ipsius vestigiis,  
precibus ac lacrymis, nunc etiam fuso hu-  
mi sanguine, recens consecrato; [*Quan-  
do*] hac eadem nocte, qua post celebratam  
cum illo cœnam, lutulentos ejus pedes,  
Christus ipse abluerat & exterserat; [*Cur;*]

æstro



æstro avaritiæ percitus, turpissima pecuniæ cupiditate stimulatus, incensus, [*Quomodo*] non aperta vi, sed dolo irruens, non denunciâns palam bellum, sed pacem simulans; ficta salutatione pestilenti complexu, atroci osculo; [*Quibus*] nefandæ carnificum cohorti, quibus stipatus erat, & insensissimis inimicis ejus vitæ jam diu insidiantibus, per inauditum execrabilemque perfidiam, vinciendum, excrucians, ac contrucidandum objecit.

*Mitto hic enumerare locos alios: Ex his enim tribus Exemplis, satis perspicuum fieri putò, quod supra dixi; videlicet, omnia Amplificationum capita, ad unam Enumerationem partium referri posse: Alia qui velit Exempla, suo loco inveniet penè multa, omnisque generis.*

## P A R S II.

### *Amplificandi Ratio.*

**S** EQUITUR jam, ut post Præcepta Amplificationis usum docearis; quæ videlicet ratione, quodvis argumentum dilatare debeas, faciliq; negotio possis. Hæc Rhetoricæ Pars est ut omnium præstantissima, maximeque necessaria, ita etiam difficillima: Meum est, difficultates amovere, aut certè minuere, quod spero me consecuturum, si à me dicenda modò, diligenter perpenderit.

*Ad Amplificationem duo remittuntur.*

**Materia & Forma** : hoc est. ipsæ Res seu Argumenta, quibus ad aliquid probandum utimur, & modus seu Ratio, qua res illæ & argumenta pertrahantur.

Exempli causa sententia hæc tibi probanda, & amplificanda preponitur. *Pigritia est fugienda.* Ut instructū munus exequi valeas, duo tibi præstanda sunt. Primò, Inveniendæ sunt Argumenta plurima quibus conficias Pigritiam esse fugiendam. Secundò, scire debes, qua ratione, inventa illa Argumenta eleganter, & ornatè tractanda sunt. Verū utrumque ut percipias, utrumque nunc enitar dilucidare pro virili, gemino Capite.

## C A P U T I.

*Ars conquirendi, & inveniendi Rationes, & Argumenta.*

**H**anc Artem triplici quasi clave aperio tibi triplicem explicando Modum inveniendi argumenta, & materiam Amplificationis: Primus erit, per Locos Orationis. Secundus, per Adjectiva Nomina. Tertius, per ea, quæ sensibus obijciuntur, **Ac nunc ordiamur, à primo.**

## §. I.

## PRIMUS MODUS

*Inveniendi Argumenta per Locos Rhetoricos.*

**P**rimus hic Modus communis, & usitatus, cum scilicet, conquiruntur Argumenta, in Locis Rhetoricis, in quibus nimirum, tanquam in quibusdam pyxidibus includuntur. Quemadmodum autem pyxidibus, narthecisque adscribi solent earum rerum nomina, quas continent, ita hi loci, quibusdam notis indicant, quid in quoque Loco queri oporteat, v. g. hæc nota, seu epigraphe, à *Definitione*, ostendit inquirendum esse illo loco, Definitiones rerum, de quibus agitur. A *notatione nominis*, investigandum esse; quid rerum illarum nomina significant. A *distributione partium*; quibus partibus illæ consent, & sic de alijs.

Observanda porro duo sunt. Primum: Ex his locis alios esse exiles plerumque macrois sterilibusque, è quibus, vel nullæ, vel exiguæ rationes peti possunt; cuiusmodi sunt, A *notatione nominis*, & à *Conjugatis*; alios feraces uberes, & secundos arguentis quales sunt, ab *Effectibus*, à *Contrario*, ab *Enumeracione partium*, &c. Secundum: Non ex omnibus locis, ad quidvis probandum, erui argumenta posse: Qui enim loci; ad rem unam conficiuntur.

aliam probandam, inutiles erunt: Quod enim de ipso soli ingenio vulgò ajunt, *Non omnis fert omnia, tellus* (Virg. 1. Geor.) Sic, non omnis Locus, cuivis argumento, rationes suppeditat. Itaque quod in agriculturæ arte faciendum esse monet Poeta ut consideremus.

*Et quid quæque ferat regio, & quid quæque recuset.*

Propterea quod.

*Hic segetes, illic veniunt felicius uva;  
Arboris fetus alibi, atque injussa virescunt  
Gramina.*

Idem in hac arte curandum est, & indagandum: qui Loci, Argumento, quod suscepisti convenientiores sint, & qui minus idonei ut his omisissis, diligentius excutias illos.

Ac jam exemplo ostendamus unico, qua ratione, à singulis Locis Rhetoricæ, Argumenta duci debeant.

### C A S T I T A S.

*Castitatem, Virtutem pulcherissimam, adeoque amabilissimam, à locis illis communibus brevissime sic evinco.*

*A Definitione.*

Castitas, virtutum Nitor, vitæ Decus, Lux honestatis, celestis elegantiae Fons, puriorisque formæ, formosa Frons, amorem vestram, Adolescentes, ac venerationem flagitat. *Vides hic Definitiones Castitatis; vide jam Partes in quibus illa refulcet.*

*Apar.*

[ *Interrogatio Repetitioni conjuncta* ] Quid enim dignius amore vestro ? Oculorum aciem, in ejus oculos advertite; quid splendidius? frontem suspicite: quid serenius? videte genas: quid suavius? cernite sinum: quid pudicum magis? Caput, collum, brachia, manus, totius demum corporis speciem, habitumque intuemini, quid oro, speciosius, cadere sub aspectum potest?

Vel ipsum Castitatis nomen, quod dico, prædicat, (*Castitas à Castigando dicta*) cum enim castiget illa, coerceat, emendetque proclivitates vitiorum; partes insuper corporis singulas, ad justum sic exæquat modum, nulla ut forma absolutior, nulla species castigatior esse queat, pulchritudine Castitatis.

[ *Apostrophe.* ] Ergo, qui hanc ambitis laudem castimonix, castam agite vitam, caste vos ubique gerite, nihil nisi castum, nisi pudicum verset animus, lingua proferat, manus moliatur, (*Castimonia, caste, castam, Conjugata sunt.* )

Magna quidem species Virtutis, ac dignitas est, eximium hominis decus, & gloria. At illius speciei nitor, dignitatisque claritas, & illius gloriæ splendor an non est

**Castitas?** (*Virtus est genus, Castitas est forma eiusque species, sub illo contenta.*)

*A Simili.*

Certè, ut cæteros vincit flores candore, ac decore lilium: ut Stellas fulgori obscurat suo, Luna: sic pulchritudine videtur Castitas, cæteris virtutibus anteire. *Similitudo patet.*

*A Dissimili.*

Utque nihil est cœno voluptatum turpius ac contemptius; ita ista Virtutum cœlo, nihil augustius exillit atque præstantius. (*Cœnum, ac Cælum dissimilia.*)

*A Causa.*

In hoc Cœlo, ceu in Throno suo sedet, Virgo Deus castissimarum Procreator Mentium, (*en causa Efficiens,*) quæ tametsi terrenis corporibus copulatæ (*en Materialis*) ab omni tamen contagione sensuum remotæ, labis prorsus expertes sunt; (*en Formalis*) quò puriorem in se perfectioremque Divinæ Nominis imaginem repræsentent, *En Finalis.*

*Ab effectu.*

Et verò repræsentat, Aeternæ Mentis supremam potentiam Casta mens, ut cæteras sileam ejus laudes; cum, quod Deus semel efficit, nunquam non facit Castitas, illæ in præstans animum, non tantum corpus, medios inter ignes impuratæ fornacis, furentibus exaestuans libidinum flammis, *Effectus ille Castitatis est admirandus.*

*A Con-*

*A Contrário*

Iis nempe flatuibus, quas obscœna Cupiditas, excitat, fovet, alit, incendit, ut quantum ab hoc vitio detrimenti manet, ac turpitudinis, tantum ab hac virtute in nos commodorum, & honestatis profluere fætentur. (*Illæ Cupiditas obscœna, Castitatis contraria est.* )

*Ab Antecedentibus, Concomitantibus, Consequentibus.*

Quidni verò id gloriôsè fateremur in ejus gratiam: quam comitantur virtutes innumere antecedit nulla quam exquisitissimæ gratiarum dotes exornant, quam pretiosissima animi bona, & ornamenta consequuntur, & in cujus unius sinum, munera simul omnia confluunt, quæ singula seorsim illustrent. (*Clara hinc sunt omnia.* )

*Ab Exemplo.*

Testis est, regina Virginum, cui Castimoniæ decor incomparabilis, tantum gratiæ, tantum majestatis aspersit, ipsum ut Opificem suum, & Effectorem mundi Deum, traduxerit in sui amorem, & admirationem, purissimoque sinu conciuserit, (*Exemplum est Dei Mater.* )

*A Comparatione.*

Incomparabilem dixi decorem Castitatis: nam, quod cum illa comparem, nihil occurrit usquam. Iurò, plurimæ sese mihi virtutes offerunt, quas ei componam; ita est.

est. Sed nec ex iis unam reperio, quæ pulchritudinem laudis Castimonix, virtutum amabilissimæ; non concedat.

*Habes hic Oratiunculam ab omnibus contextam locis Rhetoricis, à quibus singulis singula ita duxi argumenta, itaque inter se connexi, ut unum quasi corpus efficiant cui pro Exordio esse potest primus Definitionis Locus, & pro peroratione, Locus Comparationis ultimus.*

## §. II.

# SECUNDUS MODUS

*Inveniendi argumenta, per adjectiva Nomina.*

**M**odus hic, à nemine quodd sciam, indicatus, nihil quidem speciosum, ipsa fronte præsefert, spero tamen fore, ut fatearis, nihil in hoc genere uberius & accommodatius tradi posse. Adverte modo animum.

Nihil est eorum, quæ in disputationem cadere possunt, quod bonum, vel malum non sit, quod laude dignum non censeatur, aut vituperationi obnoxium. Illud, tu cuiuscumque sit generis si confirmare voles Argumentis prope innumeris, habeto in promptu, *Adjectiva nomina*, quæ vituperium, vitiumve significant; Ac tum, singula inspicere, & eorum sensum perpende; miraberis tot ferè tibi Argumenta obici, pene non



non cogitanti, quot Adjectiva sumpleris; Id verò antequam declarem fusius, operæ pretium fuerit, hîc attexere præcipuorum Adjectivorum Nominum Indicem, tum quæ boni, tum eorum, quæ mali cuiuspiam significationem habent. Addam etiam; quæ in utramque partem accipi possunt, & tam laudi, quàm vituperio communia sunt, Adiiciam, & Substantiva quædam, è quibus item, ut ex Adjectivis, rationes deduci queant.

## I N D E X

*Adjectivorum Nominum, ad Amplificandum aptissimus.*

### Adjectiva Laudis.

<i>Admirabilis.</i>	<i>Clemens.</i>	<i>Floridus.</i>
<i>Amabilis.</i>	<i>Comis.</i>	<i>Fortis.</i>
<i>Argenteus.</i>	<i>Commodus.</i>	<i>Gemmeus.</i>
<i>Aureus.</i>	<i>Constans.</i>	<i>Generosus.</i>
<i>Angustus.</i>	<i>Contentus.</i>	<i>Gloriosus.</i>
<i>Beatus.</i>	<i>Desiderabilis.</i>	<i>Gratus.</i>
<i>Bellus.</i>	<i>Diligens.</i>	<i>Hilaris.</i>
<i>Blandus.</i>	<i>Divinus.</i>	<i>Honestus.</i>
<i>Bonus.</i>	<i>Doctus.</i>	<i>Honoratus.</i>
<i>Candidus.</i>	<i>Dulcis.</i>	<i>Humanus.</i>
<i>Castus.</i>	<i>Elegans.</i>	<i>Illustris.</i>
<i>Celebrandus.</i>	<i>Egregius.</i>	<i>Innocens.</i>
<i>Charus.</i>	<i>Excelsus.</i>	<i>Iustus.</i>
<i>Clarus.</i>	<i>Faustus.</i>	<i>Laudabilis.</i>
		<i>Magnus.</i>

Magnificus.	Potens.	Sapiens.
Mansuetus.	Præclarus.	Serenus.
Modestus.	Pudicus.	Splendidus.
Nobilis.	Pulcher.	Suavis.
Obediens.	Rarus.	Sublimis.
Officiosus.	Rectus.	Tranquillus.
Ornatus.	Sacer.	Venerandus.
Perfectus.	Salubris.	Verus.
Pius.	Sanctus.	Vigilans.
Politicus.	Sanus.	Utilis.

## Substantia Laudis.

Adamus.	Flos.	Rex.
Agnus.	Gratia.	Regnum.
Ara.	Laurus.	Religio.
Astrum.	Lux.	Ros.
Cælum.	Oder.	Salus.
Consolatio.	Pax.	Sceptrum.
Cor.	Premium.	Sol.
Corona.	Purpura.	Templum.
Christallus.	Quies.	Thesaurus.
Decus.	Radius.	Victoria.
Delectatio.	Ratio.	Vita.

## Adjectiva Vituperii.

Accusandus.	Calidus.	Deplorandus.
Amarus.	Captivus.	Desperatus.
Arrogans.	Contagiosus.	Durus.
Asper.	Contemptus.	Effeminatus.
Atrox.	Corruptus.	Effrenatus.
Austerus.	Crudelis.	Egens.
Barbarus.	Damnosus.	Fallax.
Caducus.	Deformis.	Ferreo.
Cecus.	Demens.	Ferus.

# Amplificationis Præcepta. 141

Flagitiosus.	Ingratus.	Pavidus.
Fædus.	Injustus.	Periculosus.
Fætidus.	Insidiosus.	Piger.
Funestus.	Insolens.	Putridus.
Furax.	Intemperans.	Rebellis.
Furiosus.	Intollerabilis.	Rudis.
Horridus.	Inutilis.	Sacrilegus.
Ignarus.	Lethifer.	Severus.
Ignavus.	Luxuriosus.	Sordidus.
Immodestus.	Malus.	Stupidus.
Improbus.	Miser.	Tardus.
Imprudens.	Molestus.	Temerarius.
Impurus.	Mutabilis.	Timidus.
Inanis.	Nocens.	Turpis.
Incommodus.	Obscurus.	Vanus.
Infamis.	Odiosus.	Veneficus.
Infauftus.	Parcus.	Venenosus.
Infidelis.	Parvus.	Vilis.

## Substantiva Vituperii.

Aculeus.	Culpa.	Morbus.
Bellua.	Dæmon.	Mors.
Bellum.	Damnum.	Odium.
Bustum.	Decus.	Pecus.
Cadaver.	Dolor.	Seditio.
Calamitas.	Fæx.	Serpens.
Carcer.	Fames.	Servitus.
Catena.	Fel.	Spina.
Cænum.	Fæditas.	Strages.
Colluvies.	Gurgis.	Stultitia.
Crimen.	Insidia.	Tyrannis.

Adje-

## Adjectiva Communis.

<i>Abconditus.</i>	<i>Facilis.</i>	<i>Novus.</i>
<i>Abundans.</i>	<i>Fertilis.</i>	<i>Nudus.</i>
<i>Adversarius.</i>	<i>Fecundus.</i>	<i>Patiens.</i>
<i>Æternus.</i>	<i>Immensus.</i>	<i>Perseverans.</i>
<i>Afflictus.</i>	<i>Immortalis.</i>	<i>Plenus.</i>
<i>Amicus.</i>	<i>Incensus.</i>	<i>Primus.</i>
<i>Aptus.</i>	<i>Indignus.</i>	<i>Privatus.</i>
<i>Armatus.</i>	<i>Insatiabilis.</i>	<i>Robustus.</i>
<i>Ardens.</i>	<i>Insignis.</i>	<i>Severus.</i>
<i>Audax.</i>	<i>Levis.</i>	<i>Similis.</i>
<i>Avidus.</i>	<i>Liber.</i>	<i>Solidus.</i>
<i>Bellicosus.</i>	<i>Longus.</i>	<i>Tener.</i>
<i>Callidus.</i>	<i>Lugubris.</i>	<i>Tristis.</i>
<i>Celer.</i>	<i>Magnus.</i>	<i>Vacuus.</i>
<i>Credibilis.</i>	<i>Mastus.</i>	<i>Venalis.</i>
<i>Deceptus.</i>	<i>Necessarius.</i>	<i>Unus.</i>
<i>Delicatus.</i>	<i>Niger.</i>	<i>Vulgaris.</i>

## Substantia Communia.

<i>Arbor.</i>	<i>Collectio.</i>	<i>Labor.</i>
<i>Ars.</i>	<i>Columna.</i>	<i>Lac.</i>
<i>Arx.</i>	<i>Compendium.</i>	<i>Lex.</i>
<i>Aula.</i>	<i>Cuna.</i>	<i>Opinio.</i>
<i>Basis.</i>	<i>Cura.</i>	<i>Orbis.</i>
<i>Calor.</i>	<i>Delitia.</i>	<i>Pondus.</i>
<i>Canalis.</i>	<i>Fama.</i>	<i>Radix.</i>
<i>Campus.</i>	<i>Fax.</i>	<i>Rumor.</i>
<i>Cardo.</i>	<i>Flamma.</i>	<i>Speculum.</i>
<i>Causa.</i>	<i>Fons.</i>	<i>Via.</i>
<i>Cavis.</i>	<i>Fornax.</i>	<i>Voluntas.</i>

Ex his omnibus Adjectivis præcipua hæc sunt triginta.

*Ad Laudem.*

<i>Beatus.</i>	<i>Honestus.</i>	<i>Potens.</i>
<i>Bonus.</i>	<i>Jucundus.</i>	<i>Pulcher.</i>
<i>Fortis.</i>	<i>Iustus.</i>	<i>Sublimis.</i>
<i>Gloriosus.</i>	<i>Nobilis.</i>	<i>Utilis.</i>

*Ad Vituperium.*

<i>Fallax.</i>	<i>Injustus.</i>	<i>Molestus.</i>
<i>Fadus.</i>	<i>Inutilis.</i>	<i>Turpis.</i>
<i>Incommodus.</i>	<i>Miser.</i>	<i>Vanus.</i>
<i>Inconstans.</i>	<i>Malus.</i>	<i>Vilis.</i>

*Communia.*

<i>Abundans.</i>	<i>Facilis.</i>	<i>Necessarius.</i>
<i>Difficilis.</i>	<i>Magnus.</i>	<i>Parvus.</i>

Usum nunc à me requiris hujus Indicis, accipe. Ponamus, orationem tibi de pace, scribendam esse. Quid facto opus?

I Colligenda sunt ea omnia, quæ ad illius laudem conferre possunt. Id assequeris autem levissimo negotio, percurrento vel oculis, vel memoria, si memoriter comprehensum habeas indicem illum, momenti quod esse duco maximi ( præcurrento, inquam, *Adjectiva*, illa *Laudis* cum Pax, per se laudanda, & expetenda, sit ) nec non *Substantiva* lustrando, illis adjectivis adjuncta; eaque sumendo, quæ magis argumento conducent, aliis ommissis.

z. Si hæc non sufficient, indagabis etiam

*etiam Adjectiva communis significationis* : indeque pariter erues , quæ convenientiora videbuntur .

3. Si necdum illa satis erunt ; & à contrariorum loco ( quæ locus ad probandum valet maxime ) Pacem commendare voles . Expones . *Adjectiva* , & *Substantiva Vituperii* , ut ostendas carere Pacem malis istis omnibus , quæ per hujusmodi Nomina significamus .

4. Quod observandum dixi , si Pax , aut quævis alia res laudanda sit ; idem prorsus faciendum moneo , si Bellum , aliudve quidlibet sit vituperandum . At amabo ; quam multa censes , ab hoc Indice tibi subministratum iri Argumenta ? vix credas , nisi id oculis usurpes tuis . & tangas manu : Sic ergo , Exempli gratia , laudanda .

#### VIRGINITAS.

Laudum Illiadem , & rationum sylvam suppeditabit Index supra scriptus , singula ejus vocabula excutere si noris hoc pacto .

*Per Adjectiva Laudis .*

Admirabilis : Virginitate quid admirabilius , quæ hominem Angelo simillimum reddit ? quæ mediis in flammis , illibatas servat ab igne nives , &c.

Amabilis Virginitatis propria hæc laus est ; ut enim nulla pulchrior , ita nec amabilior ulla est virtus . Hujus amore , pellectus in terra ipse Deus Virginis gremium , &c.

Argen-

**Argenteus.** Sordet Argenti nitor, & obscurusejus est candor, hunc Virgineo candori, conferas; adeò blandè fulget, pietiosè radiat, amabiliter adblanditur.

**Aureus.** Quod in metallis Aurum, hoc inter virtutes Virginitas; Eas enim splendore vincit, pretio superat, decore antecellit.

*Per substantiva. Laudis.*

**Adamas.** Si Gemmæ sunt virtutes, quibus æternæ gloriæ diadema textitur; an non Virginitatem, omnium longè præclarissimam, illarum Reginam, & quasi Adamantem esse dices?

**Agnus.** Agnum illum cœlestem sine macula, sequuntur Virgines quocunque jerrit ad ejusque nuptias, & amplexum, eas præcipuè vocari, quis ignorat?

**Ara.** Cor nostrum Ara est, odoribus jugiter fragrans thure suavioribus, divinique amoris igne semper ardens, modò hunc ignem sacrum custodiat Vestalis virginitas.

**Astrum** sublime à terra est, & cœlo proximum, lucidissimum, incorruptum, nulla temeratum nubecula. Quid virginitati similis?

*Per adjectiva communia.*

**Absconditus.** Verè Thesaurus est, hæc virtus, in agro humani corporis absconditus: eam servemus ergò pari cura, qua thesaurus solet: O si paterent bona, quæ abscondit Virginitas in casto sinu!

**Abundans.** Abundat Virgo, omnium copia bonorum cœlestium, perennis abundat gaudiis, deliriis abundat sempiternis.

**Adversarius.** Qui adversarius Virginitatis est, eum pariter necesse est; adversarium esse rationis, virtutis hostem, honestatis inimicum, &c.

**Æternus.** Voluptates æternas, liquidas, ac purissimas; hæc virtus percipit, quod turpes aversetur, obscenas respuat, vanas contemnat, fluxas, & caducas aspernetur.

*Per Substantiva Communia.*

**Arbor.** Fœlix Arbor ac ferax, Virginitas in Paradiso Dei confixa, quam suavis odoris flores effundit, quam nectareos, quam generosos, egregique saporis fructus producit!

**Ars.** Hac Arte mirabili, quæ non sunt miracula? Et spiritus lilia leguntur; Nives in igne durant; A corrupta radice, incorrupti fructus progerminant.

**Arx.** Hanc arcem quam multi, quam feroces: quam impotenti, & scelerati hostes obsident! ea expugnata, conclamatum est. Amitti potest, recuperari nunquam potest.

**Aula.** Aula Cœlestis est, hominis Animus religionis laude præstantis? sed hanc Aulam Virginitas, pretiosissimo meritum apparatu adornat.

*His ita explicatis, hoc jam restat, ut ea, quæ*



quæ hic attexo, attendas, consideresque diligenter.

I. Noluiffe me totum lustrare Indicem; quod per facile fuisset: verum, ex hac particula, cuius judicandum relinquere, quàm levi negotio, reliqua nomina, eidem argumento attribui possint; simulque docere, qua ratione id fieri oporteat.

II. Noluiffe quoque, ex Adjectivis illis, & Substantivis, ea seligere, quæ Virginitatis magis propria videntur, qualia essent inter Adjectiva, *Clarus, Constans, Fortis, Gloriosus, Nobilis, Ornatus, Pius, Pulcher, Rarus, Sacer, Utilis*, & alia plurima: Et inter Substantiva *Cor, Crystallus, Decus, Flos, Laurus, Lux, Res, Sol*, & reliqua omnia, quæ annotavi; sed ea, quæ primo loco occurrerunt, ut hæc.

III. Advertas, si Nomina illa, à me sumpta, tametsi disparata pleraque videantur, nec multum argumento suscepto congrua, non tamen inutilia fuere; quid de aliis convenientibus cogitandum sit.

IV. Neque mihi fuisse consiliùm, afferre omnia, quæ de quaternis illis Nominibus. Virginitati attribuis dici potuissent: sed indicare tantùm obiter, & quasi quoddam specimen inspicendum exhibere, quo pacto, præscripto Indice Tyrone uti debeant: Nam hoc nomen ve bi gratia, *Admirabilis*, non uni tantùm linæ, sed paginis implendis materiam sufficeret, si res, &

locus postularet. Idem de cæteris dico.

V. Accidere posse, ut Nomina illa omnia convenire nequeant, cuius argumentum, ideo seligenda esse aptiora. Monui autem jam antea. Nomina Vituperii per contrariorum oppositionem, magno usui esse posse ad laudem: & vicissim Nomina Laudis, ad vituperationem rei cuiuslibet.

VI. Præfatum Indicem, adjumento fore non Tyronibus tantum, sed etiam peritioribus. His quidem, longè utilissimum ut qui lectione & usu, magnam eruditionis supellestem collegerunt, ipso Indice, ceu clave depromendum. Illis autem, non utilem modò, sed necessarium, quia etsi nondum sibi comparare potuerint, illam rerum copiam, multa tamen suggerentur; inter recensendum illa Nomina, quæ aliqui nunquam, aut certè non sine magnò labore, ipsi objecta essent.

VII. Denique, quod in hoc, de virginitate, argumento feci; in alia quavis materia, posse præstari, sed de his satis.

### §. III.

## TERTIUS MODUS

*Inveniendi Argumenta ex iis, quæ cadunt sub oculos.*

**T**Antò tertius iste Modus facilior est, quam secundus, tantò secundus facilior,

hior, quam primus est, neque enim hic Indice aut memoria opus, sed solum oculis. Ergo age. Corporis ac mentis oculos modo aperi, & Modum istum percipito, Ac.

Primò, revoca in memoriam, quæ proximè de secundo Modo diximus, videlicet, quæcunque in quæstionem venire possunt, reduci posse ad duo capita, vel ad *Laudem* (qua voce, tam jucundum & utile: quam honestum intelligo, quid quid enim utilitatem parit, aut voluptatem honestam, laudem meretur eo nomine) vel ad *Vituperium* quo pariter vocabulo, omnia quæ molestiam aut damnum quodpiam afferunt, comprehendo.

Secundò. Id ubi adverteris, ubicunque locorum eris, circumfer oculos, & quæcunque se aspectui obijcient, considera. Sic enim habeto, nihil eorum fore; modò intendas pariter animi aciem, nec, quod ajunt vigilans dormias; nihil, inquam, fermè eorum fore, quæ intueberis, ex quo argumentum ducere statim non possis, sine ulla prorsus contentione mentis.

Tertiò. Restat solummodo, exemplum unum afferre, quo fiat, quod dico, meridiana luce clarius. Laudanda sit Doctrina, simulque vituperanda Ignorantia (quod de *Doctrina* dicam, idem de quavis re laudabili; & quod de *Ignorantia*, id ipsum de mala qualibet re, dictum puta.) Ac jam responde. Esne domi, an rure? Domi sum. Quid in

domo cernis; *Gradus*, *Januam*, *Mensam*, *Abacum*, *Aula* à *Sedilia*, *Lectum*, *Tabulas*, *Candelabra*, *Speculum*, *Fenestras*. Vis, ex omnibus his, argumenta petere, tum ad *Doctrinæ* laudem, tum ad vituperationem *Ignorantiæ*? Singulorum usum, & finem attende, eaque ad tuum institutum accommoda, in hunc fere modum:

**GRADUS** *Doctrinæ* opera; quibusdam quasi gradibus, ad culmem honoris, ad gloriæ fastigium pervenimus. *Ignorantia*, suos etiam habet gradus quibus devolvitur homo ad infimam conditionem mortalium.

**JANUA**. *Doctrina* virtuti *Januam* patefacit; *Ignorantia*, vitiis omnibus *Aditum* præbet.

**MENSA**. *Doctrina* *Mensam* instruit cognitione rerum præclarissimarum: quibus, tanquam cibus exquisitissimis, animus reficitur. *Ignorantia* verò, ceu fame acerbissima, laborat humana mens.

**ABACUS**. *Doctrina* instar Abaci: auro argentoque celato ornati, ornamentum hominis est præcipuum: *Doctrinæ* siquidem beneficio, in illius mente pretiosa scientiarum vasa resplendent &c. At *Ignorans*, vilis, pauper, in honoratus, & abjectus est, &c.

**AULÆA**, *Doctrina* velut Aulæis sumptuosis, magnificisque peristromatis, vestitur, & decoratur animus, qui per *Ignorantiam*, quasi nudus paries, & inornatus, deformatusque contemnitur.

SEDI-

**SEDILIA** *Doctrina* ope, Sedet homo, velut in folio Judex ac Rex; de rebus omnibus sententiam ferens, *Ignarus*, humi jacet, nec erigere se potest, ac belluarum in morem, pronus in terram, in cœno vitiorum sæpè se volutat.

**LECTUS** *Doctrina*, Lectus est, in quo suaviter quiescit animus: cujus quietis expertus, *Ignarus* est.

**TABULÆ**, seu **IMAGINES**. *Doctrina*, *Pictura* est, omnia menti summa cum voluptate repræsentans; ejus Imaginibus insignitur, & illustratur animus; Hoc omni ornamento caret *Ignorans*.

**CANDELABRA**. *Doctrina*, eruditam, multiplicemque parit lucem, idemque præstat in hujus vitæ tenebris, quod noctu Candela argentea, cereis instructa luceantibus: *Ignorans* perpetua est caligine circumfusus.

**SPECULUM**. *Doctrina* in Speculo quæcunque obijciuntur menti nostræ; tam quæ à fronte, quàm quæ à tergo sunt; hoc est, futura juxta, ac præterita, clarissimè cernimus, nosque quod caput est, ejusdem beneficio cognoscimus, & contemplamur. *Ignorans*, ne illa quidem videt, quæ usurpat oculis, nihilque minùs novit, quàm seipsum.

**FENESTRA**. *Doctrina* menti est, quod ædibus Fenestræ: per illam, non secus ac per istas, illuminantur interiora,

& exteriora prospiciuntur, *Ignorans*, foris, ac domi, talpa est. *Sic de aliis philosophari licebit, si lubeat.*

Egrediamur jam domo, & jus petamus: Circumspice item, quæ obversantur oculis. Quid vides? *Cælum* video ac *Solem*, *Montes* quoque, *Campos*, *Vias*, *Prata*, *Arbores*, *Flores*, *Fontem*, *Fluvium*, *Segetes*, *Feras*, *Aves*. Vis adhuc, ab his rebus, rationes varias invenire? Investiga, singularum naturam, qualitates, effecta, usum, finem; statimque non pauca tibi argumenta suggerent, in hunc ferè modum:

**CÆLUM.** *Doctrina* illustratur hominis animus, ut *syderibus* *Cælum*, *Ignorantia*, atras menti nubes obducit.

**SOL.** *Doctrina* hoc mentibus est, quod *Sol* est oculis: utque mundus inter aspectabilia vitæ ac mentis expertia, nihil habet *Sole* sive ad speciem clarius, sive ad dignitatem præstantius, sive ad utilitatem melius; sic inter universa quæcunque non modo sub oculos, sed etiam sub cogitationem cadunt, obtinet *Doctrina* principatum. *Ignorantis* animus, mundus est sine *Sole*; ac lucis expertus.

**MONS.** *Doctrina* opera assurgit hominis supra id omne quod caducum, & obnoxium est tempestatum, & fortunæ injuriis; indeque tanquam è specula, cuncta securus despicit, &c. quantum autem planities, & valles infimas, excelssissimi *Montes* supereminent;

nept; tantum Eruditi *Indoctrinos* antecellunt.

**AGER.** *Doctrina*, Ager est, virtutum omnis generis fundens fruges, si sapienter excolatur. *Ignorantis* animus, nihil nisi carduos, noxiasque plantas.

**VIA.** *Doctrina*, ad immortalitatem nominis, certissima & compendiaria Via est: *Ignorantia* verò, ad ærumnas, ad dedecus Viam sternit.

**PRATUM.** *Doctrina*, instar Prati, quod herbescenti viriditati amænissimè convestitum, floribusque distinctum varii coloris, mirificè pascit oculos, multiplici rerum intelligentia pascit mentem. Quid simile ab *Ignorantia* expectari potest?

**ARBOR.** *Doctrina*, quam ferax, quam felix Arbor! quales, quantosque parit fructus sed quàm multos! quis enumeret? *Ignorantis* animus, infelix, sterilis quid, oro, producit.

**FLORES.** *Doctrina* flores, quàm suavem exhalant existimationis odorem! quàm omnibus jucundi ac mirabiles accidunt! Nihil Floribus habet natura pulchrius; nihil habet homo *Doctrina* præclarius, *Ignorantia*, non Floribus, sed vepribus abundat.

**FONS.** *Doctrina*, Fontis instar limpidissimi, sedat gloriæ sitim, laudis ardorem temperat; levi undarum fluxu mentem rigat. Contra, quod Hortus sine Fonte, hoc Animus est *sine scientia*.

**FLUMEN**, *Doctrina* laude homo circumfluens, tanquam piscosissimum Flumen, patiensque navigiorum, quantis, quæso, redundat commodis! quam varias, in omnem vitæ partem, utilitates invehit! quam multiplices opportunitatum fluctus evolvit. *Ignorantia*, & quodvis vitium, si Flumina dicenda sunt, exundant, extra rationis alveum, officiantque illius ripis, innumerasque strages important.

**SEGETES**, *Doctrina*, auream laudum Segetem profundit: *Ignorantia* in sylvam dirarum veprum infana fertilitate luxuriat.

**FERÆ**, *Doctrina* mitigat ferociam; nihil humanius homine Docto: *Ignorante*, nihil agrestius, nihil quod Ferinos mores magis redoleat.

**AVES**. *Doctrina* subnixa pennis nostra mens, nubes supervolat, transcendit astra, cælos pervadit: *Tolle doctrinam*, alas incidisti; repat necesse est, more serpentium.

Quid multis; nihil fermè occurreret oculis ex quo si non omnino plumbeum ingenium tibi est, non aliquid eruas, ad id amplificandum, quod pertractas. Erit autem *Exercitatio* non inutilis, nec injucunda, interambulandum, subinde ex obviis rebus, argumenta, ad hoc exemplum trahere, quibus sententiam, quam tibi in hunc finem propolueris, illustres, & amplifices.



## CAPUT II.

de *Artractandi, & illustrandi Argumenta,*  
*& Rationes inventas.*

**N**equaquam satis est, inquit Tullius, invenire quid dicas, nisi id inventum tractare possis. Hoc nunc explicemus ultimum; nam Inveniendi argumenta, & rationes, quæ sunt Amplificationis materia, hæcenus edocui, quantum in me fuit, superest igitur, ut Artem tractandi argumenta illa, quæ invenisti, tibi non tam præceptis quàm Exemplis explicem. Illud certè in hac Disciplina, in qua versamur, præcipuum, ac summum est.

Quid verò, illud est, quod hic quærimus? In quo sita est Ars hæc tractandi Argumenta? In eo utique, ut, quam rationem, Rhetorices ignarus ac rudis, inornatè, & incultè proferet, tu, mi Candide, eleganter, politè, illuminatè, splendide, luculenter efferas.

In quo consistit, inquiens, orationis iste splendor & elegantia? verbo dicam; in usu Figurarum: quem usum spero te percepturum huc diffìculter, si quæ sequatur, accuratè legeris, & perpenderis.

Porro, ut triplicem explicui Modum inveniendi Argumenta, triplicem quoque eadem Argumenta tractandi, & exornandi Modum aperiàm, primus erit, per Fi-

*guras insigniores. Secundus, per omnes Casus. Tertius, per omnia tempora. De primo, illud quod ex uno dicere possum, nihil esse, in hoc opusculo toto, vel melius, vel utilius: nec dubito quin quivis tyro, ingenio quantumvis mediocri, perlectis diligenter, perceptisque iis, quæ Modus ille continet, non possit quamlibet sententiam, ornatè, variis modis explicare. De duobus Modis ultimis ut non inficiar, minuta illa esse quæ afferam, neque iis, quæ primus habet, æquiparandas; ita non inutilia fore novitiis arbitror, si non contemnentur.*

§. I.

## PRIMUS MODUS

*Tractandi Argumenta per Figuras, illustriores.*

**A**D Exemplum, hanc unicam tractare placet, atque illustrare sententiam.

Peccatum fugiendum est, Quia innumeras in hac pœnas affert, & æternas in altera.

*Accipe, quàm multipliciter, Rhetoricæ beneficio, exprimi possit illa Propositio.*

I. *Simpliciter, ac sine Exornatione.*

Peccatum insectari debemus immortali odio, & vel ipsius umbram exhorrescere; propter ea quod innumeras in hac vita parit

rit ærumnas; & in altera, cruciatus asferre solet sempiternos.

*2. Per interrogationem simplicem.*

Quid peccato detestabilius? quid magis est abominandum? Nonne illud est, quod doloribus in hac vita corpus, angoribusque mentem afficit, æternoque post mortem supplicio utrumque implacabilitate excarnificatum discruciat?

*3. Per interrogationem objuratoriæ.*

Quid agis, omens? quid moliris, scelerate? Quid est, quod tot flagitiis corpus animumque contaminas, An nescis, innumerabiles à peccato miseras invehì; An ignoras, illam unam originem esse malorum omnium.

*4. Per interrogationem ab exemplis.*

Quis te, ò Beatarum Mentium Dux quondam, Princepsque Lucifer? Quis inquam te, una cum tuis, affecdis, ab altissima cœli regione, præcipitem egit in tartarum? Dic tu, mortalium, mortisque Parens infortunatissime? Quis te, à felicissima supremaque vitæ conditione, in infimam deturbavit? Nonne peccatum est.

*5. Per Apostrophen ad ipsum peccatum.*

O peccatum exitiosum! ò maximum unicumque malum! cum fædum aded, turpeque sis, cur te non averſamur? Cùm summam æternamque nobis perniciem crees quamobrem te admittimus?

*6. Per*

6. *Per Apostrophem, ad peccantes generalem.*

O Cæci, & inconsideratissimi, & dementiores pecudibus homines, qui tam levi de causa toties, tanquæ immania scelera patris! Quid? vosne latet, quàm horrenda vos poena maneat, quanta in malorum vim in vestrum caput accersaris?

7. *Per Apostrophem, ad peccantes specialem.*

Quàm verè sapienterque dicitur solet, Ignorantem esse quicumque peccat. Nescire illum quid agat, quibus se malis implicet: Ita est profectò: Nescis, Impure, nescis, quo tua te nefaria libido rapiat; Nescis, Avare, nescis, quos ad scopulose allisura sit cupiditas opum; Ignoras, Melluor, quam te in charybdim infortuniorum immergas: Ignoras, homo vanillime, præ altis verticibus, præcipitia esse proxima, & in altum plerisque tolli quò lapsu fadiore ruant.

8. *Per Apostrophem, & Deprecationem ad Deum.*

Te, Deus Optime Maxime, per infinitam tuam illam inhumanum genus benignitatem, oro, obsecroque, immeritis licet veniam tribue: Excusat miseros clementia, furor de potestate mentis deiecit, abripiuntur æstu cupiditatum, peccati gravitatem minimè sentiunt, nec quàm foedis se maculis inficiant, vident; nec quàm impie divinum suum nomen offendant, ad-

ver-

vertunt satis; nec quam horrendis se pœnis obstringant, infani cogitant.

9. *Per Apostropham, & imprecationem ad Deum.*

O Sancte Deus, aspernantur impii tuum Numen, tua sacra contemnunt, religionem violant. Quò usque tantam impudentiam malitiamque pati; Quò usque abutentur scelesti patientia tua? Quin pœnas maturè reposcis, tot flagitiis debitas? Lexia ducunt quæ in hac vita tolerant; morte atroci plecte perditos, æternis obrue cætenis rebelles, sempiternis consceleratos suppliciis multa.

10. *Per Communicationem.*

Si imminentem à tergo carnificem videres, stricto ferro, manuque jam elata paratum tibi cervices amputare, simul ac esset quidpiam contra honesti leges à te commissum, quid ageres tum? quidquamne tale perpetrare? Atqui cùm immineat tibi æterna mors, magnis te quotidie criminibus inquinās.

11. *Per Exclamationem.*

O amentiam mortalium! ò stultitiam incredibilem, omnium lachrymis, gemitibusque deplorandam; Turpem momenti voluptatem dolore excipit naquam finendus: hoc illi sciunt, hoc fatentur, hoc prædicant, & peccant tamen, & flagitia flagitiis cumulant.

12. *Per Præteritionem.*

Ut te à peccando deterream, non hîc ego mala enumerabo omnia, quæ culpam consequuntur, quis enim illa vel cogitatione recenseat? Silebo dolores corporis, angores mentis, terrores stimulosque conscientiæ, fraudumque cruciatus, hæc inquam, præteribo mala omnia, quod tametsi gravissima, finem habitura sint aliquando; Æterna solum inferorum supplicia commemorabo, quibus torqueberis indefinenter, nisi resipiscas.

13. *Per Hypotiposin malorum hujus vitæ.*

Enumera, si potes, partem malorum minimam, quæ parit peccatum; Cerne ardentibus bello regiones, hæc excitavit Peccatum incendia: Vide exhaustas regiones, incolis, quas lues absumpsit; hanc induxit luem peccatum: Aspice lamentabili strage depastos urbium cives, quos intestina odia in mutuam perniciem, armarunt, hæc odia movit Peccatum. Intuere, quantis morborum cruciamentis, quot ærumnis obruitur hominum genus, hæc damna omnia peccatum invehit.

14. *Per Hypotiposin malorum alterius vitæ.*

Non te movent ærumnarum fluctus immanes, in conscleratorum caput redundantes, dum hujus adhuc fruuntur usura lucis. Descende cogitatione in Tartarum, Cerne ignes illos, rotas illas & verbera;  
cer-

cerne voragines præaltas, & sine fundo fossas, mephitim exhalantes intolerabilem, sulphureamque flammam, atro mistam fumo, horribiliter evomentes; Aspice, ut laniantur isti, ut torrentur alii, ut discerpuntur illi, ut omnes incredibiliter cruciantur. Peccatum est, quod tantis illos tormentis addixit.

*15. De muliere, quæ patrem lacte aluit.*

Quid non audet ingeniosa pietas? quæve præclara, non molitur facinora? Ignorat illa metum; sibi que sternens per tormenta viam, mortem æque, ac tyrannos illudit. Jusserat sævissimus Judex producta ætate senem inedia perire, & quos vitæ dies factum congesserat, famem abrumperet. Longa jam misera tabe vexatus, nullaque refectus ope, nullum sibi in tanta calamitate solacium, nisi in cita mortē, superesse sentiebat. Defecerant jam vires, elanguerant manus, recesserant oculi, venterque vacuus, ac sæpe querulus epulas, quibus recrearetur, frustra poscere videbatur. Non color in facie, non calor in venis, non vigor in corde. Acidæ jam fauces hianti ore spiritum emisseræ; aut excepturæ necem aperiebantur. Senex ipse non vis, sed adhuc spirans cadaver, viva mortis imago; loquax hominis umbra; pellitus ossium acervus; atque horridum potius viventium spectrum, quam vivens vocandus erat. (*Interr.*) At quas non invenit solertissimus amor servandæ vitæ ratio-

rationes? Quas ille non excogitat novas ar-  
cendæ mortis artes? Tanto parentis calu-  
nullis parcebat lacrymis damnati filia;  
cumque impetrasset à Judice, ut obeuntis  
lumina clauderet, diligenter prius excus-  
sa, ne quid secum cibi deferret, se contu-  
lit ad carcerem: Languerat ille, dolebat  
ista; patrisque ærumnas filiaë in grora auge-  
bat: Miscebantur hujus lachrymis ejus sus-  
piria, unusque dolor amborum pectora  
exagitare videbatur. Cum verò diu secum  
volveret, quod morienti subsidium ferret,  
vicinus tandem ait, & exerto ubere se-  
nem pectori admovit, lactisque præsidio  
nece vindicavit. Rediit mox color genis,  
arteriis calor, ac penès vis animo. Jam li-  
berior permeare spiritus, jam vividior de-  
currere sanguis: jam acrior consistere vi-  
gor. Aperit senex oculos, attollitque ma-  
nus, & vitam, quæ modo sibi fuerat sup-  
plicium, honestæ fraudis pretium offen-  
tat. Quid hic afferam, aut quid non effe-  
ram tanto pietatis exemplo? En filia gen-  
trix parentis evadit; vitam enim, quam  
patre duxerat, dentum restituit; & is-  
guinem, quem mutuo acceperat, reddit  
cum fœnore. Genuit ille nascituram, hæc  
moriturum restauravit; & si ille proculit  
in lucem, hæc ab interitu revocatum in  
lucem retulit. Armatis undique vigili-  
bus carcerem circumsepserat Judex; at  
inermis triumphavit pietas, unaque mu-  
lier



lier virorum cuneos elusit. Si quidem, ut ait Poeta.

*Omnia vincit amor, &c.*

16. *Per Subjectionem ab Effectis.*

Si nondum te tartarei hujusce monstri  
fœditas terret, saltem exhorresce, quæ  
mala progignit. Quid enim turbas movet,  
seditiones excitat, bella generat? nonne  
peccatum? Quid dolores infert? quid men-  
tis ægritudines, quid morbos, quid cru-  
ciatus, quid cædes innumeras nonne Pec-  
catum? Quid naufragia navigantibus, quid  
pestilentiam urbibus, quid agris vastita-  
tem, quid rebus extremam perniciem,  
quid mortalibus denique omnibus mortem  
sempiternam, ærumnisque plenam im-  
portat? annon mentiar, nisi peccatum es-  
se dixerò?

17. *Per Subjectionem ab Adjunctis.*

Quò te ages infelix, post conceptum, pa-  
tratumque facinus? quò te recipies, ut fu-  
gias sequentem pœnam? quem in locum te  
abdes quò furiaæ ardentibus tædis armatae  
te non infectentur? non exagitent? Disce-  
des in desertissimas solitudines? te ibi lan-  
cinabit acerbius scelerum tuorum con-  
scientia, Venies in publicum? ardebunt in  
te odia omnium bonorum. Quem appella-  
bis, qui propulset à tuo capite imminentem  
pestem? Amicos? improborum amicus ne-  
mo, nisi improbus, affines quos dedecorasti?  
Propinquos quibus labem aspersisti? Paren-

tes, quos affecisti maculis æternæ infamiae? Ad bonos, beatosque Genios te convertes? exhorrent tuum conspectum: Ad ipsum, Deum, quem offendisti, qui poenas brevi, à te infinitas repetet?

18. *Per Subjectionem à Definitione.*

Quod malum, quod morbi genus, quæ calamitas? quod infortunium esse potest, quod non effluat à peccato? Plagas times? Tortor est: lacerationes formidas? Ferrum est. Incendia metuis? Flamma est: naufragia pertimescis? Pelagus est semper exæstuans, Vitam amas; ah! Mors est, infelicitas summa, Exitium extremum, terribilis Infernus est.

19. *Per Prosopopæiam.*

Dictis meis fidem non adhibes? Audi quid vociferentur homines illi, quos vel in hac vita, conscientia malefactorum dixerat, vel qui suppliciis nunquam terminandis torquentur in altera: Peccata sunt, inquit, à nobis commissa, quæ nos excruciant; hæ sunt furia, quæ nos quiescere non sinunt, hi carnifices, qui nos, dies noctesque dilaniant; hæ flammæ, quibus urimur: hi stimuli, quibus fodimur; hæc verbera, quibus laceramur: hæ rotæ quibus miserabilem in modum distrahimur.

20. *Per Antitheses.*

Exultas miser exilisque præ gaudio, vel dum te sceleribus obstringis vinctus es, & triumphum agis, conceptam in præcordiis mor-

mortem contines, & sectaris vitæ delicias; paratur tibi mala crux, & rides: impendet capiti suprema calamitas, nec moveris; discedit tuos ante pedes terra horrendo hiatus, & in barathrum lætus insilis: O cæcitate!

21. *Per Antitheses, à Comparatione.*

Age, scelerate, age facinorose, confer voluptatem quam peccando percipis cum dolore, quem patrato scelere hauris: Evanescit illa puncto temporis: iste diuturnus, & nisi vitam mendes, sempiternus futurus est. Illa, unam solummodo exterioremque corporis partem, fallaci titillatione demulcet, hic intimas ossium medullas permeat: denique stat illa foris; hic totum pervadit hominem nec corpus torquet modo sed & animum angit acerbius, æternumque cruciat.

22. *Per Concessionem.*

Eslo, sit ita, ut dicis; insine flagitiis illecebræ, quæ blandè animum & corpus devinciant: At catenarum, quibus utrumque opprimit, nonne gravitatem sentis? Oscula quæ libat scelerata voluptas, delicata sunt, molliaque, fateor: At, quos simul infigit ungues, quæ vulnera infligit, eane tu grata, eane suavia esse dices? Non injucundè canunt Syrenes fraudulentæ: ita est: At, quàm crudeliter cantu sæviant, nunquid advertis?

23. *Per Distributionem.*

Illecebrosum quidem est peccatum ad voluptatem, sed crudelissimum est ad pœnam, execrandum ad ignominiam, turpissimum ad fœditatem, formidabile ad terrorem, intolerabile ad patientiam, æternum ad diuturnitatem. Et deinde illud in se admittere quis audeat, eo delectari, in illo vivere cum illo mori?

24. *Per Distributionem, per Increpationem.*

Mortalium nequissimi, ecquando facietis peccandi finem? nullumne statuetis improbiſſimæ libidini modum? Nullane vos turpitudinum satiêtas capiet? Ecquæ vos ratio ab infania, aut ab impudicitia pudor, aut ab effrenata licentia timor, aut à scelere pietas, aut à dedecore honestas revocabit? Nullane unquam libido à vestro corpore, nullane vis à manibus, nullumne flagitium à turpissimis sceleratissimisque tabis aberit unquam?

25. *Per Dubitationem, & Gradationem.*

Quo te nomine appellem? Noxa exitialis: Morbum? morbis omnibus acerbiores: Pestem? te nulla pestis terrior ac præsentior: Incendium? aliquid ex perniciosius: Feram immanem? immanior existis. Depopulationem? quænam tecum depopulatio conferatur. Voraginem horrendam immensamque? leve est Mortem calamitosissimam? parum est illud quoque. An illa simul

simul omnia te esse dicam ? nec satis illud erit etiam ; ut enim , hæc simul omnia in unum mala confluant corpori duntaxat perniciem inferunt . Tu grassaris in acidum . Et quamvis ad animum illa pervenirent , finem tamen haberent aliquando : Tu ; nullum cruciandi finem facis .

26. *Per Gradationem . & Interrogationem .*

Ubi nam tandem aliquando subsistes , Culpa pestilens ? quodenum in gradu malorum hærebis ? Doloꝛe corpus conficis , annon id satis est ? non est satis . Caliginem offundis menti , labefactas judiciū vim , frangis ingenij vires , hebetasque aciem ; de statu naturæ totum hominem dejicis quò ultra serpes ? Etiam mortem affers teterri- mam ? scio , ac video , At sit mors saltem malorum postremum ! non erit : ultra mor- tem quoque , Peccatum , immortale ma- lum desæviet .

27. *Per Ironiam .*

Immitis , injuriusque sum , qui innocen- tissimorum hominum deliciis officiam : qui importuna oratione voluptates turbem li- quidas , quibus se immergere . Sinamus eos per otium frui conquestis tanto labore commodis ; oblectent se vino , stupris , ga- neis , cædibus , rapinis . Vos oblectate per me licet , delicatula capita ; volutate vos in cœno libidinum , obsequimini genio , in- dulgete cupiditati : Nihil inde mali ti- mendum vobis est : hujus vitæ voluptas ,

2ter-

æternum est paritura gaudium; præsentel delicias, excipiet felicitas nullis temporum limitibus terminanda; spem bonam habete.

28. *Per Expolitionem à simili.*

Videte stultitiam peccantium; ut carius celeriusque pereant, suis sibi sumptibus accersant malorum ultimum; venenum miscant, diluuntque proprio sanguine; poculaque inaurant, quod amabilius, avidiusque exorbeant mortem: Domos ipsimet suas suffodiunt, quibus obruantur: piras extruunt, in quibus ardeant: ne sciant laqueos queis se interimant: momentaneas aucupantur voluptates, ut semper duraturis doloribus crucientur.

29. *Per Synonyma à Dissimili.*

Quis satis miretur, inconsiderantiam ne dicam nostram, an dementiam? qui ob inane lucrum rei levissimæ, nulliusque pretii curis vigiliisque atterimus vitam? qui fluxam voluptatem multorum emimus annorum laborem, unumque diem, ut vivere bestos liceat, totam consumimus ærumnis ætatem. Ut verò æterna eviteamus damna, ut immortale fugiamus dedecus, ne à peccando quidem abstinemus.

30. *Per Deprecationem.*

Quò, quò ruitis infelices: Ah! per salutem vestram precor, abssistite, Prærupta, lubricaque in crepidine versamini præalti præcipitii; quid occlusis luminibus, impetuque

tuque malefano, præcipites itis? Aperite, oro vos atque detestor, per quidquid vobis charum est, aperite oculos, ac circumspicite tantisper, quàm horribilia vos mala circumstent.

31. *Per Cohortationem.*

Detestamini ergò, Adolescentes, abhorrete morte pejus, & inferno, culpam omnem, occasiones peccandi declinate, omni animi solertia, omni contentione menti ac vitium. Id unum spectent cogitationes vestræ omnes, ut præstetis vos immunes à noxa, ut devitetis delicta quælibet, ut puram ab omni labe vitam, illibatamque traducatis, cum obscurum jam vobis esse non possit, innumerabiles ærumnas, æternaque mala peccantibus impendere.

*Plura dicere in hanc sententiam, baud est necesse; satis enim jam opinor. intelligis, quid facere deinceps possis ac debeat, quoties sententia tibi quædam amplificanda proponetur, quam vario nimirum stylo ac forma, quam eleganti Figurarum contextu, illustrare illam oporteat, priusquam tamen à præceptis, ad Exempla transeam baud inutile, credo, fuerit subnectere hoc loco Rationem aliam dilatanda sententia, per omnes casus.*

## §. II.

## ALTER MODUS

*Explicanda Sententia. per omnes Casus.*

**M**inuta est, ut dixi jam, non tamen speranda hac dilatandi Ratio, cum scilicet, per omnes Casus circumfertur vox illa, qua propositionis materia est. Unum sufficiet Exemplum brevissimum, ad rem declarandam.

*Sic est explicanda propositio.*

*Modestia amabilissima Virtus est.*

*Sic à singulis casibus illam exponam.*

*Nominativus.* Modestia, virtutum omnium longè pulcherrima, præclarissimaque, tot fulget radiis, tot veneribus adblanditur, nihil ut amabilius fugi queat.

*Genitivus.* Modestiae tam gratus ac suavis est decor, tam augusta, blandaque species ut sensus omnis expertem ac rationis, eum esse necesse sit, qui ejus amore non ardeat.

*Dativus.* Modestiae uni conveniunt universa, quæ singulas commendant virtutes, sic ut ex omnibus aliis; una illa virtus facta, fictaque esse videatur.

*Accusativus.* Modestiam tot dotes commendant eximiae, ut mortalium foedissimus ac de mentissimus sit habendus, quia eum non coluerit, non amarit.

*Voca-*



*Vocativus.* O Modestia ; ò virtus cœlo purior, Sole micantior ? Quiste, vel de sola facie novit, tuique desiderio non incenditur ?

*Ablativus.* A Modestia, omnis honesti decor efflorescit, omnis decoris flos emanat, purissimæque flammæ fulgor omnis exoritur. Quis illam non ergo colat ? non ambiat, non complectatur ? Quis eam, dictis suis omnibus ac factis gestu habituque non exprimat ?

§. III.

TERTIUS MODUS

*Dilatanda sententia, per omnia tempora.*

**D**iversitate illa casuum, quibus unum, idemque nomen dilatarî posse diximus, adductus sum ad investigandum, esset ne perinde opportunum, ad Amplificationem propositionis, in qua, non *Nomen*, ut illo secundo Modo, ubi Modestiam modò laudabamus, sed *Verbum* aliquod foret explicandum, varietatem sequi *Modorum, ac Temporum*. Experiri volui ; & prima, quæ occurrit animo, Propositio ista fuit, quam solemus in amicorum officiosa salutatione ; crebrò usurpare *Addictus sum tibi servus*, seu quod idem est. *Optimè tibi cupio*, aut ut brevius dicam. **TE DILIGO** : duas igitur voculas  
H 2                      illas,

illas, per omnia, omnium Modorum Tempora, ita circumdixi, quo operæ fructu, arbitrari tibi licet.

### TE DILIGO.

Possem, hujus verbi Nominativum, Ego ejusque casum, Te, dilatare, si opus esset, v. g. EGO, quem tam multis beneficiis obstrinxisti; in quem tam eximia à te ornamenta profecta sunt, cui omnibus in rebus gratificari soles. &c. TE virorum omnium humanissimum clarissimumque omni virtutum genere cumulativissimum, decus, & ornamentum hujus provinciae, &c. Sed nihil opus est verbis illud unum, DILIGO, explicare placet, hoc modo.

*A presenti tempore.*

Ex animo intimoque sensu, te mihi charissime Amice, diligo ut oculos meos, aut si quid oculis charius est. Scio quidem amari te à multis, (quæ tuæ de omnibus bene merendi facilitas) omnes tamen in amore vinco neminique prorsus concedo, Quia vero perpetua quasi catena beneficiorum, amabilique nexu me tibi obligatum esse profiteor; tuæ in me benevolentiae respondeo vicissim, quantum in me est; tua causa cupio quantum parentis mei causa volo, meæque curæ ac cogitationes ad te referuntur omnes: & in te, tuisque rebus consumuntur.

*Imperfectum.*

Erant mihi olim multi in intimis, Arist.

Altissimo nexu devincti : familiaritatem fovebat illam, studiorum similitudo, necessitudoque mutuis officiis constituta, fateor amabamur inter nos vehementer, amicitiae vinculo ita copulati, nihil ut conjunctius esse posset.

*Perfectum.*

At postquam ab iis me fortuna distraxit mihiq; fecit tui copiam, laxari sensim animadverti veteris illius amicitiae vinculum, delevit è memoria illorum olim familiarum priscas imagines, imago tui; præteritam obscuravit benevolentiam, præsentiae tuæ splendor illustrissimus, non secus ac exoriente Sole, Stellarum fulgor evanescit non quòd contempserim, quòd alios amore dignum judicavi; sed quòd, quaecunque sparsa in singulos amaveram collecta in te uno, sum demiratus universa.

*Plusquam perfectum.*

Et verò, multa quidem ac præclara de te fama & auditione acceperam, audieram ex iis quibus familiariter utebaris, te omnibus naturæ donis exornatum aded liberaliter fuisse, ut nemo esse puteretur, qui tecum ullo modo componi posset, sed victam esse, longeque superatam cognovi, cum te primum vidi, opinionem illam, quam de te concitaras, egoque conceperam: itaque inflammari me sensu studio tui jam præsentis, quem vel absentem, incognitumque mirè dilexeram nulla ut deinceps ad

rationes? Quas ille non excogitat novas ar-  
cendæ mortis artes? Tanto parentis casu  
nullis parcebat lacrymis damnati filia;  
cumque impetrasset à Judice, ut obeuntis  
lumina clauderet, diligenter prius excus-  
sa, ne quid secum cibi deferret, se contra-  
xit ad carcerem: Languerat ille, dolebat  
ista; patrique ærumnas filiaë magis auge-  
bat: Miscebantur hujus lacrymis ejus sus-  
piria, unusque dolor amborum pectora  
exagitare videbatur. Cum verò diu secum  
volveret, quod morienti subsidium ferret,  
vicinus tandem ait, & exerto ubere le-  
nem pectori admovit, lactisque præsidio à  
nece vindicavit. Rediit mox color genis,  
arteriis calor, ac penes vis animæ: Jam li-  
berior permeare spiritus, jam vividior de-  
currere sanguis: jam ætior consistere vi-  
gor. Aperit senex oculos, atrox litque ma-  
nus, & vitam, quæ modo sibi fuerat sup-  
plicium, honestæ fraudis pretium offen-  
tat. Quid hic afferam, aut quid non esse-  
ram tanto pietatis exemplo? En filia gen-  
trix parentis evadit; vitam enim, quam à  
patre duxerat, densum restituit; & sa-  
guinem, quem intacto acceperat, reddit  
cum sænore. Genuit ille nascituram, hæc  
morituram restauravit; & si ille protulit  
in lucem, hæc ab interitu revocatum in  
lucem retulit. Armatis undique vigili-  
bus carcerem circumsepserat Judex; at  
inermis triumphavit pietas, unaque mu-  
lier

lier virorum cuneos elusit. Si quidem, ut ait Poeta.

*Omnia vincit amor, &c.*

*16. Per Subjectionem ab Effectis.*

Si nondum te tartarei hujusce monstri  
foeditas terret, saltem exhorresce, quæ  
mala progignit. Quid enim turbas movet,  
seditiones excitat, bella generat? nonne  
peccatum? Quid dolores infert? quid men-  
tis ægritudines, quid morbos, quid cru-  
ciatus, quid cædes innumeras nonne Pec-  
catum? Quid naufragia navigantibus, quid  
pestilentiam urbibus, quid agris vastita-  
tem, quid rebus extremam perniciem,  
quid mortalibus denique omnibus mortem  
sempiternam, ærumnisque plenam im-  
portat? annon mentiar, nisi peccatum es-  
se dixerò?

*17. Per Subjectionem ab Adjunctis.*

Quò te ages infelix, post conceptum, pa-  
tratumque facinus? quò te recipies, ut fu-  
gias sequentem pœnam? quem in locum te  
abdes quò furiaæ ardentibus tædis armatae  
te non insectentur? non exagitent? Disce-  
des in desertissimas solitudines? te ibi lan-  
cinabit acerbius scelerum tuorum con-  
scientia, Venies in publicum? ardebunt in  
te odia omnium bonorum. Quem appella-  
bis, qui propulset à tuo capite imminentem  
pestem? Amicos? improborum amicus ne-  
mo, nisi improbus, affines quos dedecorasti?  
Propinquos quibus labem aspersisti? Paren-  
tes,

tes, quos affecisti maculis æternæ infamiae? Ad bonos, beatosque Genios te convertes? exhorrent tuum conspectum. Ad ipsum, Deum, quem offendisti, qui poenas brevi, à te infinitas repetet?

18. *Per Subjectionem à Definitione.*

Quod malum, quod morbi genus, quæ calamitas? quod infortunium esse potest, quod non effluat à peccato? Plagas times? Tortor est: lacerationes formidas? Ferrum est. Incendia metuis? Flamma est: naufragia pertimescis? Pelagus est semper exæstuans, Vitam amas; ah! Mors est; infelicitas summa, Exitium extremum, terribilis Infernus est.

19. *Per Prosopopæiam.*

Dictis meis fidem non adhibes? Audi quid vociferentur homines illi, quos vel in hac vita, conscientia malefactorum dixerat, vel qui suppliciis nunquam terminandis torquentur in altera. Peccata sunt, inquit, à nobis commissa, quæ nos excruciant; hæ sunt furiae, quæ nos quiescere non sinunt, hi carnifices, qui nos, dies noctesque dilaniant; hæ flammæ, quibus urimur: hi stimuli, quibus fodimur; hæc verbera, quibus laceramur: hæ rotæ quibus miserabilem in modum distrahimur.

20. *Per Antitheses.*

Exultas miser exilisque præ gaudio, vel dum te sceleribus obstringis vinctus es, & triumphum agis, conceptam in præcordiis mor-

mortem contines, & sectaris vitæ delicias; paratur tibi mala crux, & rides: impendet capiti suprema calamitas, nec moveris; discedit tuos ante pedes terra horrendo hiatus, & in barathrum lætus insilis: O cæcitate!

21. *Per Antitheses, à Comparatione.*

Age, scelerate, age facinorose, confer voluptatem quam peccando percipis cum dolore, quem patrato scelere hauris: Evanescit illa puncto temporis: iste diuturnus, & nisi vitam mendas, sempiternus futurus est. Illa, unam solummodo exterioremque corporis partem, fallaci titillatione demulcet, hic intimas ossium medullas permeat: denique stat illa foris; hic totum pervadit hominem nec corpus torquet modo sed & animum angit acerbius, æternumque cruciat.

22. *Per Concessionem.*

Esto, sit ita, ut dicis; insint flagitiis illecebræ, quæ blandè animum & corpus devinciant: At catenarum, quibus utrumque opprimit, nonne gravitatem sentis? Oscula quæ libat scelerata voluptas, delicata sunt, molliaque, fateor: At, quos simul insigit ungues, quæ vulnera infligit, eane tu grata, eane suavia esse dices? Non injucundè canunt Syrenes fraudulentæ: ita est: At, quàm crudeliter cantu sæviant, nunquid advertis?

23. *Per Distributionem.*

Illecebrosum quidem est peccatum ad voluptatem, sed crudelissimum est ad pœnam, execrandum ad ignominiam, turpissimum ad fœditatem, formidabile ad terrorem, intolerabile ad patientiam, æternum ad diuturnitatem. Et deinde illud in se admittere quis audeat, eo delectari, in illo vivere cum illo mori?

24. *Per Distributionem, per Increpationem.*

Mortalium nequissimi, ecquando facietis peccandi finem? nullumne statuetis improbiſſimæ libidini modum? Nullane vos cupiditudo ſatietas capiet? Ecquæ vos ratio ab infania, aut ab impudicitia pudor, aut ab effrenata licentia timor, aut à ſcelere pietas, aut à dedecore honeſtas revocabit? Nullane unquam libido à veſtro corpore, nullane viſ à manibus, nullumne flagitium à turpiſſimis ſcleratiſſimiſque factis aberit unquam?

25. *Per Dubitationem, & Gradationem.*

Quo te nomine appellem? Noxa exitiabilis: Morbum? morbis omnibus acerbior: Pellem? te nulla peſtis terrior ac præſentior: Incendium? aliquid expernicioſius; Feram immanem? immanior exiſtis. Depopulationem? quænam tecum depopulatio conferatur. Voraginem horrendam immenſamque? leve eſt Mortem calamitoſiſſimam? parum eſt illud quoque. An illa ſimul



simul omnia te esse dicam? nec satis illud erit etiam; ut enim, hæc simul omnia in unum mala confluant corpori duntaxat perniciem inferunt. Tu grassaris in ædium. Et quamvis ad animum illa pervenirent, finem tamen haberent aliquando: Tu; nullum cruciandi finem facis.

26. *Per Gradationem, & Interrogationem.*

Ubinam tandem aliquando subsistes, Culpa pestilens? quo demum in gradu malorum hærebis? Dolor corpus conficis, annon id satis est? non est satis. Caliginem offundis menti, labefactas judicii vim, frangis ingenij vires, hebetasque aciem; de statu naturæ totum hominem dejicis quò ultra serpes? Etiam mortem affers teterri-  
mam? scio, ac video; At sit mors saltem malorum postremum! non erit: ultra mortem quoque, Peccatum, immortale malum desæviet.

27. *Per Ironiam.*

Immitis, injuriusque sum, qui innocentissimorum hominum detrois officium: qui importuna oratione voluptates turbem liquidas, quibus se immergere. Sin amuseos per otium frui conquiritis: tanquam labere commodis; oblectent se vino, stupris, ganeis, cædibus, rapinis. Vos oblectate per me licet, delicatula capita; volutate vos in cœno libidinum, obsequimini genio, indulgete cupiditati: Nihil inde mali timendum vobis est: hujus vitæ voluptas,

æternum est paritura gaudium; præsen-  
tes delitias, excipiet felicitas nullis tem-  
porum limitibus terminanda; spem bonam  
habete.

28. *Per Expositionem à simili.*

Videte stultitiam peccantium; ut carius  
celeriusque pereant, suis sibi sumptibus ac-  
cerant maiorum ultimum; venenum mi-  
scent, diluuntque proprio sanguine; pocu-  
laque mactant, quod amabilius, avidiusque  
exorbeant mortem: Domos ipsimet suas  
suffediunt, quibus obruantur: piras ex-  
truunt, in quibus ardeant: nesciunt laqueos  
queis se interimant: momentaneas aucu-  
pantur voluptates, ut semper duraturis do-  
loribus crucientur.

29. *Per Synonyma à Dissimili.*

Quis satis miretur, inconsiderantiam ne  
dicam nostram, an dementiam? qui ob ina-  
ne lucrum rei levissimæ, nulliusque pretii  
curis vigiliisque atterimus vitam? qui flu-  
xam voluptatem multorum emimus anno-  
rum laborem, unumque diem, ut vivere  
beatos liceat, totam consumimus ærumnis  
ætatem. Ut verò æterna evitemus damna,  
ut immortale fugiamus dedecus, ne à pec-  
cando quidem abstinemus.

30. *Per Deprecationem.*

Quò, quò ruitis infelices: Ah! per salu-  
tem vestram precor, abssistite, Prærupta,  
lubricaque in crepidine versamini præalti  
præcipitii; quid occlusis luminibus, impe-  
tuque

tuque malefano, præcipites itis? Aperite, oro vos atque detestor, per quidquid vobis charum est, aperite oculos, ac circumspicite tantisper, quàm horribilia vos mala circumstent.

31. *Per Cohortationem.*

Detestamini ergò, Adolescentes, abhorrete morte pejus, & inferno, culpam omnem, occasiones peccandi declinate, omnis animi solertia, omni contentione menti ac vitium. Id unum spectent cogitationes vestræ omnes, ut præstetis vos immunes à noxa, ut devitetis delicta quælibet, ut puram ab omni labe vitam, illibatamque traducatis, cum obscurum jam vobis esse non possit, innumerabiles ærumnas, æternaque mala peccantibus impendere.

*Plura dicere in hanc sententiam, baud est necesse; satis enim jam opinor. intelligis, quid facere deinceps possis ac debeas, quoties sententia tibi quædam amplificanda proponetur, quam vario nimirum stylo ac forma, quam eleganti Figurarum contextu, illustrare illam oporteat, priusquam tamen à præceptis, ad Exempla transeam. Baud inutile, credo, fuerit subnectere hoc loco Rationem aliam dilatandæ sententiæ, per omnes casus.*

## §. II.

## ALTER MODUS

*Explicanda Sententia. per omnes Casus.*

**M**inuta est, ut dixi jam, non tamen speranda hac dilatandi Ratio, cum scilicet, per omnes Casus circumfertur vox illa, qua propositionis materia est. Unum sufficiet Exemplum brevissimum, ad rem declarandam.

*Sic est explicanda propositio.*

*Modestia amabilissima Virtus est.*

*Sic à singulis casibus illam exponam.*

*Nominativus.* Modestia, virtutum omnium longè pulcherrima, præclarissimaque, tot fulget radiis, tot veneribus adblanditur, nihil ut amabilius fingi queat.

*Genitivus.* Modestiae tam gratus ac suavis est decor, tam augusta, blandaque species ut sensus omnis expertem ac rationis, eum esse necesse sit, qui ejus amore non ardeat.

*Dativus.* Modestiae uni conveniunt universa, quæ singulas commendant virtutes, sic ut ex omnibus aliis; una illa virtus facta, fictaque esse videatur.

*Accusativus.* Modestiam tot dotes commendant eximiae, ut mortalium foedissimus ac demeritissimus sit habendus, quia eum non coluerit, non amarit.

*Vocativus.* O Modestia ; ò virtus cælo purior, Sole micantior ? Quiste, vel de sola facie novit, tuique desiderio non incenditur ?

*Ablativus.* A Modestia, omnis honesti decor efflorescit, omnis decoris flos emanat, purissimæque flammæ fulgor omnis exoritur. Quis illam non ergo colat ? non ambiat, non complectatur ? Quis eam, dictis suis omnibus ac factis gestu habituque non exprimat ?

§. III.

TERTIUS MODUS

*Dilatanda sententia, per omnia tempora.*

**D**iversitate illa casuum, quibus unum, idemque nomen dilatari posse diximus, adductus sum ad investigandum, esset ne perinde opportunum, ad Amplificationem propositionis, in qua, non *Nomen*, ut illo secundo Modo, ubi Modestiam modò laudabamus, sed *Verbum* aliquod foret explicandum, varietatem sequi *Modorum, ac Temporum*. Experiri volui ; & prima, quæ occurrit animo, Propositio ista fuit, quam solemus in amicorum officiosa salutatione ; crebrò usurpare *Addictus sum tibi servus*, seu quod idem est. *Optimè tibi cupio*, aut ut brevius dicam. **TE DILIGO** : duas igitur voculas

illas, per omnia, omnium Modorum Tempora, ita circumduxi, quo operæ fructu, arbitrari tibi licet.

### TE DILIGO.

Possem, hujus verbi Nominativum, Ego ejusque casum, Te, dilatare, si opus esset, v. g. EGO, quem tam multis beneficiis obstringisti; in quem tam eximia à tæornamenta profecta sunt, cui omnibus in rebus gratificari soles, &c. TE virorum omnium humanissimum clarissimumque omni virtutum genere cumulativissimum, decus, & ornamentum hujus provinciae, &c. Sed nihil opus est verbum illud unum, DILIGO, explicare placet, hoc modo.

#### A præsentis tempore.

Ex animo intimoque sensu, te mihi charissime Amice, diligo ut oculos meos, aut si quid oculis charius est. Scio quidem amarit te à multis, (quæ tua de omnibus benemerendi facilitas) omnes tamen in amore vinco neminique prorsus concedo, Quia vero perpetua quasi catena beneficiorum, amabilique nexu me tibi obligatum esse profiteor; tuæ in me benevolentiae respondeo vicissim, quantum in me est; tua causa cupio quantum parentis mei causa volo, meæque curæ ac cogitationes ad te referantur omnes: & in te, tuisque rebus consumuntur.

#### Imperfectum.

Erant mihi olim multi in intimis, Artist-

Cliffimo nexu devincti : familiaritatem fovebat illam, studiorum similitudo, necessitudoque mutuis officiis constituta, fateor amabamur inter nos vehementer, amicitiae vinculo ita copulati, nihil ut conjunctius esse posset.

*Perfektum.*

At postquam ab iis me fortuna distraxit mihiq; fecit tui copiam, laxari sensim animadverti veteris illius amicitiae vinculum, delevit è memoria illorum olim familiarium priscas imagines, imago tui; præteritam obscuravit benevolentiam, præsentiae tuæ splendor illustrissimus, non secus ac exoriente Sole, Stellarum fulgor evanescit non quòd contempserim, quòd alios amore dignum judicavi; sed quòd, quaecunque sparsa in singulos amaveram collecta in te uno, sum demiratus universa.

*Plusquam perfektum.*

Et verò, multa quidem ac præclara de te fama & auditione acceperam, audieram ex iis quibus familiariter utebaris, te omnibus naturæ donis exornatum adèd liberaliter fuisse, ut nemo esse puteretur, qui tecum ullo modo componi posset, sed victam esse, longeque superatam cognovi, cum te primùm vidi, opinionem illam, quam de te concitaras, egoque conceperam: itaque inflammari me sensi studio tui jam præsentis, quem vel absentem, incognitumque mirè dilexeram nulla ut deinceps ad

amorem meum accessio fieri posse videatur.

*Futurum.*

Quare hærebis tu mihi semper in modulis, singulari te in perpetuum benevolentia complectar: nullum in te colendo, atque honestando locum, aut tempus, nullum studii, & observantiæ genus prætermittam: in tua dignitate, omnem meam curam, industriamque figam, & locabo, omnem operam ad honorem tuum, omnem diligentiam conferam, summique beneficii loco ponam, si qua in re tibi gratificari poterò.

*Imperativus.*

Impera proinde, quæ tibi grata videbuntur; quæ tuo animo arriserint, sine ulla exceptione manda; tua mihi voluntas, lex erit atque norma. Quid vis præcipe, quid vis efficiam: Jube, ad remotissimas eam mundi plagas, ibo; jube, me tua causa spoliem bonis omnibus, spoliabo; jube profundam pro te sanguinem, profundam.

*Optativus.*

O utinam, talem ex me requiras amoris notam, ut fundendus mihi sit pro te sanguis! ut tam illustri significatione, perspicuum tibi esse possit meum erga te studiū, o, si adeò honorifica se mihi daret occasio, tibi aperiendi animum meum! quàm me felicem, fortunatumque judicarem!

*Subjunctivus Præsens.*

Nam quid est, quod tui gratia non suscipiam?



piam? non exequar? non exhauriam? cum mihi ipse sis æquè charus, atque ego ipse mihi esse possum; quid esse queat tam arduum, tamque difficile, quod te jubente non aggrediar, constantissimèque conficiam?

*Imperfectum.*

Currerem, si juberet ad desertissimas orbis oras, vastissima obirem aquarum, terrarumque spatia, excelsissimarum rupium jura superare, labores acerbissimos quosque non pertimescerem, discrimina omnia imperterritus subirem, ipsam denique mortem non reformidarem; neque vererer ullo modo, me, ut quisquam, vel observandi studio, vel obtemperandi celeritate antecederet.

*Perfectum.*

Esto fuerint, qui ob amicos, multa cupierint, multa fecerint, multa pertulerint, illorum nomina venerata sit antiquitas ipsorumque fidem atque constantiam; eximiis testatam expressamque monumentis, transmiserit ad consequentes annos, suspiciendam posteris.

*Plusquam perfectum.*

Audebo dicere, concessissent mihi profecto ii omnes, si animum perspicere meum potuissent, amoris palmam; seque gloriòse victos à me, vel inviti non abnuissent.

*Futurum.*

Quid ita? quia sic ego in te animatus sum, ut postquam me exeras te benevolentem

tiae testandæ causa, perfecero quidquid illi amore licet incitati vehementissimo, pro suis amicis præstiterè, aut præstare conati sunt, nihil me fecisse tamen putaturus sum quandiu advertero, superesse adhuc quidpiam, quod tui gratia navare possim.

*Infinitivus.*

Ita est; tametsi vires omnes meas, in te ornando, consumam, meque continenti labore angam atque conficiam, vix ullam tuorum meritorum partem, assecutum me esse credam, neque putabo unquam, meo me satisfecisse, vel amorì, vel muneri.

### P A R S III.

#### AMPLIFICATIONUM EXEMPLA.

*A Variis Rhetoricæ locis ac Figuris.*

**P**reter eas Amplificationes, quas habes in Progymnasmate de Figuris, ( quot enim Figurarum illustriorum, quæ Sententiarum dicuntur, Exempla dedi, tot Amplificationum Exempla sunt ) placet hoc loco, proferre non paucas à Locis ductas Oratoriis, variisque decoratas figurarum ornamentis; ut eadem opera, huiusmodi Locorum usum addiscas, & quo pacto, ex iis Amplificationes peti debeant.

C A P U T I.

A M P L I F I C A T I O N E S

*A Definitionibus conglobatis.*

**A**mplificatio fieri dicitur, à Definitionibus conglobatis. cum ejusdem rei, variae Definitiones, in unum locum congeruntur; unde alio nomine, Congeries, seu Frequentatio definitionum, vocatur hic locus. Ita Cicero, non satis habens dixisse incensam esse Curiam; adjecit definitiones Curiae plurimas.

Curiam, inquit incendit, quo, quid miserius, quid acerbius, quid luctuosius vidimus? Templum sanctitatis, amplitudinis mentis, consilii publici, caput urbis, aram sociorum, portum omnium gentium, sedem ab universo populo Romano concessam uni ordini, inflammari, excindi, funestari? (*Pro Mil. 19*)

*Huic Exemplo veteri addamus nova.*

*Virtus Latius.*

[*Polyfantbeta.*] Virtutem commendare si cupis, illam esse dices animi Animam nostri, cordisque Corculum & vitæ decus honestique germen, ac decoris florem, mentisque puriores delicias, æternique radium Solis, & felicitatis auroram, & immortalitatis parentem, perennemque fontem bonorum omnium.

Hac virtute, quid quæso pulchrius? atque adeo, quid amabilius fingi potest? [*Dissolutio.*] Est quippe, animi facies amæna, [*Antitrochæsis.*] Pignus probitatis morum, pudicitiae munimentum, tantum elogium, animæ pictura, taciti hominis commendatio eloquens, humanæ societatis lumen, & decus, rapax charitatis illecebra, sedes honoris. vestis virtutum omnium, omnibus nota gentibus, & gratâ lingua, neminique barbara, cunctisque jucundissima.

*Pulchritudinis excellentia.*

Non hic ego, plebejam illam ac vulgarem Pulchritudinem delineo, quam Euripides appellavit omnis infelicitatis originem, quam vocavit Theophrastus Tacitam fraudem; quam Theocritus, Pestem nuncupavit eburneam, quam Comicus Calamitatem omnium acerbissimam esse dixit, sed patritiam, regiam, sacram, plenamque Mysterii Formam loquor, cœleste superum Munus, Parelum divinitatis, Speculum divinæ speciei politissimum, expressam Numinis Effigiem, Radium ex æterni luminis fonte delibatum, & gratiarum omnium, quas cæteris in rebus supremus Artifex expressit, Collectionem perfectissimam, absolutissimumque Compendium.

*Patrorum, & Scholarum in quibus docentur, Encomium.*

Pueris laudem optas impertiri? Dic,  
Speram

Spem illos esse humani generis, [ *Metapho-  
ra* ] Fulcimenta Familiarum, rerumque  
publicarum Subsidia, Amorumque Deli-  
tias, Corculaque Virtutum, vitæ Gemmas,  
& Ocellos orbis; terræ Stellulas, cœlique  
flosculos, & Regulos mundi, Hæredesque  
æternitatis, gerinanosque Christi Fratres,  
& Filios Dei.

Dico Scholas, in quibus eos, cum littera-  
rum rudimentis, religionis elementa, &  
morum præcepta docemus, aliud nihil esse,  
[ *Allegoria* ] quàm secretos Regis æterni  
Hortulos, roseo fulgentes rubore verecun-  
diæ, candidissimæque pudicitæ liliis pul-  
chrè radiante: selectarum esse Seminaria  
stirpium, & elegantiarum Pulvillos, urba-  
nitatumque Areolas, Fontesque honestatis  
limpidos, & speciosas humanitatis Offici-  
nas, & Emporia sacra, pretiosioribus auro  
mercimoniis, terris, cæloque celeberrima.

*Barba commendatio.*

Adversus barbatos, instinctu nescio  
quo, reverentiam adhibemus? docti vi-  
delicet à natura, haud aliud esse Bar-  
bam, [ *Definitiones Allegorica:* ] quàm  
Authoritatis Insigne, de mento pendulum,  
quàm Vexillum reconditoris Prudentiæ,  
foris explicatum; quàm nativum oris hu-  
mani Diadema, de crinetextile, quàm pro-  
germinantem è genarum molli solo, Sa-  
pientiæ Lauream; Serrumque florem ver-  
nantis ætatis, maturorum fructuum indi-

cem, quos virilis producit autumnitas: nihil, inquam, aliud esse pilos hujusmodi, præter erumpentes Fibras judicii [*Paranomasia*] mentisque Radices in mento jactas, aut promicantes extra cutem Solis animati Radios, qui lucet in cerebri Cælo.

*Invidia Pictura.*

Quid est invidia? O vitium abominabile! Audi quid sit [*Antitheta frequentata.*] Invidia est malum genitum à bono; Caligo est à splendore oriens: à pulchritudine nata Deformitas, à risu Lacryma fluens. Rivus est fellis, à fonte mellis progerminans; è planta honestatis, nequitiae fructus: proprius ab aliena lætitia Dolor: Calamitas domestica, ab externa gloria manans: intestinum Infortunium, quod fortuna creavit prospera. Umbra est, non corporum sed animorum: Ægritudo voluntaria, Crux fixa malevolis, & necessaria virtutis Hostis.

*Calvini Elogium.*

Quæris à me, quid hoc hominis fuerit [*Metaphorica definitiones;*] quem hîc depingo? Dicam: Non homo, sed simulacrum fuit hominis, bonorum odium, dux improborum, perditorum magister, gaudeorum antesignanus, sceleratorum coriphæus, fraudum peritus artifex, dolorum fabricator pessimus, helluo sacrilegus & infamis, gurgis vitiorum, sentina turpitudinis, vorago nequitiarum, cloaca foedissimarum libidum, Christianæ Reip. pestis,

stis, Religionis labe, vitæ pernicies, ruina virtutum, disciplinæ clades, malorum disseminator, orbis incendium, mundi portentum, naturæ dedecus, luxuriosus scurra, lenisque impurissimus, plenus stupri, plenus furoris, & flagitii, plenus inconsideratissimæ temeritatis; atque, ut verbo dicam, inferni Monstrum.

*Quo tartara nunquam.*

*Effudere, Deo irato, truculentius ullum.*

*Ex his exemplis colligis definitiones hujusmodi conglobatas tum ad laudandum, tum ad vituperandum peridoneas esse.*

*A Definitione mixta.*

*Quando versamur in hoc Definitionis loco non prius ad alium transferre orationem placet quam duplicem Amplificationis ideam, omnium facile præclarissimam, quæ à Definitione peti possit, exposuero. Utramque habet Cicero, cujus verba ita proferam, ut ea tantum quæ ad artificium pertinent, relictis aliis sim allaturus, quò scilicet clarior, & proclivior earum imitatio tyronibus proponatur.*

*Quid sit Consul.*

*Consulem describit Tullius ut ostendat, Pisonem eo nomine indignum esse; primum per Negationem explicando, quid non sit Consul; his verbis.*

*Tu etiam mentionem facies consulatus tui? aut te fuisse Romæ consulem, dicere audebis? Quid? tu in lictoribus, in toga, & prætexta esse consulatum putas? his tu ornamentis-*

namentis, & insignibus consulatum declarari putas? (*En jam, per Affirmationem, quid sit esse Consulem*) Animo Consulem esse oportet, consilio, fide gravitate, vigilantia, cura, toto denique munere consulatus. [*Tum ingerit pugnam contrarium.*] Ego Consulem esse putem, qui senatum esse in republica, non putavit? & sine eo consilio, consulem numerem, sine quo Romæ ne Reges quidem esse potuerunt? (*addere poteris, eorum loco, quæ fufius prosequitur*) Consulem, eum esse putem, qui patriæ conservatorem ejecit qui everfione legum vexavit rempublicam, qui avaritia, libidine, crudelitate cives fcleratiffimo superavit? &c. Qui latrones igitur, fi quidem vos Consules? Qui prædones, qui hoftes, qui proditores, qui tyranni nominabuntur? Magnum nomen est, magna fpecies, magna dignitas, magna majestas confulis: Non capiunt angustia pectoris tui non recipit levitas ifta, non egeftas animi, non infirmitas ingenii fuffinet, non insolentiam rerum fecundarum tantam perfonam, tam gravem, tam feveram.

*Quid fit populus Romanus.*

*Hæc item Amplificatio, Definitione confat, per negationem, & affirmationem. Sed hoc habet peculiare, quod media inferitur Ironia. Describis ergo primum Cicero.*  
Quid



Quid non sit populus Romanus, *ſic.* (*Pro domo ſua* 89.

An tu populum Romanum eſſe illum putas, qui conſtat ex iis, qui mercede conducuntur; qui impelluntur; ut vim afferant magiſtratibus; ut obſideant ſenatum, optent quotidie cædes, incendia, rapinas? (*deinde addit ironicam exclamationem*) O ſpeciem dignitatemque populi Romani, quam nationes exteræ, quam gentes ultimæ pertimeſcunt; multitudinem hominum ex ſervis conductis, ex facinorosis, ex agentibus congregatam: (*tum ſubiicit quid ſit*) illa fuit pulchritudo populi Romani, illa forma, quam in campo vidisti tum, cùm etiam tibi contra ſenatus authoritatem, dicendi poteſtas fuit. Ille, ille populus eſt, dominus regum, victor, atque imperator omnium gentium, quem illo clariffimo die, ſclerate vidisti tum, cum omnes principes civitatis, omnes ordinum, atque ætatum omnium, ſuffragium, ſe, non de civibus, ſed de civitatis ſalute, ferre cenſebant.

*Ad utriuſque imitationem exempli, definire poteris, quid ſit Chriſtianus, quid Rex, quid Pater, quid Diſcipulus, quid Miles, aliaque ejus generis.*

## CAPUT I.

## AMPLIFICATIONES

*A Partium Enumeratione.*

**H**ic locus ad amplificandum est omnium aptissimus cum ad illum alii ferè omnes revocari queant, ut superius ostensum est nihilque ferè sit quod in partes suas non distribui facile possit: En Exempla.

*Pulcherrima Heroine Laus.*

*Ipsius commendare posses pulchritudinem, tribus hisce verbis.*

*Eximio Decore fulget.*

*Quæ tria verba à singularum partium enumeratione, sic amplifica.*

[ *Repetitionum congeries.* ] Quis fulgor, superi! quæ majestas, quæ venustas oris, quæ membrorum omnium dignitas! quàm festivè sedent, colliduntque in illa fronte veneres. Quam blandè rident, volitantque Gratiæ, per floridissimam genarum planitiem: ut lepores adblandiuntur oculis: ut corallia relucet in labris, ut ligustra splendent in collo: ut sinus argentei nitor pretiosè, purèque rutilat. Illæ manus quàm factæ ad sceptrum: Ille capitis vertex, quàm venerandus ad coronam. Oris ille decor, pectorisque decus, quam ad delicias, amoremque rapax. Morus ille omnis, & habitus & quam liberalis & elegans,

elegans , plenusque dignitatis , ac laude dignus .

*Virtutis pulchritudo , nunquam marcescit .*

*Fingam , Virtutem habere corpus , easque sic enumerabo partes ; in quibus præcipue decor est .*

Quid formæ venustate vanius ; quid fragilius , quæ floris instar , tenui livescit afflatu , casuque levissimo defluit , & vergente in senium vita , momento citius contabescit .

Tuus verò Decor , ò pulchra virtus , numquam non virens , atque vernans , ubique florens & amabilis , omni ætate gratus ; atque mirabilis , neque languescit morbo , neque flaccescit ægritudine , nec labore corrumpitur , nec violatur annis , nec vetustate deflorescit .

Tua illa Genarum lilia purpureis mixta rosis , nunquam marcescunt : Illæ pudoris flammulæ ab tuo vultu venustissimo promicantes extingui nequeunt . Nives illæ Oris purissimæ , nullo cupiditatum æstu tabescunt ; Nec obscurantur mæroris nube , gemini oculorum soles ; nec inflectuntur adversis , arcus triumphales Superciliorum illis impositi , Nec delitiis solvitur pectoris illibata glacies ; nec mæstitie rugis inaratur nitidissimæ Frontis crystal-  
lus .

Turpissima est, inquis, hujus Senis, & tetra species. At ego enumerando partes corporis singulas, tuam illam pbrafin ita diffundam.

Quis non exhorreat Senem [ *Polyssynteton:* ] illum retorridum, cadaverosum, capularem, scapulas habentem arcuatas in fornicem, hiantesque, & aridas facies; oculosque lippitudine riuos, fœtidâsque nares, buccasque fluentes, dentesque tremulos, nasumque simum, sulcatamque frontem, recurvumque mentum, genasque luridas, auriculasque flaccidas, aduncasque manus, falcatosque pedes, pectusque pulcibus scatens, caputque cimicibus putens.

*Veram Laudem sola Virtus parit.*

*Hanc sententiam à Grammatico prolataam sic Rhetor explicabis.*

Non satis est, vacare culpa; qui laudem prehensas. Animum geras oportet virtutibus eximium, insignem pietate fortitudine clarum, religione præstantem, eruditione conspicuum: Alium si te præstas, & laudem quæris, ludis operam, & cum laudaris, luderis, sceptro sis verendus licet elatus imperio opibusque potens. [ *Enumeratio variorum ordinum.* ] Reges siquidem laus contemnit, si non magis moderentur sibi, quam regno. Duces despicit, nisi prius se, quàm hostem vincant:

cant: aspernatur Opulentos, qui pluribus non abundant animi bonis, quàm fortunæ, spernit Optimates, quibus antiquior est dignitas, quàm virtus. Ut autem quisque laude fulget, hunc maximè illustrat, exornatque laus, at, quàm præclare, quàm insigniter: Plebejum respicit, efficitque Patritium: armis instruit Militem, & Ducem facit: terræ Filium, suscipit & cælo invehit; Misero favet, fælicemque reddit, suaviatur Inopem, supraque modum locupletat.

*Beatus esse vis? Virtutem cole.*

*Hoc Paradoxum oratoriè explanare vis; sic age Enumerando varia hominum studia.*

[ *Apostrophe, & interrogatio.* ] Quid molimini structores Babylonii Gigantes non tam mole corporis, quàm superbia? Quis ille est cognitionum vestrarum æstus? quæ mentis agitatio? quis ardor impotentis animi, in excitanda illa Turre, cacumine tactura cælos? Erratis toto cælo, stolidi, vel dum in cælum tenditis. Ad superos non itur gradibus lapideis, sed honoris, cælum si cogitatis, factis laude dignis erigite Virtutum monumenta sublimia, non substructiones insanas. Una est ad astra via, vera Virtus, hæc terram cælo nectit, hominesque syderibus inserit. Illam sequimini, qui adspiratis ad cælestia? Illam peramate, qui flagratis amore vitæ? Illam amplectimini, quorum

rum oculos, animosque tenet formæ venustas, Hanc adite, qui auro inhiatis; Ei servite bonorum candidati, Hanc prestat, quibus vitæ placet honestas. Virtute, nihil est honestius, ac nobilius, nihil pulchrius, & præstantius, nihil pretiosius, & divinius.

*Honori omnes serviant.*

*Vocem illam, Omnes, sic exponit.*

Honori, subdunt sceptrâ Reges, Honori submitunt vexilla Duces; suas ei palmas, & lauros, Victores ac Triumphatores subjiciunt; Ei Præsules infulas, antistites thiaras consecrant, artes omnes ac scientiæ suas illi elucubrationes inscribunt, dedicantque in Honore quærendo, curas omnes, studia, cogitationes, vigiliâs, universi figunt, & locant.

*Sine Virtute, nihil gloriosum.*

*Vocabulum hoc, Nihil, ita dilatabis.*

[ *Apostrophe.* ] Quid de te possumus, & magna Virtus prædicare magnificentius, quàm cum asserimus, præclarissimorum facinorum, majorem nullam inveniri posse mercedem, præter Te; nullumque esse tam illustre factum, quod nisi à te commendetur, non turpe sit; nullam magnitudinem esse tam celsam, tamque exaggeratam, cui coronam non imponas; honores vilissimos esse, quos non exornas; sordere purpuram, quæ splendorem à te non trahit, non radiare diademata, quibus fulgo-

fulgorem non acceris; vacillare solia, quæ non erexisti; trophæa iuere, quæ non excitasti; nihil habere sceptræ pretii; quæ non contulisti, nullius esse dignitatis ornamenta regia, quæ non proficiuntur à te, &c.

*Animus pulcher, in pulchro Corpore.*

*Quid efficiat animus ille in suo corpore significare si volueris, ita ferme dices.*

Corpori suo venustatem, robur, maiestatemque conciliat animus pulcher.

*Pulchrè quidem sed quânto elegantius, si in hunc modum eloquaris!*

[ *Distributio* ] Simul ac subiit Corpus suum, generosus ac Pulcher Animus, & per interiora diffusus est, Deus immortalis: ut repentina luce fulgurat; ut splendet: ut micat: ut animat: ut accendit: ut movet omnia: Statim omnes aptè conformat artus ad decorem; omnes componit motus ad dignitatem, omnes concinnat partes ad harmoniam; ad honestatis leges omnia membra perfectissimè dirigit. Vigorem ingenerat menti, ardorem pectori instillat; veneres aspergit in ore, afflat honores oculis, illigat labiis lepores, collo decus affundit, genis pudoris flammulas, capillis venustatem, fronti speciem, capiti maiestatem, absolutæ demùm, per universum corpus radios pulchritudinis floridissimè circumfundit.

## CAPUT II.

## AMPLIFICATIONES

*Ab effectis.*

**A**D hunc locum transferri possunt Exempla proximè superiora nam in eorum quibusdam, ac præsertim postremo omnium tam enumerantur Effectus quam insipientibus istis.

*Vitii, & Virtutis Effectus.*

Nulla, inquit, mala sunt, quæ non exoriantur à pestilenti fonte vitiorum; nulla bona, quæ virtus non afferat.

*Bene sed nimis exiliter Expone, quæ mala illa sunt, & quæ bona.*

Inde vitii delineat sæditatem, quod rationi adversetur, [ *Repetitio*; ] quod contaminet animum, quod divinum Numen offendat: quod auctorem suum diris excruciet modis, [ *Dissolutio*: ] angore stimulet, curis exedat, metu percutiat, furiis lancinet, suppliciis torqueat, exanimetque doloribus maximis, nullo sermone satis explicandis. Tum, quod leges, quod instituta, quod scœdera, cæteraque humanæ societatis sanctissima jura violet [ *Synonymia*. ] pervertat, labefaciat, exciadat, perdat, extinguat [ *Adjunctio*. ] Denique, quod pestem rebus publicis, provinciis calamitatem, perniciem regnis, urbibus exitium, familiis damna innumera, sin-



ra, singulisdenique universum malorum agmen importet.

[ *Antitheta.* ] Virtutem autem si ornare cupis; dic illam esse, quæ moestos recreat, ægros reficit, jacentes erigit, excitat afflictos, miserolque levat: quæ splendorem rebus obscuris, vilibus pretium, abjectis dignitatem, vulgaribus honorem, humilibus excelsitatem, contemptis condemnationem accersit, omnibusque venerationem conciliat.

*Geographia laus.*

Mira sunt, quæ facimus Geographia beneficio, quam artem si laudare cupis conversa in illam oratione ejus Effecta sic recensere poteris.

[ *Apostrophe.* ] O artium præclarissima, [ *Dubitatio* ] quibus te literarum monumentis extollemus? qua prædicatione celebrabimus? quo tibi laudum genere pro tuis in nos beneficiis grates referemus? Nostris enim, ut servias oblectationibus, & emolumentis, facis mundi compendium [ *Hiperbaton* ] omnia omnibus loca locis conferis, remotas regiones proximis implicas, exterisque ac disiectissimis nostras innectis. [ *Antitheses.* ] Per te coercentur tempestatum vicissitudines, dispersa congregantur, admoventur distantia, immota transuehuntur, concluduntur in puncto montes; exiguisque lineis flumina ingentia terminantur. Per te, Asiam, atque Africam transferimus

ferimus in Europæ orbem in novolustramus veterem; Australes plagas in Septentrione, Orientem in Occidente, & vicissim Occidentem in Oriente, sine ulla tamen ordinis perturbatione obimus. Tua opera quæ miracula, sed jam sine miraculo, patrantur: figitur fluminum lapsus, firmantur, quæ natura fluunt, sistitur, quod semper volvitur; quod globosum est explicatur; retinetur, quod stare nescit; quodque non nisi suis libratum fundamentis sustineri potest aliena vi, nutuque ac sine fundamentis consistit.

### ADOLESCENTIUM

*In spernendis rebus caducis, Summa Virtus.*

Vestra, (ita loqueretur, rudis Rhetor) vestra virtus, Adolescentes sectissimi, in hoc summa est, quod contemptis rerum humanarum illecebris, per summam pietatis, & castimonie laudem aspernami-  
ni vitæ delicias, & in religiosa claustra conceditis.

*At petitus idem argumentum hoc modo diffundet.*

[*Dubitatio, & Allegoria.*] Quid de multiplici virtutum fructu, Adolescentes, referam quas in musarum viridariis, nisu generoso, felicique partu profunditis? [*Repetitio, & Metaphora.*] Ubi floret amoenius, quam in vobis, germana pietas? ubi purior ardet divinæ flamma charitatis? Ubi castimonie candor enitescit pulchrior?

chrīor? Ubi rerum cœlestium cultus ardentior, & in supremum Numen, religio major?

[ *Fusa volubilesque Periodi.* ] Num vos estis, ut ab hac una laudum particula, colligatur genus universum, qui animo laboribus non invicto minùs, quàm voluptatibus inexpugnabili, pernicioſa rerum fluxarum blandimenta rejicientes, colonias quotannis ducitis, è Collegiis nostris in novas cœlestesque plagas : [ *Allegoria, à Bello ducta.* ] ibique convertis armis in ipsa rebel-lantis naturæ viscera, fractis, domitisque cupiditatibus improbis, compresso intestinarum perturbationum tumultu, revulso pestilentium illecebrarum vallo, quibus hominum vita cingitur, misso denique sub Religiosæ vitæ jugum, Mundo ipso toto quantumvis tumido victoriis, erigitis trophæa gloriæ, [ *Antitheses.* ] tantò altiora quantò abjectius vos ipsi deprimitis : ed magis conspicua quò magis in obscuro latent ; tantò splendidiora, quantò remotiora sunt à luce : opimisque spoliis ed graviora, quò nudam magis, ab exitiosis fortunæ commodis, spoliatioremque initis vitæ rationem : [ *Repetitio.* ] ibique, per subactos, calcatoque vitiorum cuneos, vestrorum currus triumphorum agitis, ascensum super astra molientes : ibique vestigia virtutum relinquitis, non impressa leviter, ad exigui prædicationem temporis, sed fixa firmi-

firmiter, ad memoriam sæculorum omnium sempiternam: Ibique, ea præclare, forti terque susceptis, exituque felici terminatis, [ *Synonyma* ] quæ divinis decoranda laudibus, ad cœlum præconiis efferenda immortalitatis donanda præmio, [ *Distributio*, & *Adjunctio*. ] stuporem mortalibus afferunt, Immortalibus admirationem, vobis decus nunquam intermoriturum, ipsique Deo, æternæ gratulationis materiam.

## LAUDIS AMOR.

*Quid efficiet.*

Nos, laudis amor, inquit, à vitiis avocat, & ad omnem virtutem impellit.

*Vis, duo illa Effecta dilatem ipsamque Laudem compellerent, veluti Reginam quandam præpotentem?*

[ *Apostrophe*. ] Tu ipsa es, ô castissima, fecundaque Laus, [ *Allegoria à Conjugio petita* ] cujus amore, complexuque purissimo gravidati, facta illustra, hoc est, innumeros hæredes gloriæ, nominisque nostri progignimus [ *Disjunctio*, & *Distributio*. ] probrosa cæteroqui virtutum sterilitate laboraturi, aut insana vitiorum luxurie, nisi nos avulsos ab uberibus voluptatum, invitares ad immortalis vitæ decus, erudires ad disciplinam, corroborares ab laborem, firmares ad pericula, interritos ad omnem casum, eventumque redderes, nec adversis minus infractos, quam

quam prosperis præstares invictos.

[ *Similitudo & Allegoria.* ] Itaque, non secus ac per absentiam Solis nocturnasque tenebras; universa natura torpet, exoriente vero die, excusso sopore, suscitantur omnia: sic te, ò Sydus nostrum, sic nostris dum te subducis oculis, nec nos illuminas, inglorii jacemus; & inertes, pigro torpore languidi, indecora quiete desides, molli-  
tiè inhonesta fracti, fœdoque implicati, & oppressi somno, stertimus ignobiles sine nomine, sine honore; At si exoriaris nostra Lux, quid non in orbe præstas? quid in nobis non efficis? Ad primores divinæ tuæ formæ radios evigilat de repente humana Mens, Disciplinæ velut desiliunt è lecto, Artes se foris explicant, Virtutes quasi domo egrediuntur, in publicumque prodeunt veniuntque in lucem, ut à te vires, ac decus hauriant, & quidquid per illas suscipimus, tuo beneficio coronetur.

Quid enim est, quod non aggrediamur hortatu tuo, quod non perpetremus te auspice [ *Subjunctio.* ] Armisne gerenda res? [ *Distributio.* ] Tu manibus arma ministras, [ *Poly synteton.* ] & nervis robur addis oculisque, ardorem animisque generositatem ingeneras, pectoribusque fortitudinem: Tu pericula submoves, laboremque lenis, & levas, viamque sternis ad victoriam, & munis iter ad triumphum, palmisque obsecuris vias, & arcus  
I 2 exci-

excitas honores erigisque trophæa gloriae, laureasque texis coronas: Victorum capitibus imponendas.

Nomen ne aliquod, decusque, pacis artibus colligere juvat [*Repetitio*]. Quis id assequeretur sine te, ò præclara Laus? Quis publicæ rei navaret operam? miserorum causam susciperet? discrimina subiret pro salute civium? Quis literarum laboribus addiceret vitam? quis ætatem, discendo docendoque tereret? Quis vexaret studii animum? Quis nondum natos occupaturus beneficiis ingenii monumenta sui, contemni meditatione, assiduisque perfecta vigiliis transmittere curaret ad posteros,

[*Expolitio seu commotatio*] nisi Laudem cogitarem, nisi spectarem id præmii, nisi ad hoc honoris centrum consilia nostra confluerent, nisi ad illam virtutum metam dirigeremus vitæ cursum: nisi ad hunc gloriæ scopum vota collimarent omnia [*Allegoria*] & spirando mortalis hujus vitæ auram, ad immortalem aspirare nobis liceret, quem morientes in sinu Laudis nos consecuturos certò speramus.

### C A P U T III.

## AMPLIFICATIONES

*A Consequentibus.*

**A**MPLIFICATIO fit ab hoc loco cum ea, quæ tam quamquam consequuntur exponi.

*exponimus. Ut si adversus auctorem belli faciendi mala enumeres, quæ bellum sequi solent, videlicet.*

[ *Distributio partium* ] Exhaustum ærarium, abacta pecora proculcatas segetes, incensos vicos & villas, desertos agros, everfa mœnia compilatas domos, direpta templa fractam laboribus juventutem, tot adolescentium mores licentia depravatos, tot virgines indignè constupratas, tot orbos senes, tot viduas matronas, oppressas præterea leges, extinctas artes, corruptam disciplinam, obliteratedam religionem, confusa divina humanaque omnia, tibi uni accepta referemus, si belli author fueris. ( *Ex 4. ad Heren. & Eras. de cop.* )

[ *Solis Occasum Consequentia.* ]

[ *Hypotyposis.* ] Cerne, ut occidente die [ *Allegoria à funere petita* ] natura omnis esset extincta sepultaque tenebris, amicitur veste tenebri mundus; ut accensæ micant toto æthere funestæ faces; ut cœlum quod manè, præ letitia colliquefcebatur in rorem melleum, serò solvitur in noxium fletum, ut evanescit orbis pulchritudo, ut obsolescit splendor urbium, camporumque amœnitas, [ *Similiter deficiens* ] & plantarum viror, & florum decor, & totius telluris honor, ut triste silentium cuncta tenet, dum solæ Noctuæ, soli bubones, Vespertilioes, ac Ranae infestant omnia ferali cantu, sibilis horrido-

nis, infaustis stridoribus, & coaxationibus  
malè ominosis. Interea cæteros animantes  
stupor ac pavor occupat, [ *Isocolon.* ] vo-  
lucres gemunt in nidulis, pecudes latitant  
in antris, feræ fremunt in cavernis, &  
homines jacent in lectis, oppressi somno,  
sopore obruti, &c.

*Conditionum Aequalitatem,*

*Consequentia*

Si nullum esset potentiae, nullum digni-  
tatis, & authoritatis discrimen; sed æqua-  
liter omnes idonea bonorum copia frueren-  
tur, ( quod futurum fuisse præstabilius  
Thales censebat ) quid sequeretur? hoc  
nimirum, & cum pares essent omnes fu-  
turi; opibus & potentia, reperiretur ne-  
mo qui audaciam improborum posset reprimere,  
compescere furem, libidinem,  
ac petulantiam coercere. [ *Hypotyposis.* ]  
Atque ita, volitarent passim homines illi,  
quod immanis, acerbique natura ad flagi-  
tia stimulat, amentia incensi, inflamma-  
ti libidine, audacia terribiles; & quod fu-  
ror impelleret, quod cupiditas incitaret, eò  
fine ullo formidinis sensu continuo rape-  
rentur; [ *Subjunctio.* ] Nam quid est, quod  
tunc nefarios illorum conatus posset fran-  
gere? prænarum timor, at quis irrogaret? Le-  
ges; at quis ferret aut tueretur? Multæ  
irrogatio, at, quis diceret? quis solveret?  
Hoc certè jam habemus, ut latebras quæ-  
rant, qui peccare volunt, lucem fugiant, op-  
portu-



portunitates aucupentur: suppliciorum quippe metu, & legum vinculis irretiti tenentur, & judicia reformidant eorum; qui authoritate præstant; qui si non essent, quid esset, cur celerati homines sua vitia tegerent flagitia occultarent, aliorum vitæ ac pudicitie insidiarentur; Quin potius proposita sibi certa impunitatis spe, quam maximam esse peccandi illecebram, nemo nescit. [*Expositio & Gradatio.*] ruerent in scelus, præcipientes, in omni flagitiorum cœno volutarentur, & perfractis per summam licentiam, pudoris ac naturæ repagulis, non modò, non tenebras quærerent, & integumenta suorum criminum, sed in turpissimis ac nequissimis rebus frequentissima celebritate, & clarissima luce lætarentur.

*Volatum Consequentia si Alatus  
esset Homo.*

Longè beatiorē fore mortalium vitam, si essemus omnes pennis instructi, satis indicat, communis illa omnium volandi cupiditas, & publica vox [*Synonymia.*] O utinam, inquit, alatus hunc essem! O si darentur pennæ mihi! fecissent superi similiter atque aves volare nunc possem!

Quid enim faceres, quæret aliquis, si aliger esses? Rogas? Quid verò facere non possem? [*Similiter cadens, & desinens.*] Nobilissimas orbis universi partes percu-

I 4 rerem,

xerem, provincias obirem, lustrarem regiones, & oppida, tranarem fluvios, flecterem promontoria, maria, transmitterem, immensa terrarum, aquarumque spatia celeritate admirabili, incredibilique delectamento pervolarem.

Quid præterea; [*Isocolon*] Ambularem, quò liberet, pedem inferrem, quò placeret omnibus me locis præsentem sisterem, pervaderem infestas barbaris oras sine metu: obsessas hostibus munitiones perrumperem sine formidine, & per invias solitudines, per vastos sylvarum recessus, per abrupta montium iuga, difficilesque aditus, [*Similiter cadentia*] delusis custodibus, irrisus vigilibus, neglectis præsidiiis, contemptis excubiis, arces, castella, turre, propugnacula, civitates tuas invaderem, securus adirem.

[*Transitio.*] Atque hæc quidem, si in exteris placet peregrinari regionibus, nam si domi remanere delectat, nec eas aves imitari, quæ certis tempestatibus verrunt solum; non minor sanè, imò liquidior existet voluptas, tum maximè, cum relaxandi animi gratia, nos ad volatilem deambulationem cum familiaribus, conferemus. Tunc enim, modò levi alarum remigio amicos salutatum per urbem volitabimus: modò podium insidentes, aut mæniis, aut fenestris ædium inspicere poterimus, quæ sunt in conclavibus, & cubiculis: qua delectatione  
haud

haud scio, an nulla esse possit in vita limpidior. Nunc ubi remiserit hyemis inclementia, impellente Zephyro, & vocante aura, in hortos, & viridaria confluemus, ibique flo-  
rescentibus insistentes arborum ramis, aut cum Lusiniis canemus in amœno recessu sub umbella frondium; aut inter vepreta, consilesque sylvas cum passeribus; aliisque aviculis colludemus quo quid ad sensum, animique oblectationem jucundius?

[ *Transitio.* ] Sed hæc ad voluptatem, quid commoda memorem, à volatu provenientia? fac æ. hominem, alatum esse, quantam tunc, Deus immortalis utilitatum messem colliget? Sanè in Cretensisibus licet labyrinthis, difficultatumque Mæandris inextricabilibus includatur cum Dædalo: inde alarum beneficio, evadet liber cum eodem, & velociter mirabili.

[ *Repetitio:* ] quò illum vocabunt negotia, quò incitabit amor, quò spes impellet, quò rapiet cupiditas, quò feret innata propensio, nullo labore, nullis impendiis, nulla comeatus comparandi cura, iniquitate locorum nulla prohibente viam, aut retardante peregrinationis consilium, sine animi molestia, aut corporis defatigatione pervolabit.

## CAPUT IV.

## AMPLIFICATIONES

*Ab Adjunctis.*

**A**ntonii vomitum amplificat Tullius, ad Adjunctis personæ, loci, temporis & circumstantiarum, his verbis. ( Ph. 63. )

Tu istis faucibus, istis lateribus, ista gladiatoria totius corporis firmitate, tantam vini in Hippiae nuptiis exhauseras, ut tibi necesse esset, in populi Romani conspectu vomere postridie. [ *Exclamatio.* ] Orem, non modò visu scèdam, sed etiam auditu? Si inter cœnam, in tuis immanibus illis poculis hoc tibi accidisset, quis non turpe duceret? In cœtu verò populi Romani, negotium publicum gerens Magister Equitum, cui rustare turpe esset, is vomens frustis esculenti, vinum redolentibus, gremium suum, & eorum tribunal implevit.

*Puerorum mala Indoles.*

Quæ jucunditas animi, in puerorum cultores ac magistros respèrgi potest; à quorum videlicet stoliditate pervicaci, nihil nisi minis exprimitur? Qui bestiolarum in morem nihil aliud ambiunt, quàm quod blanditur oculis, aut arridet palato, aut sensum alium, quapram delectatione permulcet? [ *Similiter cadens & desinens.* ] Qui animum, in ea perpetuò cogitatione defixum habent, ut mentem nugis obruant, ingluviem cupediis expleant,

expleant, ridicula venentur, papiliones aucupentur, locis incumbant, ineptiis indulgeant; dies noctesque levissimis oblectationibus conterant. Qui rota figulari mobiliore stare loco nesciunt, mente vagi animo volucres, ingenio plumei, lingua lubrici, indole petulci, motu turbulenti, assueti tripudiis passim palantes, concursantes subliantes, seseque in omnem partem, nullo non loco ac tempore, turbinis instar agitan-tes? Qui levitate ipsa leviores amare hodie, cras odere, nunc blandiuntur, post paulò obmurmurant; rident modò placidè, ac de repente torvè plorant, & quem manè suaviuntur; vespere, si vires juvaret audacia, unguibus appetere, dentibusque furibundi dilaniarent?

[ *Præteritio, interrogationi juncta.* ] Nihil dico de sordibus: nam quid puero negligentius? Trade illi prætextam auro splendidam, luto mox reddet inquinatam. Mitto socordiam, nam quid vecordius? propone sceptrum, sceptro præponent calculos, & post habebit nucibus coronam. Stuporem prætereo: nam quid stolidius? Docè, quid sit honestum, surdo canis, enarra fabellam, aures erigit illicò.

## A D O L E S C E N T I U M

*Præclara, in Scholis, Indoles.*

[ *Interrogatio, & Repetitio* ] At vobis, Adolescentes urbanissimi quid solertius? quid comius? quid ingeniosius? quid ma-

gis illecebrosum, & magis adblandiens?  
 [ *Definitiones.* ] Vos, Musarum amores,  
 Parnassi Christiani decus, Reip. nostræ  
 lumina; gymnasiorum estis ornamenta,  
 Cælique hujus eruditione fulgentis, luci-  
 dissima sydera. Vos specie venusti, elegan-  
 tia liberales, ornatu comptuli, omnium  
 pellicitis oculos, & corda, & quorum bene-  
 volentiam, [ *Enumeratio partium.* ] statu-  
 ræ dignitate, splendore frontis, capillorum  
 cincinnis, apta corporis habitudine, mem-  
 brorumque omnium, concinnè inter se,  
 lepidèque nexorum pulcherrima confor-  
 matione colligitis, pulchriorum decore  
 munerum, animique commendatione no-  
 biliori, penè cogitis ad obsequium.

[ *Antitheses.* ] Vos non importuni, ut illi  
 pusiones, sed festivi, non inepti, sed commo-  
 di, non insulsi, sed urbanitate conditi, non  
 sordidi, sed lauti, non stupidi, sed argutissi-  
 mi, [ *Repetitio* ] quo genere officii vestros non  
 demeremini præceptores? quæ non præbetis  
 argumenta vestræ in illos observantiæ, quam  
 studii significationem non adhibetis? Ut il-  
 los colitis! ut Amplectimini! ut dicto estis  
 audientes! ut vos ad illorum mores, nutum-  
 que fingitis! [ *Subjectio.* ] Lætitiæ ne illi,  
 præferunt? arridetis. Doloremne? una  
 doletis. Ornatene dicunt? applauditis. Ap-  
 positene docent? laudibus effertis. Acutene  
 differunt? sine fine miramini. Quid multa?  
 [ *Similiter cadens & desinens,* ] summo stu-  
 dio

dio paretis jubentibus; obsecundatis adhortantibus, fertis objurgantes, redamatis amantes, absentibus gratum præstatis, memoremque animum, præsentibus exhibetis venerationem ac reverentiam.

*Gloria Virtutem æternitati consecrat.*

[ *Allegoria.* ] Simul ac purissimo Gloriæ amore fecundatus animus noster egregium quidpiam concepit peperitque facinus, in lucem editum sustulit illicò ipsamet gloria, ne jaceat humi, gremioque susceptum fovet, ne stareoque lacte pascit, exornatque tam diu, comit, illustrat, expolit, quoad sæculorum oculos omnium, in sui admirationem convertat. [ *Gradatio.* ] Nec aliud satis habet, etenim ne qua vetustas suæ rugas obducatur soboli, sed ad omnes ætates recens illius pulchritudo, integraque perveniat quid agere solita est? Celeberrimarum artium pulsatur fores, obit officinas, solertiam explorat, laceffit industriam, opem requirit, consumit operam, [ *Expositio* ] ut sui etiam post Anni mortem ejus imago vultus, animique vitam in ære, spiret in marmore, scintillet in auro, vibret in argento, fingatur in statuas, formetur in effigies, exprimatur in Icones, in simulacra figuretur. Nec dum contenta mutam oris imaginem posteris demirandam traderet: Ipsumet, litterarum subsidio, tanquam excitatum ab inferis, omnibus sistit locis, ætatibusque repræsentat omnibus, seu loquentem faciens, quæ-

quæcunque dixit sapienter, seu facientem inducens quæ gessit eximie, sicque impositum literato, vitalique currui, aurigante historia, præeunte fama, comitante honore, per remotissimos locorum tractus, ordinisque temporum redivivum atque triumphabundum circumducit.

## C A P U T V.

## AMPLIFICATIONES.

*A Contrariorum Frequentatione.*

**E**st Contrariorum, seu Antithetorum frequentatio, cum multa sibi adversantia congeruntur. Mirabilem habet Tullius Amplificationem ab hoc loco ductam cum describens ea, quæ in Varronis Villa fiebant ab Antonio, homine improbissimo ita loquitur. (2. Phil. 104.)

At quam multos dies in ea villa turpissimè es perbaccatus? Ab hora tertia bibebatur, ludebatur, vomebatur. O tecta ipsa misera quàm dispari à domino (quamquam quomodo ille dominus) sed tamen, quàm à dispari tenebantur! Studiorum enim suorum, Marcus Varro voluit esse illud non libidinum diversorium. Quæ in illa villa, antedicebantur; quæ cogitabantur, quæ literis mandabantur? jura populi Romani, monumenta majorum omnis sapientiae ratio, omnisque doctrina. At verò, te inquilino, (non enim domino) personabant omnia



omnia vocibus ebriorum, natabant pavimenta vino, madebant parietes; ingenui pueri, cum meritoriis; scorta inter matres familias verlabantur.

*Nuptæ infelices.*

Leclissimæ non raro Virgines, castimoniæ laude claræ, viris nubunt spurcissimis, seu vi coactæ, seu delinitæ blanditiis, seu muneribus irretitæ: atque ita fit, ut in eadem sæpè domo diversentur pudor, & impudentia, honestas, & obscenitas, libido, & modestia, deformitas, & pulchritudo, virtus, & vitium.

*Sed hæc de infelicitate nubentium, ad parentium calamitatem styllum convertamus.*

*Matres miserae.*

Ea est miseria humanæ sortis, ut mutatis in feretrum cunis, [ *Paronomasia*, ] prius sæpè soboles [ *Paronomasia* ] pereat, qui pariat mater, ejusque tumens uterus, fiat proli non raro tumulus. Atque etiam versa vice, oriente filio, haud infrequenter parens occidat? tenebrisque condat oculos, dum suos aperit in lucem puer, papillisque lacte manantibus, lethalibus madeant lacrymis pupillæ; tantumque abest alienam, ut fervet vitam parens, ut amittat propriam; adeo non subducens morti eum, ut morituro præeat, & aperiat securo, sepulchrum prior.

*In Judam proditorem.*

[ *Antitheses.* ] Perge, scelerate proditor, per-

perge, quo cæpisti pede, Caput generis humani perdere, pestem moliri in Auctorem vitæ, Lupis adornare convivium purissima carne Agni sanctissimi, Solem mittere in lethales umbras, veritatem tradere vinclam in manus calumniæ, & triginta argenteis, per inhumanitatem planè ferream, sacrum humani generis Redemptorem, emptoribus sacrilegis vendere. [ *Paronomasia.* ] O excæcate, qui solum ut oculos consulas, oculos habes. O impudentissime Nundinator, &, o ex avaritia Prodiges, qui inventum in horto thesaurum omnis sapientiæ, non abscondisti, illum ut ibi emereres, sed potius, ut perderes, prodidisti.

*Pulchritudo Fallax.*

Ita est; tota ex fallaciis fraudibusq; concreta Pulchritudo. [ *Interrogatio Antithesimissa.* ] Quàm sæpè si quidem, scabros, asperosque mores, polita delicataque pelle convestit! Quàm sæpè formosa facit, co-honestat deformes animos: turpissimisque mentibus, liberale prætendit velum. [ *Repetitio.* ] Quoties fraudulentius grassat in perniciem nostram dum Rosæ instar, foliorum purpura blandè fulgurat, spinarum aculeos, in aspicientes contorquet? [ *Allegoria.* ] Quoties, è castissima facie glaciei, obscurior flamma concepta est, & è lucis intuitu ab ore radiantis, impudica nubes libidinis exiit fædaque caligo prorupit? Quàm  
multi

multi quotidie, perverso rerum ordine, cæcutiunt ab alienis oculis, turbantur ad serenæ formæ conspectum, impallescent ad ejus ruborem [ *Similiter desinens;* ] & frontis pudorem excutiunt, dum frontis honores aspiciunt, & impudentiores existunt, quò magis pudorem mirantur. Nimirum, viret illa quidem, sed urit; floret sed pungit; [ *Paronomasia,* ] lenocinatur, & latrocinatur, eodemque momento rapit oculos, & eripit mentem ut quò quis ipsius amantior est, eò videatur amentior.

*Pulchritudo potens.*

*Jam, si pulchritudinem laudare placet, ejusque amplificare potentiam sic eloquaris.*

Illa est, quæ corporeo, fragilique throno insidens, secunda dominatur in amicos, & quantumvis ab omni sensuum contagione remotos, suis legibus obnoxios reddit [ *Antitheses & Paronomasia crebra.* ] Illa est, quæ lepore suo pertinacissimos flectit quæ ignibus suis inflammat frigidissimos, quæ laetitiae gratiarum ferreos molliat, humanitate frangit barbaros, mitigat urbanitate agrestes, suavitate ferreos domat, solo aspectu stupidissimos excitat ad sui venerationem, & obsequium.

Tyrannidem exercere diceret, adeò cuncta sibi sine lege subjicit, nisi amorum potius bella gereret, quàm armorum jure si insidiis, non illecebris grassaretur, si tela inficeret veneno, & non ambrosia; vulnera-

neraret spinis, non rosis; & sagittæ, quas ad cor adigit, aliunde mitterentur, quàm ab arcu oculorum.

Tyrannum crederes, si spicula non essent oscula, si delitiis non tormentis, gratia non terroribus, neſtare non cruore, non laqueis sed lenociniis, voluptate non clade, leporibus non machinis, veneribus non vulneribus nos illa non adoriretur, & faces alias vibraret, quàm quas accendit amor, & hostem, quem oppugnat, non converteret in amplexum potiùs quas in fugam.

Pugnat si quidem Virago illa victrix animorum. [*Disjunctio*], pugnat in otio, vincit in pace, triumphat oculis, tacendo tonat, aspectu fulgurat, & uno, non dicam imperu sed intuitu, pectus invadit, cor obsidet, expugnat animum, sibi que tributarium facit. Quid? quod sine voce loquitur, sine vi vim affert, sine catenis allicit, sine præstigiis immutat mentem, & vidisse, vicisse est, & visam esse, triumphasse.

Testis Helena, testis Phryna, testes innumeri; sed tamen illa jam palo alligata, atque obruenda lapidibus, oculorum fulgure delictorum manibus lapides excussit: Hæc manifesti comperta criminis, jamque multis præjudiciis irretita, simul ac discissa veste aperuit sinum, præcluserat ora iudicum & pro se perorante forma, cunctorum sententiis absoluta est. Ut vel inde verum fieret, quod lyricus Poeta, de hac eximia

natu-

naturæ dote, ingeniosè cecinit; fuisse videlicet pulchritudinem mortalibus à natura datam, ut ea lancearum, scutorumque loco uterentur, ferrumque, atque ignem vincere, quid decore præstat.

## C A P U T VI.

### AMPLIFICATIONES.

#### *Ab exemplorum frequentatione.*

**E**XEMPLORUM frequentatio est cùm multa coacervantur Exempla, quibus probetur, quod propositum est. Terna sufficient Exempla, circa unum & idem argumentum, videlicet in laudem Laudis; cujus prima fit laus, quæ

*Laudem omnes ambiunt;*

Innumeri, Laudem proci circumstant; illam quicunque conspexere, depereunt, & aspernantur universa, ut ejus fruantur amplexibus, Thesauros nempe inexhaustos habet quibus suos dicit clientes, æternumque beet. [*Correctio.*] Fallor, non usus sum voce, qua decuit; ei Thesauri nulli sunt, verùm Thesaurus ipsa est, non auri, sed decoris, non argenti sed gloriæ, non gemmarum sed honestatis, non supellectilis pretiosæ, sed nominis, æternæque famæ.

Thesaurus est, non abditus, sed palam obviis, cunctisque patens, at paucis notus, nec nisi sapientibus. [*Repetitio, & inter-*

*rogatio.* ] Thesaurus est, quem Philosophi ut reperiant, quæ mysteria non explorant? quæ non pervadunt adita? quæ secreta non penetrant? quas non movent quæstiones ac controversias? Quem, ut nanciscantur Eruditi, quæ volumina non evolvunt? quas bibliothecas non obeunt? quibus laboribus, vigiliisque non se torquent? Quem sibi, ut Bellicosi comparent, quas non committunt pugnas, non edunt strages, non pariunt vi-  
 ctorias, non referunt coronas?

Hoc Thesauro, Crates ut potiretur, projecit opes: ut illo Cato donaretur, profudit sanguinem; ut Brutus illum possideret, prodedit vitam: ut obtineret [ *Diogenes*, Philosophus ille doliaris, contempsit omnia. Illum ut scrutaretur Curtius, se immisit in horrendum terræ hiatum, ut Decii adipiscerentur, devovere se pro salute patriæ; ut inveniret, ad exquisita profectus est supplicia Regulus; ut Codrus detegeret, personam texit regiam, nudatque pectus hostium telis. [ *Repetitio.* ] Illius cupiditate incensus sibi Zopyrus nares exsecuit, sibi oculos Democritus eruit, sibi linguam præcidit Zeno; sibi manum combussit Scevola, sibi Lucretia transfixit pectus, sibi mortem innumerabiles conscivere.

*Laus, Animorum Umbra, fugientes sequitur.*

[ *Apostrophe.* ] Testes, Paradoxi hujus, vos appello, Heroe; Ecclesiæ celeberrimi,  
 Reli-

Religionis Christianæ Lumina; vos, Laudem respuistis, aspernati estis, fugistis; ita est, At fugientes secuta Laus est, & comprehendit, latitantes investigavit, detexitque, abditos indagavit, totique patefecit orbi.

Te illa providit, Alexi, delirescētem sub scalas paternæ domus, hisdemque scalarum gradibus, quibus ad abjectissimam vitæ rationem descenderas, in cœlum fecit ut ascenderes, Tibi detraxit, Alexander, obscuram Carbonarii personam quem indueras, excussa que fuligine, albentem reluctanti stolam induxit, lucentemque carbunculis imposuit mitram. Te illa personatum, ignotumque Nicolae conspicuum reddidit. Te fugientem, Ambrosi, retraxit ex fuga, Te absconditum, produxit palam, Magne Gregorii, illustravitque luce gloriæ nunquam intermoricuræ.

At tu IGNATI, quid vestes frustra mutas? quid te mendicorum gregibus inferis? quid sub Mantefana rupe oblitescis, & barbam fœdum in modum, capillosque finis excrefcere, ut famam minuas, ut laudes obiteras, ut ostentationem devites, & pulchrum illud digito monstrari, effugias? Nihil agis Vir sanctissime, nihil agis. Te digito, vel invitum monstrabit Laus perque omnia mundi loca; temporumque spacia spirantem tuarum virtutum effigiem; Fama circumferens, voce ab omnibus

bus exaudienda posteris dicet, *Hic est*. [ *Definitiones conglobatae ab effectis.* ] Hic est, virtutum fator, vitiorum domitor, expul-  
 sor ignorantiae, pietatis assertor, proflig-  
 ator haereticum; daemonum victor, orci  
 terror; ac mundi stupor. [ *Repetitio.* ]  
 Hic est, unus ille, homo, qui cunctando  
 certandoque pariter, cum Romanae Se-  
 dis hoste; publicam restituit rem: qui or-  
 bi, scelerum mole laboranti, nutantique  
 supposuit humeros, labentemque solus  
 sustinuisse visus est, & erexisse claudican-  
 do. [ *Repetitio.* ] Hic est, cui suum de-  
 bent Tempia nitorem, Caenobia cel bri-  
 tatem, splendorem Academiae, Artes  
 optimae dignitatem, institutionem Ju-  
 ventus, Familiae nobilissimae vitae sancti-  
 moniam: decus religionis illibatae Urbes,  
 Provinciae, Regni, Europa tota, atque ad-  
 eò Orbis terrarum, quam late patet, uni-  
 versus. Hic est, quem in irritum petiere  
 invidi, horruere impii, odere scelesti, op-  
 pugnant haeretici, quem boni contra co-  
 lunt, Sapientes praedicant, honorant Po-  
 puli, mirantur Optimates, suspiciunt Prin-  
 cipes, Reges venerantur, gentes florentis-  
 simae reverentur, quem omnes amant,  
 omnes observant, omnes ornant, & satis  
 dignè nemo laudat.

*Laus sola parit Immortalitatem.*

[ *Interrogatio.* ] Nonne vivunt in nostris  
 apudis, viventque memoria saeculorum  
 omnium



omnium homines illi quos, ob eximia facinora, quæ patrarunt, prima retrò suspexit ætas; venturaque porro cum admiratione suscipiet? viget sanè illorum fama multis testata, expressaque rectè sanctorum monumentis: At cuius beneficio? Nonne Laudis adepti sunt gloriam sempiternam. [*Subjunctio.*] Duces generosissimi & vel ab ipsa morte quam attulerunt hostibus, aut optinuerunt ipsi fortiter pro incolumitate reipublicæ, aut defensione virtus peperere sibi vitam nullam diuturnitate circumscribendam. At cui hoc decus acceptum referent? Nonne Laudi.

[*Apostrophe cum interrogatione.*] Quis nomen subtraxit vestrum edacitati temporis illustres fori Reges, Oratores eximii? Quis rapacitati mortis vestrum eximit nomen laureati, ingeniosique Poetæ? Quis meliorem vestri partem, è communi servavit incendio, Philosophorum Coriphæi? Nonne Laus? Et vos qui ingenii claritate nobiles, vel rerum gerendarum prudentia celebres excelluistis inter omnes, ceu stellas inter Lyna minores, quæ res efficio dicite; ut nulla sit tam surda, aut tam muta posteritas, quæ de vobis non audiat, & loquatur, nullæ tam ingratae invidæ quæ literæ, quæ de vestris virtutibus conticeant? Annon ipsa Laus est? sine qua nulum jam esset tuum nomen, Eloquentiæ Parens, M. Tulli; Tuum jam pridem decus

cus delevisset oblivio . Suadæ medulla ,  
 Demosthenes, in tenebris delitesceres Hi-  
 storiz Romanæ Lumen, te nemo, Maro,  
 celebraret; Tibi nemo assurgeret, Inge-  
 niorum apex, Aristoteles; Obcurasset jam  
 pridem vetustas eruditionis vestræ splen-  
 dorem, Cultores optimatum artium præ-  
 stantissimi, æternaque involuti caligine  
 temporum vestris cadaveribus conssepulti,  
 inhonorati jaceretis.

Nec melior futura esset, conditio vestra,  
 ævi nostri Heroes inclyti: Quod enim vitæ  
 decus, quam mercedem gloriæ, quod retu-  
 lissetis honoris præmium, si rerum à vobis  
 gestarum fama nunquam interitura . Laus  
 æternitati non commendasset? Tunc Justi  
 appellationem, Ludovice, obtinuisses, et si  
 iustissimam? Tibine Magni cognomentum,  
 Henrice Maxime, magnitudo fecisset ani-  
 mi? Fuisse sine, Philippe, decoratus Augusti  
 nomine? Te ne etiam nunc Sapientem, Ca-  
 role, vocaremus? Tuarumne Laudum, Re-  
 gum Sanctissime, impietatis Saracenæ do-  
 mitor, tuarumne laudum faustis acclama-  
 tionibus publica que gratulatione, univer-  
 sus personaret orbis; nisi facinoribus illu-  
 strissimis debita sempiterna Laus, vestræ,  
 per omnes latè mundi plagas, ætateque;  
 disseminasset existimationem virtutis, &  
 super astra nomen extulisset?

## C A P U T VII.

## AMPLIFICATIONES.

*A Comparazione.*

**L**OCUS hic tum maxime Amplificationi subservit; cum multa inter se per comparationem opponuntur; ideoque ad Contrarium locum reduci potest. Terna similiter Exempla. ut proxime superiori fecimus, adducam ad commune item; idemque argumentum pertinentia. Comparabo nimirum inter se 1. Puerorum & Adolescentium indolem, 2. Utrorunque Magistrorum item compositionem, 3. Instruetur denique contentio inter eas res, quas doceri solent in scholis: quod personis, quæ frequentius usuræ sunt his elucubrationibus, conveniat magis.

*Pueritia, & Adolescentia,**Comparantur.*

[ *Apostrophe, Definitiones.* ] O Adolescentia, feralis ætas; funestissima vitæ pars quantum nostris Academiis obes, obfuturæ es, obfuiſſi! Tu, innocentia profli-gatrix, Tu expugnatrix pudicitia, Tu nostrorum perniciēs alumnorum mularum labes, morum corrū-tela, virtutum peſtis, scholarum calamitas, disciplinarum liberaliorum exitium, Tu fruteta nostra depopularis, exoris viridaria, violaria violas, roseta ita vastas, ut floribus evpſis, tristes nobis relinquant spinarum reliquias;

K

dum

dum colligendarum frugum tempestatem  
adesse commodam putabamus.

Ita enim profectò se res habet. [*Allegoria ab Agricultura.*] Prima fronte Adolescentia, frugibus percipiendis idonea videtur ætas, aptior certè quidem, quàm Puerilis, quod secus est; non enim solùm amœnitatem florum cultura Puerorum jucundior est, quàm Adolescentium, verùm etiam ubertate frugum utilior.

Est quippe Adolescentis ingenium, ferax quidem, sed infelix *Ager*, densiorem in sylvam dirarum veprium *fruticans*; ad quem sationi commodæ præparandum, quantum operæ, Deus immortalis! in evellendis nocentibus pestiferisque plantis cupiditatum, quibus vernans ætas illa sylvescit, coercendaque insana illa perversarum, quibus progerminat, animi affectionum luxuriæ, quantum necesse est navare negotii! At Puerilis animus instar *bumi subactæ atque puræ*, quæ nunquam recusat cultoris imperium, parato semper, molli toque gremio sparsum à præceptore semen excipit, spontaneasque fundens fruges, nunquam sine usura reddit, quod accepit.

Accedit ad hæc, Puerorum mira docilitas: Adultorum verò penè intractabilis indoles. [*Allegoria, ab arboribus.*] Illi enim tamquam *Arbuseula*, in suum semper ordinem directæ, si tantisper deflectant à linea; molli digito diriguntur, & flectuntur

tur in quamvis partem sine vi. Hos contra jam obduratos anni *stipites* carneosque *truncos*, si semel tortuosi & abnormes excreverint, quæ ratio corrigat? quæ manus inflectat? quæ solertia restituat in pristinum statum?

[ *Allegoria ab statuaria.* ] Illos, mollioris Iostar *Argilla*, in quasilibet trahit figuras Plastis perita manus, cereosque fingit atque refingit animos; & sedens placidusque ductilem, ac sequacem in omnes partes indolem labore nullo tractat; nutuque temperat, & ungue perpolit. At istos, asperitate *saxeos*, obstinatione *marmoreos*, quis efformet in statuas; quis animet in viros? scabris splendorem accersat; nisi insitam pervicacissimæ duntiem mentis, obstantem scalpri conatibus, summa contentione brachiorum, assiduaque malleorum repetitione, & agitatione perfringat?

[ *Allegoria à Pictura.* ] Illi veluti *pura Tabula*, nihil habent; quod penicillum remoretur, coloresque respuat. Hi, ceu *Tela* atramento *illita*, oppletæque pulvere artificis frustrantur industriam, & operam miserè corrumpunt.

[ *Allegoria à Pixidibus & vasis.* ] Puellum cum aspicias, quid aliud, quam *Alabastra*, quam *Pyxides* eburneas intueris nullo nondum imbutas odore malo, vacuum, & nitidum sinum molliter explicantes, infundendis à Magistro suavissimis, saluberrimis-

que liquoribus? Adolescentes autem cum cernis, quid quaeso vides non audes dicere: nec ego item. Si auderem tamen, me saepe Dolia videre dicerem, ita plerique vino madent; aut spumantes esculentis ollas ore animoque sunt hyanti atque imminenti, ad omne genus intemperantiae; aut Lebetes atroes, spurcissimosque Cacabos, ita nigrore obliti foedissimarum voluptatum, ad libidinis ignes exaestuunt. Sed haec, ut dixi, attingere non audeo.

*Præceptores Puerorum, & Adolescentium Comparantur.*

Quàm læta, quàm amœna est felicissimi Præceptores. Puerilis provincia, quæ vobis obtigit, vestraeque charitati commissæ est: Vestra secus, quàm impedita, quàm molesta, quàm plena negotiî, graviorum Doctorum artium.

[ *Allegoria à Pastoris officio ducta.* ] Vos purissimo stipati grege puerorum, Pastorum instar, Agnello regitis expertes cornuum, illibato vellere nitidos, gestiente natura ludibundos, & alacres, innoxioque dente, saluberrimas Latinorum novatium plantas per florulenta Musarum viridaria depascentes: Vos *Vervæces* plerumque scabiosos Caprosque turpes, vitiis olidos, petulcos, petulantes, barbigeros, atque cornigeros agitis in uberrima felidiorum pascua scientiarum impudenti, ingratuque cornu arietantes, & ipsum saepe ferientes Custodem gregis.

[ *Allo-*

[ *Allegoria ab Avium educatione .* ] Vos jucundissimè circumvolitantes *Passerculos*, & suaviculos sine felle *Columbulos*, tenerri-  
mosque sine ungue *Pullos*, sub geminas pie-  
tatis & eruditionis alas colligitis sensim-  
que ad volandum excitatis, ad veræ laudis  
apicem . Vos verò *Milvos Accipitres Struthia-  
chamelos*, melius dicam; vos *Pallumbos*,  
vos *Anatres* atque *Pullos*que, pretiosis doctri-  
næ granis magno labore alitis, qui vestris  
deinde beneficii saginati, maledico subin-  
de rostro, unguibusque impiis, in ipso  
sæpè Nutritios, ac Progenitores insi-  
liunt .

[ *Allegoria ab Hortis & Sylvis .* ] Vestras  
ego dum Scholæ cogitatione perlustro, Pue-  
ritiæ Cultores Beati mihi, in *Hortulo* quo-  
dam versari videmini, elegantissimè con-  
sisto, pervenistis collucente flosculis mi-  
ra herbularum varietate picturato, in quo  
si quis exauditur garritus, si quod murmur  
excipitur, garritus est gratissimus Avicu-  
larum, & rivulorum leve murmur, la-  
pillis occurfantibus obloquentium, aut te-  
ner Agnorum balatus, aut blandè quæri-  
monix Turturum, aut gemebundæ vo-  
ces Columborum : Vestras autem dum  
oculis, animoque penetro Exedras, Tuto-  
res Juventutis infœlices, non Scholas sed  
*Sylvas* (date veniam si paulò liberius lo-  
quar) *Sylvas*, inquam, cernere me puto  
sentietis asperas, monstris infestas, fe-

risque infames: ubi haud infrequenter tumultuantur Onagri, & Vulpes obgan-  
niunt, & Molossi latrant, grunniuntque  
Sues Anguesque venenati sibilant; In qui-  
bus, ut planius dicam, Nebulones audacu-  
li blaterant, protervi ringunt, delicati tor-  
pent, ignavi jacent, somnolenti oscitat,  
fætent obscœni, tument arrogantes, vani  
se se jactant, se insolentes efferunt, seditiosi  
turbas cient, & jurgiosi rixas movent.

*Discipline Pueris, & Adolescentibus tradi  
solita comparantur.*

*Ad ea veniamus, quæ Pueris, & adoles-  
centibus condiscenda præscribi solent, quan-  
tumcumque inter se discrepent, ex mutua utra-  
rumque rerum contentione colligamus.*

Illis Grammaticæ quisquiliæ, putidæ-  
que rudimentorum minutias explanamus;  
qua videlicet ratione sint maritanda verba  
verbis; & nominibus illiganda nomina, &  
propaganda conjugio phrasium, & copula-  
tione particularum familia vocabulorum:  
Istis, Eloquentiæ divinam vim aperimus,  
æternæ Sapientiæ veneranda placita pate-  
facimus angustiora rerum adyta, arcanaque  
naturæ penitiora, sub aspectu subijcimus,  
& in propatulo collocamus.

Illos docemus, quo verba modo inflectē-  
da sint; Hos, quo modo à vitiis deslecten-  
dum. Illos, quo pacto nomen: Hos qua ra-  
tione, culpam declinent A nobis discunt  
illi vocum, Isti morum Concordiam. Se-



nos illi nōminum; innumeros illi humanæ  
vitæ Casus examinant. De litterarum illi  
Elementis balburiunt; Isti de mundi Ele-  
mentis peracutè philosophantur. Illorum  
denique linguam acuimus; Istorum effor-  
mamus animos: Illi, ne inquinatè dicant;  
Isti, ne inquinatè vivant, dicantque bene,  
& melius agant.



## DE FABULA,

ET NARRATIONE GENERATIM.

**Q**UÆ Narratio est quoddam quasi genus Fabulam, & Historiam tanquam partes complectens, seorsim explicanda esse duxi quæ non minùs Fabulam spectant, quàm Narrationem: Virtutes enim, ut mox dicam & Ornamenta quæ vulgò Historiæ veræ Narrationi tribuuntur, & Fabulæ quoque quæ fabulosa Narratio est attribui debent nemo neget, ut ex arte fiat. Itaque ea hoc brevi Progymnasmate exponimus, quæ tam Fabulæ, quàm Narrationi conveniunt.

## CAPUT I.

*Virtutes Narrationis generatim sumptæ.*

**Q**UÆ sunt Virtutes Narrationis generatim sumptæ, hoc est, seu veræ, seu fictæ ac fabulosæ.

R. Hæ quatuor; Brevitas, Perspicuitas, Probabilitas, & Suavitas.

Quo pacto erit Brevis Narratio?

R. Si nihil afferatur, quod sit superfluū. Profer Exemplum.

R. En, Cùm ensẽ, quem adolescens ille suspenderat in quodam domus suæ angulo; arripuisset, illum strinxit, & inimicum in-

secta-

*ſeclatus eſt, tandemque comprehenſum percuſſit, atque interfecit. Hæc Narratio nugatoria eſt & ineptè longior. Brevis eſſet, ac melior ſi ita diceret. Arrepto gladio, fugientem aſſecutus inimicum interemit.*

Quomodo reddetur perſpicua?

R. Perſpicua, ſeu clara exiſtet, ſi verbis uſitatis propriisque conſtet; ſi vitetur rerum, & perſonarum nimia multitudo; ſi longiores omittantur verborum, ac ſententiarum circuitus, ſi denique tollatur omnis ambiguitas.

Da exemplum, in quo appareat hæc Ambiguitas.

R. Do. *Cùm conſtaret Privignum occidiſſe Vitricum domi ſuæ dormientem, ad Judicem ejus nomen delatum eſt. Quid oſcurius; Nam quæſo, uter eſt interfeſtor, & interfeſtus? Et illa domus, cujus eſt? Privigni an Vitrici? Vaticinare.*

Qua ratione fiet Probabilis Narratio?

R. Probabilis reddetur, ſeu credibilis, ac veriſimilis, ſi nihil contra decorum peccabitur; hoc eſt, ſi nihil dicetur, quod non conveniat perſonis, ac rebus; nihil, quod loco, & tempori non congruat.

Prome Exemplum.

R. Si diceret quis; *Pictorem ſe vidiffe, utroque orbatum oculo, præclaras imagines coloribus exprimere ſolitum. Careret illa Narratio probabilitate; id enim fidem ſuperat.*

Quomodo Suavis erit?

R. Primò. Si verbis utaris elegantibus, nitidis, lectis, & sonantibus, ipsique rei, quæ narratur, maximè congruis. Secundò: Si in ipso Narrationis decursu, expectationes concitabuntur, si Motus animi interponentur, ut lætitiæ, metus, iracundiæ, &c. si Colloquentes personas induxeris, si denique Exitus occurrent inopinati, ac fælices; quo, vel audienti, vel legenti, accidere jucundius nihil potest.

Declara id Exemplo quodam.

R. Non exemplum erit, sed Exempli particula, de morte Ciceronis. *Popilius ad lecticam, qua Cicero vehebatur appropinquans, stare jubet Leticarios, extractumque Ciceronem obtruncat. Hæc Narratio insuavis est; ei Suavitas conciliabitur, si motus quosdam, & colloquia intres, hoc modo. Ut eminus lecticam Ciceronis aspexit Popilius, ad illam citato cursu contendit, stipatus, ut erat, armatorum militum globo, atque, ubi audiri vox potuit, clamans, & manum præcedens, Staret, inquit, Leticarii, famuli exterriti parent illi; Leticam milites cingunt; Tum minati voce Popilius; Ubi herus Vester? Ubi Cicero? Qui audiens se nominari, seque unum peti, profert à lectica caput, & Popilium irato vultu intuens, En, inquit, feri carnifex, hoc caput amputa, & ad Antonium defer. Ille nihil cunctatus, gladio quem tenebat, cervicem abscidit. Narratio ista, nonne prima illa suavior est, ac venustior.*

C A P U T II.

*Ornamenta Narrationis.*

**Q**uæ sunt Narrationis Ornamenta?

R. Ea, sine quibus nuda, simplex, incompta, & injucunda Narratio est:

Quotuplicis sunt generis?

R. Duplicis; Alia sunt in verbis posita: alia in sententiis?

*Ornamenta in verbis posita.*

Quænam illa sunt ornamenta, quæ in verbis sita sunt.

R. Hæc præcæteris.

*Primum.*

Verba hæc, inquit, ait, & si quæ similia sunt, aptè reliquæ dictioni alligantur: quod fit, cum nec initio nec in fine sententiæ ponuntur, sed post unum, alterumve verbum, hoc modo.

Tum ejus Mater: Non sum, inquit, nescia unde venias, id de odore sed satis intelligo? Cum ille è caupona se venire fassus esset. Censetne, inquit, tantum dedecus mihi laturam diutius? Quid enim commisit mali? respondit Thales, At Mater d'impudentem, inquit etiam querit, quid mali commiserit furcifer? Hic filius, convicio exasperatus; Mene, ait habes mater famuli loco? Cui illa: Non famuli respondet, sed nequissimi mancipii. Siccine verò inquit ille filium amas? Siccine verò refert illa, tu matrem colis.

Habes in hoc exemplo omnes fermè connectendi particulas, quoties colloquia in Narrationibus fieri necesse est? Advertendum tamen, his vocibus, ait, inquit; & similibus, plerumq; præmitti participia. Ut.

*Ceterum Imperator sicut curru eminebat, dextera, & laeva que ad circumstantium agmina oculos, manusque circumferens: Adeste, inquit, Milites, erigite animos victoria nostra est.*

*Ergo primos ordines, ut pulchrè sedebat in equo, obequitans Alexander simulque ad confertos cuneos, protendens manus, certandum inquit, Commilitones.*

#### Secundum.

Præsens tempus pro præterito in Narrationibus eleganter usurpatur. Ut.

*Philodamus rogat Rubrium, ut quos ei commodum sit, ad cenam vocet. Ille suos familiares invitat; Mature veniunt, discumbitur, fit sermo inter eos, & invitatio, ut Græce more biberetur hospes hortatur, utuntur majoribus poculis, celebratur omnium sermone, lætitiæque convivium.*

*Cùm mulierem adisset, rogat demum illam sibi vendat; negat illa primum, at ille urget Quid multa? Emit homo cupidus, & dives, præsentem numerat pecuniam: eadem die suppellectilem importari imperat, jubet conduci basulos, & carrucas. (Cic. I. Ver. 63.)*

Observa, in hoc ultimo exemplo Nominativi verbo postpositi elegantiam, his verbis *Emit homo cupidus ac dives*. Dicas similiter,

liter, *Vendit mulier callida, & avara. Simulat vaser adolescens se non audire. Quos Nominativos aliter, sic rectè exprimas. Emit homo nimirum callidus & benè nummatus, vel quem harum adium cupidissimum esse constaret. Et sic de aliis.*

*Tertium.*

Plures infinitivi sæpè congeruntur sup-  
presso verbo, unde regi possunt; suppres-  
sis etiam aliis quibusdam vocibus, ac par-  
ticulis, ut in hoc exemplo videre licet,  
quod habet Tullius ( 6. in Verr. 63. ) ex-  
ponens quo pacto Verres Candelabrum  
gemmeum Regi Antiocho per fraudem  
eripuerit, cum illud rogasset afferri do-  
mum suam, perspicendi causa.

Affertur candelabrum à Regis domesti-  
cis ad Verrem qui cum jam tatis illud per-  
spexisse videretur, illi tollere incipiunt,  
ut referrent. Ille ait, se velle, illud etiam  
atque etiam considerare, nequaquam se  
esse satiatum; jubet illos discedere, & Can-  
delabrum relinquere. Sic illi tum inanes  
ad Antiochum revertuntur, Rex primò,  
nihil metuere, nihil suspicari ( Subintel-  
lige ) ( poterat ) Dies unus, alter, plu-  
res. ( Subaudi abeunt ) non referri, Tum  
mittit Rex ad istum si sibi videatur, ut red-  
dat. Jubet iste postridie, ad se reverti,  
mirum illi videri ( Supple, incipit, )  
mittit iterum. Non redditur. Ipse homi-  
nem appellat; rogat, ut reddat, &c.

## Quartum.

Principia, & verba ejusdem temporis, nonnunquam scitè conglobantur. Ut.

*Quid memorem, in bello, everfas ades, direptum ararium, expilata templa, exinanitas urbes, exbaustam provinciam, villas incensas, abacta pecora, &c.*

*Quid non agebat, quid non moliebatur, ut id honoris consequeretur? Ibat, redibat, circuibat, concursabat, prebensabat blandè obvios, hos salutationibus, illos amplexibus, alios fatigabat osculis, nunquam cessabat, nunquam quiescebat.*

Huc referri possunt Obliquæ orationes, quæ multum quoque venustatis Narrationi afferunt.

Sic Livius, ubi narravit, Fabios Romanorum nobilissimos, ejusdem nominis, ac familiæ trecentos sese obtulisse, ad pellendū hostem à castro, quod invaserat, hæc subjungit.

*Hic verò populus Romanus tollere in cælum Fabiam gentem (Subaudi cæpit) irent fortiter avibus in hostes imperii, opponerent se alicui periculo omni genere, bella caperent. Si plures totis familiæ existerent, nullos brevi Romania hostes fore. In hujusmodi locutionibus subiungitur hoc verbum: Hortari eos cæpit populus, ut irent, ut se opponerent, &c. (Lib. 2. Dec. 1.)*

*Ornamenta in sententiis posita.*  
Quænam illa Ornamenta sunt, quæ in sententiis consistere dicis?

R. Sunt



R. Sunt Figuræ quædam nobiliores, quæ si suo ponantur loco, narrationem, mirum, quantum illustrem reddant. Hæc verò ferè adhiberi solent.

**HYPO TYPOSIS.** Ut. *Inflammatu*s* ira egreditur damo, ardebant oculi, micabat ore furor, horrebant capilli, &c.*

**DUBITATIO.** *Quid ager misera? quam se in partem conferet? ad quem confugiat? cujus opem imploret? Patris? in vincula coniectus est. Fratrum? abducti sunt in servitutem Propinquorum? aufugere omnes.*

**SUSPENSIO.** *Quid deinde factum censeas? Captam esse puellam illecebris? nullo modo. Cessisse minis, non cessit. Vim passam esse, non est passa. Quid igitur facere potuit Columba imbellis, inter ungues Accipitris, Dicam, audite: Excisam sibi linguam in os impudici expuit, quo ille telo ictus, victusque cessit loco.*

**COMMUNICATIO.** *Qui hæc legis, quid quaeso ageres, si ejus loco esses? Quid consilii caperes? Vel Quæro à vobis qui hæc auditis si vestre res in eo essent loco, quid vobis agendum esse censeatis? Fugam arriperem, inquiet aliquis nec resistere auderem. At hic adolescens resistit certamini, in iis adversarium inermis abiecit.*

**EXCLAMATIO.** *Filiam exturbavit nuptiali thalamo & Genero nupsit: O mulieris scelus incredibile! O libidinem inauditam: non timuisse hominum famam! non dedecus æternum! non furiarum ardentes tadas!*

## DE FABULA.

**H**ACTENUS Narrationem spectavimus generatim acceptam, prout scilicet res, tam fictas, quam veras explicat, Cum res sunt fictæ Fabula dicitur: cum veræ, Narratio propriè nuncupatur, De illa primùm, tum de ista agendum videtur, ut institutum ab Aphthonio servemus ordinem.

## CAPUT I.

## FABULÆ

Definitio, ac Nomina.

**Q**uid est Fabula?

**R.** Est sermo falsus veritatem effingens, hoc est: Falsa quidem, & ficta Narratio est: at sub fabuloso verborum cortice, veritas semper latet aliqua, & utilis sensus.

Quas Appellationes vulgò sortita est?

**R.** Varias: Nam modò Sybaritica, modò Cilix, modò Cypria dicitur, (Arbe. lib. 22.)

**R.** Quòd Sybaritæ Græciæ populi, effeminati, ac molles fabulosis parumque pudicis sermonibus oblectarentur. Eos certè nonnulli scribunt deliciis immerfos, luxuque

luxuque diffuentes adeo exhorruisse vel umbram laboris, cujuscumque levioris incommodi, ut nullum opificium admitterent in urbes, quod cum strepitu exerceretur; imò, edicto cavisse, ne quis Gallos Gallinaceos intra urbem aleret; quod eorum cantu obrumperetur dormientium somnus.

Cur *Cilix* vocata est?

R. Quod Cilices Asiæ populi, ob corruptos mores, fabularum vanitate pascerentur anilibusque commentis, ita mendaciis assueti, ut in proverbii locum abjiceret *Κίλις ἐξ ὧν ἀνδρῶν, Cilix baud facile verum dicit.*

Quare *Cypria* dicta?

R. Propterea quod apud Cyprios, Cyprium insulam incolentes, Fabulatores magno in loco essent, & magnus Fabularum usus.

Quamobrem *Æsopica* appellata est?

R. Quid rogas, quod neminem latet? Quis enim nescit, *Æsopum* omnium ingeniosissime scripsisse fabulas; easque teris solitas omnium manibus; sic, ut haberetur ille olim ignavissimus, qui eas non didicisset; Ex quo etiam natum illud adagium. *Νε Ἄεσopum quidem τριβίσσι.* (Erasmi. in Ad.)

C A P U T I I  
F A B U L Æ  
Varietas.

**Q**uot sunt genera Fabularum?

*R. Varia, Alia siquidem dicuntur.  
Rationales, alia Morales, alia Mixtæ.*

*Quid vocas Rationales Fabulas?*

*R. Illæ, quibus quidpiam fingimus ab homine dictum, vel factum, quod re vera neque dictum, nec factum fuit.*

*Da exemplum aliquod. [Fabula rationalis.]*

*R. Libens dabo. Medicus ægrotum curabat; quem deinde mortuum cum efferri videret ad sepulturam, si vino, inquebat clamans, hic abstinuisset in morbo nequaquam obiisset. Cui circumstantes propinqui; Necti, responderunt, stultè sapi, qui post mortem, morbo præscribis medicinam. Nempe, succurrendum est laboranti, cum tempus est. [Affabulario.]*

*Quas dicis Morales Fabulas?*

*R. Quæ morum seu naturam & indolem bel-  
luarum exprimunt valensque ad hominum mo-  
res informandos.*

*Da exemplum. [Fabula moralis.]*

*R. En brevissimum. In theatro, cum invenisset aliquando Vulpes personæ larvam: Opræclarum, inquit, caput, si cerebrum haberet.*

*Quæ fabula in illos convenit, quibus honorem,*

norem, & gloriam fortuna concessit, quibus item eximiam corporis speciem natura tribuit; sensum verò communem abstulit.

[ *Affabulatio.* ]

*Quæ vocantur Mistæ?*

R. *Quæ ex Rationali & Morali compactæ sunt, idest, in quibus, homines cum belluis sermocinari finguntur.*

*Cedo Exemplum.*

R. Mustela ab homine prehensa, cum instante necem effugere vellet. Ah! quæso, inquit, mi homo, parce cur necare me vis, quæ tibi Muribus purgo domum? Id tu, respondit ille, mea causa si præstares, ac non potiùs tua, gratum accideret quod facis, veniamque darem supplici. At, quod Mures occidis, ut gulæ tuæ servias, & quæ illi corroserint, consumas, vanum est, quòd jactas beneficium; Nunc ergo morere. Fecit Mustela imperata: justè quippe contusa vitam cum morte commutavit.

[ *Affabulatio.* ] Hoc sibi dictum putent: qui meritum inane prædicant; dum suis unis student emolumentis.

### C A P U T III.

### F A B U L Æ

*Sensus.*

**Q**Uælibet Fabula habetne sensum aliquem.

R. Pla-

R. Planè. Quemadmodum enim nulla pictura est, quæ non aliquid representet; ita nulla Fabula esse potest, modò scitè, & ex arte sit ficta, quæ cujuspiam non sit imago veritatis.

Sensus iste debetne verbis exprimi, quoties Fabula narratur?

R. Plerumque solet indicari: quòd multi esse possint ex iis, qui audiunt: vel legunt fabulas; qui earum sensum minimè intelligant, nisi explicetur.

Quo Fabulæ loco, explicandus hic sensus est?

R. Vel initio, vel in fine, hoc est; vel antequam exordiaris, vel postquam absolveris fabulam. Si primo loco ponatur, dicitur *præfabulatio*, Græcè *προφύτιον*, si ultimo loco *Affabulatio*, Græcè *ἐπιφύτιον* appellatur.

## C A P U T IV.

### F A B U L Æ

#### Utilitas.

Quæ Utilitas Fabulæ?

R. Multiplex: *Delectat* enim, *docet* & *mover*.

Cur fabula *delectat*?

R. Causam esse puto duplicem hujus delectationis, vel quòd in omni fabula, even-  
tus reperiatur aliquis inexpectatus, qui af-  
ficere animum solet sensu voluptatis ju-  
cundis-

cundissimo; Vel quia omnis imitatio cuiuscunque rei parit delectationem, tanto maiorem, quanto proprius accedit ad naturam.

Quomodo Fabulas delectare ostenderes?

R. Ratione primum, ut jam ostendi, tum experientia. Quis enim non arrigat aures, simul ac audit enarrari fabulam? Testes Athenienses, quos cum Demosthenes, apud illos agens de magnis rebus non haberet attentos; hoc Apologo, seu Parabola ( utrumque idem est, ac Fabula ) attentionem excitavit.

[ Fabula de Asini umbra. ] *Asinum conduxerat adolescens, Arbenis Megaram iturus; cum quo flagrantem jam meridie ( aestas enim erat ) calor cepisset esse vehementior, sub Asini ventrem se coniecit, ut umbram captaret. At is qui locavit Asinum, illum inde capite propellere asserens se Asinum locasse, non Asini umbram. Hinc rixa, & lites, hinc risus pariter, & voluptas, & quod caput erat summa attentio.*

Quid docent Fabulae?

R. Qua ratione instituenda vita sit, & mores temperandi: seu, quod idem est? Quae virtutes exercendae, & quae fugiendae sint vitia.

Rem ostende in exemplo.

R. Faciam ( *Fabula de Gru, & Lupo.* )

Cum Lupi Faucibus os devoratum haereret,

ret, & præcluderet spiritum, magno dolore victus, aves omnes rogare cæpit, sibi ut illud malum extraherent. Vicla est, & persuasa Grus precibus & promissis Lupi, & gulæ immani credens colli longitudinem periculolam laboranti medicinam fecit, os rostro eruens Operæ tum præmium poscit. Cui Lupus, Ingratissima volucrum, quid præmii requiris? An non satis magnam recepisti à me mercedem, quod incolume caput ore abstuleris meo? Docet Fabula hæc, haud tutum esse opem ferre improbis, nec ullam meriti ab iis expetendam esse mercedem.

Moventne præterea Fabulæ, animos audientium?

R. Ita prorsus.

Quo exemplo id probares?

R. Exemplo Menenii Agrippæ, qui plebem Romanam, quæ in Sacrum montem secesserat, ad Patrum auctoritatem, concordiamque revocavit, præclarissimo isto corporis humani Apologo. Sic autem illum narrasse ferunt [ *Fabula de Ventre, & Membris aliis.* ]

Tempore id quo homines non, ut nunc omnia unum consentiebant per singulos, membris suum cuique consilium, suus sermo fuerit, indignatas reliquas partes sua cura, suo labore, ac ministerio Veneri omnia quæri: ventrem in medio quietum, nihil aliud quàm datis volupta-

tibus



cibus frui: Conspirasse inde ne manus ad os cibum ferret, nec os acciperet datum, nec dentes conficerent, hac ira dum Ventrem domare vellent, ipsa una membra totumque corpus, ad extremam labem venisse: inde apparuisse, Ventrís quoque haud segne ministerium esse: nec magis ali, quàm alere eum, reddentem in omnes corporis partes hunc quo vivimus, vigemusque divisum pariter in venas maturum confecto cibo sanguinem. Comparando hinc, quàm intestina corporis seditio similis esset ira plebis in Patres flexisse mentes hominum. [ *Liv. lib. I.* ]

## C A P U T V.

## F A B U L Æ

*Usus, & Artificium.*

**L**icet in re seria, & sermone gravi, adhibere Fabulas.

R. Licet, sed raro: videndum siquidem, quid res ac decor patiatur: tuncque præfari conveniet, à viris priscis, ac sapientissimis, ista non sine causa, fuisse confecta, neque temerè tot jam sæculis magno mortalium consensu fuisse celebrata; (Deinde quid sibi voluerint, interpretabimur in hunc modum, v. gr. ) ut enim aptissimo figmento significarent, hominem avarum tam non habere, quod habet, quam quod non habet, exhibere nobis Tantalum quendam, mediis

*mediis in aquis aeterna sui cruciatum, &c.*  
( *Erasmi de Cop. rer.* )

Quo Artificio texendæ sunt Fabulæ?

R. Eodem prorsus; quo Narrationes veræ. Debent nimirum, quod jam monui, quatuor habere virtutes, scilicet, Brevitatem, Perspicuitatem, Suavitatem, & Probabilitatem.

Quid opus est Probabilitate in Fabulis, in quibus nihil est quod verum sit, aut verosimile?

Opus est tamen; Etenim quamvis probabile, credibileque non sit, belluas loqui, v. gr. & more hominum colloquia miscere, idque repugnet penitus earum naturæ: Attamen, si voce, & ratione uterentur, haud dubiè aliter Vulpes loqueretur, aliter Gallina. illius enim indoles subdola, tortuosa, & multiplex, hujus ingenium simplex, & rectum. Aliter Lupus, aliter Agnus ageret; nam ille rapax, & ferox natura, hic contra mitis, ac minimè malus. Itaque si pecudibus illis, quas ratione uti fingimus, quippiam attribueres ab earum natura abhorrens: v. gr. Si Murres induceres audaces, Cervos lentes, Columbas crudeles, benignos Accipites; & Vulpes stolidas, peccares contra decorum, tuaque Fabula, *Probabilitate* caret. Nam si fabulandum, & sine fraude mentiendum est, id non ineptè, sed ingenuè ac graviter, facere convenit.

Suntne

Suntne figuris illuminandæ Fabulæ?

R. Quis dubitat? Cum enim sunt Narrationes, ut supra monui; habere quoque virtutem illam debent, quam *Suavitatem* dicimus, Narrationi propriam, & quæ figurarum præcipuè ornamentis, excitatur, ut dictum est, clariùsque patebit his Exemplis, quæ hic appono.

## C A P U T VI.

### F A B U L A R U M.

*Exempla.*

**I**N his Exemplis, observare licebit discrimen quod intercedit inter fabulam *stylo simplici* textam, & eam, quæ ornatum habet.

### F A B E L L A.

#### D E A G N O, E T L U P O.

*Stylo simplici.*

Siti Agnus æstuans ad rivum venit; ad quem pariter accessit Lupus ad bibendum. Cumque superior staret Lupus, & Agnus inferior; Ille tamen jurgii causa captans Agnum accusat, quod turbet aquam pedibus: Hic modestè negat, fieri id posse, cum ab ipso Lupo, rivi unda decurreret. At maledictis, inquit Lupus, me procidisti ante sex menses. Neque id accidere potuisse, respondet Agnus, cum nondum natus esset id temporis. At tuus certè pater maledixit mihi, subiit ferox, atque ita correptum lacerat.

L

Sic

Sic adornare calumnias, & opprimere innocentem non est difficile. [*Affabulatio.*]

E A D E M.

*Stilo ornatior.*

Ad rivum Agnus venerat, sitis levandæ causa: Lupus huc etiam accurrit, magis prædæ quàm potus desiderio, ac potius stimulante fame, quàm siti: [*Hypotyposis, & Etopya.*] Dum bibit Agnus, terribilem in aqua videt umbram Lupi totisque contremiscens tenellis artubus hæret percussus ipso in vestigio, nec caudam, caputque movere misellus audet. At Lupus fauce improba rixas movens, illumque lacerandi occasionem aucupans. [*Sermocinatio.*] Heus inquit audaceule, non cessabis, mihi aquam turbulentam bibenti facere, lutulentis pedibus tuis? Men, tu, o bone Lupe; audaculum appellas, qui præ timore, cuique reverentia, vix pedibus confisto; Non abistes, inquam, reponere latro turbare aquam mihi. Cui Agnus quid possum, quæso facere quod queris, Lupe humanissime? Vix, heu! primoribus labellis rivum attingi, vix extrema libavi undam lingua. Mentiris, impudens, turbasti latices; lutulenta ad me fudit aqua. Ah! quid ais, Lupe nobilissime? Non ego certe sum, nec esse possum: Nonne vides, à te decurrere liquorem ad meos haustus? Obmutuit hic Lupus ratione repulsus tam evidenti: sed

mox

mox ad alia se vertens, novum crimen comminiscitur. Non meministi, inquit, proterve, cum ante sex menses maledicta in me ingereres, è stabuli fenestra minas intendens transeunti? Bona verba. Heros Sylvarum inclyte: non cohærent quæ dicis, verbo sit venia: nam qui tres tantum sum mepes natus, quid potui ante sex menses tibi maledicere? Atqui perinde est, inquit immanis, mihi tu, tuusve pater maledixerit: Ille certè, in me convicium jecit non semel: æquum est, parentis peccata iniquus luat natus. Quo dicto in illum insilit, correptumque dentibus, crudelissimè devorat.

[ *Affabulatio.* ] Quis enim labor, innocentem structis calumniis in sectari, opprimere, perdere. Quàm multi, etiamnum hodie, Agnis imbellibus haud absimiles, cedunt in prædam hominibus, & voracibus lupis, spoliantur bonis, fama exuuntur, & privantur si minus vita, ac vitæ commodis!

F A B E L L A  
DE CORVO ET VULPE.

*Rudi Stylo.*

[ *Præfabulatio.* ] Qui Laudatores libenter audit Fabellam hanc attentè audiat.

Corvus raptum de fenestra caseum comedebat, celsa residens arbore. Hunc cum vidisset Vulpes, laudare cœpit pen-

narum nitorem, & decorem capitis, totiusque corporis elegantiam; unam, ait, desiderat vocem; quam si haberet, nullam fore alitem ipsi comparandam. At ille demens; ut ostendat, sibi nec deesse vocem, & canoram quidem ac suavem, dum se ad canendum comparat, caseum amittit rostro, quem celeriter dolosa Vulpes avidis arripuit dentibus.

E. A. D. E. M.

*Stylo compitiore.*

Sedebat Corvus in excelsa arboris ramo caseum quem rapuerat è fenestra proximæ villæ, pari aviditate, voluptateque comedens, [ *Ethopopæja.* ] Hunc vidit Vulpes, & invidit, & lingua sibi lingens rostrum, jam caseum devorabat oculis: spes tamen optato potiundi cibo affulget nulla, quam visusque, & usque arborem sollicitè circumceat, verterque se in omnem partem. In una tandem spes omnes vafricie figit, ac locat. Ad solitas se vertit technas, dejectoque humi tergo, collum ac rostrum erigit, & aures simul arrigit obtutu in Corvum defixo. Advertit Corvus speculantem, & crocitans: Quid contueris, inquit, versipellis? [ *Laudatio assentatoria, & hyperbolica.* ] Te ipsum, respondet Vulpes, te intueor, Corve mi elegantule; nam herclè, tuarum me pennarum splendor in admirationem ita rapit, ut vix, ubi sum, satis sciam; Nihil equidem me-

mini,

mini, me vidisse pulchrius, nihilque venustius, ore illo tuo, & capite nihil vidisse augustius, per Apollinem juro, & per Æsculapium, ( applaudit interea sibi Corvus ) Proh quantum decoris, corpore & vultu geris! ita me Dii ament, ut mihi videris ipsa formosior formositate. O si quantum præcellis speciei dignitate aves cæteras, tantum præires voce! Ne tu absolutus fores numeris omnibus, nec ulla esset volucris ulque adeò temeraria, quæ venire in tuum conspectum auderet, nedum, tecum de palma contendere: Corvus, qui cum plus voluptatis, commemoratione illa laudum perciperet, quam suo caseo; agit primum, ut decuit Vulpi gratias: se tamen non destitui voce asserit; Et dabo, inquit, cantus clarum specimen; simulque cantilenam occinit, simulque caseum omittit. Hunc Vulpes comprehendens fugit, & fugiendo abligurit, illustro Corvo turpiter, qui cantu in gemitum verso, stoliditatem, coepit suam deplorare, atque damnare, at serò nimis.

[ *Affabulatio.* ] Sic capiuntur stolidi laudum venatores, sic inescantur inanis gloriæ velani aucupes: Quid enim faciunt, dum præbentes adulantium vocibus patulas aures, indulgent arrogantiae? Effundunt bona, rem familiarem dilapidant, existimationem amittunt, maximèque cum deluduntur, cum laudantur.

## DE BOMBYCE, ET ARANEA.

*Stylo floridiore.*

Irrepserat aliquando suaveolentem arbusculam Bombyx; eodemque fortè Aranea scanderat; ibique tendens utraque tabernaculum moliebatur, quæquæ suum, pari sedulitate incumbentes operi: Cùm laborem interruptura Bombyx, relaxandi animi gratia, ab suo vellere crura tantisper aliò, & curas abstrahit. Circumflectit ergo molle collum, & oculis aberrat, rami, in quo struebat nidum, singulas curiosè perlustrans frondes. At ecce tibi, ò foedum spectaculum! Aranea sese videndam obijcit, è regione texens telam. Miratur venenosæ impudentiam Bombyx; nec ultra valet continere stomachum, & bile turgens tota; Quæ te, inquit, insectorum teterrimum, quæ in has oras, aura pestilens advexit, ut florulentum hunc Rorem marinum, sordibus inficeres tuis? Audit incessentem Aranea, erigitque tibias ingentes, jactansque contemptim cerviculam: Desiste, inquit; desiste Bombyx optima, æmulam laceßare maledictis. Æmulam te dicere audes, ait Bombyx? ò temeritatem non fereudam! O stultitiam incredibilem! Cui continuò Aranea; In te, vilis vermicule, in te cadunt convicia, quæ in me jacis: Nam quid te stultius, magisque temerarium, quæ valen-





valentiorē irritas hostem? vis, in arenam descendamus modò, vis, cursu certemus? vis, pugnemus aculeis & dentibus? Hic Bombyx: Noli vires jactare; scio, te morſu, iac veneno ſuperiorem habere neminem, imo nec parem: hac in re tibi facile concedo palmam. Inſtat Aranea, mittamus ſanè rixas, vis contendere mecum celeritate operis, artiſque ſolertia? vide Infelix, vide, quā pernecitate, quantaque machinatione, ex utero fila deproptere, ſtainina deducam, ad neſtam ſubtegmina orbe circinato indiſſolubili que nodo implicem? En aſpice, ut à centro meum percurro, pervolitoque rete agilis (hæc cum diceret, telam percurrerat) Cerne, ut ab extremis in meditullum recurro puncto temporis, & è meditullio rurfus, in ditionis meæ fines remigro, orbemque circumeo totum; dum tu, ignava, iners, eodem hærent loco, nihil agis aliud, lenta illa inflexione corporis, quam ſtupas ore evomis. At Bombyx læta huc ſermonem flexiſſe Araneam; hinc adeo intelligeres, inquit, facile, ſi valeres mente quantò te ſim præſtantior, cujus quem vocas vomitum, paſſim homines omnes exquirunt, amant, ambiunt. Meo vellere, ſi neſcis, Conſulum prætexta textitur, Regumque trabea, & ſumptuoſior Matronarum nobilium mundus. Hac, quam tu per ludibrium ſtupam dicis, decorantur aulæ Principum, adornantur thalami, templa

nitent, aræ relucet. Atque etiam hîc tuam  
mibi telam, jactas, quæ nonnisi in sordidis  
visitur mendicorum mapalibus, humilibus-  
que casis vilioris plebeculæ. Aude, impu-  
dens, aude pedes inferre in lautiores do-  
mos; aude obtrudere fœdissimum os tuum,  
honorato in angulo; sed verecunda es, am-  
bitiosa non es adeò, facis sapienter, tuam  
hac in parte laudo modestiam, & verecun-  
diæ causam scio: times enim tibi ab ancil-  
lis & famulis. Verùm mittamus ista, nolo  
te pudore suffundi. At cursu præstas? ò  
celeritatem admirabilem! ò laudem præ-  
claram! Curris, recurris, procurris, cir-  
cuncurris, diu, noctuque; quem ad finem?  
ut incurrentem in tua retia capias muscam.  
Fila deducis, producis, explicas, implicas,  
circinas, quem ad finem? Cilicem ut impli-  
ces, Papilionem ut illaquees, Formicam ut  
irretias unam. At ego nobiles ac speciosas  
irretire soleo Virgines. Reginas induco in  
meos casses, his retibus illaqueo primores  
urbium; neque verò violentas metuo ma-  
nus, sed postquam satis gloriæ, & naturæ  
vixi, spontaneam occumbo mortem, nidus-  
que meus illustre mihi mausolæum est.  
Plura parabat dicere Bombyx in tam illu-  
stri versans argumento; cùm Aranea, in  
cujus pectore, invidia jam dudum, itaque ex  
æquo certabant, in hostem cæpit irruere  
magno impetu, transfixura dente pectus  
aut effossura oculos: At prævertens Bombyx

in suum se castellum recepit opportunè, ridens ab arce serica hostiles invidiæ conatus, & arietationes irritas. Verùm enim verò, dum hæc geruntur, illac transit Ancilla, hospitii proximi, armata colo: jurgantium inauditi clamores, subsistit, advertit oculos, cernit Araneam, Bombycis obli dentem propugnaculum, ò misera, exclamat, quid istic agis? væ tuo ventri; væ longis cruribus tuis. Verba excipit baculus impactus; Aranea corripit fugam, fugientem puella insequitur, deprehendit tandem, deturbat, proterit prætentasque confundit telas, & plurium dierum opus momento destruit: Bombycem verò laudat, mulcet, coronat viridanti fronde.

[ *Affabulatio, Apostrophe.* ] Sic destruentur, Homo inconsultissime, molitiones illæ tuæ omnes, ac labores vani, quibus animum & corpus, diu noctuque conficis, tametsi cum Aranea evisceres uterum, & consumas cum vita omnem industriam, sic, inquam, destruentur, si, ut Aranea Muscas venaris, hoc est, si aucuparis existimationem hominum volucrem, levissimamque gloriæ auram, & à caducis rebus voluptatem captas inanem, aut turpem quæstum. Irruet ex improvise inopina mors, spesque omnes, opesque, operamque dissipabit, æternoque cruciatu torquebit corpus, vexabit animum. At vos, illustres Animæ, quæ uni Gloriæ divinæ dicatis

vitam, & vitæ curas, nobiliaque facta  
 molimini; vos alius, felicior vos manet  
 exitus: Claudetis nempe vitam, Bomby-  
 cis more, nominisque vestri memoriam  
 monumento laudum, quas vobis ipsis te-  
 xuistis; laboribus immoriemini; vobisque  
 tumulus corona fiet; & sudarium sepul-  
 chrale purpura, & feretrum thronus;  
 & mortis spolia, melioris vitæ trophæa:  
 Hæc manus, tantorum effectrices operum:  
 ut in hoc etiam sitis Bombyci similes in  
 alas vertentur, quibus, post mortem  
 etiam astra supereris, impleturi cœlos ac  
 terras fama memoriæ, & factorum gloria.  
 Nimirum non laborem, sed laboris finem  
 spectat Deus...

# DE TANTALI

## FABULA.

**N**ulla prorsus animi labes, [*Prefabula-  
tio*] vitiorumque sordes reperiri po-  
 test avaritia turpior, at nec ulla pernicio-  
 sior. Cum opes ea congregat, curas exag-  
 gerat, cumque divitias adiicit, sollicitudi-  
 nes addit. Hæc scilicet prima, & maxima  
 avarorum poena; hoc supplicium; quò  
 magis rerum omnium ubertas augetur; eò  
 magis molestias, atque inexplebilem auri  
 cupiditatem augeri, quæ diù, noctuque ani-  
 mum vexet, omnique calamitatis genere  
 exagi-

exagitet. O inanes hominum curas! Amant quod oblit, cupiunt, quod torqueat quærunt quod perimat. Se insanas explere cupiditates opibus arbitrantur, at remedio quo recreari se putant, animi ægritudinem alunt, atque adaugent; nam ut ait Poeta:

*Ipsa accuunt alimenta famem*

*Quo plura ministras, plura capis.*

Et sicut Hydrops aquarum vi ardentissimus, qua laborat sitim non extinguit, sed accendit, sic divitiarum copia non reficit, sed augetur aviditas. Hæc planè veteres Tantali cruciatibus patefacere, ut suam avari poenam recolentes à tam fæda vitii labe animum deflectant, at maxima doloris ratio est, quæ floret solatii materia.

[*Fabula Narratio.*] Collo tenus insidet ille flumini, quod leni tractu, atque incorrupta aquarum puritate circumfluit. Nullus hic ventorum incurfus placide manantes undas commovet, nulla coeni macula perpetuam aquæ integritatem violat. Capiti verò dulcissimis cumulata fructibus arbor imminet, quæ pomorum elegantia, atque pulchritudine nec aureis Hesperidum ramis cedere creditur: et quoties miser aut liquorem illum, quo se reficiat, demisso vultu petit, aut poma, quibus se confirmat elata fronte prosequitur; protinus aquæ ad ima refugere fructus in altum se tollere videntur. Hinc novo genere supplicij scilicet ipsas inter dapes, & aqua-

anma affluentiam majori vexatur fame, ac  
serventiori siti torquetur :

*Quidrides ; mutato nomine de te*

*Fabula narratur ; addit Lyricus .*

[ *Post Fabulatio .* ] Tu tu quoque pau-  
perem inter opes vitam agis, & vel media  
in felicitate miseriam : Tua nempe cum  
re crescunt vitia, & nefaria divitiarum  
cupiditas ; adeo ut omnia habenti cuncta  
deficere videantur : cum enim teneas, quod  
cupias adhuc plura se tibi offerunt cupien-  
da ; nec unquam quo frueris habes licet  
multa, quibus frui possis, habeas . A te  
nisi vitii turpitudine cohibe, tui salutem te  
pietas tanger . Mala quæ te inopem fa-  
ciunt, exitia quæ te sæpissime excruciant  
prohibe, hæc autem tum demum evita-  
veris, cum avaritiam posueris .

## D E F A B U L A

### PHÆTONIS .

**N**il magis Imperia labefactare, urbesque  
funditus evertere potest, quam sæda  
principiis inertia . [ *Præfabulatio .* ] Citò la-  
bitur, non fulta virtute potentia, suaque  
mole ruit in præceps, quæ consilio non niti-  
tur potestas : Secedat à Regno, qui regendi  
artem non novit : Imperare non audeat, qui  
non nisi servire didicit . Atlantis nervos re-  
quirit provinciarum pondus ; non succedat  
oneri

oneri viribus impar, ne rerum gravitate opprimatur. Cum portum tenere putat, impingit in Syrtes navis, quam regit nauta scopulorum, marisque ignarus, cumque tranquilla in statione sistere videtur, internis seditionum vorticibus, externisque bellorum tempestatibus, jactabitur civitas, quam moderatur Regis inscitia. Et quot rapuit ad exitium, quot ad vulnera, ad cædes vel unus Principis error! Rem æquè publicam, privatamque excindit, cumque sibi tum aliis nefariam perniciem molitur. Fidem dictis asstruunt tot everfa antiquitus imperia, tot nutantia nostris temporibus Regna, & vel ipsa fictione ad normam veritatis composita Phærontis fabula. [*Fabula Narratio.*] Eum filium Solis dixere veteres, cui licet satis luminis conciliaffet parentis decus, sibi tamen tenebris involutus videbatur, nisi ampliorem ab audacia lucem mutuaretur. Petivit itaque à patre, ut sibi ducendum currum permitteret, equorumque habenas gerendas, qui flammæ undique vomentes diem latè propagant; Renuit primum pater, & cohibendum ratus adolescentium etsi ingenuum animi ardorem, collaudato puero; egregia quidem postulas, ait, fili, & quæ præclaram tuæ mentis indolem ostendent; verùm majora petis, quàm sustinere queas. Hanc eximiam operis molem in virum refer, non ea tibi vis, quæ tanto par sit oneri. Tibi  
cum

tum demum equorum imperium tradam, cum ipsi tibi parcere didicerunt, illis tu imperare potueris. Ea cum sit rerum conditio, ut vetita cupiditatem accendant, negata à parente facultas juvenis animum sollicitavit, votisque preces, & lacrymas addidit, quousque aut pietate compulsus, aut fatigatus precibus; quæ vellet, pater concederet, & genitoris consilium filii cederet importunitati, ea tantum præscripta ducendi lege.

*Altius egressus caelestia signa tremabis.*

*Inferius terras, medio tutissimus ibis.*

Quid plura? Cæpit opus quod perficere non valuit. Aggressus est facinus, quo diu consistere non potuit. Cum enim ab itinere flecterent equi, nec ipsi vis esset, ad comprimendam indomitam ferarum licentiam, ignita passim rheda propè terram torquebatur, quæ cuncta prorsus ureret. Jam cæperunt arescere prata, extinguere flores, languere segetes, herbis agri, foliis arbores, arboribus arva expoliari, ipsi penè sitire fontes, ipsa absorberi flumina videbantur. Sentiit jupiter orbis perniciem, juvenisque audaciam detestatus fulmine præcipitem in Padum egit; ut qui ferè triumphans in currum ignis ascenderat, cælesti telo petitus in aquarum tumulum decideret; qui veni-



nimum lucem affectaverat, citius mortis tenebris offunderetur. Hinc discant quicumque in vertice dignitatis collocati, vanaque freti spe, quævis ardua moluntur quinam exitus maneant inconsultos principis ausus. In lubrico versatur imperium, quod sapientia non nititur. Jocatur inter pericula auctoritas non copulata consilio. Qui temerè ad summa evehitur, ad ima citissimè labitur, civibusque calamitatem, sibi dedecus, urbi perniciem parit. Vos verò, qui regno nati, vitæ, necisque arbitri terrarum habenas moderamini, ne quæso regendi facultatem aulicorum inertissimis faciatis; vestra enim parvi pendetur auctoritas, cum eorum pateat ignavia. Num provinciarum ei tradenda potestas, qui ne familiam quidem novit unquam regere? Num legibus urbes moderandas suscipient, qui sibi met ipsis imponere leges ignorant. Ipsi in crimina decident, vos in pericula. Ii populum sententiis vexabunt, vos populus detractione petet. Illi mala patrabunt: vos pænitentia, sera tamen, tenebit. Ne igitur vos consiliorum pigeat, iis gubernacula Reip. tradatis, qui ad æquitatis, ac prudentiæ leges ea noverint pertractare.

## HELENÆ RAPTUS.

**A** Deo cæcutire videtur incauta mortalitas, ut non ea, quæ sibi imminuant, intueatur mala, quin ad felicitatem ducere putet, quod ad perniciem cogit. Est, qui in pravi cupidinem sensus omne studium, omnemque animi curam convertant seque beatum arbitretur, si, pro qua perit, mulierem in sua vota trahat blando scilicet sermone raptus, aut decori vultus blanditiis illectus diu, noctuque, quibus tenetur, laqueos meditatur, nec solvi petit, sed actiori nexu implicari. Speciei venustatem, frontis decorem, morumque elegantiam secum animo volutat, aliisque commendat, quod altius hæreat animo vulnus, seque felicitatem assequutum censeat, si effrenatæ libidinis expleat cupiditatem, at non raro fit, ut cæcum secutus amorem, quem in ducem cooptavit, ibi vulnera, ibi calamitates, ibi cædes inveniat, ubi levitiam, ubi lætitiā, ubi omnem bonorum copiam excepisse arbitraretur. En Paris, qui promissa Veneris impleturus adit Spartam, & Helenæ raptus amore hospitii jura violare decernit, & conjugii fallere fidem, niveo scilicet oris candore, vultusque venustate illectus in ejus speciem, oculos, omniaque vota intendit, à qua animum divertere nescit: si quidem se virum om-  
niam

nium felicissimum censebat, si mulierem omnium pulcherrimam in suam redigeret potestatem, eamque sibi rapuerat, cujus in genis roseus efflorebat color, cujus in facie femineum splendebat decus in vulnus animarum. Frontis admirabatur elegantiam, gratiarum sedem, sinusque candorem, qui amoris accendebat ignes; quos oris pudor suppressere videbatur. Secum tandem nec invitam rapuit, quam deliciarum omnium, suæque sortis putabat argumentum. O cæca mortalium consilia! Lætabatur in raptu Paris, eosque deperibat oculos, quorum fulgor eniteret in Imperii incendia? vix verò quam optavit, ardentissimè tenuit, ut in unius adulterii ultionem universa Græcia convolarit, ut armatæ undique legiones in ejus vulnera, a vitique regni perniciem convenerit. Ita brevem, eamque levissimam pravi amoris voluptatem assinium cæde, parentum funere, populorum calamitate, patriæ everfione, sui demum exitio comparavit. Huc obsecro convenite quot quot amorem sectamini, ejus vulnera, ejus arcum, & facem, ac si luceret in hominum præsidium, commendatis. Combustæ cineres florentissimæ quondam urbis inspicite: everfi culmen altissimi quondam imperii contemplantini, totque invictos Asiæ bellatores morti consignatos, & discite, quæ polliceatur amor, quæve impertiatur: Trojam

jam non Græcorum arma, non Achivus  
furor, non Uliſſis conſilia evertunt, ſed  
infana Paridis libido, & Helenæ venuſtas,  
unius ſæminæ ſpecies Trojano magis ob-  
ſuit imperio, quam univerſa præliantium  
tela, quæque videbatur felicitatem inge-  
rere, miſerrimas intulit calamitates. Pra-  
vi igitur comprimant amantes cupidinis  
motus, ne in Paridis ærumnas occurrant,  
dum adulteria ſectantur.



# PROGYMNASMA VI. DE NARRATIONE.

**A** FABULOSA, ad veram proprièque dictam Narrationem devenimus: De qua, ut ex Apulebonii mente ordine differamus, triplici Capite nobis dicendum erit. 1. Quid sit & quotuplex Narratio 2. Qualis esse debeat 3. Exempla quædam narrationum offeremus.

## C A P U T I.

*Quid & Quotuplex sit Narratio.*

**Q**uid est Narratio?  
R. Est Expositio rei factæ, vel tanquam factæ.

*Cur addis? vel tanquam factæ.*

R. Quia Narrationes quædam sunt, rerum fictarum, ut mox dicemus, quæ nunquam factæ fuerunt, ita tamen ingeniosè prudenterque confictæ sunt, ut veræ factæ videantur.

*Quotuplex est Narratio:*

R. Triplex Poetica, Historica, & Civilis,  
*De Poetica Narratione.*

*Quid est Narratio Poetica?*

R. Ea est, quæ res exponit, fictas quidem & nunquam factas, sed quæ fieri potuerunt; cuiusmodi sunt Argumenta Comædiarum.

In quo differunt Narratio Poetica, & Fabula?

R. In eo, quod huiusmodi Narratio res explicat, quæ tametsi fictæ, fieri tamen potuerunt, ut dicebam modò: At verò. Fabula ea memorat, quæ neque facta unquam fuerunt, neque fieri ullo modo potuere.

Quot sunt Narrationis Poeticæ genera?

R. Tria, Activum, Enunciativum, & Missum.

Quod est Activum genus?

R. Illud est, in quo res ficta, non verbis enarratur; sed quasi gereretur, personis, & Actionibus exprimitur; uti fit in Comædiis. Proptereaq; Græci, hoc genus Narrationis Poeticæ, δραματικὴν vocant, id est, Activum δραματικὴν, Representationem, sive Actum Comædiarum significat; & nos Latini Drama dicimus, Appellatur etiam μιμήτιον, hoc est Imitativum, quia personæ, in theatris, res illas quasi olim factas imitantur, & agendo spectandas exhibent.

Quod est Enunciativum Narrationis Poeticæ genus?

R. illud, in quo, verbis dumtaxat, res à Poeta fictæ referuntur: Ipsum Græci, ἱστορικὴν sive ἀπολογητικὴν, id est, Enunciativum seu Enarrativum appellant.

Quod est Missum, seu Commune, μικτόν, vel ποικίλον, Græcè dictum?

R. Illud, in quo partim sermone, partim actione, narratio fabulosa describitur.

## De Historica Narratione.

Quid est Historica Narratio?

R. Ea est, quæ rei olim gestæ continet expositionem.

Cur illam addis particulam, *olim*?

R. Quia Historia propriè dicta est rerum gestarum Expositio, ab ætatis nostræ memoria remotarū. Unde à Cic. ita definitur *Historia est Testis Temporum, Lux veritatis, Vita memoria, Magistra Vita, Nuntia vetustatis*.

Quare dicitur, *Testis temporum*?

R. Quia historia testatur, quid quoque tempore sit factum. Fidem certè nullam habituræ essent apud posteros priscorum res gestæ; nisi Historiæ testimonio, & auctoritate confirmarentur.

Cur vocatur *Lux veritatis*?

R. Quia rerum gestarum veritas, temporum tenebris obscurata jaceret in oblivionis sepulchro, nisi lucē ei afferret Historia.

Quamobrem appellatur *Vita memoria*?

R. Propterea quod, præteritarum rerum memoria moreretur simul cum corpore, & extingueretur cum vita, nisi illam Historia subtraheret edacitati temporis, & immortalitati consecraret.

Quorsum nuncupatur, *Magistra vita*?

R. Quoniam docet nos, ea declinare, quæ turpiter ab aliis facta; imitari contra, quæ præclare patrata sunt.

Quam ob causam cognominatur, *Nuntia vetustatis*?

R. Id.

R. Idcirco quia nuncios nobis affert earum rerum, quæ à primis retro temporibus gestæ fuerunt.

*De Civili Narratione.*

Quid est civilis Narratio?

R. Est, quæ in forensibus controversiis, causisque judicialibus Oratores utuntur.

Quod præcipuè in genere Orationis, adhibetur huiusmodi Narratio?

R. In Judiciali; nisi fortè constaret de re gesta inter Accusatorem seu Actorem; & Patronum seu Defensorem tunc enim Narratione non esset opus.

In his Civilibus causis, narrantur ne res ab oratore, eo planè modo, quo gestæ sunt?

R. Nequaquam sed pro sua prudentia aliquando nonnulla reticet, alia immutat, alia invertit, alia exaggerat, ut causæ necessitas postulat.

C A P U T II.

*Qualis debeat esse narratio.*

**Q**ualis esse debet Narratio, ut sit perfecta?

R. Perfecta erit, si prædita fuerit quatuor his virtutibus, quas supra recensui; & iis ornamentis, tum verborum, tum sententiarum, de quibus, ibidem disseruimus.

Recense illas quæso, hic iterum?

R. Ecce. Prima, Narrationis virtus est ut sit aperta, lucidaque; sive, quod idem est,

ut



ut perspicua sit, & clara. Secunda, Brevis esse debet, ut scilicet nihil inane, nihil inutile ac redundans habeat. Tertia, Probabilis sit oportet, ut nihil nimirum afferatur, quod naturæ, ac rationi adversetur. Quarta Suavitatem habeat necesse est, id est, sermonis festivitatem, colloquia, varios animi motus.

Quid interest inter Narrationem Rhetoricæ ornamentis splendidam, & eamvæ: nullum sequitur orationis florem?

R. Tantum profectò inter utramque interest, quantum inter puellam nobilem, & elegantissimam, pretiosa fulgentem stola, & deformem rusticam; vili, ac plebejo indutam habitu.

Quo artificio texenda est Narratio, ut, quemadmodum ais, pretiosè fulgeat?

R. Quatuor illis, quas nunc retuli, virtutibus exornanda est. Verum, multo melius respondeo tibi per Exempla, quæ modò proferam, in quibus, ceu in speculo quodam inspicies, in quo differant ornatae Narrationes ab incultis, politæ comptæque, ab invenustis, & oratoriæ ab historicis.

Quid? Historici non æquè ornate nar rant ac Oratores?

R. Minimè; sed minus satis implere sibi sibi videntur, si nitidè, & aperte narrent: Oratores verò figurarum coloribus narrationes suas illuminant, pulchreque distinguunt, variisque ubi opus est animorum moti-

motibus incitant, & velut spirantes ac vivas reddunt. Sed, ut dixi, planius facient Exemplum quod quæris.

## C A P U T III.

## E X E M P L A

*Narrationum omnis generis.*

**I**ncipiamus à Narratione Poetica, cujus Exemplum, illud ipsum afferro, quod ab Ovidio desumptum, Aphthonii Scholiasles attulit; non ipsa Poetæ carmina, quæ ille fecit huc transcribens, sed quod longè utilius fore nostris Candidatis arbitror, oratione soluta; fabulosam illam Narrationem ita depingens.

## §. I.

## NARRATIO POETICA.

*Pyramus, & Thisbe.*

**P**YRAMUS, & THISBE apud Babylonios, forma, ætate, moribus ac conditione pares, amari pariter inter se cæperant, ab ipsis penè incunabulis. Amorem peperit ædium vicinitas, (erant enim contiguæ) consuetudo puerilis aluit, rara in utroq; forma perfecit. Crevit tamen cum annis, amor, & jam ætatem attigere nubilem, inirentque nuptias proh quàm lubentes! ni parentes abnuerent, ob similitates veteres, quos jampridem exercebant. Itaque ne quid moliantur

tur liberi, contra quàm parentibus placet, colloquio, mutuoque conspectu, ipsis interdicitur. Quid aget Pyramus! Quò se vertet Thisbe, paries erat, domus communis utrique, & in pariete tenuis rima, domesticis hætenùs ignota.

*Quid non sentit amor?*

*Illam prius vidistis, Amantes;*

*Et vocis fecistis iter, tutæque per illud  
Murmure blanditiæ minimo transire solebant.  
Transibant, & suspiria; sed transire ne-  
quibant oscula, quæ vale dum sibi dice-  
bant, figebant parieti.*

*Parti quisque suæ non pervenientia contra:*

O qualem fatalis illa parietis labes, in am-  
barum pectore, labem fecit! ferre non po-  
test magnus amor eruptionem tam angus-  
tam. Amplior est, quàm ut rima tam arcta  
commeet. Ergo statuunt proxima nocte  
libertatem, qua potiri non valent domi,  
quærere foris, & in nemus mænibus proxi-  
mum perfugere. Constituitur locus, umbra  
Mori proceræ arboris, fontem opacum. Pa-  
cis placent; adventat nox; Thisbe elusis cu-  
stodibus egreditur prima, & ad nemus ad-  
volat; alas namque addebat amor. Cum ecce  
ibi Læna, à boum cæde recens, venit.

*Deposita sitim vicini fontis in unda.*

Exterrita Thisbe fugit in antrum quod-  
dam & fugienti retrò velum capitis ceci-  
dit, quod inventum Læna à fonte redux,  
ore ut erat cruentato, laniat. Sub hæc Py-

M

ramus

ramus adest, cernit vestigia feræ altè impressa fabulo, moxque Thisbe amictum lacerum, & cruore tinctum. Illicet, suam vitam extinctam ratus & discriptam belluæ dentibus amore in furorem verfo, tendit amens animi ad condictam arborem; Ibique non inventa Thisbe, incumbit in ensē, & vitam profundit cum sanguine. Thisbe interea, collegerat à povere animum, & ad Morum properabat; jamque parum aberat cum.

*Tremebunda videt pulsare cœnsum  
Membra solum.*

Hæret illa primū, horrere perculsa; pedemque refert, stupenti similis.

*Sed postquam remorata suos cognovit amores.*

In amplexum morientis ruit; immiscet lacrymas cruori & Amantem amplexata.

*Pyrame, clamavit, quis te mihi casus ademit?*

*Pyrame, responde, tua te charissima Thisbe*

*Nominat: Exaudi, vultusque attolle jacentes.*

*Ad nomen Thisbes, oculos in morte gravatos*

*Pyramus erexit vidensque recondidit illa.*

Hic Thisbe, dolore exanimis, laniare genas pectus tundere, capillos vellere, uberrimoque fletu rigare frigentis genas, nullumque facere lugendi finem, quod velamen cernit suum in dextera Pyrami laceratum, cruentumque. Tum verò, mortis causam facile agnoscens; quidquid supererat vitium, colligit; avulsumque ferrum, quod adhuc hærebat in amantis pectore, altè defigit

defigit in suum, & collapsa supra jacentis corpus, osculum libando fortuitum ac frigidum, extremum in ejus ore, atque sinu spiritum exhalavit. At Arbor, mirum dictum! utriusque tepefacta sanguine, mortem sensit, & luxit: & quæ jam erubuerat, fuso Pyrami sanguine, moris, quæ prius alba fuerant, dolore rubefactis geminato funere, atrata visa est funebremque traxere, ac nigrum *mora colorem*,

## §. II.

## NARRATIONES HISTORICÆ.

## Prima Narratio.

**I**N puerorum gratiam; *literarum Gymnasia celebrantium* (quorum præcipue manibus seretur hic liber) Narrabo, quod paucis abhinc annis Avenione contigit puerulo cupiam Grammaticæ tum studenti.

Puer amissum præceptorem.

## D E F L E N S.

Is Puer, annum jam obierat in Grammaticæ Classe infima, Præceptoris usus opera, ætate juvenis, eaque formæ dignitate, quæ auctoritatem amoremque ex æquo pareret. Sed anno vertente, (quæ vicissitudo rerum humanarum est) cum amotus ille fuisset à docendi munere, successor ei designatus est Senex quidam macilentus, strigosus, pallidus, colorum in modum canus. Itaque exactis feriis, recurrentibusque Lu-

calibus, quo tempore intermissum redintegratur studiorum curriculum, Quintanus ille Pufio, (nam è Sextano ut vulgò loquuntur, Quintanus evaserat) fatalis hujus mutationis ignarus expectabat unà cum sociis, sperabatque se revisurum suum illum suavissimum Præceptorem. Jamque hora aderat quæ hora Magistri suam quique provinciam sibi destinata inire solent. [ *Hypotyposis*. ] cùm ecce tibi, ò rem visu lacrymabilem, relatu peracerbam! Senex de repente comparet in scholæ limine, tremuloque incessu, in medium puerorum agmen, non tam procedit quàm perreptat. Et horruere omnes illicò, hæserique aliquandiu stupentibus similes. Ubi verò sese tantisper à consternatione, metuque collegerunt, respectare sese mutuo, nutu, oculisque loqui, quærere à se taciti, quid hoc hominis sit, quæ larva magistri? Quid multa? Vix se continent, quin scandenti pulpitum seni vetus illud puerorum in Elisæum convicium occinant, *Ascende Calve*, (erat quippe calvus.) Se tamen continent, auscultantque hominem raneidulo gutturre, & stridula voce, de more præfantem nescio quid, facto demum loquendi fine manum in peram ipserit. diuque scrutatus (pueris interim expectatione suspensis, quid educurus esset) educit tandem specularia, nasoque imponit; quo inexpectato, tristisque spectaculo perculsi graviter,

& tan-

& tantum non exanimati pusiones illi, conceptum animo dolorem, tenere ultrà nequiverere, sed palam mussitare, minaciter jactare cerviculam, vultum alii advertere in parietem, alii solum ferire indignanter, omnes eum testari luctum, mœroremque animi, ut aula ipsa ad scolarum utque finem crebro gemitu singultibusque personaret. Sic afflictis, levamini utcumque fuit, abeundi signum, ære campano datum; Quod simul audiere illico effundunt se universi ad januam, fugiuntque suam quisque domum.

[ *Esbopeja* ] In iis noster ille Puerulus, de quo dicebamus, in suam simul ac pervenit trëpidus domum flebiliter matrem inclamat, utque erat educatus delicatissimè, & blanditiarum molliter appetens in obvix parentis amplexum fuit, pondetque à collo, & sinum implet lacrymis. At illa mirans, attonitaque. [ *Colloquutio.* ] Quid est, mi Ocelle, inquit, mi pupule, quid lacrymas? Ecquid accidit mali, Num quis te sodalium percussit, Anime mi? At ille suspiriis verba confundens, nequaquam, inquit, Mater, mihi horum est. Tum illa. Quid igitur, mi Passercule, meum ò Corculum, sic te maceras? sic mœrore conficis, Heu! subicit puer occidimus omnes, Mater: Magistrum amisimus nostrum, illum, inquam, forma eximium, plenum succi, plenum vigoris, plenum amabilitatis, ac venerum, Præ-

ceptorem amissimus illum, suaviorem saccharo, amtenio-rem rosa, zephyro blandio-rem, nobis eripuerunt latrones truculenti, ejusque loco suffecerunt hominem grandævum, exsuccum, edentulum, retorridum, oculis utentem ad legendum vitreis, indefinenterq; tussientem ac excreantem. Hæc dum diceret, cadebant ab oculis guttæ decumanæ; & comam faciemque violabat unguibus: Ac mater subridens simul, & collacrymans, dolere se ait, filii amantissimi dolorem; oculos ac genas abstergit sudariolo, mæstum solatur repetitis oculis, verbisque de lenificis bene sperare jubet, brevi reversurum juniorem illum Mastigrum, abiturum procul molestum hunc senem. Hic, respirare puerulus, illa vero ut primum in me incidit, rem totam enarravit mihi, non sine risu.

*Advertisti, credo in Narratione hac suavitatem illam de qua loquebamur: Nam multiplices habet animorum motus; videlicet, mærorem, ex insperato incommodo indignationem, dolorem, misericordiam matris in filium, spem melioris exitus, habet item Colloquia personarum &c. At illud facilius advertes insequentibus.*

## SECUNDA NARRATIO

### Historica.

*Quid inquam, facilius advertas, quantum Narratio simplex, ab ornatione discrepet; Remeandem pridem in Belgio gestam, triplici stylo*



*Stylo placeat exponere, ut feci in fabularum exemplis; simplici, at jejuna. 2. paulò venustiore. 3. magis oratorio. Porro, cum bujus Narrationis argumentum sit humile, ac comicum, humilis propterea dicendi genere utemur: armilla quippè gemmeæ, aureaque monilia principem matronam, non plebe jam decent. Argumentum ergo præbebit.*

## EBRIUS IN FERETRO

### 1. *Stylo jejuno ac tenui.*

Degebat in Belgio vir quidam, qui quotidie à summo manè potabat ad usque vesperum: Tum vino, ut erat, madidus redibat domum, postea verò quam ebriaverat ingressus uxorem, liberosque malè mulcabat pugnis, & calcibus. Illa diutiùs ferre non valens ebriosum conjugem, statuit vino sepultum collocare in feretro, involutum linteo funebri. Id cum fecisset, lugere cœpit quasi mortuum. Ejus lamentis exciti vicini, conflunt in ejus domum. At ipse mortuus planctu increbrescente excitatur à somno; miratur lacrymas uxoris, ac fascias magis, & mortualia. Quærit causam; audit se mero extinctum; nunc, Dei beneficio singulari, redire postluminio in vitam: Attonitus ille, pessimo liquori in inimicitias denunciât immortales, promittit se nunquam vinum deinceps gustaturum. Et fecit quod in se receperat.

### 2. *Stylo paulò venustiore.*

Fœminæ cuidam Belgicæ maritus fuit;

egregius in paucis potator, toto famosus oppido, qui dies totos pergræcando postquam in cauponis consumpserat, inclinante in vesperam die, solebat titubante gressu, reverti domum. Vix attigerat limen, cum canere receptui uxor cum liberis, abdere se in latebras, expectare dum temulentus crapulam exhalaret: ni faceret, in ejus os, ille involare pugnis, calcibusque miseram contundere, quidquid veniret in manus impingere in obvios; denique pervertere mensas, abacos, omnia. Hoc diu cum tulisset uxor patientissima, nihilque non experta esset, quo virum avocaret ab intolerabili turpitudine, statuit demum, ad ultimum descendere remedium, & hanc, quod ajunt, quasi sacram ancoram jacere. Venerat ille aliquando à popina domum, haud paulò onustior solito id ubi advertit cauta mulier, in occasionem rei gerende intentissima, excubat eminus, de more latens, donec edormescat ebrius. Ut videt prostratum, & ronchos jam edentem audit, de repente advolat, fascias præparat, manus ligat, pedesque nexu valido; tum sudario caput implicit, & corpus linteo involvit mortuali, componitque in fandapila, quasi mox efferendum ad sepulturam. Dein composito ad mœstitiam vultu, (quod fœminis ajunt esse familiarissimum) conclamat mortuum, lamentis ædes personant, accurrunt vicini, fit gemitus, & comploratio. At ens audit plorantes mor-

tuus

tuus attollitque caput cunctis præter uxorem obstupentibus; quæ tamen lætitiâ ingentem pari stupore simulato conjunctam præseferens, in viri corpus ruit exultans, dissolvit linteum, sudarium detrahit, fascias exsolvit, & quærenti marito causam luctuosæ comœdiæ respondet, ad exequias confluisse, quod videret, cives optimos, vino sibi ereptam fuisse, cum mente, vitam; sed inaudito miraculo rediisse ab inferis. Credit vir scitè mentienti fœminæ, & vinum execratus jurat, per quidquid factum est abstemium se reliquo vitæ tempore, ad veram usque mortem fore; & verè fuit quoad vixit.

*Stylo magis oratorio.*

Matrona prudens & honesta maritum habuit in Belgio, cum multis vitiis dedecoratum; tum verò temulentia insignem [ *Interrogatio.* ] Quid non egit mulier cordata, recordem ut virum ad sanitatem revocaret? quas non intendit machinas? quam industriam non adhibuit? quem denique non lapidem movit sed nimirum corroborata erat longo usu insana perpotandi cupiditas, altioresque egerat in ejus animo radices turpissima consuetudo, quàm ut evelli ratione nec ulla aut pudore posset. Convolabat quotidie, simul ac evigilarat in popinas vinolentus, in cœno assiduè suo sese volutabat sordidus, sordescque suas, adventante nocte domum convehabat. Quoties, marsupio non

sufficiente gule è caupona abiit expalliatuſ;  
 & exgalerituſ ( verbo peregrino ſit venia ). t-  
 que etiam penè exoſſatuſ pugniſ probrisque  
 probè obſituſ? Quoties inter redeundum  
 ( ſi hoc eſt redire, paſſu labi, & elabi quoli-  
 bet ) offeſantem altero quoque paſſu, & in  
 tabernas ac parietes impingentem proſecu-  
 ta eſt caterna puerorum ſibilis, conviciis, lu-  
 to? Sed enim acceptaſ foriſ injuriaſ, intuſ  
 ulciſci ſolituſ, ut primùm attingebat limen  
 ædium, horrendum illicò vociferari, adeſ-  
 ſent famuli, adeſſet conjux; Illi contra late-  
 braſ aucupari, deliteſcere, trepidare; ſi quem  
 occupaeſſet incautuſ, mediũ arreptuſ  
 ſternebat in terram, & quà pugno, quà ſulte,  
 qua re quaviſ alia pulſabat diris modis mi-  
 ſeruſ [ *Dubitatio.* ] Quid ageſ mater fa-  
 miliaſ? quo ſe vertet? flebit? obſecrabit?  
 iraeſcetur? minabitur, involabit in barbam  
 ebrii? Horuſ nihil omiſit; veruſ fruſtrà  
 fuere illa omnia. Quid ergo faciet? Acci-  
 pite Audax comminiſcitur factuſ. Leſto  
 jacebat ille vino obrutuſ, oppreſſuſ ſopore,  
 quem nulluſ tonitruſi fragor excutiat; occa-  
 ſionem arripienſ mulier, accedit ad viruſ,  
 ac manuſ utraque primuſ, tum pedeſ  
 ſtringit fune valido, ſudario poſtea obnubit  
 caput; totuſque circumvolvitiſ corpuſ ſe-  
 pulcrali linteo; tum deinde ſtertentem an-  
 cilla ſuccolante, parato collocat in feretro,  
 & hinc & inde tædaſ feraleſ adſtitutaſ ac-  
 cendit. Illicet mortuũ conclamat conjugẽ,  
 lacry-

lacrymæ ut ferè fit, iussæ fluunt ubertim,  
& sinum rigant: Tum capillos vellens, ac  
vocem tollens flebilem in modum. Mi ma-  
rite, inquit, heu! mi marite, sic me orbam  
afflictam, perditam, æternum deseris? Cur  
heu! vitales auras, mortem tam cita, linqvis.  
Confluit interea omnis vicinia, ægram se-  
lantur, nec desunt, qui bonas preces pro de-  
functo fundant, proni in genua. [*Hypotypo-  
sis.*] At ecce, prodigium! ò rem inauditam!  
Dum hi lugent, illi glangunt, miserantur,  
alii, excitatus incondito clamore mortuus,  
ronchum ingentem imo emittit pectore;  
tum motat caput tibiaeque vinctas agit.  
Hic omnes stupere; trepidare, totis artibus  
tremere; mussare, rediisse in corpus animum  
palam asseverare, defunctum revixisse. Hic  
ebriosus, sternutare semel atque iterum, vi-  
nariamque clara voce poscere lagenam.  
Uxor quæ vix teneret risum inter lacry-  
mas, vivum lugens, quem vellet mortuum,  
vero dolore verso in fictum gaudium, ad fe-  
retum accedens, ò mi vir inclamat, quàm  
maxima voce potest: Audit ille, recludit-  
que oculos perque linteum, lucem videns  
magnam, brachia, & pedes gravi nodore-  
vinctos sentit. Quid cogitasse cogitatis,  
vivum cadaver plorantes, gementes ululan-  
tes audiens, funebremque apparatus in-  
tuens per rimas linteas? penè mortuum è  
vivo fecit horror stupori mixtus, trepidat se  
tantillam movere, tacitusque audit lugea-

tem conjugem : Siccine inquiebat versipellis, æternis ignibus addictus es, marite optime? O! si vel ante mortem expiasses animum, tot, tamque insanis computationibus inquinatum! Hæc immotus audit miser, tandemque susurro semimortuo succlammat. Uxor. Fingit illa teneri; &, ò Marite mi reclamationem, vivis? vivo, inquit, redux è lethi faucibus. Reduxne ab orco, ò mi animæ; & vitæ reditus, qui modò mortuissimus fuisti, purum purum cadaver mox humo dandum? Bona uxor respondit, expedi, ah! quæso, vincula expedi. Vix illa extricarat fasciis brachia, & sudario caput, cùm ille, ad astra tendens manus, vovet alta voce solemne votum, per omnem vitam, vinum se nullum, ne primoribus quidem labris libaturum esse; vas nullum vinarium, ne primoribus quidem tacturum digitis: ( ridebat interim in sinu conjux ) & stetit voto, siccam in posterum vitam, ad veram usque mortem exigens.

*Desudemus jam in nobiliori materia, & comicum hoc mittamus dicendigenus.*

### TERTIA NARRATIO

#### Historica.

Hujus Narrationis argumentum præcedente multò erit illustrius; quare illustrius orationis genus adhibendum: Spero autem, vos Candidati studiosissimi, vel ex unius hujus Exempli accurata lectione, ut cætera præter-

pretermittatis omnia, non vulgare fructum relatu-  
ros, si adverteritis diligenter ani-  
mum ad varios modos, quibus illud ex  
Rhetoricæ arte pertexui. Primus modus  
Historicus erit: rem siquidem gestam sim-  
pliciter exponet; sed alii sunt ex Orato-  
rum officina deprompti.

**VIRGINITATIS PIA FRAUS.**

**EUPHRASIA.**

*Primus modus.*

Euphrasia virgo, frustra minis precibus-  
que sollicitata ad abjurandam Religionem  
Christianam, Judicis sententia, & authori-  
tate ad lupanar traducitur. Qui ad illam  
prior est introductus, Miles fuit, ab castissi-  
ma puella ita delusus. Cum enim, habere se  
diceret unguenti genus quo, qui perunctus  
esset, ferro vulnerari nullo posset, illudque  
ipsi donaturam promitteret, si pudori suo  
consultum vellet ut fidem faceret dubita-  
ti, sui que probaret unguenti vim, periculo  
suo, oblini cervicem, tum militi percu-  
tiendam objicit. Hic virgini, tam constan-  
ter asseveranti, penè credens, experturus  
tamen ejus dicta & vires unguinis, eniè  
collum validè ictu ferit, & amputat.

*En Narrationem incomptam, & exsuccam  
Vis, adsciscamus ei nunc ornamenta Rhetori-  
ca? vis eam velut candidam telam aut puram  
purpuram stylo oratorio, quasi acu Fbrigia di-  
stinguamus, variis coloribus, & figuris? Ac-  
cipe præsertim attende, quam multifariam ad*

*narra-*

*narrationem aggrediar. Ejus enim venustas omnis ferme pendet ab exordiendi ratione.*

*Alter ejusdem rei narrandæ modus.*

*Narrationem auspicor ab introductione Euphrasie in prostribulum, per Hypotiposin, sic.*

Quæris, quæ sit illa puella; quàm impurissima Prætoris sententia ad prostribulum rapi vides? Euphrasia est virgo, non egregiæ minus pudicitiae laude nobilis, quam formæ venustate præstans, quæ Christi fidem, quod ejurare noluerit, ad lustrum, exponenda publicæ libidini, ludibrioque trahitur. Ac jam cubiculo inclusam primus sibi deposcit Miles adolescens, crista gloriosus plumatili, fulva cæsarie decorus, calamistro compulsus, ornatu venustulus, ferroque splendido succinctus, ut vel inde cognoscas; ad Venerem à Marte turpem transfugam. Itaque introditur, lupanar subit. Ah! Euphrasia, cave: heu! quid ages Euphrasia? qua arte libidinoso Marti resilles? quo stratagemate repelles armatam Venerem? Resilles, repelles; ne metue, quisquis illius causa metuis. Ecce, ad impudici pedes se Virgo abjicit; pudori suo, ne vim afferat, enixè rogat, & ingens gratiæ promittit præmium! Quod tu mihi præmium: inquit Miles. Quale, ait Euphrasia, nec tu à Diis ipse tuis petere audeas, nec illi dare tibi valeant. Nempè, inquit ille subridens. Nempè, inquit illa collacrymans, unguenigenus habeo mirabile, cui ea vis inest,

ut



ut quodlibet retundat telum. Jocarīs, ait Adoleſcens. Serid loquor, ait Puella. Vis meo capite facere periculum? Vis cervices oblinam, quas deinde ferias gladio, quàm maximo valebis impetu? Si non manè ceciderit in caput ferrum; tum verò, me diſſe verba dicito, tum me quavis affice contumelia; non reluſabor, libens patiar. Quid multa? In ſpem ereſtus cujuſdam immortalitatis vanus adoleſcens annuit. Collam mendaci oleo ungit Euphraſia; cervicem deinde nudat, præbet Militi. Miles enſem diſtringit, attollit manum, fulgens vibrat ferrum, cervices ferit, caput amputat. Collabitur corpus pudicum, præciſum caput: ipſe pariter impurus, carniſex, ſtupore, an dolore? exanimis concidit. Sic contra quàm ille de Marte prædicabat, ſic exultantem Venerem, ac ſpolia pudicitiae jam jam detrahentem, abjecta, proſtrata Virgo perculit, & in fugam vertit.

*Terzius, ejusdem rei narrandæ modus.*

*Ab unſione cervicis, per Interrogationem & Hypotypoſin, ita incipio.*

Quid, ſuperi! quid in illo cubiculo geri video! Stat ſtriſto mucrone Adoleſcens; juxta puellam video formoſiſſimam, ſibi unguento collum illinientem, fortasſe vulneri, quod ille fecit, facit hæc medicinam. At nullum cerno veſtigium plagæ: nec ſanguis à cervice fluit ſed oleum. Et auget admirationē Miles ipſe tacens, & quaſi ex-  
pecta-

pectatione suspensus ; Ac jam ad illum accedit Puella, eiq; ad genua supplex accedit. Quam ob causam? Haud dubiè, ne feriaturogat. Imò, ut feriaturobsecat. Audi, quid dicat generose Juvenis, attolle nunc manum, te obtestor; totoq; nifu brachiorum, in meum caput gladium demitte. Paret Adolefcens, ferrum elevat. Ah! Miles, quid agis? Non audit Miles, ferrum deprimit, obtruncat Virginem. Infelix virgo, quod admiseras scelus? qui te Judex supplicio addixerat. At, quò spectat insolita tortoris humanitas? Cur lacrymas effundit! Quid est, quod sublatum puellæ caput veneratur osculis? O me crudelem! inquit, sed ò te multò crudeliorem, Virgo innocentissima, quæ me ad facinus hortata es, quæ me induxisti in fraudem? Te ne ferrum attigisset unquam, ni tu sanctè affirmasses, retulum iri, tuo illo fallaci unguine: At agnosco scelus meum, & necis accersitæ causam. Non te meus premit ensis, sed libido, maluisti vitam, quàm pudorem amittere, exponi crudelitati meæ potiùs, quàm cupiditati. O castitatem prædicandam quam vel ejus hostis commendat! quam, qui oppugnavit, in cælum effert!

*Quartus ejusdem rei narrandæ modus.*

*Ab ipsa capitis Amputatione; per Apostrophen; & obsecrationem initium duco.*

Resistes Miles; ferrum, ah! sustine: subest promisso fraus, te fallit Virgo; ah! inhibe  
gl-

gladium tantisper. Heu, non inhibuit truculentus, Virginem ferit, caput abscidit. O barbare, o ferro durior ac sævior tuos: potuisti secare hunc florem? hoc lumen extinguere? hunc fontē exsiccare? potuisti tam elegantē spoliare virginem vita? corpus tā pulchrum, tam nobili privare anima? Sed, quid militem infector? non ipse fuit necis auctor, quam intuiit: Ipsa ipsa illius manum, ferrumque Virgo impulit: Nolentem exoravit fraudulenta, repugnantem induxit, titubantē confirmavit ingeniti promisso, ut feriret, ut omni virium contentione percuteret ense cervicem. Quo promisso, inquis? Oleū habere: se dixerat, quod mox ei daret in præmium, si ab ipsius corpore, libidinem abstineret, quo inunctus, nulli vulneri futurus esset obnoxius. Credere nolebat Miles, sed deniq; asseveranti credidit, & in se periculum facere volenti capitis periculo, paruit demū; percussit, obtruncavit. O virgo, (ad te enim, jam subirata se convertit oratio) quid egisti? quo in consilio commenta es? cur tibi alienas, invitaque manus attulisti? At, quid sciscitor? quid interrogo? quasi me latere possit, quod quæro? Illa, illa fuit causa quæsitæ necis, studium tuendæ pudicitiae, castitati caput posthabuit, Heroïna invictissima illibatam constupratæ vitæ prætulit mortem, ut sibi immortalitatem morte compararet. O virtutem omnium sæculorum præconiis efferendam.

*Quin.*

*Quintus ejusdem rei narranda modus.*

*Ab Obsecratione Euphrasie, ad militis pedes provoluta ne pudori afferat probrum sic ordiri possumus.*

Generose Miles, inquit Puella illa venustissima, quam ad pedes Adolescentis advolutam cernitis? Juvenis humanissime, te per ego hanc dextram tuam oro; genuaque, quæ amplector, per vigorem illum animi eximium, indolemque præclaram, quæ toto ore amicat, precor, obtestorque, pudori meo parce: Enitar, & ut spero consequar, ut te de me optimè esse meritum hæteris. Est mihi, unde parem tibi gratiam, atque etiam fortè majorem rependam. Quid enim, inquit Miles abnuens, quid mea causa facere possis? Possum, ait Virgo, immortalem te præstare bello, si me audies, (arrisit ad hæc Adolescens) & unguine, quod tibi mox datura sum, linies pectus; sic enim genus omne telorum illesus rideas. Non credis video satis putas me tibi velle fucum facere: atqui experiri licet fidem meam, periculo vitæ: periclitare, explora unguenti mei vires in hoc capite. Annuit miles, illa perungit colum oleo, tum cervicem feriendam exhibet, hortatur, totis ut viribus ferrum in caput contorqueat: Hæret Juvenis, metuit, pallet, quasi feriendus ipse; excitatur blanda objurgatione Virginis, nihil esse, quod sui causa metuat; obtusum iri ferri aciem, audeat

audeat modò, ensẽ exerat, manum erigat, cervicẽ percutiat. Animatus ille, nihilq; jam formidans nudum attollit gladium, demittit in collum, præscindit caput. Quo putatis stuporem perculsum adolescentem impudicum, ubi Virgineum caput suos subsilire ad pedes vidit? quam mærens, ubi se collegit, retulit pedem! ut iagemuit! ut detestatus est nefariam libidinem.

*Sextus ejusdem rei narranda modus.*

*Ab Hortatione Euphrasia juncta jam cervicẽ. Militi suadentis, ut ferrum adigat in caput principium ducere licet in hunc modum.*

Feri miles, inquit Euphrasia, feri, quid cessas? quid cunctaris? ferrum jam nihil ego timeo, oblini collum: Eñ; præbeo cervicẽ: quid trepidas? Non mea, inquit ille, sed tua causa trepido; vereor nimirum, ne futura sit acutior, quàm vellem, ferri acies: Men' tu censes, subjungit Virgo, stolidam aded, & prodigam vitæ, quæ subjicerem gladio caput, si perspecta, probataque mihi non esset vis huic unguento insita? hoc liquoreuncta, tui ensis hebetabo aciem, attolle dexteram modò, atque aude. Audet ille, eximit vagina gladium, attollit, cervicẽ icit, primoque iQu demetit. Muto ac stupenti insultat subsultans pavimento caput, motuq; ipso loquitur, & vocem cum cruore fundens; Quid istic heres adhuc, inquit, impure ganeo? te non sentis verberari his oculis extinctis? non vocem audis linguæ mortuæ?

nec

nec te, in hac fronte relictæ, terrent minæ?  
 Quid stas? quid intueris? quid me impudico  
 aspectu violas? Abscede, scelerate; abi jam,  
 & ubique tuum, meumque factum prædica;  
 exarmatum scilicet ab inermi puella mi-  
 litem; victorem, adversariæ morte victum,  
 & novo genere victoriæ triumphasse quæ,  
 cecidit, & prostratum esse, qui stetit.

*Septimus ejusdem rei narranda modus.*

*Invitantur Virgines ad spectaculum occisa  
 Euphrasia, per apostrophem.*

Adeste quot quot castimoniæ laude glo-  
 riamini, Virgines: adeste omnes ad specta-  
 culum huc oculos ad fletum, huc manus,  
 ad planctum, aut ad plausum potius; huc  
 voces ad præconia; huc animos ad admi-  
 rationes afferte. Dignum oculis, dignum  
 virtute vestra, & admiratione spectaculum  
 vobis objicio. Cernite hujus cubiculi pavi-  
 mentum cruore natans, & abscissum à suo  
 corpore puellæ caput formosissimæ. Quid  
 in militem adstantem oculos torquetis, ita  
 ardentes, quasi facinoris authorem; Quid  
 sanguine stillantem intuemini, quem manu  
 tenet gladium; Impure latro, inquitis, ca-  
 stissimæ Virgini arripere non potuisti pud-  
 citiam, vitæ abstulisti explere nequisti libi-  
 dinem, explesti sanguine crudelitatem, vim  
 inferre pudori non valuisti, violentas intulisti  
 manus illibato corpori [ *Sermocinatio.* ]  
 Aberratis, Virgines, aberratis; violentas ma-  
 nus non intulit; volens puella vitæ perdidit,  
 caput

caput amisit. At hujus militis, nonne ferro truncatum est? Ita, sed quin ipsa impulsit Virgo, impulsit; quo autem consilio impulsisset? ut scilicet cupiditati turpissimi adolescentis illuderet; Cum enim in angustiis deprehensa, effugere alia ratione vim non posset, & succumbendum necessarium ei esset sceleratæ libidini, occumbendum sibi potius esse duxit. Ergo, mirabilem unguenti cujusdam vim militi exponit; quod haberetur, omne ferrum: si fidem dicto nolit addere, addet facto, simulque cervicem oblineit, offertque ferendam in experimentum. Persuasus Juvenis, illius caput ferro percutit, & obtruncat; Quid agitis jam, delicatæ Virgines? filetis? obstupescitis? hæret vobis lingua, admiratione tantæ virtutis? Et mihi pariter calamus hæret.

*Habes in hoc uno Exemplo, quod promissam, Unum tamen adhuc adjiciam superioribus, ut mihi quidem videtur, baud paulo compius ornatusque.*

## QUARTA NARRATIO

Historica.

*Formosa Deformitas duarum Virginum.*

Euphemia & Margarita Virgines erant, oris decore claræ; at pudicitiae laude multo præclarissimæ Cum viderent autem perniciem passim afferre animis, eximiam illam, qua fulgebant, corporis elegantiam, neque prodire in publicum posse sine alieno dam-

no: instinctu divino, nares cultello præciderunt.

*Ita ferè Rhetoricæ artis imperiti loquerentur ac scriberent; At verò qui illius non omninò ignarus est varias orationis gemmas huic Narrationi illigabit hoc ferè modo.*

Hæ duæ Virgines, quibus Euphemiæ & Margaritæ nomen erat; sorores necne fuerint cogoatione sanguinis haud quidē scio at meritorū similitudine, germanas existisse certè scio. In eadem agebat demo, ætate penè, virtute planè pares decore pares ac pudore, [*Similitudo*] ut Colūbæ non sit Columba similior, aut Rosæ Rosæ ut alterius, decus ac formā referebat altera, [*Hyperbole*] Margaritam dixisses Euphemiæ speculū, & Margarita Euphemiā aut potius geminum corpus; uno eodemque agi & animari spiritu, ita semper una erant, incedebant, vivebantur, seu domi manerent, seu prodire in publicum exigèret necessitas, aut honesti ratio postularet, haud ignaræ utique, puellam in publico apparere, aut sæpius, aut solam nequaquam [*Paronymasia*], omnem esse pudici nominis. Ergo quoties extra ædium fines posuerant pedem, tum vero, [*Metaphoræ*] pudoris odorem, quod unum erat utriusque votum, quocumque irent spargebant suavissimum, simulque, quod exhorrebant morte perius [*Antitheses*] ignem in plerorumque animis haud satis pudicum, accendebant pudicæ (quod mirere)



re) illibatæque nives oris elegantissimi, & corporis maiestas planè mirabilis ac divina. [*Repetitio.*] Id aded prodebant non obscuris iudiciis, plurimorum suspiria quoties obvios se darent, alto emissa pectore; id lacrymæ, ab oculis cadentes intuentium; id admirationes non tacitæ; & acclamationes non fictæ, clarè loquebantur. Quid? quod ed etiam prorupit non semel non nullorum temeritas & amentia; ut amatorias stulti literas mittere in earum domum non erubuerint.

At impudentiam procorum erubere Virgines: ac prima Euphemia ad germanam versa. [*Colloquium*] Vides, soror, quo res sit loco? ut serpit malum in dies, opinione latius? audis, ut amantium insanis præconiis vicina circumsonat, ut nec jam nobis efferre pedem recto liceat, sine proprio dedecore, vel scelere alieno? [*Allegoria*] Et spectamus ignavæ incendium, quod excitavimus: atque etiam ministramus pabulum flammis, quas vel ipso sanguine restinguere, aut corporibus opprimere jam diu debuimus? Quin si me amas, tanto me deamur malo, quod creavimus, & me sequaris præeuntem. Sequar verò, & libenti quidem animo, inquit Margarita, & vel in certam tuam mortem, habebis me ubique comitem, nec ullus me casus à tuo latere divellet, soror; jube modò. Precibus, inquit illa, efflagitemus divinam opem, in  
genua

genua procumbamus ambæ. Ambæ procumbunt, orant, supplicant; [ *Exclamatio*, ] quo sensu pietatis, superi! quo fervore animi! quis explicet? [ *Hypotyposis*. ] Surgit deinde Euphemia impatiens moræ: consurgit Margarita: secretius illa cōclave subit; hæc subsequitur occlusisque foribus, considerat, quid illa moliat; molitur enim magui nescio quid, & inusitati. Atque ecce, thecam è scrinio jam depromptit, speculumq; in primis præclarum ac splendidum, nō hos, heu! in usus emptum pridem à parentibus, relictumque hætenus in cistellæ fundo. Illud nunc Euphemia appendit loco idoneo, tum è theca cultellum extrahit, minaci fulgore rutilantem. Spectat Margarita stupenti similis, quid illud sibi velit speculum, quod spectet ille mucro; silet tamen pallida, & tremens, cum Euphemia speculo objicit sese, tantum ab decore vultus doloris habuens, quantum aliæ voluptatis. Tum ingemiscens, & pulchritudini irata suæ.

[ *Apostrophe*. ] Itane verò, inquit, pudorem tu mihi, aliis etiam afflabis venenum, forma pestilens: nec erubescis, tot flagitiis causam date? faxo, puriore mino, tota modò rubeas. Hæc dicens, [ *Hypotyposis*, ] prehenas nares (videt, & exhorrescit Margarita, & ego, pariter horresco referens) nares inquam sibi uno ictu exsecat; ac defluentis aspectu sanguinis vehementius in semetipsam exardescens,

scens, genas, mentum, labia, dirum in modum cultro violat; acumine deinde dispungit frontem. [ *Exclamatio.* ] O spectaculum, luctuosumne dicam, ammirabile! [ *Allegoria.* ] Ac jam ab cœlo illo pudoris ac modestiæ, purpureus imber depluit in sinum argenteum, & rosæ liliis miscetur.

[ *Apostrophe.* ] Quid agis interea, tu, Margarita? Et quando colliges à stupore animum? Diutiusne, crudelem manum sævire patieris, in vultum innocentem stuporem discute, inhibe furem dexteram, cultrum eripe sacrilegum; discussit, inhibuit, eripere tamen immitte ferrum nondum valuit: reluctatur enim Euphemia. Cui illa; Quid ultra tendis inquit, Germana? totum jam funditus corrupisti formæ decus: horrorem jam mihi crede, non amorem paries. Cedo jam cultrum, meam ut vicissim, ad exemplum tui faciem refingam: Novum hoc mihi calamistri genus trade, inquam, obsecro, quo me, tui ad instar, comam, poliamque. Verbis adhibet vim, & tandem extorquet gladiolum cruore rubentem; ac gestiens, nares similiter præcidit fœdissimo vulnere, & frontem confusis turpat punctiunculis, genas sulcat deinceps [ *Allegoria.* ] exaratque lineas celeri ductu, & quasi molli in ebore, miniatos insculpic characteres! *Exclamationes.* O lineas! o

characteres ! ò cruorem ! ò purpuram !  
 [ *Antitheta* . ] ò fœditatem splendidam !  
 ò vulnera præclara ; ò deformitatem pul-  
 -cherrimam ! [ *Repetitioni juncta* , *Interro-*  
*gatio* . ] Qua putatis celeritate ; è superis  
 delapsos regionibus Angelos , ad specio-  
 sum convolavisse spectaculum ? Qua sol-  
 licitudine ac religione , depluentes in ter-  
 ram certatim collegisse pyropos , [ *Meta-*  
*phora* . ] unionesque roseos . Qua seduli-  
 tate ex iis texuisse ferta , corollas ac mo-  
 nilia , queis purpuratarum colla , sinusque  
 Virginum decore ambirent , ambitiosè de-  
 corarent ? Agnoscunt sanè ornamenta di-  
 vida Virgines , & à vulneribus mirantur  
 fluere delicias , & à fœditate clariùs efflo-  
 rescere formæ nitorem : sibi que mutuos  
 inter amplexus osculaque plaudunt , & la-  
 crymas confundunt lacrymis quas expri-  
 mit voluptas , & cruorem miscentibus hor-  
 rori , quem dolor elicit . O quàm mihi  
 jam , Euphemia , solito videris elegan-  
 tior ! clamat Margarita . Quam tu etiam ,  
 reponit illa , videris mihi venustior , quàm  
 antea ! ut blandè rutilant genæ ! ut pul-  
 chrè frons resplendet ! ut jucundè labra  
 irradiant .

Quid multis ? sic comptæ , sic ornatae ,  
 quò displicuere magis mortalium oculis :  
 hoc Immortali Cœlestique Sponso amabi-  
 lius arrisere .

*Ut autem intelligas , quod in Superiori*  
*Narra-*

*Narrationes feci, idem quoque in hac, ceterisque ejusdem generis, posse facile fieri; placet Historiam eandem alio modo refingere, ad precedentis exemplum.*

## EADEM NARRATIO.

*Alio modo texta.*

[ *Hypotyposis.* ] Quid cerno Deus Immortalis! Quod horrendi spectaculi genus, percellit oculos! Duas intueor, præstanti pulchritudine Virgines, alteram sibi labra, genasque sædè lacerantem, alteram præcisis jam naribus, lacerata fronte sine specie, sine decore, atque adeo sine facie, genibus affusam, elatis in cælum manibus, oculisque, rigantem pretioso cruore pavementum. [ *Apostrophe.* ] Quis vos habet furor præclarissimæ Virgines, quæ insania stimulat? aut si quis sanctior instinctus est, amabo dicite? Quid ita formam illam deformatis eximiam! Cur in hunc modum turpatis, truncatisque vultum? Quæ ratio, ad hoc inusitatum facinus, vos incitat? Audite quid respondeant. Audite, quid hiantia illa ora vulnèrum loquantur? quæ verba cum sanguine profundant: [ *Prosopopæia & crebra Anastrophe.* ] Oris dehonestamus elegantiam, inquam, ne pudoris honestas violetur; corpoream perdimus formam, ne deformis reddatur animus; has corrumpimus amorum illecebras, ne aliis nos depereundo, & amando malè, amentes pereant: puras

N 2

gena-

genarum nives inquinamus, ne impuro igne intuentium corda exardeant, splendorem obscuramus, ne ab illo cæcutiant alieni oculi. [ *Exclamationes.* ] O consilium immortalī laude dignum! ò facinus eximium, admirabile, singulare, omnium literis, & prædicatione celebrandum! Pergite, porro, Virgines illustrissimæ! Pergite conspurcare speciei nitorem, quò pudor speciosus effulgeat; confundere pergite venustatem vultus, venustior ut existat forma virtutis. Pergunt illæ, quoad turpes sibi videantur insigniter, sicque alienas sordes eluunt suo sanguine; & hoc quasi unguento, Veneris curant vulnera, & elaque retundunt, extinguuntque nefarias facies: Neque enim eas quisquam posthac amavit ut pulchras, sed ut castas coluit, ut sanctas suspexit.

*Pessem alia, atque alia ratione, hanc ipsam historiam, sicut priorem, pertractare; sed quia hac sufficere mihi videntur, & quæ afferrem baud multum iis essent absimilia quæ in proximè superiori attuli; ad illud Narrationis genus veniemus.*

## §. III.

## NARRATIO CIVILIS.

*Flagitiosa Nuptia.*

**N**Arrationem hanc, consultò in locum hunc reservavi ultimum quòd cum absolutis-

*solutissima sit Amplificationis idea, virtutesque ad narrandum requisitæ omnes in ea præclarissime eluceant, fastidium è superiorum lectione conceptum levatura sit.*

*Argumentum est hujusmodi Cluentia, Cluentii & Sassiæ filia post patris mortem Melino nupserat adolescenti nobili. Aliquantò post Sassiæ Generi sui amore capta filiam compulsa ad discedendum à marito, quo divorzio facto nupsit Melino Sassiæ. Flagitium hoc Tullius eloquenter exaggerans Narrationem auspica-  
tu à primis Melini, & Cluentia nuptiis, de  
his sic agens. ( Or. pro Cluenti n. 22.*

*Cùm essent hæ Nuptiæ, plenæ dignita-  
tis, plenæ concordæ, repente est extor-  
ta mulieris importunæ nefaria libido, non  
solum dedecore, verum etiam scelere con-  
juncta. Nam Sassiæ mater hujus Aviti ( ma-  
ter enim à me nominis causa, tametsi in  
hunc hostili odio, & crudelitate est ) ma-  
ter, inquam appellabitur, neque umquam  
illa ita de suo scelere, & immanitate au-  
diet, ut naturæ nomen amittat. Quod  
enim est ipsum nomen amantius, indulgen-  
tiusque maternum ( hoc illius matris, quæ  
multos jam annos, & nunc cùm maxime  
filium interfectum cupit, singulare scelus,  
majore odio dignum esse ducetis. ) Ea igitur  
mater Aviti, Melini istius adolescen-  
tis, Generi sui, contra quàm fas erat,  
amore capta: Primò, neque ipsum diu,  
quoquo modo poterat, in illa cupiditate.*

continebatur: deinde ita flagrare cœpit amentia, sic inflammata ferri libidine, ut eam non pudor, non pudicitia, non pietas, non hominum fama, non filii dolor, non filiae mæror à cupiditate revocaret. Animum adolescentis, nondum consilio ac ratione confirmatum, pellexit iis omnibus rebus, quibus illa ætas capi ac deliniri potest. Filia, quæ non solum illo communi dolore muliebri, in ejusmodi viri injuriis angeretur, sed nefarium matris pellicatum ferre non posset, de quo ne quæ i quidem sine scelere se posse arbitraretur, cæteros sui tanti mali ignaros esse cupiebat; in hujus amantissimi suæ fratris manibus, & gremio mærore, & lacrymis consensebat. Ecce autem subitum divortium, quod solatium omnium malorum fore videbatur. Discedit à Melino Cluentia, ut in tantis injuriis, non invita; ita à viro non libenter. Tum verò illa egregia, ac præclara mater palam exultare lætitia, ac triumphare gaudio cœpit, victrix filiae, non libidinis. Itaque diutiùs suspicionibus obscuris lædi famam suam noluit: lectum illum genialem, quem biennio ante: filiae suæ nubenti straverat, in eadem domo sibi ornari, & sterni, & expulsa atque exturbata filia, jubet. Nubit genero locrus, nullis auspiciis, nullis auctoribus, funestis ominibus omnium. O mulieris scelus incredibile, & præter hanc unam, in  
omni



omni vita inauditum! O libidinem effræ-  
natam, indomitam! O audaciam singula-  
rem, non timuisse, si minùs vim Deorum,  
hominumque famam, at illam ipsam no-  
ctem, facesque illas nuptiales? non lumen  
cubiculi; non cubile filia? non parietes  
denique ipsos, superiorum testes nuptia-  
rum? Perfregit ac prostravit omnia cupi-  
ditate, ac furore? vicit pudorem libido,  
timorem audacia, rationem amentia.



## DE CHRIA.

**Q**uid frontem, Lector, erigis : mendosus non est ille Titulus? Chria dici debet, non Chreja, ut vulgus imperitorum, tam Gallicè, quàm Latine loquitur. Etenim Græca vox Χρῆμα scribitur ; uti vides per α quæ diphthongus latinitate donata non dissolvitur ; sed exprimitur ut i longum. Sicut igitur, non dicis Mageja & Aleſſandreja sed Magia, & Aleſſandria quoddā scilicet scribantur per α ita, nec Chrejam dicere debes sed Chriam. Id te volui præmonitum ut ne offenderes, vel in ipsum rei nomen de qua tam multa nobis disputanda sunt.

## CAPUT I.

*Quid sit Chria, & quotuplex.*

**Q**uid est Chria?  
**R.** Est Commemoratio, seu Explicatio, facti alicujus, vel dicti, vel utriusque simul certis capitibus comprehensa.

Quare hoc genus Amplificationis Chria dicitur?

**R.** Quia vocabulum hoc χρεία usum & necessitatem significat, unde à nonnullis *Uſus* appellatur. Quòd igitur, hæc Amplifican-

plificandi forma, & ad quodpiam seu dictum, seu factum; ornatè, & eleganter explicandum, utilissima; hinc factum puto, ut *Usus* seu *Chria* nominata sit.

Quotuplex est Chria?

R. Triplex, Alia est *Activa*, alia *Verbalis*, alia *Mixta*. Latiniùs dicendum esset; Alia in *Actione* consistit, alia in *Verbis* posita, alia ex duabus illis coalescit.

Quid est Chria *Activa*?

R. Illa est, quæ *Actionem*, seu factum quodpiam exponit, & exornat.

Da Exemplum.

R. Dabo geminum, 1. Lacædemonii, suis ut liberis, ebrietatis odium horroremque ingenerarent, adducere illos soliti erant in conspectum fervorum, qui vino mentem obruissent, nimirum, ut fædo illo spectaculo deterrerentur ab hoc vitio. 2. Tarquinius Superbus, septimus Romanorum Rex, Legato quem ipsi filius miserat, sciscitatum quidnam se facere vellet, in Urbe Gabiis, in qua omnia ipse unus posset, nihil respondit, sed velut deliberandus, in hortum ædium transiit, sequente Nuncio, & responsum expectante, ibique inambulans tacitus, summa papaverum capita baculo decussit: Ex quo filius intellexit, primores urbis interimendos esse; quod brevi præstitit. Hujusmodi *Actiones Activæ Chriæ* argumenta esse possunt.

Quid est Chria *Verbalis*?

R. Illa est, quæ verba sententiosè ab aliquo prolata explicat.

Da Exemplum.

R. En aliquot 1. Difficilius est imperata facere quàm imperare facienda. 2. Pro focis, interdum pugnatur acriùs, quàm pro aris. 3. Prope se consequuntur, proponi formam, & exponi pudicitiam. 4. A summo declinantibus facilis est, per prærupta, ad infima quæque casus. 5. Non est in ejusdem manu ignem iniicere, & injecto spatium, modumque statuere. 6. Sparsa in commune gratia ab omnibus accipitur, à nemine redditur.

Quid est Chria *Missa*?

R. Ea est, quæ factum quodpiam sermone conjunctum complectitur.

Da Exemplum.

R. Duplex afferro. 1. Diogenes, cum puerum vidisset, petulanter, & immodestè se gerentem, ejus Pædagogum fuste percussit adiiciens verberibus verba hæc: *Siccine puerum hunc tuæ curæ commissum instituis?* 2. Scilurus Scythia octoginta filios moriturus cum advocasset, jaculorum fascem singulis frangendum porrexit; sed frustra; quis enim tot jacula simul collecta frangeret? Ipse verò, tela singula seorsim eximens, nullo labore fregit; factoque monitum præclarum addens: *Quandiu, inquit, vos conjunget mutuus amor, arctior*  
que

que benevolentiae nexu vivetis copulati, tam-  
diu infracti invidique eritis: At si qua dis-  
sensio vos segregabit ac distrabet, vincemini  
facile.

## C A P U T II.

### Chria Partes.

**Q**Uæ sunt illæ Partes, seu Capita ex  
quibus Chria componitur?

R. Octo ista; *Encomium*, *Paraphrasis*,  
*Causa*, *Contrarium*, *Simile*, *Exemplum*,  
*Testimonium veterum*, *Epilogus*.

Seu mavis, vulgari more loquar: Tra-  
ctanda Chria est, à.

<i>Laudativo,</i>	<i>Simili,</i>
<i>Paraphrastico,</i>	<i>Exemplo,</i>
<i>Causa,</i>	<i>Testimonio Veterum,</i>
<i>Contrario,</i>	<i>Brevi Epilogo.</i>

Quid sibi vult à *Laudativo*?

R. Inchoandam esse Chriam ab illius  
laude, qui vel dictum protulit, vel edidit fa-  
ctum illud, quod Chriæ materiam præbet.

Quid significat, illud à *Paraphrastico*?

R. Idem, ac si diceret, ab *Expositione*  
facti, seu dicti, quod per Chriam, susce-  
pimus amplificandum. *Paraphrasis* enim,  
nihil aliud est Latine, quam liberior In-  
terpretatio, & dilucidior explicatio dicti  
cujuspiam.

Quid sibi vult à *Causa*?

R. Afferendam esse causam aliquam ar-  
gumenti

gumenti quod pertractavimus, v. gr. in hac sententia, *Pecunie obediunt omnia*, quærendum esse, cur omnia obediant Pecuniæ, tamquam Dominæ; Et hæc præ cæteris occurreret causa; quod Pecuniæ usus ad omnia sit ferè necessarius.

. Quid illud est, à *Contrario*?

R. Significat, ex contrariarum rerum conflictu, id confirmandum esse quod probandum nobis est. Exempli causa. Quemadmodum Pecuniæ obediunt omnia, id est, sicut opulenti in cæteros imperium exercent, videnturque adepti licentiam omnium rerum; E *Contrario*. Egeni jacent, contemnuntur, aliorum voluntatibus coguntur obsequi.

Quid à *Simili*?

R. Illustrandam esse docet propositam sententiam similitudine quampiam. Ut; Quemadmodum Regi famulantur subditi, & ab illius nutu cuncti pendent; ita Pecuniæ obediunt omnia. Vel: Sicut qui Claves habet portarum urbis, & arcis, in cives dominatur, nemoque potest ejus imperio se subducere; Sic qui pecunia abundat, est quasi cæterorum dominus.

Quid, ab *Exemplo*?

R. Monet, Exemplum adducendum esse, ad stabiliendum quod intendimus. Ut si dicam, ad confirmationem allatæ sententiæ Cæsarem, pecuniarum largitionibus, viam sibi muniisse ad totius orbis imperium.

Quid,

Quid, à Testimonijs veterum?

R. Ostendit. Scriptoris cujusdam veteris auctoritate, confirmandam esse propositam Chriæ sententiam: v. g. Dicam idem sensisse Virgilium, cum pecuniæ summam potentiam admiratus, exclamavit in hæc verba:

— *Quid non mortalia pectora cogis,  
Auri sacra fames?*

Quid denique sibi vult, à brevi Epilogo?

R. Indicat, quæcunque dicta sunt brevi, aptaque verborum comprehensione, concludenda esse.

Quod est difficillimum Chriæ Caput?

R. Illud, quod secundo loco ponitur, quodque à *Paraphrastico* nominamus: Ubi autem ab illo discesseris, Encomium, seu, quod à *Laudativo* dicimus, non levis est momenti, & negotii. Quocirca de utroque separatim nunc agendum est; adiciemus postremo pauca de reliquis.

### C A P U T III.

*De primo Cbræ Capite à Laudatione.*

**Q**Uam ob causam, Chriam aucupamur à Laude Auctoris sententiæ, vel Actionis amplificandæ?

R. Quia, quò major est loquentis, aut agentis auctoritas, eò majoris sunt ponderis ejus, seu dicta, seu facta. Ut ergo Sententia, aut Actio explicanda, non fidem solum

solum apud auditores, sed quandam quasi venerationem sibi concillet, præmittenda est Laus Auctoris.

Qua ratione laudandus est Auctor?

R. Duplex hujus rei cautio est. *Prima* ut laudes sint veræ; nam laudem, qua quis caret, ipsi tribuere, non est laudare, sed illudere. Licebit tamen, quod ait Cicero, hoc in genere, largiri nonnunquam plusculum etiam, quam concedit veritas, & adhibere figuram, quam vocamus Hyperbolen, sive Auxesin, sed modestam. *Secunda cautio*; Ut propriæ sint laudes, eique convenientes, cui adscribuntur. Sic, Poeta non est laudandus, à robore virium, sed ab ingenio; nec Imperator, à suauitate vocis, sed à fortitudine, ac scientia militari.

Quasdam mihi, hoc loco Idæas Exordiendæ Chriæ, quæso trade.

R. Faciam, eoque libentiùs, quod me non lateat, nullam fermè rem esse, in hoc genere, quæ tyronum animos molestiùs afficiat, quam ista Chriarum Exordia. Cùm enim, in iis, dicti vel facti cuiuspiam laudandus sit Auctor, ut nunc monebamus; ubi tritum illud ac puerile, *Merito laudandus est Isocrates*, præcinuerint, continuò hæret illis aqua, nihilque occurrat quod adiiciant. Cui ego incommodo ut occurram, eorumque hac in parte, molestiam utcunque levem, varia Exordiorum exempla subiicio, è variis petita Rhetoricæ



thoricæ locis ac figuris; ad quorum imitationem, similia ipsi condiscant, aut etiam meliora effingere.

*Variis Exordiendæ Cbrisæ modi.*

*His Exordiis, Transitions annectam idoneas, quibus primæ huic parti, quæ ab Encomio dicitur, altera Cbrisæ pars, quæ vocatur à Paraphrastico, aptè committatur.*

*In Ciceronis laudem.*

*A. Definitionibus conglobatis.*

[ *I. Encomiam,* ] Ciceronem, quem merito appellare possumus, supremum fori Regem, Oratorum Consulem maximum, Triumphatorem animorum invictissimum, & splendidissimum Curiaæ Solem, Rhetoricæ Decus & Ornamentum, Alumnum, aut Parentem potius Eloquentiæ, Latinæque facundiæ Fontem, dicere solitum accepimus, l. 5. ep. 28. *Præter culpam & peccatum, homini accidere nihil posse, quod sit horribile, aut pertimescendum.* Quo, quid præclarius? quid ab homine sapientissimo verius dici potuit?

[ *A. Paraphrastico.* ] Expendamus, amabo verba singula divinæ sententiæ. Itane verò, Marce Tulli, nihil pertimescendum esse ais, præter culpam? Quid non est pertimescenda ipsa bonorum iactura? ipsa mors, &c.

In Virgilii laudem.

II. A. Partium Enumeratione.

[II. Encomium.] O Poetarum Corriphee, Virgili; quam ego te lego lubens, ac laudo. Quis enim tam invidio aut agresti ingenio est qui si tuam, unà cum scriptis tuis evoluit vitam, virtutes in te non miretur maximas? Pudorem non prædicet admirabilem, qui virgineum tibi fecit nomen, dum *Parthenius* appellatus es. Humanitatem non extollat, qua omniū tibi cœvorum devinciebas animos? Modestiam non exosculentur, quæ te compellebat in latebras, quoties digito à prætereuntibus monstrareris? Pietatem non veneretur, cui tot laudes tribuisti, quam moribus castissimis consecrasti? Prudentiam non efferat, quam Augustus ipse suspexit, cum te consuluit, consiliumque danti paruit? Hanc equidem præ cæteris virtutem, cum ubique suspicio tuis in poematis; tum verò præcipuè, cum asseruisti. *Non alium salutis spem iis affulgere qui victi fuerint quam se nihil omnino sperent*: hoc uno carmine mysterium illud comprehendens, & explicans.

*Una salus victis, nullam sperare salutem.*

[A. Paraphrastico.] Enucleemus hoc Mysterium, cujus sensum, prorsus dicas carere sensu, si parum tibi perfecta fuerit Poetæ mens. Quid enim verò? inquires Ut salutis suæ consulat, qui ab hoste devictus est, ei speranda est: Cum enim nullum sibi superesse

resse viderit salutis consequendæ locum, quid non agat? quas strages non edet, ut se expediat? &c.

In laudem Aristotelis.

*A Notatione Nominis.*

[*III. Encomium*] Non sine divino cōsilio factum putem, quod Principi philosophorum *Aristotelis* fuerit impositum nomen. Quid e. *Ἀριστος* nisi *Optimam* sonat? Quid *ἄλος* nisi *summum*, nisi *extremum*, *perfectum*, *absolutumque* significat? Fuit nimirum id nominis absolutissimæ laudis quasi prænuncium, qua vir ille summus sic excelluit, ut in ipsius mente Sapiencia videretur fixisse sedē aut certe dono quodam providentiæ crederetur esse progenitus, in cujus animo Artes omnes optimæ ac liberales Disciplinæ, vires suas ad certamen usque experirentur, ac ostentarent. Adeo infinita eruditione conspicuus omniumque præclarissimarum rerum intelligentia instructissimus, supremum attigit doctrinæ verticem, statutamque humanæ menti metam, ingeniti celeritate longè multumque superasse visus est. Talis, ac tantus vir, audite, quid aliquando in commendationem literarum responderite: Rogatus enim, *quo differrent Docti ab Indoctis*; quo, inquit, *Viventes à Mortuis*.

[*A Paraph.*] O dignum Aristotele responsum! o, mortalium sapientissimo, digna vox. Hos tu vivere putas, qui omnis eruditionis expertes, in summa optimarum artium igno-  
ratio-

ratione versantur? Hos, inquam, vivere tu putas, quia sentiunt, quia loquuntur, quia cæterorum more usura lucis fruuntur? Erras. Hæc vita non est, &c.

In Senecæ laudem.

A Genere, & Forma.

IV. Encomium.

Magham quidem, egregiamque laudem, sibi sapientissimus Romanorum Seneca peperit, eximiamque existimationem adeptus est, cum plurimis præclare factis, tum verò æquabilis vitæ moderatione, quam non minus in adversis, ac in secundis rebus adhibuit, majori tamen luce gloriæ nomen illustravit suum clarissimis ingenii monumentis, quæ transmisit ad posteros, tot figurarum luminibus reudentia, tot abundantia, sonantibus verbis, tam gravibus ornata sensis, ut quamvis cæteræ animi laudes, abfissent, hæc una tanti viri famant ad sempiternam temporis memoriam propagatura facile fuisset. Idum adeò non loqui diceres, sed oracula fundere; non scribere, sed leges ferre, nec tam in verba, characteres fingere, quàm figurare verba in sententias; At quàm argutas! Superi! quàm exquisitas! quàm reconditas! Unam de omnibus vultis explanemus? Accipite, quàm scitè, perversam hominum, in carpendis aliorum factis consuetudinem, carpat ipse atque reprehendat. *Aliena vitia*, inquit *in oculis habemus, nostra à cæcis sunt*.

[A Ps.

[*A Paraphrastico.*] Planè ità res se habet; gerimus, quod ajebat alius ille, manticam super humerum? in illius anticam partem aliena peccata, in posticam propria immitimus, ut nostra hæc nunquã inspiciamus, illa contra semper obversentur oculis, &c.

In Cæsaris laudem.

*A Comparatione, & Contrario.*

[*V. Encomium,*] Et si non satis judicatu proclive, pleriq; putent; plusne lingua Cæsar valuerit, quàm manus; stylone fuerit, quàm pilo, scriptis, quàm factis, commentariis, quàm victoriis, dicendi, quàm bellandi arte præstantior; in ea ego tamen opinione sum, ut existimem, illum militare decus obscurasse scribendi gloria, victoriasque vicisse suas, dicendi laude, ingenii que pernitate, non modò assecutum esse magnitudinem animi, bellicamque fortitudinẽ, ac felicitatem, verùm etiam, longè multùmque superasse. Præterquam, quod enim eximias laudes bello partas, innumerabilesq; triûphos, Commentariorũ, quos edidit, divino beneficio, edacitati temporis subduxit, æternitati que commendavit. Quis neget, egregia, quę armatus gessit facinora, populorum dedecorasse infinita clade; palmas quas mersuit, miserorum rigasse sanguine, captarum direptione urbium ac provinciarum suam amplificasse dignitatem: & per aliena damna, stragesque publicas, quasi per gradus supremum conscendisse gloriæ thronum, &  
orbem

orbem subegisse universum? At verò, Ingenii victoriæ quas retulit, Eloquentiæ triumphum, quos egit, Eruditionis trophæa, quæ consecravit, non modò nemini perniciem, sed summa etiam utilitatem, posteris, futuris ætatibus admirationem, ipsique Cæsari immortalem nominis famam, illibatumque decus peperere. Æstimate, quæ de illo dixi, dicique possunt, unius hujus consideratione sententiæ; & ex unguem, quod ajunt, Leonem cognoscite. *Nihil*, inquit, *Imperator, faciat libentius, quàm supplicibus ignoscere.*

[*A Paraphrastico.*] Audite, Duces, Legati, Tribuni militum, Imperatores, audite Cæsarem, Imperatorum omnium Ducem ac Regem; militaris officii jura describentem: Ex eo discite, quid vobis sit libentius, in bello faciendum, si palmas, si victorias, si coronas amabitis: *Nihil*, inquit, &c.

In Q. Curtii laudem.

*A Simili.*

[*VI. Encomium.*] Terenti mihi, ac sæpe numero legenti Q. Curtii Commentatores deambulare videtur in Horto quodā ornatissimo, inter pictas areolarum amœnitates pervenistis distinctas flosculis, quorum odor risu invitari me undecunq; sentio, jucundissimèque compelli, ut illum legam potius ut istum aliumque prius decerpam; cumque mihi sese carpandos singuli certatim offerāt nullus occurrit tamen, quem post-

posthabeam, quẽm cæteris præferam! ita proprio colorum decore, aliis alii præfulgent, singulique singulos vincunt venustate formæ præcipuaque odorum fragrantia. Haud absimili ratione, Historiam dum lego Curtii, voluptate quasi laborat animus, mira sententiarum varietate blandè plectus quibus pulcherrimè collucet tota, venustissimèque distinguitur. Una est tamen præcunctis arridens, quam modò, paulò curiosius ceu Florem eximium, placet olfacere, attentiusque contemplari. Proh! quàm suavem exhalabit odorem, ubi explicata fuerint verborum folia, quibus efformatur! *Nihil, inquit, tam altum natura constituit, quod Virtus non possit eniti.*

[ *A Paraphrastico.* ] Quid enim tam sublime, arduumque esse, aut fingi potest, quod, virtute instructus homo aspirare non possit, atque pertingere? Quæ difficultates obicientur quas non rumpat? qui opponentur obices, quos non disjiciat? quæ impedimentorum moles, quas non evertat?

In laudem Severini Boetii .

*Ab Effectis.*

[ *VII. Encomium.* ] Qualis quantusque fuerit, quàm eximie cumulatò omni genere laudum, quàm illustri conspicuus meritorum fama, Severinus Boetius, qua valuerit apud Reges gratia; apud omnes auctoritate quam excellenti fuerit in Deum fide, qua pietate præcelluerit, quanta publicam rem admi-

administravit sapientia, quanta linguarum omnium cognitione floruerit, quam admirabili eruditione ornatus, quam recondita singularique literatura perpolitus, quæ volumina scripserit, quos in lucem libros ediderit, quæ virtutum monumenta reliquerit, quas pertulerit ærumnas innocens, quos carceres, quæ vincula, quos cruciatus, quam crudelem, acerbamque mortem, pro Catholicæ Religionis defensione tolerarit, quam denique tot factis, tot studiis, tot laboribus, immensam gloriæ mercedem collegerit, si oratione recensere mihi esset animus, haud aliud profectò mihi faciendum putarem, ac malè feriat ille, qui Solem ipsum illustrare maligna candelæ luce moliretur. Dejiciamus ergo vultum, ne perstringatur animus tam inusitato laudum splendore, & venerationi velo luminibus obducto, unum duntaxat admiremur, ex illo laudum Sole, radium. Ipsius facta taceamus, dicta volvamus animo, prætereamus, quæ laudatè gessit, expendamus, quæ scripsit præclarè, hancque præcipuè, dignam sæculorum omnium admiratione sententiam. *Infeliciores sunt, inquit, qui faciunt, quàm qui patiuntur injuriam.*

[ *A Paraphrastico.* ] Quis hoc credat? qui alios convicio violant, injuria afficiunt, omni contumeliarum genere divexant, iis ipsis esse miseriore, quos miseriis obruunt? &c.

In



In laudem Farniani Stradae.

Per Apostropham.

[VIII. Encomium.] O te omnium, literarum commendatione cohonestandum. Farniane Strada! ò te singulari laudum prædicatione, & oratorum omnium voce præconiisq; celebrandum. [*Interrogatio, & Similiter desinens*] Quod enim nõ meretur honoris præmium, ihusitata illa dicendi facultas, qua eminuisti? Quam laudis mercedem, non sibi jure vindicat, exquisita illa Rhetoricæ artis intelligentia: qua enituisi? Quem gloriæ fructum, tuo non jam peperit nomini, parietque in dies, semper majorem, absolutissima illa Historiæ conscribendæ peritia, qua excelluisti? Sanè quot verbis scripta tua distincta sunt, tot mihi videntur illuminata gemmulis, & quot sententiis conspersa, tot adridere flosculis, totque splendentibus stellulis jucundissimè radiare. [*Distributio.*] Illarum tamen gemmularum velut Adamantem pretiosissimum, illorumq; florum tanquam Rosam elegantissimam, harumq; stellarum velut Solem, sententiam istam reliquis aliis nemo non anteponat, quam sic expressisti, *Bellicæ Duces nihil magis timere debent: quam ne timere videantur.*

[*A Paraphrastico.*] Auditisne Copiarum Ductores? Præfecti exercituum intelligitis, quid vobis metuendum in bello sit? Nihil, inquit is, fortissimo Duci metuendum est: Imo, unum est quod maximè refo-

mida-

midare debeatis, ut ne videlicet quicquam reformidare videamini, &c.

In laudem S. Hieronymi.

*Per Congeriem Sententiarum.*

[ *IX. Encomium.* ] Eximia quidem admiranda ingenii vis ac celeritas, qua celeberrimum Ecclesiæ Doctorem Hieronymum, floruisse constat, laudem ac venerationem meretur: summam illius eruditionem, cumulatamque linguarum omnium notitiam omnium ingenuarum artium cognitionem perfectissimam, qua præcelluit, omnibus encomiorum ornamentis, nemo dignè satis illustret. Nulla mihi tamen, ex innumeris quæ illum commendavere, animi dotibus, sublimior videtur aut major, quàm inusitata illa Sapientiæ virtus; cum in omni ejus vita, clarè renidens tum præcipuè in sententiarum majestate, quibus ea, quæ nobis tradidit, doctrinæ monumenta pereruditè illustravit, incredibili splendore præfulgens. Quæ, ne quis magnificentius à me dicta, quàm veriùs, forsan existimet: placet ex iis unam proferre in medium, omnibusque demirandam proponere. *Sola*, inquit, *Libertas est, non servire peccatis.*

[ *A Paraphrastico.* ] Quid igitur, Doctorem Maxime? Qui sui juris est, & pro arbitrio cuncta gerit; is non est liber? Non est liber. Qui nihil coactus, nihil necessitate cõpulsus sed spontè agit omnia; eum tu non dices liberum? Non dicam liberum, &c.

In

## In laudem S. Ambrosii.

*Per interrogationem, & Auxesin.*

[ X. *Encomium* . ] Quæ lingua usque adeò soluta, & eloquens, quæ tam disertâ, volubilisque dicendi facultas; quod orationis genus tam expolitum, perfectumque, vel minimam laudum particulam, aut verbis exequatur, aut enumerando recenscat, quas Ambrosius, ( ò ambrosia dulcius, nomento nectare suavius ingenium! ) illustri sanctimonix fama, ingeniique magnitudine sibi comparavit? Deficiunt me certè verba, calamusque torpet, stupentique similis animus hæret, admiratione suspensus, quoties, eximia ipsius, quæ transmissit ad posteros eruditionis ornamenta pervolvens, sententiarum, quas cum viveret, pleno profudit ore, consignatque deinde literis varietatem atque majestatem, attenta cogitatione perpendo. Attamen, omnium illa mihi semper est visa longè præclarissima, & ad morum informationem, in primis utilis, ac pernecessaria, quam his verborum coloribus adumbravit. *Luxuria seminarium, & origo est vitiorum omnium.*

[ A *Paraphrastico* . ] Si quis ergo omnia profligare vitia cupit, indicat uni Luxuriæ bellum; immortales, capitali huic vitio inimicitias denunciât, &c.

## In laudem S. Bernardi.

*Per Apostrophen, & Allegoriam.*

[ XI. *Encomium* . ] Huc adeste, ingeniosæ  
O libro-

librorum Apiculæ. Huc convolate; eruditi mellis artifices studiosissimi; qui curiositaris, ac diligentia subnixi, florulentos scientiarum hortos circumvolitantes, singulas descriptorum voluminum areolas, e perlustratis animo, atque odoramini, huc adeste; Ad amcenissimos Scriptoris plenè mellei (Bernardus is est, benè nostis) vos hodie ad pulvillos invito innumeros perspersos suaveolentibus herbulis, floribusque pulcher-  
rimis suavissimè picturatos. En flosculum vobis hunc unum inspiciendum, atque olfaciendum offero, ut de cætera divini hujus viridarii magnificentia capiat is speciem: At, quem flosculum offero? Sententia hæc est, qua nihil arbitror, vel subtilius, vel sapientius dici potuisse. *Omnia illi desunt, qui nihil sibi deesse putat.*

[*A Paraphrastico.*] Nihil sibi deesse putas homo opulentus, omnibus fortunæ muneribus affluens suntne illi omnia? prorsus omnia. Nihil desiderat, cui ad voluntatem cuncta fluunt; omnianè illi desunt? ita desunt &c.

In laudem S. Augustini.

*Per eandem figuram.*

[*XII. Entomium.*] Stellæ, cætera-  
que minora Sidera delitefcite; Sol Dux  
vester, & Imperator exoritur. Abscedite,  
Scriptores ethnici, profanæ Faces, tene-  
bræ Lampades, viles Nitedulæ vestris  
vos sublestribus umbris involvite: Et vos,  
lucidif-

lucidissima doctrinæ purioris Astra. Doctores illustrissimi, discedite quoque tantisper honoris gratia. Augustinus adest Ingeniorum Sol, orbis Christiani clarissimum lumen, ac decus; En, jam prodit splendore virtutum, ac scientiarum, Ecclesiæ maximum Sidus; radiis errorum caligine discutit, vitiorum tentbras pellit, hæresumque dissipat nubes, & mundum erudita luce collustrat universum, perpetuumque, quod mirere, diem efficit, suumque post occasum, in suis, etiam nunc totus refulget, scriptorum Pareliis, in quibus suam expressit ipse imaginem, nulla temporis aut oblivionis caligine obscurandam. O splendidam, quam aureis characteribus depictam in iis video, Sententiam! Quid ais Augustine? Quid radio descriptum unico, nobis legendum obiicis? *Mali serviunt bonis*, inquis.

[*A. Paraphrastico.*] Bonis malos servire, dicis? Quin potius Malis Bonos servire afferis? Sic enim comparatum videmus ab rerum ortu, ut vitio virtus oppressa serviat. Vera tamen sunt, quæ pronuncias. *Serviunt Bonis mali, quibus in rebus? &c.*

*C. H. R. I. A.*

**Q**UOD raro sapientia tenuit, id sæpè adulationi contingit, ut principum ædes furtim penetret, & regum alatur opibus, quibus exitium minatur. Ea scilicet est humanæ mentis cæcitas, ne dicam insaniam, ut quæ sibi obfutura sint foreat, ac penè veneretur.

neretur. [ *A Laude.* ] Tacitus itaque nulla unquam laude tacendus principes, cæteroque terrarum moderatores, quos efformare ad virtutis exemplar contendit, quæque regno sint jacturæ futura; sibi autem turpitudini edocet in primis assentatores; venale hominum genus; ut hostes infestissimos fugiendos admonet: cum ait pessimum inimicorum genus laudantes; ac si potentes allocutus hæc diceret. [ *A Paraphrastico.* ] Quis obsecro vos metus tenet, quicunque regna moderamini, & urbes: ut satellites, ut excubias, ut arma in præsidium congeratis, ne hostium impetu aggressi de solio vos deturbent, ac prorsus expellant. Heu miseri vos anguem in sinu fovetis, vos vestram amplexamini calamitatem, sædamque malorum coluviam sub blanda hominum specie in aulam recipitis; ii nempè, qui vos laudibus efferunt, atque impia, probaque facinora æquè commendant, ii vestra, non vos amant. ii regiam sortem, non regem sequuntur, atque adeò hostium infestissimi sunt vobis judicandi: hos cavete, hos à vestra prohibete consuetudine, & alloquio. [ *A Causa.* ] Nec miremur: pessimos inimicorum nuncupari adulatōres. Nemo est enim adeò mentis expertus, ut quem sibi adversarium sentit non timeat, ejusque consilia, fraudes, & ex insidiis pericula non evitet. Vim vi repellere licet, gladium cohibere gladio, dolos prudentia cavere, ni repugnare deceat, declinare

nare saltem datur, & cautè de fortunis, de fama, de capite dimicare, at in perditos homines, qui non vi, non ferro, non facibus, sed blanditiis, sed laudibus, animique demissione decernunt; omniaque divina, atque humana miscent ac penè prophanant, quisquæso sensus, quæ ratio, quod consilium dari potest? cum consilium insit fidelitati, lateant in blandimentis insidiæ, atque è laudibus emergat exitium. [*A Contrario.*]

Is vere diligit, qui cum amico, non cum amici fortuna loquitur, & pro se, pro tempore severa placidis verbis miscet, ut à rectæ virtutis semita deflectentem revocet à vitio, & primum in pessima quæque animum referat ad honesta. Nescit ille celebras amicitia, assentationem ignorat amor; & qui sua magis, quam amici commoda quærens, vel prava commendat, vel indecora tuetur, amici faciem exuit, personamque induit mercatoris. Medicus ægrum odit, si ferro parcat, si abstineat ab amaro, si nimis indulgeat. Scilicet non abhorret amicus à correctione, & si res exigat, censorem se præbet, aspera intonat, ominatur pericula ac ferè tubiicit oculis, ut à turpibus cohibeat, ad virtutem accendat. Adulatores verò, & cætera hominum dehonestamenta, cum ad alterius non modò sensum; sed etiam vultum, atque nutum convertuntur ad instar leopii brachia protendere videntur in ample-

xum, at protinus in arcum collector corpore vulnerant, atque veneno inficiunt. [ *A Similitudine.* ] Num eorum laudes jure sirenum vocibus comparari possunt viventibus illis nautarum Syrtibus, quæ carminum suavitate, & flagitiosis blanditiis delinitos homines rapiunt ad interitum, aded, ut quæ mulier formosa videbatur, se feram immanem ostendat, & quos ad sui amorem excitavit cogat ad necem? Neronem quis ad immanitatem rapuit, & cruorem sitire docuit? Quis è Principe Tyrannum fecit, virumque in feram commutavit? [ *Ab Exemplo.* ] Nemo sanè fuerat Imperatorum aut moribus sanctior, aut consilio prudentior, aut majestate gravior. Aded clemens, ut se litteras nescire cuperet, ne fontes capite dampnaret. Aded incorruptus, ut nulla unquam vi ejus integritas aut frangi, aut inflecti posset; aded prudens, ut meliorem nec Roma unquam senserit, nec cives optaverint; at vix in ejus animum sensum irrepsit adulatio, ut probitas in sævitiam, integritas in libidinem migraverit, ut urbem luctibus, ærumnis, cædibusque repleverit [ *A testimonio veterum.* ] Hæc sanè perpendit egregius ille rerum ab Alexandro gestarum scriptor Q. Curtius, horumque detestatus artes ait. Perniciosa adulatio, perpetuum malum regum, quorum opes, sæpius assentatio, quàm hostis ever-



evertit; & si enim plaudere, & si magis assentiri, quàm assentari videantur, insidiosè tamen agunt, & sub laudibus instruunt pericula, ut enim Ovidius asserit.

*Impia sub dulci melle venena latent.*

[ *Ab Epilogo.* ] Quis igitur sævissimus hostium, neget adulatores, qui non ferro, non palam, non armis dimicant; sed fraudibus depravatoque ingenio conantur evertere imperia, mores corrumpere, æquitatem labefactare? aut quis adeò sit mentis impos, ut personatos hos proditores in suas admittat ædes, foveat in contubernio? nos saltem, quos adulatorum mala non latent; hanc urbium pestem pro viribus evitemus; & si quando blandas nos voce petant Taciti sententiam memoriæ repetamus: Pessimum inimicorum genus laudantes.

*Habes hic duodenos Cbria exordiendæ modos, totidemque Encomia; quorum nonnulla si forte cuiuspiam prolixiora videbuntur ad suum judicium, meam quoque sententiam adscribat, etsi consulte, hoc etiam in genere in gratiam Candidatorum luxuriare placuit, habent enim collectas unum in locum, multiplices laudum formulas, quarum varios in usus non rarè indigent. Ut autem dicam hac in re, quod sentio; hujusmodi Cbriarum Exordia, ed aptiora mihi videntur, ad dictionem reliquam quo paucioribus sunt comprehensa verbis. Quid enim opus est sic excurrere in laudem auctoris cum non de illo habendus sit sermo? Idcirco*

*circû obiter tantûm perstringere illius laudes  
mallem, iis ferè similibusque formulis.*

*Breviora Cbriarum Exordia.*

I.

Quæ splendidior unquam, floridiorque  
sententia ab hominum sapientissimorum  
ore dimanavit? Quæ cogitatio subtilior,  
concinioribus expressa vocibus? Quis animi  
sensus argutior, literis mandatus illustrio-  
ribus? Quod acutè dictum insignius, ele-  
gantiori explicatum verborum contextu,  
quam quod Romanorum omnium, imò  
etiam omnium gentium eloquentissimus  
Cicero paucis hisce voculis est complexus.  
*Improbo bene esse non potest!*

II.

Potuitne egentissimus, simul & locuple-  
tissimus ille mortalium; ille rerum huma-  
narum contemptor, calcator ille fastus, &  
arrogantiæ, ridiculus ille, admirabilisque  
Philosophus, ac derisor Diogenes, potuitne  
inquam quicquam profari verius vel inge-  
niosius, quam cum interroganti cuiquam  
quodnam sibi videretur sustinere terra gra-  
vius onus, *Indoctum hominem* respondit.

III.

Quàm sapienter clarissimum Hispanici  
Parnassi lumen, & ornamentum Seneca, in-  
genii subtilitate nulli secundus, sententia-  
rum gravitate inferior nemini, tragici ma-  
jestate carminis, omnibus facile Superior di-  
vinum

vinū, ac mirabile hoc effatum pronuntiavit:

*Qui non vetat peccare, cum possit, jubet.*

## I V.

Nihil veritati convenientius, aut ad legentium profectum utilius exarare potuisti Properti suavissime Poetarum; Umbriæ quæ te tulit illustre Sidus; Italiæ quæ ingenii tui comitatem mirata est, insigne Decus: Dico iterum, nihil immortalī mandare chartæ potuisti ad morum institutionem perfectius, quàm hunc versum: *Imperat, baud servit possessa pecunia cuique,*

## V.

Audite Pueri, ac Juvenes, qui turpissimas editis, cane pejus, & angue voluptates, audite, quid vobis accinet Ovidius, Poetarum ille Dux, & Antesignanus, qui ingenii laude singulari sempiternæ memoriæ nomen commendavit suum, omnium scriptis, & prædicationibus exornandum *Est Venus in Vino*, inquit Venerem averlāmini, vinum respuite.

## VI.

Quid arbitraris, purissimæ Latinitatis summe Princeps, Comitorum excellentissime, disertorum elegantissime Terenti, qui comitate morum, amœnitate dictionis, ac sententiarum cupediis, capis oculos, animosque retines, mira que voluptate reficis? Quid arbitraris? *id arbitror*, inquit, *apprimè in vita utile esse, ne quid nimis.*

## VII.

Quoties Sallustii, historicorum omnium,

quæque vox est quoddam quasi Totum ex multis partibus compositum, hæ partes, convolutæ ac complicatæ, permistæque sunt, latetque sub trium illarum vocum involucris. Evolve, atque explica singulas, & incipe si vis ab ista.

*Amor.*

Habetne partes vox hæc, Amor, quas explices? Nullas quidem habet veras, neque enim res est corporea, habet tamen quasi partes, Definitiones nimirum varias, quæ sic convenire possunt, & ex quibus coalescit, tanquam ex partibus. Quærendum igitur erit, quid sit Amor, & ab ejus effectibus, hæ tibi Definitiones occurrent.

Amor, rapax illa cordis illecebra, invictus ille Tyrannus animi, ille motuum Concitator, & intestinarum perturbationum Incensor, fatalis illa Fax humanæ mentis, insidiosa illa Siren, suavis ille Tormentor, blandusque Carnifex, &c.

*Vincit.*

Quid est, *Vincit*? hoc est, pellicit, irretit, implicat, ferit, vulnerat, affligit, proflernit, arma eripit, spolia detrahit, catenas injicit, tradit in servitutem, carceri mancipat, dominatum exercet, ad suum nutum, & arbitrium torquet, versat, inflectit, sui juris efficit? Quid?

*Omnia.*

*Omnia*, hoc est, Hominem ipsum, totum corpus: animum, sensus, omnes facultates ani-

animi, mentem, memoriam, voluntatem: Nam simul ac hominem devincit amor, quid facit? Corpus totum sibi devincit, oculos dirigit in rem amatam, aures advertit ad illius laudes, & iussa, indit pedibus celeritatem; ut feratur quod imperat, manibus addit solertiam, ut famuletur, ori venustatem, ut placeat; cor succendit, ut amet mentem occupat, ut de illa nunquam non cogitet, voluntatem inflammat, ut ejus desiderio tota ardeat.

*Omnia* vincit; id est: omnes omnium ætatum viros ac fœminas, puellas, adolescentes, senes decrepitos, omnium conditionum, tam plebejos, quam patritios, subditos quam principes, pauperes æque ac locupletes, milites ac Duces, captivos & liberos, togatos & sagatos, urbanos & agrestes, robustos & imbelles, eruditos & imperitos, Singula jam recense. Viros Amore effeminat fœminis virile robur ingenerat, puellis ingenium, adolescentibus ardorem, senibus robur, vigorem decrepitis: plebejos exehit, patritios deprimit, inopes ditat, divites expoliat, milites exarmat, duces ducit in triumphum, captivos in libertatem, liberos in servitutem asserit, fortes frangit, inermes roborat; potentiamque Regibus creptam impertit subditis.

*Omnia* vincit, hoc est, fortunæ ac naturæ Dona, & Dotes animi, divitias, honorem, nobilitatem, pulchritudinem, robur, sapientiam;

tem; Artes omnes, disciplinas, scientiam; Virtutes omnes, sapientiam, justitiam, fortitudinem, temperantiam, pietatem sibi subjicit, suo imperio obnoxias reddit.

*Omnia* vincit, nempe difficultates, quæ ipsi opponi possunt: obices, claustra, montes, arces, carceres, vincula effringit, perumpit, tollit, eludit, superat, ridet. Et pericula quoque, terrores, ærumnas, molestias, ægritudines, mortem ipsam, mala omnia vincit.

*Omnia*, nimirum omni in Loco, rure ac domi, intus, & foris, terra & mari, in sylvis & in urbibus; in privato & publico, sacris ædibus & profanis, in tuguriis, & palatiis, occultis in locis, & in patentibus, munitis, & apertis, ubique denique vincit Amor.

*Omnia*, omni videlicet Tempore, omni ætate, tempestate, de die & de nocte, manè, & vesperi, quacunque die, hora quolibet quovis momento.

*Omnia*, scilicet omni modo vincit amor armatus & inermis & dolo & aperta vi, irreptus & irruens, ex improvviso, & ex destinato, sincerè se gerens ac simulatè, fallaciis, & blāditiis, precibus ac minis, laudibus, & conviciis, objurgando, & observando, muneribus ac vulneribus, aspectu, voce, silentio, gestu, risu, lacrymis, oculis, osculis, acerbitate, ac suavitate, odio & benevolentia fugiendo, & insectando.

Vides hanc unam vocem, *Omnia*, explicatam

catam quantam rerum segetem præbeat , non ad unam certè Chriam, sed ad implendum volumen integrum. Ponamus jam alia Exempla diversi generis, ne existimes, hoc solummodo dilatarì posse, non sensis fœta, ut illud, sed multò jejuniora.

### AUDACES FORTUNA JUVAT.

Ternæ illæ voces similiter exponendæ sunt haud ab simili ratione.

#### *Audaces.*

Qui sunt Audaces? Ii sunt, qui periculis non terrentur, qui discrimini obijciunt caput, qui nec vulnera, nec mortem exhorrent, quos nullus timor dejicit, nullus adversæ fortunæ casus remoratur? Qui nunquam pallent, nunquam formidant, nunquam trepidant, nec diffidunt, neque desperant; Qui intrépido vultu, hostem aspiciunt, ejusque minas rident, ejusque tela temunt, eique nunquam terga vertunt, sed in illum potius imperterriti irruunt; Qui generoso incitati laudis impetu, illuc rapiuntur, ubi discrimen gravius, ubi periculum præsentius; Qui stimulati præclara gloriæ cupidine, si committendum prælium est, primi se in confertos hostium cuneos immittunt; si vi expugnanda munitio scalas admovent, primi mœnia scandunt, in hostica transiliunt castra; Qui læsi, non recedunt loco; deserti non respiciunt fugam: prostrati, non concidunt animo: Tales.

Dea illa , tametsi cæca, volucris, inconstans , anceps, dubia semper, ac varia .

*Juvat.*

Hoc est, periculis tutos, armis invictos , & malis infractos tuetur, servat, defendit, protegit, roborat, animat, urget, in hostem incitat, obices amovet, labores levat, discrimina tollit, tela repellit; eis iter ad victoriam sternit, & arcus triumphales erigit, laureasque texit coronas, & immortalis gloriæ triumphos adornat .

*Unum adhuc sumamus exemplum .*

Donec eris felix, multos numerabis  
Amicos.

Sententia hæc duobus tantum constat membris 1. *Dum felix eris* 2. *multos amicos numerabis*. Sic autem utrumque diffundam; quærendo, qui sit esse facilem; deinde quid sit, *numerare multos amicos* .

*Donec eris felix .*

*Esse felicem*, est. 1. fortuna uti prospera, 2. opes amplas possidere. 3. honores ac dignitates obtinere . Hoc igitur modo illud expones, per synonymorum congeriem .

Quandiu fortuna respondebit optatis tuis, votisque suffragabitur, & voluntatibus obsecundabit, tibi que fluent ad arbitrium omnia, & nutu tuo cuncta pendent . Quandiu florentissimus eris rerum tuarum status, nullum tibi infortunium accidet, felicitate tibi præferri nemo poterit:



iis vel ornamentis, vel præsiidiis affluens, quibus majora esse nulla possunt, nihilque eorum desiderabis, quæ ad benè, beatèque vivendum requiruntur.

Quandiu afflues divitiis, maximæ tibi facultates erunt, omni copiarum genere abundabis, omnibus fortunæ muneribus, egregiè ornatus eris, & ab re familiari paratissimus; Quandiu lauta in domo habitabis splendide, sumptuosa tibi erit suppellex lucebunt pretiosis aulæis cubicula, abacus radiabit argento, mensa exquisito semper ciborum apparatu instructa fuerit, & arcas auro refertas possidebis.

Quandiu gloria circumflues, nominis tui memoria celebrabitur, auctoritate valebis, florebis gratia, eximiis fulgebis honorum titulis: Quandiu summum obtinebis atque altissimum civitatis gradum, eaque geres, quæ in republica putantur amplissima; Tandiu.

*Multos numerabis amicos.*

Hoc est innumeros invenies, qui se tibi addictos obstrictosque profiteantur, qui singulare suum polliceantur studium in omni genere officii, quod ad gloriam & ad rem tuam spectet; qui palam prædicent, nullum pro te laborem, nullum se onus recusaturos, qui quæcunque tibi grata esse viderint, omni cura ac diligentia complectantur. Occurrent tibi frequentes cum descendes in publicum, deducunt te, stipabunt  
latus,

latus, honorificis te verbis excipient, salutarunt comiter, amplectentur, venerabuntur, laudibus efferent à te stabunt, tuas partes suscipient; ad tuas rationes se adiungent, sua omnia studia tuam ad dignitatem conferent, omnem industriam tibi dicabunt, se ubique strenuos præbebunt tui defensores, &c.

Jamne intelligis, quàm facile dilatari possit quævis sententia; quod enim in his tribus exemplis à me factum est, idem tibi faciendum erit in cæteris. Non quod Locutiones illæ variæ ac synonymæ coacervæ sint, eo, quo feci modo; id enim esset puerile ac nugatorium: sed temperanter & cum delectu usurpandæ, prudenterq; disponendæ erunt. Multa verò congeffi idcirco unum in locum synonyma, ut advertas quanta sit ubertas materiæ, quanta locutionum varietas, & abundantia; è quibus cum componenda Chria est, aut quævis alia Amplificatio, resecanda sunt inutilia, & adhibendus figurarum ornatus, ut exemplis mox ostendemus; ad quæ priusquam descendamus pauca dicamus de reliquis Chriæ capitibus.

## C A P U T V.

*Transitiones, ad connectendas Chriæ Partes.*

**S**ubjungo jam cōmunes quasdam Transitionum formulas, quibus singula Chriæ

Chriæ capita copulentur inter se. Scio, quòd alibi monuimus Transitiones hujusmodi, vix sub artis præcepta cadere, sed ab ipso, quod tractatur, argumento deduci naturaliter; non tam finem dicentis aut scribentis solertia. Ne quid tamen hac etiam in re desideres; nonnullas attexam, quæ omni fermè argumento convenire possint. Sumamus hanc sententiam exempli gratia.

### ARDUA EST AD VIRTUTEM VIA.

*Transitiones, à Paraphrastico ad Causam.*

Quod si hujusce rei causam ex me quæras: dicam, arduam idcirco ac difficilem esse viam virtutis; quòd, &c.

Rogas, undenam hæc difficultas oriatur? At nescis, non aliam assignari causam posse; quàm quòd, &c.

Sciscitaris ex me causam hujus difficultatis? Accipe. Ideò mihi videtur via illa difficilis; quòd, &c.

Nec mirum est, virtutis iter, plenum esse laboris ac molestiæ; Nam, &c.

Sed quid miramur, quòd via ad Virtutem ducens, tam incommoda; & adeò impedita sit? Etenim, &c.

Atque hæc hujus difficultatis mihi videtur ratio quòd cum natura proclives sumus ad vitia, &c.

*A Causa, ad Contrariorum.*

Facilis contra, lubricaque ad vitium  
via

via est. At verò via qua ferimur ad vitia ita commoda est, ut duce nequaquam sit opus.

Contrà verò, quid facilius quàm labi ad vitia. Quàm contrà jucundum & amænum est vitiorum iter!

Nullum è contrario expeditius, & facilius iter est quàm quod ad vitia non ducit, sed præcipitat hominem.

Sed, ut abrupta, plenaque laboris, de virtutem via est; ita planissima, plenaque voluptatis est rapimur ad vitium.

At, ò miserrimam conditionem nostram! quantùm molestiarum experimur, cum ad virtutem tendimus, tantùm percipimus jucunditatis, tuentes ad vitia.

Atque utinam, æque saltem incommoda esset ad vitium, atque ad virtutem est via! Verùm nihil simile, nihil habere commune possunt, virtus, & vitium, cum labore ad illam, cum voluptate ad hoc contendimus.

*A Contrario ad simile.*

Quemadmodum enim, Ascensus difficilis esse solet; tantoque difficilior, quantò infirmiores sunt vires ascendentis, & asperior collis est. Ita, &c.

Non secus ac autem, Haud aliter verò, quàm molestissimas res scientiarum rudimenta perdiscere. Sic, &c.

Et verò, quod in arte Architectonica usu venit, ut magnus sit in edificando labor; in destruendo verò nullus; Similiter, &c.

Vide quanta cura, quanta contentione

Ima-

Imago pingitur, quæ momento lacerari, delerique potest; Idem accidit, &c.

Sic non sine ingenti labore, ac periculo Adamantem è rupibus inaccessis. Aurum è terræ visceribus, Uniones è fundo maris eruuntur.

*A Simili ad Exemplum.*

Testes sunt Heroes illi omnes, qui vitam in ærumnis consumpsere, ut virtutem adipiscerentur.

Testes appello illos omnes, qui sanguinis pretio thesaurum illum sibi compararunt.

Testes estis; Vos appello, illustres viri, scæminæque; Te appello Alexi, Te Carolomanne, qui ut virtutem, &c.

Experti sunt laborem virtutis, Magnus ille Athanasius, Chrysostomus, Basilus, aliique innumeri, &c.

Sensistis hunc laborem, Doctores incliti, invictissimi Martyres, celeberrimæ Virgines, Dum &c.

Quid exemplis opus est, ad id stabilendum, quod dicimus? Quis enim nescit, intolerabiles ærumnas eos pertulisse, qui virtutis iter sequuti sunt?

*Ab Exemplo ad Testimonium.*

Nec verò aliud significare voluit ipse Christus, cum diceret, angustam esse vitæ portam.

Idem sentiebat ille, qui dicere solebat, Deos nobis omnia laboribus vendere.

Quid aliud innuere Pythagoras voluit,

Vir-

Virtutem dicens cum labore semper esse conjunctam?

Audite quid in eandem sententiam Horatius scripserit: Nihil sine magno vitæ labore dedit mortalibus.

Hoc ipsum declarare voluisti, Sophocles cum assereres, sine labore nihil homini bene unquam succedere.

Sed quid plura disputo? Audiamus, quam præclare Cicero, eandem hanc sententiam suo testimonio comprobavit.

*Epilogorum Formula.*

Quæ cum ita sint, quis jam asserat arduam esse ad virtutem viam; rem esse plenam negotii, &c.

Quæ cum ita se habeant, neminem esse puto adeò stupidum, aut à ratione tam malè alienum, qui virtutis studium, &c.

Itaque fateamur necesse est, nihil ab Scriptore illo verius dici potuisse, quam cum asseruit, arduam esse, &c.

Et erit deinde, qui in dubium revocare audeat, quod tot rationibus stabilitum est? videlicet arduam, &c.

Imponamus orationi clausulam, assensumque præbeamus manifesto huic oraculo; virtutis studio difficilius nihil esse, &c.

Sed tempus est, ut institutæ orationis expediamus exitum, iisdemque verbis, quibus initium dicendi sumpsimus, finem dicendi faciamus.

Hæ porro Conclusionum, seu Epilogorum

rum formulæ vulgares sunt, & communes argumentis quibuslibet; At concinniores erunt, & aptiores, quæ ab ipsa Chriæ materia seu ab ipsis, quod ajunt, Causæ visceribus ducentur; ut variis exemplis patebit paulò inferiùs.

## C A P U T . VI.

*Exempla Chriarum.*

**T**Ria Chriarum genere esse diximus: Aliæ in verbis, quæ *Verbales*. Aliæ in Actione alia quæ *Activæ*. Aliæ partim in Verbis, partim in Actione sitæ sunt, quæ *Mixtæ* vulgò dicuntur, Exemplum afferamus singularum: earumque, (primæ præfertim ac secundæ) ita singula prosequamur capita, ut quæ simpliciter primùm, ac fudi stylo delineata fuerunt, eadem paulò ornatiore pertexamus. Sic nimirum faciliùs animadverso, inter utrumque scribendimodum discrimine; advertes faciliùs, quid imitandum sit, & quid evitandum.

## C H R I A V E R B A L I S

In hæc regis Salomonis verba,

*Stultorum infinitus est numerus.*

[ *Ab Encomio.* ] Multa quidem sapienter dixit Salomon, sed nihil sapientius unquam protulit, quam cùm pronunciavit. Stultorum infinitum esse numerum.

*Ita ferme Grammaticus; idipsum autem Rhetor sic eloquatur.*

Sapien-

Sapienter quidem illustrissimæ ille Rex qui ob eximiam, ac divinam, qua mortales universos præcelluit, laudem Sapientiæ, clarissimum Sapientis nomen adeptus est, & quasi proprium, sibi quodammodò totum vendicavit, Sapienter, inquam, Salomon, dixit, scripsitque plurima, æternis laudum prædicationibus extollenda: At nihil, mea, quidem opinione, sapientius, unquam, nihil magis consentaneum rationi, ac veritati congruum prolocutus est, quàm cum stoliditatem hominum, stultitiamque secum ipse reputans, divino incitatus spiritu afflatusque cœlesti numine, *Stultorum numerum infinitum esse* pronunciavit.

*Expende quæso, quantum duo illa Encomia inter se discrepent.*

[ *A Paraphrastico.* ] Ita est; omnes ferme homines desipiunt; Et nullus est locus, in quo stultos, non invenire liceat: Verè quippe insani sunt ac dementes, qui vitium virtuti præferunt, & terram cœlo, Deumque rebus creatis anteponunt; Atqui infiniti sunt, qui hoc stultitiæ genere laborant; Ergo Stultorum infinitus est numerus.

*Nuda est hæc Expositio, sic autem ornamentis Rhetoricæ vestienda, & commendanda est.*

[ *Allegoria.* ] Ita est mortalium plerique cerebro laborant; eoque graviore tenentur morbo dementiæ, quò sibi quisque præ cæteris videtur esse mente saniori [ *interrogatio.* ]



gatio. ] Quò enim ibis, oro te, ubi non offendas infanos? Quem penetrabis orbis angulum, in quo non verlentur amentes? Quæ illa regio aded felix, & salubris cœli temperie, in qua desipientes non invenias? [ *Distributio, & Enumeratio locorum omnium.* ] Urbes percurre; stolidis redundant; fora circumspecte, fatuorum conventu fervent; perlustra vicos, pervade compita; scatent confertissima turba delirantium: obi domos, subitabernas, aulæ, cubicula, conclavia; [ *Expositio seu commemoratio.* ] Deus immortalis! quàm ingentem stultorum ac stultarum numerum ibi deprehendes! quot intus, & foris, domi ac rure, in villis, & in oppidis, in publico, & in privato stolidos stolidasque cernes! quam innumerabilem omnis ætatis, & conditionis, malè capitatorum multitudinem, ubique reperies! Nempe eorum partem maximam; quos singulari studio, vides, suis studere commodis, captare delicias vitæ, rerum suarum diligentem gerere curam, susceptaque negotia cautissimis consiliis ad optatum finem perducere. [ *Similiter cadens* ] illos inquam, quos vulgus hominum, ut prudentes laudat, extolli ut providos, miratur ut acres, & ingeniosos, ut sagaces sapientissimosque deprædicat: hos, Rex ille sapientium, [ *Congeries verborum,* ] longè imprudentissimos, inconsideratissimos, expertes sensus,

sus, & iudicii ac prorsus insanos, stultissimosque appellandos esse jure contendit.

[ *Interrogatio & Subjectio, & Antitheses.* ]

Quid? non appellabuntur insani, qui honestati turpitudinem, libidinem moderationi, virtuti vitium, gloriæ dedecus, cælo terram, caduca omniaque bona veris ac sempiternis anteponunt? quis non antepōnit? Non desinere dicam, qui neglectis cœlestibus liquidissimisque beatæ vitæ gaudiis, obscænas voluptates, quibus nulla capitalior pestis est, votis omnibus consecantur, & expetunt; quis non consecatur, & expetit? Non stultos vocem, qui momentanea delectatione, æternos sibi creant cruciatus? qui proculcata ratione vitam addicentes intemperantiæ, voluntantur in turpissimo cœno vitiorum? qui curas omnes ad id referunt, [ *Repetitio cum Distributione,* ] ut gloriæ fumos aucupentur, ut vanitati serviant, ut obsequantur avaritiæ; ut luxuriæ sese mancipient, improbiissimisque cupiditatibus obsecundet? [ *Interrogatio cum Repetitione* ] quis hoc vivendi genus non sectatur? [ *Allegoria.* ] quis in hoc dementiæ mari non navigat? quis ad illos insanix scopulos, non impingit; quis in his stultitiæ syrtribus, miserandum, non facit iudicii, mentisque naufragium?

*Videsne discrimen utriusque Paraphrasis.*

[ *A Causa.* ] Causa hujus stultitiæ tam latè patentis, est quia plerique, non rationem

nem sequuntur ducem, sed cupiditates quibus abripiuntur ad insaniam illam vivendi rationem.

*Hanc causam sic expone.*

[ *Allegoria ejusdem rei.* ] Nimirum, Navigationis suæ ducem, paucissimi sequuntur rationem; quæ cum deberet in puppi sedere, clavumque moderari, & vitæ cursum regere, exturbata per summum scelus, & contumeliam, in sentina vitiorum demersa jacet; in ejusque locum effrænata. [ *Allegoria.* ] Cupiditas irruens tractat gubernaculum, remos affectionum agit, expandit vella vitiis, & furentibus animi perturbationibus, fluctibusque incontinentiæ velanos exponit; donec exhausti intemperantiæ voragine, aut abrepti æstu reciprocante insanarum libidinum, ad unum omnes in ima tartara devolvantur. Contra Sapientium numerus oppidò exiguus est.

*Hanc lineam ita dilatabis.*

[ *A contrario.* ] Apparent interea, tot inter insipientes, naufragos, rari Sapientes. [ *Allegoria* ] nantes in vastissimo procellosæ hujus vitæ oceano. [ *Ejusdem continuatio.* ] Unus Ulisses numeratur: & unus Orpheus, qui Sirenium ferali cantu non pelliciantur in fraudem, qui Circei illecebris non deiciantur de statu mentis, qui Scyllas, & Charybdes furentium cupiditatum incolumes prætervehantur, & felicitatis tene-

ant

ant portum. Hos enumerare perfacile cui-  
vis est cùm perpauci sint. At fluctuum,  
quis inire numerum valeat?

[ *A Simili.* ] Sicut inutiles lapilli, &  
plantæ nullius pretii innumerabiles; ita  
infiniti sunt Stulti.

*Ornatius sequentia præcedentibus hoc modo  
connectes.*

Citius equidem fluctuum volumina, quos  
ciere tempestas solet; aut arborum folia,  
quæ frigus hyemale deducit; aut lapillos,  
quos littoribus allunt undæ, quàm fatuos,  
quàm deliros, quàm aversos à ratione di-  
numerem. Ita enim natura malignè com-  
paratum videmus, ut præclara quæque  
perrara sint, vilissima passim occurrant:  
Sic saxis ignobilibus, silicibus loca omnia  
cernis obsita: Sic inhorrescunt vepribus,  
infelicibusque plantis opprimuntur agri:  
Sic noxiarum aut inutilium bestiolarum  
incredibilis vis est, malaque sunt innume-  
ra, & innumerabiles mali; adeoque infi-  
nitus Stultorum numerus.

[ *Ab exemplo.* ] Exemplum dabit Noe-  
mus, qui inter infinitos amentes solus Sa-  
piens inventus est.

*Hoc exemplum sic explica, & sequens ca-  
put cum superiore ita conjunge.*

At, non nunc primùm infiniti esse cæ-  
pere malefani: Ab rerum incunabulis, eo-  
rum numerus crevit in immensum; & ita  
crevit ut ex innumeris hominibus, orbe

jam pænè toto disseminatis, variosque terrarum tractus incolentibus, unus dumtaxat inventus fuerit Noemus, qui divino suffragio, Sapientis laudem adeptus sit quique extorrem terris Sapientiam exceperit in Navim fatalem illam divino jussu à se fabricatam, & à communi illa alluvione, rerumque omnium naufragio salvam incolumemque servavit.

[ *A Testimonio veterum.* ] David Rex, & Propheta, Salomonis filii sui sententiam, sua confirmavit, cum dixit:

Ne unum quidem inventum esse qui sciret.

*Hoc testimonium, sic adhibebis elegantius.*

Id videras Regum sanctissime, Salomonis sapientissimi multò Sapientior Parens; hauserat ille à te disciplinam illam coelestem, divinamque Philosophiam; Audierat te profectò, tum perspecta mira paucitate sapientium, ad incredibilem delirantium numerum cogitationem convertens; divino mentis instinctu concitatus exclamares attonitus ac stupens: Non unum quidem ex hominibus omnibus, ab rerum omnium inspectore Deo esse deprehensum, qui sciret, qui rectam virtutis viam sequeretur, qui vitam ageret homine dignam. *Omnes declinaverunt, inquiebas, non est intelligens, non est usque ad Unum.*

[ *A brevi Epilogo.* ] Igitur, sapienter dixit

dixit Salomon, Stultorum infinitum esse numerum.

*Sed paulò concinnius sic perorabis.*

Quæ si vera sunt, ut verissima esse nemo sanus est qui dubitet, Annon sapientissime Salomonem asseruisse fatendum est: Stultorum hominum, tantam esse ubique gentium multitudinem, ut eos enumerare nemo possit.

## CHRIA ACTIVA.

*S. Franciscus, factis concionaturus non verbis Urbem totam obit cum socio.*

*Singularum hujus Chriae partium proponam artificium, quo illud faciliùs imitère. Exordiamur ab Encomio, quod hac una linea circumscribi potest. Silete omnes Franciscus se ad concionandum comparat. Vis hac lineam paginam implere? Terna illius partes diffundendæ sunt. Prima; Silete omnes; ab Enumeratione partium eos compellendo quibus imprari potest silentium. Secunda, Franciscus; explicando quis ille sit per varias Definitiones & Effectus. Tertia: Se comparat ad concionandum: exponendo ab Adjunctis, quid sit, se comparare: Vide jam tres ipsas Partes, eo quo dixi modo amplificatas in hoc Exordio, quod idcirco trifariam divido adjetis his notis 1. 2. 3.*

1 Silete fori Reges, Oratores favete linguis, obmutescite Rhetores, deprime vocem Declamatores, tu quoque Eloquentia triumphatrix animorum blandissima

conticesce; [ *Ab Encomio.* ] Novusecce surgit Orator ad dicendum, cui non Curia Romana parem, non similem Lugdunense vidit Athenæum. Convenite populi huc, remotissimæ nationes accurrite, confluite ad audiendum ex omni regione gentes universæ. 2. FRANCISCUS, ille Religiosæ paupertatis assertor inclytus, generosus ille contemptor opum, & inopiæ cultor opulentus, ille verus, & infractus Atlas, qui humeros collabanti orbi Christiano supponit, qui novo, & inusitato genere pugnæ bellum indixit voluptati, qui tela in se vertens, secumque ipse pugnans, conjuratas Averni copias convertit in fugam, spolianisque se rebus omnibus, spoliavit virtutis hostem, & abiiciens caduca vanitatis arma immortalem de mundo victoriam reportavit. 3. FRANCISCUS ille, Orator extemporaneus è Duce factus invictissimo, concionaturus prodit è cellula, descendit in templum, scandit suggestum, orationem auspicatur; Erigite aures, adeste animis omnes, & attendite.

*Sequitur Paraphrasis, sed potius Explicatio actionis illius, quæ hujus Christi argumentum est; quamque tribus his verbis complector Franciscus urbem adit: Porro hæc Actio ab Adjunctis, & consequentibus amplificanda est. Adjuncta sunt, Francisci per urbem incedentis Silentium, ac Modestia. Consequentia verò civium Concurfus ad illum videndum*

dendum ipsiusque virtutis Admiratio, ac Veneratio, variis testata signis ut ex his licebit advertere quæ Encômio superiori sic attexo.

[A Paraphrastico.] Imò verò intendite potius oculos, & aspiciate. Usus aurium nullus in hac Concione futurus est, [Antithetice] quippe quæ silentio fieri debet non voce; factis, non verbis, exemplo, non sermone: votis, & orationibus, non rationibus, & argumentis. Quid expectaris? [Similiter cadens.] Non ascendit Franciscus pulp tum, sed descendit in publicum, non sacram subit ædem, sed totam obit urbem, neque manus movet ad gestum, sed immotas antepectus, modestissimèque tenet compositas: non circuit oculos sed demissos habet ac fixos humi; non pedibus supplodit, sed tacito æquabilique motu ingrediens, oppidi plateas, & vicos incessu pleno dignitatis obambulat. Nihilo tamen minus, ò rem inauditam, & incredibilem! etsi divinus hic Orator, verbum faciat nullum, neminemque vel alloquatur, vel aspiciat, susceptamque insistant viam, silens ac sine strepitu, quasi eloquio tornaret, ejusque voce personarent ædificia omnia, effundunt se foras omnium ætatum, & conditionum viri, fæminæque [Distributio partium] profiliunt è tabernis opifices, ex officinis milito- res, magistratus è curia, è foro judices, è cæcis matronæ, ipsique etiam è lectis ægroti, turmatimque ad audiendum, (iterum, hic



erro ) ad videndum, inquam Franciscum  
 convolant [ *Distributio virtutum.* ] modestia  
 suspiciunt incedentis, submissionem ad cœ-  
 los evehunt, squallorem habitus laudibus  
 exornant, patientiam demirantur, vitæ san-  
 ctimoniam sine fine prædicant: Nec verò  
 votis solum testantur conceptam animo  
 reverentiam; [ *Distributio effectuum.* ] Hi,  
 submisso corpore, venerationis ergò, hono-  
 rem habent transeunti, præcumbunt alii  
 ad ejus pedes, & impressa solo lambunt  
 vestigia: Illi contingunt manu trepida ve-  
 stis detritæ simbriam, ac furtim frustula  
 præcidunt: Feriunt alii palmis pectus: Alii,  
 oculos manusque ad sydera protendunt la-  
 crymantes, hi gaudio, illi dolore, commise-  
 ratione nonnulli. Sed quid hæc singillatim  
 commemoro: Ad studium, accenduntur  
 omnes, veræ laudis ac gloriæ, & torpentes  
 situ ac delitiis, ad salutarem. Dei metum,  
 æternæque vitæ cogitationem excitantur  
 aspectu Francisci, speique pleni vota faci-  
 unt, sibi gratulantes applaudunt. San-  
 cto, & abeunti vale dicunt, & vale dicentes  
 exclamant: O virum excellentem! ò in-  
 comparabilem, ò cœlo lapsum Oratorem!  
 [ *Antitheses* ] qui sic tacendo loquitur, qui si-  
 ne voce ita docet, qui sine vi nos ita movet,  
 qui sine minis ita terret, sic flectit sine pre-  
 cibus, ita sine stimulis incitat, sine impetu  
 sic suæ spectatores virtutis in cœlum rapit.  
 Interea totum peregit urbis circulum vi-  
 sanctus

sanctus suamque se refert in cellam: jamque limen attigerat, cum ad illum conversus comes: Quo te, mi pater agis? inquit: ubi illa Concio quam te in egressu habiturum esse dixeras? Cui ille Concionem inquit, peregrimus, frater, atque ex animi sententia: non voce quidem peroravimus, sed exemplo.

*Causa jam subjicienda utilissima bujus ac præstantissima Concionis, quod scilicet: Exempla efficaciora sint ad persuadendum quam verba. Hæc autem Causa per Expolitionem ac Congeriem sententiarum idem ferme significantium, dilatari ita potest.*

[ *A Causa.* ] O Concionem præclarissimam, o tacitam simulque eloquentissimam orationem! Perorasti, Francisce, perorasti sane feliciter, uberrimumque ex oratione illa tua fructum collegisti, persuasisti, quod intēderes [ *Expolitio seu Commoratio seu Congeries sententiarum* ] tantoque facilius, quanto ad persuadendum disertior Manus quam Lingua est: & ad expugnandos animos, telum potentiùs, machinaque multò validior, Exempla sunt, quam Præcepta: His videlicet illustratur humana mens, illis incenditur: hæc indicant, illa etiam incitant: hæc vocant, illa trahunt: hæc delicatas, armatas illa preces adhibent: hæc denique suadent, illa persuadent. Quod enim sæpissimè contingat, ut multi sint, qui ad honestatem vitæ impelli nequeant, vel inde fit,

fit, quod virtutis viam difficiliorem putent ac nimis arduam: vel, quod eximiam illius speciem non satis habeant perspectam. Vis o qui oratoriam profiteris artem, vis geminum illud amovere impedimentum? vis arduam illam complanare viam; facillimamque reddere ac tritam? præi exemplo, sponte sequentur alii: facili hortare prius quam præceptionibus, convinces mentes omnium: coelestem virtutis formam, ne verbis deinde tantum, vix enim auribus animus credit, sed eam moribus exprime, & velut sub aspectum pone, statimque spectantium oculos, animosque rapies in amorem & admirationem divinæ pulchritudinis, suavissimaque illius possidenda flamma, corda succendes.

*A contrario nunc ostendendum, verbis non aequè inflecti homines, ac Exemplis, invehendo in Oratores illos, qui cum non faciant quæ dicunt, delectant quidem aliquando, at nunquam movent. De cæteris capitibus nihil erit, quod interjiciam.*

[ *A contrario.* ] At vos, Oratores vanissimi, qui profluente verborum volubilitate, inanique circunductione sententiarum, affectatis artificiosæ orationis delicias: qui eloquenti lenocinio, & illecebrosa loquacitate, titillatis aures imperitas, aliudque nihil aucupamini præter auram popularem, & famæ ramusculos, amabo dicite, qui motus animorum, quæ conversiones,

nes, quæ immutationes voluntatum, quæ præclara facinora, quæ virtutum miracula, præclaras illas, quas habuistis, Conciones, solent subsequi? Meditatas orationes, adamussim exactas, & ad unguem politas afferitis domo, inscenditis deinde pulpita, pronuntiatis, inculcatis, vocem intenditis, obtrunditis clamoribus aures, ingenti vociferatione templa completis: At quo fructu operæ! vobis enim exardescantibus Auditor friget; vobis perstreptentibus oscitat, intonantibus obdormiscit, ac tum demum movetur, cum postquam perorastis abit, & soluta concione domum discedit. Quid ita? quia orationi vestræ mores non consentiunt; quia, quod sermone statuitis, actione revellitis; quia quod suadetis argumento, prævaricante vita refutatis.

[ *A Simili.* ] Nempe, non opimatur terra tonitruis, sed aquis: non fulgoribus lætificantur arva, sed imbribus: non sonanti grandine sitientes rigantur agri, sed leniter stillante pluvia: Sic, non verborum strepitu, non fulgentibus ingenii, sonantibusque sententiis, provocantur Animi, ad fundendas virtutum fruges, sed factis egregiis, sed exemplis. Vide quo Milites ardore irruant in hostem, quo furore irrumpant in obsesam urbem per everfa mænia. Cense tympanorum sonitu, clangoribusque buccinarum, illos incendi ad pugnandum? hallucinaris: Putas, hostium conviciis commilito-

num clamoribus, prælectorum cohortationibus inflammari? erras; Ipse est, ipse unus imperator est, qui sublimis in equo exercitum tenens manu gladium præit agmina, & manuum magis agitatione quam linguæ, hortatur ut sequantur: quis enim Ducem non sequeretur præeuntem?

[ *Ab Exemplo.* ] Ita est; Quis te non sequeretur præeuntem, Francisce, Maxime Dux Gaudiæ, Beatissime Borgia, cujus, hæc dum exaro, felicem in cælos ingressum anniversaria gratulatione concelebramus? Quis te non sequeretur? Quis illustri adeo sollicitatus exemplo sanctimonix, vestigia tua non premeret? Quis non imitaretur vitæ genus. Quis non incitaretur æmulatione tantæ virtutis? Concionabatur aliquando vir ille sanctus, extra urbem in planitie patentissima, ob incredibilem hominum turbam, è circumjectis oppidis confluentium, cumque non audiri posset à remotioribus, imò, nec intelligi, quidem à proximis, quod regionis linguam non calleret; fluebant tamen ab oculis omnium, magno cum pietatis sensu lacrymæ; nonnullique interrogati, quid lacrymarentur, quoniam quæ dicerentur, non intelligerent. Flemus, inqueiebant, quia sanctum Ducem concionantem intuemur. Flebant eadem sine dubio de causa Priburgenses, cum Petrum Gansium, clarissimum illud Germaniæ decus ac propugnaculum, senio jam laboribusque

con-

confectum, vix ut commovere se loco posset obsecrabant; tamen ut iniret pulpitem, aut, si minus evaleret ipse conscendere, pateretur saltem se in suggestum evehi: patiebatur vir humanissimus, & oblucri non ausus inferebatur in exedram; simulque ac ex edito loco, se conspiciendum præbuerat (nam voce, viribusque deficiebatur ad dicendum) commoti omnes, gravissimi hominis præsentia, & autoritate summæ virtutis, exemplo lacrymis ac suspiriis, laudibus & acclamationibus, muto Oratori suo plaudebant.

[ *A testimonio veterum.* ] Aded verum est, quod supra dicebamus, Leonis sanctissimi, maximique Pontificis confirmatum oraculo, *Validiora esse, inquentis, Exempla, quam verba & plenius opere doceri, quam voce:* (Ser. de jejun.) Aded nihil à Sancto Francisco fieri potuit sapientius, & ad persuadendum accommodatius; quam cum Exemplo modestiæ, reliquarumque virtutum concionaturus, urbem tacitus, adjuncto sibi comite, circuevit.

## CHRIA MISTA

*Diogenes, accensa Lanterna frequentissimo foro. Hominem quærit.*

[ *Ab Encomio.* ] Quid cum Lanterna illa tua quæris, Diogenes lepidissime bipedum? Quid investigas Doliaris philosophe sapientissime Nugator, illustrissime Morio?

Quid

Quid indagas, Mendicorum nobilissime, cum accensa illa Lucerna, ipsa meridiei luce, medio in foro frequentissimæ civitatis? Age responde, Tenebrio clarissime, quid investigas? Audite quid respondeat, joculari caput: **HOMINEM QUÆRO**, inquit. **Hominem quæris?** Tu tot inter homines, inquis hominem? Amplissimo in foro, innumerabili hominum ulterò citroque commearantium multitudinē celeberrimā, hominem conquiris? Quid? oculisne, an mente orbatus es? Quos intueris, umbrasne hominum reris esse, non homines? Quos incurfas homines esse putas? Qui te salutant, teque percunctantur, quid quæras, hos non homines esse putas? [*A Parap.*] Nō putat, ita est profectō, eos non homines esse putat, in quos incurrit, idcirco, clarissimo meridie, forum, vicos, domos, lustrat accensa face, iterque homines, quærit ab hominibus hominem non cuiusmodi obvios se nobis ubiq; dant, non quales quotidie cernimus, vanos, recordes, improvidos, inconsultos, vitiis deditos, sed prudentem, sed cordatum, sed temperantem, additumque virtutis studio quærit, ac sapientem. Quid enim autumas, tu, qui philosophi huius ridiculi consilium explodis, & responsum rides? Quem amabo, hominem esse iudicas? quem hoc illustri nomine dignum arbitraris? [*Quid non sit Homo.*] Eundē, qui felicitatem turpissimis in rebus

bus sitam existimans, nihil sibi expetendum putat, nisi quod corporeos sensus, inani aut obscæna delectatione permulcet? qui nihil cogitans de honestate vitæ, & officio rationis, eò fertur amens, quò voluptas allicit, quò libido rapit, quò cupiditas incitat. Eum tu hominem appellas, qui curas omnes suas ac cogitationes refert atq; cõsumit in coacervandis per fas, & nefas opibus, atque cumulandis arcis, ac proferendis latifundiorum limitibus; Hominem nominare audeas, qui in id unum incumbit, ut omnes umbras falsæ gloriæ consecetur, ut luxu diffuat, otio torpeat, epulis indulgeat, gulæ abdominique serviat, in omni voluptatum genere sese volutet, & immergat?

[*Exclamatio Ironica.*] Egregiam verò speciem, dignitatemq; Hominis, quem summus omnium Opifex Deus, præpoluit terrarum orbi, cujus imperio subiecit omnia, cujus causa, universam condidit mundi molem!

[*Quid sit Homo.*] Ille, ille Homo dicendus est, qui magnitudine consilii, tolerantia rerum humanarum, virtutibusque omnibus, ut mænibus septus spernit voluptates, refrænât libidines, coercet avaritiam, improbißimis dominis, dedecori ac turpitudini non paret. Ille homo est, quem effrænatus non impellit amor; non adducit odium, non extollit audacia, iracundia non accendit, letitia non effert, voluptas, & timor non frangit; qui nec molestia tabescit, nec mœrore

con-



conficitur, nec fatili gestiens alacritate deliquescit. Hic ille Homo est, quem Diogenes olim quæritabat, quemque ut facilius inveniret, lucernam accenderat.

[ *A Causa.* ] Hujus enim generis Homo, non est qui sit obvius; eo more qui vivat, perrarus est, accendenda idcirco tibi est Judicii lampas; mentis, non corporis solum aperienda lumina, ut eum discernas ab aliis. Externam quippe oris humani speciem plerique præferunt; at cupiditatis immoderate plusquam Circeo poculo, in varias mutati belluas, Vulpium induunt alii fraudulentam indolem, Luporum alii voracitatem imitaturi. Alii Equorum libidinem, Tigrium rabiem, tumorem Leonis, Serpentium virus, Asellorum stoliditatem, ac desidiam, levitatemque Voluctum, Pisciumque stupiditatem, ferinis moribus adæquant, ac sæpè vincunt.

[ *A contrario.* ] Tales, si homines indagas, lucernam haud opus erit accendere, nec obire fora, compitaque necesse erit, ubique tibi obviam contra venient, hujusmodi sine labore invenies infinitos, vel occlusis luminibus. At si verum inquiris Hominem, si optas reperire sapientem, sume lucernam, accende lampadem, teque Diogeni comitem adjuuge, omnesque perlustra plateas, percurre vicos omnes & domos, rimare viarum flexus, angiportus, & editus.

[ *A simili.* ] Mulieris instar amissam quæ-

quæritantis gemmam, quam habebat unicam. Quos enim illa non evertit domus angulos; quas non accendit faces? quos non perscrutatur recessus? neque enim contenta meridiano lumine, ipso in sole, lucernam admovet, Lapillumque unum, numerabiles inter lapillos, Unionemque unum; omnibus investigat locis, incredibili diligentia, sollicitudineque singulari.

[ *Ab Exemplo.* ] Longè tamen, Tu, majori diligentia, Deus Optime Maxime, *Scrutatus es*, non civitatem unam tantum *Hierosolymam in lucernis*, sed quinque urbes illas, non flagitiis minùs famosas, quàm claras incendio, quo deflagrarunt, unumque ut invenires in iis Hominem; non Lanternam modo unam, non solarem tantum adhibuisti lampadem, astrorumque omnium lucem, sed ipsos etiam inflammasi cum viribus universos incolas, & unum tandem quem quærebas Lothum; tot inter horribiles hominum larvas vix hominem nactus, ab illorum turpissimo avulsum complexu abstraxisti.

Lanternam, tu etiam, Regum sapientissime eundem in finem, credo, succenderas; cum perlustratis animo celeberrimis terræ plagis, oppidisque frequentissimis, exclamasti denique millenis de viris, unum tandem aliquando te reperisse, mulierum verò, ne invenisse quidem unam, ex omnibus.

Ite jam, & Lanternarium irridete Diogenem, quod in confertissima hominum turba, hominem quærat. Sanè Lanterna illa sua, si minùs, quod investigabat, invenit; non mediocrem certè quidem sapientiæ laudem reperit maximamque sui Judicii, lucem; Lanternæ suæ luce patefecit.

## C A P U T VI.

## C H R I A R U M.

*Argumenta varia.*

**F**Acturum me putavi rem æquè Præceptoribus gratam ac Discipulis, si quidem hic Chriarum Argumenta subnecterem, materiamque rudem, & impolitam subministrarem; in qua, ipsi deinde Tyrones elaborarent per otium; Duodecim ergo delineo, quarum sex primæ Verbales, quatuor sequentes, Mixtæ erunt; duæque ultimæ Activæ.

## I. CHRIA VERBALIS.

Fiet in hanc sententiam.

*In via Virtutis, nulla est via.*

[*Ab Encomio.*] Ovidius laudabitur ab ingenii magnitudine, ejus tamen miserando vicem, quod laude illa non sit usus ad virtutis studium, cujus summam potentiam admiratus; exclamat: *In via virtutis nulla est via.*

[*A Paraphrastico.*] Sententiæ hujus sensus est: nihil esse adeò difficile; quod homo

mo virtute præditus præstare non possit. Difficultates hic singillatim recensendæ sunt, quæ Virtuti opponi possunt; cuiusmodi sunt, labores, ærumnæ, jacturæ bonorum ac nominis, morbi, mors denique; & ostendendum, eas omnes difficultates egregiè à Virtute vinci, adeoque faciliter, ut quod labores graviores sunt, eò majorem colligat gloriæ legetem, & uberiores materiam laudum.

[ *A Causa.* ] Cur nulla est via tam difficilis, quæ sit Virtuti invia? Cur nullus labor est tantus, quem superare Virtus non possit? Causa duplex esse potest. 1. Quia virtutis vires infinitæ sunt 2. Quia cum Virtus laboribus excitetur, acuat, perficiatur, & splendeat, inde fit, ut, quod jam dicebam, quod majores se difficultates objicerent, eò clarior Virtus elucescat.

[ *A contrario.* ] Contrarium est quod Vitium debile, ignavum, iners, infirmumque sit & vel minimo labore, homo virtute destitutus frangatur.

[ *A simili.* ] Quemadmodum Fulmini nihil occurrit, quod obsistat: ut Soli nullæ opponi nubes possunt, quas non dissipet: sicut Torrens repagulis objectis intumescens, obvia quæque proruit: Sicut inclusus ignis rumpat necesse est, nullæque superimponi possunt tantæ molæ, quas non evertat; ita Virtus, &c.

[ *Ab exemplo.* ] Quàm difficile, Davidi fuit

fuit adhuc puerulo & inermi, Leones, Ur-  
 sos, manibus captos strangulare ac dilania-  
 re in frustra? dilaniavit. Gigantem arma-  
 tum singulari certamine vincere ac pro-  
 sternere? vicit, prostravit, interfecit.  
 Quam laboriosum Josepho fuit, fratrum  
 invidiam & crudelitatem, servitutem,  
 calumniam, vincula ferre, ac superare?  
 tulit fortiter, feliciterque superavit. *Si-  
 milis Exemplorum Inductio fieri hoc loco pote-  
 rit in eundem modum.*

[ *A Testimonio.* ] Ovidio Q. Curtius iis-  
 dem ferè verbis concinuit. *Nihil esse, inqui-  
 ens, tam arduum quò Virtus non possit eniti.*

[ *Ab Epilogo.* ] Concludetur brevi Epilo-  
 go quo nos ipsos excitabimus ad Virtutis  
 cultum, cùm nihil ea sit potentius.

## II. CHRΙΑ VERBALIS.

*Etiā sine magistro Vitia discuntur.*

[ *Ab Encomio.* ] Laudandus Seneca, quòd  
 inter Scriptores Ethnicos, Magistri vir-  
 tutum nomen potiori jure vindicare sibi  
 posse videatur maximè cùm dixit: *Etiā  
 sine magistro addisci Vitia.*

[ *A Paraphrastico.* ] Explicabitur il-  
 la sententia, ostendendo opus non es-  
 se, scholas frequentare vitiosorum ho-  
 minum, libros legere pestilentes, præce-  
 ptos audire improbos, ut discamus:  
 Vitia, &c.

[ *A Causa.* ] Causa, cur sine labore,  
 studioque Vitia discuntur est naturæ no-  
 stræ

stræ pravitas, & ingenita nobis ad malum propensio.

[ *A Contrario.* ] Vitio contraria Virtus est: ut hanc addiscamus, quot Magistorum, & Librorum opera requiritur! quot præceptis, quot monitis, quot lectionibus egemus: quantum studii & laboris ponendum est, ut vel primis ejus elementis, multorum spatio annorum imbuamur?

[ *A Simili.* ] Similitudo ab Agricultura petetur: ut enim noxia gramina, inutileque plantæ progerminent, nulla cultoris industria opus est, spontaneas profundit inculta tellus spinas & carduos, &c. Sic & Vitia &c.

[ *Ab Exemplo.* ] Exemplo esse possunt Adolescentes illi omnes, qui cum honesta in familia, probis nati, educatique sint parentibus, vitam vitiis inquinatam agunt: vix enim singulare Exemplum huic argumento satis idoneum reperias.

[ *A Testimonio veterum.* ] Eandem sententiam expressit his verbis S. Hieronymus: *Proclivis est, inquit, malorum imitatio; Expressius adhuc Deus ipse: Sensus, & cogitatio humani cordis, in malum prona sunt ab adolescentia sua.* (Gen. 7.)

[ *Ab Epilogo.* ] Ex his inferemus, sapienter dixisse Senecam, sine Magistro Vitia addisci, sapientiusque nos facturos, si dediscamus ea, quæ jam per nos ipsi didicimus, & quæ fortè etiam alios docui-

Q

-mus,

mus, doctiores heu ! quàm deceret, ad malum Magistrum.

### III. CHRISIA VERBALIS.

*Rara est concordia Formæ, atque  
Pudicitia.*

[ *Ab Encomio.* ] Laudabitur à facultate Poetica, qua eminuit Juvenalis, hujus auctor sententiæ.

[ *A Paraphrastico.* ] Ostendetur, vix inter corporis Formam elegantem, & Pudicitiam benè convenire unquam posse; hoc est: rarò contingere, ut qui pulchritudine præstant, castitate ornati sint. Tribus constat membris hæc sententia. 1. *Forma*, quæ describenda est, per varias definitiones, quas pag. 150. invenies conglobatas; 2. *Pudicitia*, quàm similiter describere per definitiones poteris, appellando illam Reginam virtutum, animi Decus &c. Consule, quæ pagina 155. de Castitate diximus, & quæ 189. in virtutis laudem; 3. *Non concordant*, quod verbum per Congeriem Sententiarum licebit exponere. Quid est, non concordare, non convenire, non consentire? Est, sensu, verbis, factisque discrepare, altercari assidue, jurgari, exercere inimicitias, perniciem sibi moliri mutuam, &c. Hæc omnia præstare solent Pulchritudo, & Pudicitia.

[ *A Causa.* ] Cur inter Formam, & Pudorem, vix unquam benè convenit  
Cur?

Cur rara est earum concordia! Cur ita dissident! Quia forma elegans, videri vult; Pudicitia latere amat: Illa vana & superba est; Hæc modesta: Illa deliciis gaudet, voluptatibus pascitur: Hæc contra pænis, laboribusque delectatur: Illa expetitur, amatur, ambitur oppugnatur, Hæc nequaquam, &c.

[ *A Contrario.* ] Contra: non est admodum difficile, ut cum Deformitate Pudor consentiat.

[ *A contrario.* ] Pudor, Thesaurus est; servari vix potest in loco ornatissimo, patenti, ac splendido: Pudicitia, Regina est inter hostes delitescens; si fulgenti, regioque decoretur habitu non effugit manus, non eludet oculos quærentium. Ut lateat, ut elabatur, oportet se plebeo cultu deformet.

[ *Ab exemplo.* ] Viderunt quàm verum esset, Raram esse Concordiam Formæ atque Pudicitia, qui violavere oris elegantiam, ne castitatem in discrimen adducerent; qui ut essent pudici, formosi esse noluerunt. Id noverat Euphemia virgo, quæ cultello vultum fœdavit non uno vulnere, Hoc Brigitta, hoc Andrigisyna Virgines, quæ precibus formam perdiderunt, ne pudorem perderent: Hoc Wilgefortis quæ ob eandem causam obtinuit à Deo, suus ut barba genas ac mentium deturparet.



[ *A Testimonio . .* ] Ovidius, idem quod Juvenalis planè sensit, idemque pene dixit, hoc carmine :

*Lis est cum Forma magna Pudicitia .*

[ *Ab Epilogo . .* ] Epilogus commodè fieri poterit, brevi cohortatione ad Adolescentes ; sic fermè . Cum igitur tam rara sit Formæ , ac Pudicitia concordia , date operam , Adolescentes , ut qui estis formosa facie , mente sitis formosiores ; qui non estis ore venusto , sitis venustiores animo : utrumque utrique consequemini , si pudicitiam coletis .

#### IV. CHRIA VERBALIS.

*Facilis descensus Averni .*

*Sed revocare gradum superasque evadere ad auras*

*Hoc opus , hic labor .* [ Virg. 6. Æn. ]

Perstringendæ breviter Virgilii laudes , quibus poetarum Principis nomen meritò adeptus est .

[ *Ab Encomio .* ] Sententia hæc , duabus contrariis constat partibus , prior solum hic explicanda est ( nam posterior exponetur , à *Contrario* ) huncque habet sensum . Facile est ruere in omne genus vitiorum , criminibus addicere vitam , inquinare se flagitiis , contaminare corpus animumque sceleribus , facile est .

[ *A Paraphrastico .* ] Locus hic , à *Contrario* ; ante locum à *causa* , tractari in hac Chria debet , quod scilicet , Sententia

tiæ propositæ pars posterior sit priori contraria. *Sed revocare gradum superasque &c.* Hoc est. At revocare se ad officium, emergere à vitiis, mutare vitam, recipere se ad bonam frugem, id verò perdifficile est; maximique laboris opus.

[ *A Contrario.* ] Causa cur sit facile peccare est. 1. Ipsa humanæ mentis perversitas, & innata proclivitas ad malum. 2. Quia inest vitiis omnibus illecebra quædam voluptatis, qua blandè pellicimur ad peccandum. 3. Quia facillimum est descendere, seque agere præcipitem celso ex loco in infimum. At verò ascendere, præsertim per abrupta & lubrica, *Hoc opus hic labor.*

[ *A Simili.* ] Innumeræ adduci possunt Similitudines. Quemadmodum enim facile est demoliri ædificia, lacerare vestem, vastare agros, injicere ignem tectis, bona dilapidare, existimationem amittere, &c. Difficillimum contra, amissa recuperare, injecto igni spatium, ac modum statuere &c. Ità facile est labi in peccatum, &c.

[ *Ab exemplo.* ] Proclive fuit David, à solio virtutis, semel descendere, aut potius præcipitare se in sentinam turpitudinis, at quantum laboris subeundum illi fuit, ut emergeret; quot lacrymis eluendæ fuerunt contractæ sordes! Pronum fuit Sophiæ Augustæ colum ac fusum Narseti mittere per summam contumeliam; at vix

ducentorum annorum spatio retexi potuit tela imperio fatalis, quam Narses neverat.

[ *A Testimonio.* ] Hanc peccandi facilitatem, & Virgilianam illam sententiam verbis aliis expressit Seneca: *Serpunt vitia, inquit, & contactu nocent, & in proximum quemque transfiliunt.* At lues, quæ levi contactu, imò & afflatu contrahitur, quàm difficile depellitur.

[ *Ab Epilogo.* ] Aptus erit Epilogus, interre ex iis, quæ dicta sunt, Peccatum esse omni contentione fugiendum; cum labi, aded sit facile, resurgere contra ita laboriosum.

## V. CHRIA VERBALIS.

*Principes unquam soli peccant.*

[ *Ab Encomio.* ] Famianus Strada, qui hanc protulit sententiam, vir Eloquentiæ laude clarus; Religiosæ vitæ clarior, Historicus nostrorum temporum eximius, laudandus obiter.

[ *A Paraphrastico.* ] Perspicua hæc est sententia: *Principes nunquam soli peccant*, per suas partes, sic exponenda, I. *Principes*, qui scilicet rerum gubernacula moderantur, qui summi cum auctoritate præsent, &c. *Si quando peccant*, si quod admittant contra jus & naturæ leges, si quod flagitium, &c. *Non sunt soli*; hoc est multos sceleris socios habent, &c.

[ *A Causa.* ] Causa, cur non soli peccant Principes, est: Quia cum Auctoritate summa

summa polleant, maximaque potentia, assentatore habent innumeros, qui ut eorum gratiam sibi demereantur, obsequuntur nefariis illorum cupiditatibus, ipsorumque vitia majoribus exprimunt.

2. Quia, Principum facta, leges videntur esse populorum: neque enim pœnas timere possunt, imò laudem se putant consequi, si suorum imitentur, ac sequantur exempla Principum.

[ *A contrario.* ] Contrarium prorsus usu venit, cum Principes, ex virtutis disciplina, vitam traducunt. Illarum enim Exempla in utramque partem valent maximè.

[ *A Simili.* ] Principum auctoritate tanquam fundamento innituntur respublicæ: ruente fundamento, totum necesse est ædificium corruat. Sclopi breviores, minimum; Bombardæ ingentes maximam edunt hominum stragem. Ducum in bello, & in mari Navarchorum peccata, exitium, non uni: sed infinitis afferunt.

[ *Ab exemplo.* ] Exemplis si opus esset, dicerem Neronis temulentiam, ad imitatum tantum valuisse, ut Roma, ex urbe in popinas abiisse videretur: Libidinem, Helio. gabolo libidinante sic crevisse, ut ne Philosophi quidem turpissimis voluptatibus intacti essent: Sævitiā, Commodogladiatorem agente, in mores hominum ita mara- visse, ut ipsæ fœminæ gladiatorio cultu, & magna etiā audacia, in arenam procederent.

[ *A Testimonio.* ] Audi Claudianum, inculcantem.

*Scilicet, in vulgus manant Exempla Regentam.*

*Utque Ducum lituos, sic mores, Castra sequuntur.*

[ *Ab Epilogo.* ] Communi, Chria hæc claudetur Epilogo.

## VI. CHRIA VERBALIS.

*Voluptas Esca malorum est.*

[ *Ab Encomio.* ] Plautus, auctor hujus sententiæ laudabitur ob ingenium admirabile, præsertim in moribus hominum venustè describendis, vitiisque scitè carpendis stylo suo comico, quo tametsi conditione vilissima (nam versandæ molæ asinariæ addictum fuisse ferunt) immortale sibi fecit nomen apud posteros.

[ *A Paraphrastico.* ] Explicabitur illa Sententia, similitudine ipsa, quam continet: ut enim hamo pisces, sic voluptate inelcantur, & capiuntur homines, & ad omne vitiorum genus pertrahuntur. Quære à singulis, cur peccatis se polluant? cur sceleribus scelera cumulent? Respondebunt, se voluptate allici. Dic impure, dic temulente, cur tantis flagitiis macularis animum? Dubitas, quin se, vel invitosperttrahi, voluptate respondeant.

[ *A Causa.* ] Quæris causam, cur voluptate, ad mala homines alliciantur? Quæro ego vicissim ex te causam, cur hamo pisces capian-

cāpianur ? Quia , inquit , escam , non unum ferreum vident pisces . Idem quod o-  
que respondeo ; quia homines , voluptatis  
solūm , non doloris secuturi sensum adver-  
tunt . Non considerant cum peccant ; in-  
numera , æternaque mala , quæ momen-  
tanea ; levissimaque voluptas invehit .

[ *A contrario.* ] Labor contrā , si minus  
Esca bonorum dici potest ; quodd nihil de-  
lectationis obiciat sensibus ; origo certē  
dici debet bonorum omnium nam ex labo-  
re vera virtus , ex virtute æternus honor ,  
ex honore immensum gaudium , felicitas-  
que sempiterna profluit .

[ *A simili.* ] Quamvis similitudinem  
habeat sententia ipsa suam : poterit tamen  
similitudinis subire vicem , quod de Sire-  
nibus fabulantur Poetæ ; quæ ad maris  
oram consistentes tanquam piscatrices , sua-  
vitate cantus , pellectos , sopitosque nautas  
ac vectores , quasi pisces retibus irretie-  
bant ac devorabant .

[ *Ab Exemplo.* ] Nonne Siren fraudulenta  
fuit illa muliercula , quæ Sampsonem om-  
nium mortalium fortissimum blanditiis  
inescatum illexit in sinum , sopitumque  
vinxit , totondit , prodidit , perdidit .

[ *A testimonio.* ] Plauti sensum totidem  
verbis , assecutus est Cicero , idemque verbis  
aliis , alio loco elegantissime significat : *Imi-  
satrix* , inquit , *est boni Voluptas , malo-  
rum Mater omnium* . *cujus blanditiis cor-*

*rumpuntur, quæ natura bonasunt: Et alibi, Multa nobis blandimenta Natura ipsa genuit, quibus sopita virtus conduceret.*

[ *Ab Epilogo.* ] Quoties igitur, sensibus vestris Adolescentes, aliqua se voluptas offert, hamum considerate esca oblectum, &c.

### I. CHRISIA MISTA.

*Omnia mea mecum porto.*

[ *A Laudatio.* ] Laudabitur Bias, à sapientia, quæ sic excelluit, ut inter septem Græciæ sapientes fuerit numeratus. Is, cum patriam ejus Prienem cepisset hostis, cæterique ita fugerent, ut multa de suis rebus secum asportarent, admonitus à quodam ut idem ipse faceret: Ego verò, inquit, facio: Nam *Omnia mea mecum porto.* Quid sapientius dici potuit?

[ *A Paraphrastico.* ] Demonstrandum est, quàm sapienter Bias respondit, quàmque sit verum, nulla esse alia hominis bona, præter Virtutem, ( hoc enim ipsum Bias intelligebat, cum diceret, *omnia mea mecum porto* ) Id autem fiet Enumeratione bonorum omnium quæ possidere homo potest; qualia sunt. 1. Fortunæ bona; opes, honores, fama, nobilitas. 2. Bona corporis, sanitas, robur, pulchritudo. Hujusmodi bona omnia; dici non debent, bona hominis; sed sola Virtus. Quid ita? mox subiicio causam.

[ *A Causa.* ] Causa cur sola Virtus sit bonum

bonum hominis, est. 1. Quia sola Virtus bonum Hominem, perfectumque efficit. 2. Quia Virtutem qui possidet, Thesaurum infinitum possidet nullaue re alia eget. 3. Quia virtus ita nostrum est bonum, ut sicut dono dari non potuit, ita nec ulla vi eripi nobis queat. 4. Quia sola Virtus reddere nos beatos potest, æternumque felices.

[ *A Contrario.* ] Contra verò, Naturæ ac Fortunæ bona omnia, aded non bonos nos reddunt, ut sæpissimè pessimos, ac sceleratos efficiant. 2. Boni nomen non merentur, quia probis sæpè denegantur, & tribuuntur improbis. 3. Quia sine laude, imò plerumque maximo cum dedecore possidentur. 4. Quia auferri nobis possunt, & in morte semper auferuntur. 5. Quia etsi fruamur iis bonis omnibus, si una caruerimus virtute, miserrimi, in hac vita sumus, multoque miseresiores in altera.

[ *A Simili.* ] Qui hujusmodi bonis gloriatur, idem facit, ac Cornix illa Æsopica, quæ pennis decora alienis, circumspiciebat tumens ac superba; At spoliata ornatu non suo, sibilis ac rostris aliarum volucrum exposita est.

[ *Ab exemplo.* ] Job bonis orbatus omnino omnibus, dives tamen, ac beatus erat; doloribus obrutus, & infimo jacent; quia virtutem adhuc retinebat, quam Dæmon eripere illi, unà cum cæteris bonis non potuerat



tuerat: Vidit certè, & suis aspexit oculis, patientissimus ille virorum, unum hominis bonum Virtutem esse, idemque, quod Bias ille, ejus inopiam mirantibus dicere potuit, *Adhuc, Omnia mea mecum porto.*

[ *A Testimonio.* ] Idcirco divinè Seneca: *Unum hominis bonum*, inquit, *Virtus est.* Et Plautus, lepidissimum illud caput, *Omnia ei adsunt bona, pænes quem est Virtus.*

## II. CHRIA MISTA.

*Concordia parvæ res crescunt, Discordia maxima dilabuntur.*

[ *A Laudativo.* ] Laudandus Micipsa Numidarum Rex à prudentia, cujus virtutis regium specimen, ac documentum dedit filiis suis moriens, illos ad virtutem, concordiamque his verbis adhortans: *Regnum vobis trado firmum*, inquit, *si boni eritis, sin mali, imbecillum: nam Concordia parvæ res crescunt: discordia maxima dilabuntur.* ( Apud Sallust. )

[ *A Paraphrastico.* ] Hujus sententiæ, duæ sunt partes, inter se contrariæ, & seorsim deinceps explicandæ, Prima hæc est: *Concordia voluntatum consensione, conjunctione virium*, nihil esse tam parvum, quod non evadat amplissimum: nihil tam humile, quod non assurgat in immensum: nihil tam debile, tamque contemptum, quod, &c.

[ *A con-*

[ *A contrario.* ] Altera sententię pars, primę illi opposita sensum hunc habet : Discordia, dissensione, jurgiis, distractione voluntatum, ac virium, familias clarissimas extinguere, respublicas florentissimas interire, imperia firmissima labefactari, penitusque concidere.

[ *A Causa.* ] Causa in promptu est : quia quod virtus magis unita est, eod fortior est, faciliusque resistit fortunę, ac malevolorum injuriis. Cum autem disjuncta est ac segregata, existit imbecillior ; adeoque nullo fere labore frangitur.

Quandiu propugnaculi faxa firmiter inter se cohærent, tandiu est inexpugnabile. At simul ac parietes facere labem incipiunt, &c. Ut conjunctę guttę, in rivos, fluminaque coeunt, separatę modico tempore siccantur. 3. Ut conglobati pulvisculi assurgunt in excelsos montes, dispersi verò cedunt ventorum ludibriis. 4. Ut lapis Scyro insula, inquit Plinius fluctuat integer, comminutus autem subsidit : sic res Discordia pessum eunt, Concordia sustentur.

[ *Ab Exemplo.* ] Exemplum dabit insigne, Romanum Imperium : quandiu enim in illa republica concordia viguit, stetit illud floruitque at ubi discordia Pompei, & Cesaris, in factiones distractum est, brevi eversum est.

[ *A Testimonio.* ] Idem cum timeret familię

milix suæ Scilurus illè Scythæ, octoginta filiorum pater omnes accersens, paulò ante mortem, fasciculum jaculorum, singulis frangendum porrexit : at illi, cùm id ne tentare quidem voluissent, quod viderent id esse supra vires omnium, sapiens pater, singula educens ac rumpens, facile fregit universa ; addens, idem ipsis eventum, ni concordēs conjunctique viverent.

[ *Ab Epilogo.* ] Epilogus, animorum conjunctionem suadebit.

### III. CHRIA MISTA.

*Amici, diem perdidisti.*

[ *Ab Encomio.* ] Titus Imperator, is, qui ob humanitatem planè divinam, Amor, & Deliciæ generis humani cognominatus est, si quem diem egisset non insignitum aliquo in homines beneficio, facturam illius diei dolens ; dicere solebat ; ad amicos conversus, & ingemiscens, *Amici diem perdidisti.* Quo laudum genere non digna est, tam amabilis indoles?

[ *A Paraphrastico.* ] Exponenda illa Sententia ; cujus, hic verus ac legitimus sensus est, Amissum illum à nobis diem, quantumvis magna negotiorum turba implicati fuerimus, quo die, nullum contulerimus in homines beneficium. Quisquis, igitur qui nemini benefaciendo, dies, menses atque etiam fortè annos transigis, exclama, si sensum non amisisti,

*Amici*

*Amici diem perdidisti.* Noli dicere, te perdidisse diem, quod non sis factus eo die ditior, &c. Non perdidisti, si bene de aliquo meruisti.

[ *A Causa.* ] Hujus rei causa est; quod nullus Homini æquiparandus thesaurus est, cum nihil sit Homine pretiosius: Hominem lucrari, sibi devincere, plus est, quam Gazas omnes Persicas collegisse, &c.

[ *A contrario.* ] Ille contra, diem non perdidit sed quàm optimè collocavit, qui collocavit apud aliquem beneficium, etsi bona fortè amiserit, etsi honoris fecerit juram, &c. ne dicat, *Diem perdidisti.* Illa enim dies immortalis erit, nulla obscurabitur nocte, &c.

[ *A simili.* ] Ut Alexander, jam inde à puero Magnus, dedignabatur cum vulgo hominum, Olympicum decurrere stadium, operam se perdidisse ratus, nisi palmam de Regibus tulisset cursu; sic quivis homo, nisi Hominem beneficiis, vicerit ac devinxerit, nihil magnum, nihil animo suo dignum, se fecisse putet.

[ *Ab exempla.* ] Ea tibi, haud dubiè, tum observabatur cogitatio Cyre, cum plus ex pecuniis in merentes effundendis, quàm ex coacervandis caperes voluptatis: Eares, Constantine, & Carole Magne, faciebat, ut doctrina, & pietate claros homines, augeretis honoribus, beneficiis ornaretis.

[ *A Te-*

[ *A Testimonio.* ] Notat Socrates, quàm quæstuosa sit negotiatio hujusmodi: qui, cum Æschines, pauper auditor, nihil se diceret habere, quod mercedis loco daret præter se ipsum, & rogaret, ut hoc quaecunque munus dignaretur accipere; Tu verò, inquit ille, me, præclaro, nisi te fortè parvi æstimas, munere affecisti.

[ *Ab Epilogo.* ] Itaque demus operam nullum ut sinamus abire diem, quem non ornemus illustri aliquo, nostræ in alios benignitatis, & beneficentiæ monumento.

#### IV. CHRIA MISTA.

*Plaudite.*

[ *Ab Encomio.* ] Laudandus Cæsar Augustus, Romanorum Imperatorum felicissimus, ac sapientissimus, cujus morientis illa vox est. Circumstantibus enim lectum amicis, Ecquid videor, inquit, satis bene personam egisse meam? Cum illi, optimè, respondissent; Ergo, inquit Cæsar, *Plaudite*: quo dicto, se parum obduxit, & expiravit.

[ *A Paraphrastico.* ] Sensus illius vocis est; nemini mortalium plaudendum esse ante mortem, contra quàm sit ab assentatoribus, qui officiorum tempora pervertentes, vivos plausibus obtundunt,

dunt, quos deinde mortuos onerant conviciis.

[ *A Causa.* ] Cur non nisi in morte aut post mortem plaudendum? Quia vita hæc Fabula est, in qua, suam quisque personam sustinet, alii Regum, alii mancipiorum, &c. Ut quisque ex artis legibus, hoc est, ex rectæ rationis præscripto, personam erigit suam, plausum refert. Contra, qui non pro dignitate munus suum objerit, talemque non se exhibuerit Actorem, qualem imposita sibi persona postulabat, æternum dedecus subibit, At nec isti vituperium & ignominiam, nec illi laudem ac plausum ferre debent, nisi in morte? Quia mors est vitæ absolutio; nihil autem, nisi absolutum, perfectumque laudem meretur.

[ *A contrario.* ] Inconsultissime agunt, qui plaudunt ante mortem; stultissime qui nondum debitam laudis mercedem exigunt captantque gloriam viventes adhuc, & applaudentes sibi ipsis, aliis etiam dicunt *Plaudite.*

Nec enim in fabula, plauditur prius, quam ad Epilogum, & Catastrophen perducta fuerit. Non imponitur corona victori nisi post emensum stadium, confectumque cursum, Non conceditur triumphus, nisi peracta pugna, &c.

[ *Ab Exemplo.* ] Quid agitis Romani? quid Tiberio Augusti filio ac successor, in-

intempestivè plauditis? Digna quidem plausu gerit, dicitque plurima. At expectate: nondum est plaudendi tempus: expectate, dum vitæ claudat scenam. Tandiu non expectandum: aliam ecce personam induit exuta omni humanitate: non agit jam Imperatorem, & Patriæ Patrem, sed immanem Tyrannum, crudelissimumque Carnificem. Jamnè plaudetis morienti? Audebitne Tiberius in morte, dicere, ut Augustus, *Plaudite.*

[ *A Test.* ] Quam sapienter dictum: ò præclarum Poetæ carmen, aut potiùs oraculum.

*Dicique beatus.*

*Ante obitum nemo, suprema que funera debet. (Ovid.)*

[ *Ab Epilogo.* ] Sic laudabiliter vivamus ut ante obitum, haud ex vano dicere possimus. *Plaudite.*

*Quatuor illis Mistris: duas adjungamus Cbrias Activas.*

## I. GHRIA ACTIVA.

*Lingua nihil pejus.*

*Æsopus* pulcherrimum illud in turpissimo corpore ingenium, laudem meretur, quòd jussus optimos quosque cibos apparare ad convivium: nulla nisi linguarum fercula in mensam intulit: jussus iterum, ex pessimis quibusque cibis adornare epulum: linguas iterum in mensa multiplices ministravit.

[ *Ab*

[ *Ab Encomio.* ] Breviter exponetur, quid sapiens ille fabulator significare voluerit, illo ciborum apparatu: [ *A Paraphr.* ] Nihil aliud certè, nisi quod, ut Lingua nihil melius, cum rectè loquimur: ità cum male, nihil pejus. & perniciosius est.

[ *A causa.* ] Cur Lingua nihil pejus est? (nam nihil esse melius probabitur in sequenti Chria). Quia infinita damna parit; quod enumeratione facilè ostendi poterit.

[ *A contrario.* ] Silentio contra nihil melius est: nam multi fuerunt in admiratione propter silentium. Et *Stultus quoque si tacuerit sapiens reputabitur* (Pro. 17. 15.).

[ *A Simili.* ] Lingua ensis est; quot strages, quos cædes edit? &c. Flamma est; quot incendia miscet; Jaculum est, eminus ferit, animumque ipsum perimit. Et Serpens virus ubique suum spargit, &c.

[ *Ab exemplo.* ] Serpentis tartarei lingua, & primæ omnium Parentis linguæ perniciem extremam crearunt humano generi.

[ *A Test.* ] Quo circa dixit vir sapientissimus, multos quidem interjisse gladio, at multò plures, linguæ intemperantia perijisse; (Eccles 28. 22. c. 2.) Et S Jacobus, linguam omni fera sæviorem, nulla domari humana industria posse.

[ *Ab Epil.* ] Linguam igitur coerceamus, si mala, quæ affert, extimescimus.



## II. CHRIA ACTIVA.

*Lingua nihil melius.*

[*A laudativo.*] Pittacus Mitylenus, unus de septem Græciæ sapientibus laudabitur, quod rogatus, partem victimæ proferret optimam, pessimamque, Linguam exsecuit, ac porrexit. Et Bias quoque, alter ex eodem numero sapientium, rogatus ab Amasi Ægyptiorum Rege, exploraturo ejus sapientiam sibi ut ex Ove, quam ad illum consultò miserat, partem optimam, pessimamque remitteret, unam remisit Bias linguam.

[*A paraphr.*] Voluit uterque videlicet demonstrare, Linguam, corporis humani membrum esse, utilissimum juxta, ac perniciosissimum? prout quisque illa re, aut secus utitur.

[*A causa.*] Cur lingua, nihil in homine melius? (nam jam supra probatum est, nihil esse pejus) Quia innumera bona nobis affert, quod eorum Enumeratione declarandum erit. Quid enim lingua non efficit. Docet, hortatur, laudat, vituperat, jubet, &c.

[*A contrario.*] Silentium contrà, magna sæpissimè detrimenta, quæ recenseri hoc loco poterunt.

[*A contrario.*] Virginis Sanctissimæ, Christianorum omnium optimæ ac maximæ Parentis Lingua, Verbum Divinum, in ejus castissimo sinu produxit; dum

dum Angelo Dei legato assensum præbuit.

[ *A Testimonio.* ] Non ergo sine causa dixit Salomon Rex, ( Pr. 10 11 ) *Vena vitæ os justi.* ( C. 18. 22. ) Et, *Lingua sapientum est sanitas.*

[ *Ab Epil.* ] Vel benè loquendum, vel omnino tacendum esse, docebit Epilogus ex hac communi sententia.

*Aut dic aliquid melius silentio, aut sile.*



D E

# SENTENTIA.

**N**on multum nobis facesset negotii Pro-  
gymnasma hoc, propterea quod om-  
nia prorsus quæ in superiori dicta  
sunt ad istud referenda sint.

## C A P U T I.

*Quid Sententia sit, & quotuplex.*

**Q**uid est Sententia?  
R. Est oratio, dictum quodpiam,  
quod ad hortandum, dehortandumvè per-  
tinet breviter explicans.

Quomodo differt Sententia à Chria?

R. Nihil omninò differt; nisi quod  
Chria non dictum modò, sed etiam factum  
aliquando commemorat. Sententia verò  
dictum dumtaxat explicat.

Quotuplex est Sententia?

R. Multiplex, Alia dicitur Exhortans,  
alia Dehortans, & alia Enuncians. Item;  
alia Simplex, alia Composita. Rursùs  
dividitur in Veram, Probabilem, & Su-  
perlatam.

Quid est sententia Exhortans?

R. Ea est, quæ ad aliquid hortatur & in-  
citatur.

citatur. Ut *Amicum dilige, qui te non tua eligat.* (Cat.)

Quid est Sententia Dehortans?

R. Illa, quæ ab aliquo malo nos avocat.

Ut, *In voluptatis regno non potest Virtus consistere* (Cic. de Senect.)

Quid est Sententia enuncians?

R. Quæ rei cuiuspiam naturam nobis aperit. Ut, *Virga atque correptio tribuit Sapientiam.* (Prov. 29. 15.)

Quid est sententia Simplex?

R. Quæ unum, simplicemque habet sensum. Ut *Soli boni sunt felices.*

Quid est Sententia Composita?

R. Quæ non unum tantum sensum continet. Ut, *Fortunas fortes metuit, ignavos premit.* (Sen.)

Quid est Sententia Probabilis?

R. Quæ rem non quidem certissimam, sed probabilem ac verissimam enunciat. Ut, *Major est mulieris quam viri malitia.* (Arist. de hist. Anim.)

Quid est Sententia Vera?

R. Quæ rem affirmat semper veram. Ut, *Facile est vincere non repugnantem.* Et *Malè parca, Malè dilabuntur.* (Cic.)

Quid est Sententia superlata?

R. Quæ rem videtur augere supra veritatem. Ut, *Ingrato homine, terra nihil erat pejus.* (Ausonius apud Lips. in Sen.)

Quibus capitibus tractatur Sententia?

R. Iisdem plane quibus Chria videlicet

ab Encomio, Expositione, Causa, Contrario, Similitudine, seu Parabola, Exemplo, Testimonio veterum, & Epilogo.

Sed jam Exemplum Sententiæ ab omnibus his locis pertractatæ, accipe;

## C A P U T II.

### S E N T E N T I Æ

#### Exemplum.

*Adolescens, juxta viam suam ambulans,  
etiam cum senuerit non  
recedet ab ea.*

[ *Ab Encomio.* ] **A** Deste animis, Adolescentes, attentasque præbete aures Regum sapientissimo, Doctorumque omnium Regi, quem nihil eorum latuit, quæ sciri ab homine possunt, qui penitissimos naturæ recessus, artiumque arcana omnium, adytaque secretissima scientiarum, ingenii pervasit acie, animoque complexus est; cujus in augustissima mente velut in sacrario, visa est posuisse sapientia domicilium cujus ab ore, sua ipse Deus fudit oracula, leges dixit, concilia explicuit, mysteria promulgavit. Audite quibus vos ille verbis avocet à vitiis, ad virtutem impellat, cohortetur ad vitæ decus, & ad omnem officii rationem pelliciat: *Adolescens*, inquit,

quit , *juxta viam suam ambulans* , *etiam cum senueris non recedet ab ea* . Quasi vos ita commoveret , ac diceret .

[ *A Paraphrastico.* ] Videte , Adolescentes lectissimi , quam à primo ætatis exordio agendi rationem teneatis , quam ab ineunte pueritia ordiamini vitæ telam , quæ puris paratisque ad sationem mentibus semina mandetis , quibus colorum initiis puras animorum tabulas imbuatis , ad quas artes appellatis cogitationem , quod arripiatis vivendi genus , quam studiorum ineatis viam : Etenim ; quàm quisque à teneris capeffiverit vitæ rationem , eam ad exactum usque senium retinebit , nec ulla prorsus arte , nullaque vi ab instituto cursu revocari se patietur . Considerate inquam etiam atque etiam , quo vestra inclinata indoles , quam in partem , corrupta vitiis natura propendat , quò vos abripiat fervor ætatis , & æstus impotentis animi , turpissimusque cupiditatis dominatus : si enim vitiorum lue , semel infeceritis animos , sordibusque scædissimarum voluptatum violaveritis innocentiam mentis , manabit pestis ad ætatem usque postremam ; contagione serpet malum exitiabile ad senectutem ultimam , nec ullam morbo pestilenti curationem dies afferet ; sed ingravescentibus annis magis , ac magis ingravescens , æternum vobis pariet dolorem nominique vestro labem inuret

R

igno-

ignominiae sempiternam.

[ *A Contrario.* ] Si contra à puero, indixeritis voluptati bellum, si cohibuerit rationis fræno libidinem, nihilque vobis expetendum putaveritis, nisi quod sit cum laude, & cum dignitate conjunctum, crescet accessu annorum honestatis amor, obfirmavetur mentis vigor, robore vitium; nec consenesceat virtus, senescente vita; sed quò languidior vis erit emarcescentis corporis, eò generosior efflorescet animus, maturusque tum maximè suavissimosque fructus, ætate immatura profunder.

[ *A Causa.* ] Nempe, & usus & consuetudinis maxima vis est in omnem partem, ut quædam quasi necessitas inducatur, aut infelicitèr conficiendi vitæ curriculum, quem ab ipsis vitæ carceribus inchoavimus.

[ *A Simili.* ] Flectitur nimirum, eadem facilitate tener animus: qua molle corpus; dumque adhuc certus est, quasi vis figuras inducit. At si intercessu temporis, mollitiem amittat illam ductilemque indolem, & quasi lapidescere coeperit; induram, ad finem usque vitæ, formam conservat. Cernite, ut metalla cum fervore soluta fluunt, in quoslibet vultus conflantur; ubi verò desit ignis, ut continuò immutabiliter obdurescunt. Aspicite, ut arbores, in quemcumque

partem

partem flectuntur faciliè, cùm teneræ sunt; ut contra induratæ annis, nulla dirigi industria queant, sed abnormes ac turtuosæ perseverant. En, ut globus quem validè impactus, torquet per planitiem malleus à linea nunquam deflectit, donec impressa vis sensim elanguet & impetus emoriatur. Videte, ut per declivia montis, saxum è cacumine avulsum ac ruens, quò longiùs à summo provolvitur, eò violentiùs rapitur, nec usquam nisi in ima valle conquiescit. Sic, qui per hujus vitæ prærupta, lubricaque prolabi cœperit in præcipitia vitiorum, consistere nulla ratione valebit, donec in profundissimum miseræ barathrum, lamentabili casu devolvatur.

[ *Ab exemplo.* ] Testis est purpuratus ille Carnifex, coronatum illud Monstrum, capitalissimus ille bonorum Hostis, illa ex omni vitiorum genere coagulata Bellua, Portentum illud naturæ ex immanitate concretum, Herodes ille, tyrannorum crudelissimus testis est, qui assuetus à cunabulis, innocentissimorum hominum fundere cruorem non modò non discessit à ferino more, confectus jam senio, sed in ipsa etiam morte, atque aded, quantum in ipso fuit eundem ultra fata retinuit.

[ *A Testimonio.* ] Nec verò, id mirum videri debet: quod enim scriptum reliquit eximius Ecclesiæ Doctor Hierony-



mus, difficulter eraditur, quod rudes anni  
perbiberunt ( De Instit. Pu. ep. 7 ) & quod  
ajebat ille alius, facile est teneros ad huc  
animos componere, difficulter reciduntur vi-  
ria quæ nobiscum creverunt ( Sen. 2. de ira,  
c. 2. ) Denique, *Ætas prima post tinctu-  
ram voluptatis, ægre alium colorem bibit.*  
( Fam. Str. de Bell. Belg. ) Illud enim Poe-  
tæ tritum prætereo.

*Quo Semel est imbuta recens servabit odo-  
rem.*

*Testa Diu.* ( Hor. l. 1. ep. 2. )

Imbuite igitur, Adolescentes, recen-  
tes animos suavissimo virtutum liquore,  
optimarumque artium pretiosis odoribus,  
illos, ut diu æternùmque servetis; Rectæ  
rationis inite viam, dum vobis est inte-  
grum. Sic enim susceptum insistentes iter,  
nunquam deflectetis ab honesti calle; Et,  
ad quam concitato cursu, acris vegetaque  
contendit ætas, Senectus fortunata me-  
tam continget.



PROGYMNASMA <sup>389</sup> IX.

D E

ETHOPŒJA,

ET THESI.

**D**UO Aphtonii Progymnasmata in unum contrahimus, quod de utroque pauca dicenda sint.

C A P U T I.

*De Ethopæja.*

**E**THOPŒJA figura est Rhetorica, & quidem una de pulcherrimis de qua idcirco suo loco id est Progymnasmate 2. de Figuris dicturus fuisset, nisi & proprium Aphtbonius Progymnasma tribuisset. Eam idem Auditor, contra communem omnium oratorum Sententiam cum Prosopopæja confundit, & Exemplum quod affert de Niobe, quam post interfectos filios loquentem facit, mera Prosopopæja est; At nos utramque distinguimus & Ethopæjam quid sit, ( nam de Prosopopæja fuse alibi ) sic definimus.

ETHOPŒJA est quædam expressio motuum personæ alicujus; quæ sit, dum ejus actiones, studia, propensiones; & agendi ratio exhibentur oculis. Characterismus item dicitur, cum personam ita

R 3

effingit,

effingit, ut non corporis modo lineamenta, sed animi quoque indolem, quasi ponit sub aspectum.

# EXEMPLUM I.

*Ἐθόπαις.*

Puer Piger.

Hic ille Puer est, quem ab litterario ludo prodeuntem aspicio. Hic ille, inquam est, quem hic delineo: cuius vultum mihi exprimendum, habitumque sumerem, ipsius si pigritiæ imago ad vivum reddenda suisque depingenda coloribus esset? Et verò, Nonne ex ejus ore, atque incessu, pigerrimum esse nebulonem intelligis? Annon impexus capillus, vestis sordida, galerus pulvere fœdatus; pallium ab dextro humero indecore fluens, humumque verrens, meram desidiam clamarit? Nunquid, vel in libris ipsi, quos sub axilla gestat, ipsius legis negligentiam? Suam se in domum recipit, adjungamus nos ei comites, & tardo, inertique passu gradientem; cogitatione sequamur. Quid factorum putas; ubi limen attigerit, nisi quod semper aliàs? Ab ipso statim vestibuli aditu, servum inclamans, Heus; tenebrio, inquit, ades dum: Etiamne restitas cessator? Exonera me hac intollerabili sarcina librorum, quos Dæmon malus, in malam rem avehat, ita mihi quotidie pariunt uberrimam, messem mali. Inde cubiculum ingressus, in lectum se proiicit, anhe-

anhelans partem quietis capturus aliquam,  
 dum vocetur ad cœnam. Vocatus adest  
 illicò, strenuumque, hoc duntaxat loco  
 se præstat, Exemptis epulis, oscitare,  
 obdormiscere incipit, & toto capite an-  
 nuere, tempus jam advenisse cundi cubi-  
 tum. Itaque abit, obelum, & adipale  
 corpus plumeo resupinat toro, ad multam  
 lucem stertens placidè, somnum portò  
 producturus ad meridiem, si permittere-  
 tur. At ecce ancilla obstrepit ad fores;  
 adest objurgator, qui torpentem excitet,  
 & solemne illud occinat:

*Nempe hoc assidue; Jam clarum mand  
 fenestras.*

*Intrat, & angustas ostendit lumine rimas.*  
 Nec tu tamen, Aselle, expergi ceris?  
 videris mihi, vel cum Gliribus certare  
 posse. Hic, beatulus noster aperire ocu-  
 los, caput attollere, explicare brachia,  
 & huc illucque se versare: Et, quæ ho-  
 ra est? inquit, vix dum illuxit; meis cer-  
 tè oculis adhuc multa nox est. Quid mul-  
 tis? Dum scalpit caput, dum distendit  
 nervos; dum oscitat, fricatque, erigitur  
 lecto, tota abit hora. Demum indutus à  
 toro recta pergit ad focum, à foco cibatum  
 vadit ad armarium culineum; tandem in  
 Academiam se confert, testudineum mo-  
 vens gradum, & ambages viarum quæri-  
 tans, obviasque opificum tabernas flolidè  
 contemplans, morasque nequens alias ex

aliis. Denique accedit ad scholas, eo ferme tempore, quo solent alii à scholis abscedere.

## EXEMPLUM II.

*Εὐβοῖα.*

Puella vana.

Nobilis est ac dives hæc Puella, amplæ familiæ spes, hæres unica, quò meliore forma fulgens, eò fastu vaniore turgens.

At ecce illam, quomodo à rheda illa inaurata prodit, Imago ad speculum ficta, Officina deliciarum Exemplar levitatis absolutum. Cernis, ut tumet vanitatis Simulacrum, ut se circumspicit superba, ut se vendat arrogans, ut collum erigit, gressumque frangit, oculosque torquet circumquaque, non tam ut videat, quàm ut videatur. Viden' ut purpuream trahit cum ostentatione lasciviæ defluentem luxuria cycladem, auro, gemmisque radiantam: ut detracto molliter crispò bombycino, à levissimo vertice protendit, jactatque cerviculam, ut capillos ambitiosius comptos, concinnatosque velut incidatim, hinc inde sparsos explicat, levissimæque ventorum agitationi permittit, quasi captans ab aura gloriolam. En, ut niveæ splendent armillis manus, ut aures micant in auribus aureis, ut collum gemmeo torque rutilat, ut crebro coma scintillat adamante. Ah! oculos quæso, abducamus, ab ejus ore cerussato, miniato, stigma-

stigmatico ut ne nimirum violetur, aspe-  
 ctu parum verecundo modestia; & aliò  
 avocemus aures: amabo illam adit, allo-  
 quiturque de grege mundulorum nescio  
 quis, totus de capsula, ex pictura totus,  
 verè omnia bona sua secum portans: Bene  
 habet. Colloquium abruptit interveniens  
 à parente servulus. Abscedit barbarulus  
 ille comptulus, & rhedam Nympha subit  
 iterum, properatque ad ædes maternas:  
 Jamque carrucæ strepitu excita mater ad  
 fenestram accurrit; filia visa devolat ad  
 fores, & ruens in amplexum. Ubi tandiu  
 inquit, à me abfuisti, meæ vitæ corcu-  
 lum, mei cordis animula, mea voluptas  
 & suavium; At illa, non diu me deside-  
 rast mater, vix momento uno foris sum  
 morata. Atqui, Annum mihi videbaris  
 abfuisse; ascende mecum, mea lux, in  
 aulam: sed placidè, ne quid tibi, festi-  
 nando, parias incommodi: hìc sede,  
 meum mel, tuamque mirare formam in  
 hoc speculo; nam digna es profectò quam  
 Venus ipsa demiretur: cui vel gratiæ in-  
 videant. His dictis, colliquescit puella  
 gaudio, sibi que lenocinante risu gratu-  
 lans ad blandiensque matri grates agit repe-  
 tito osculo.

## C A P U T II.

## De Thesi.

**S**Iqua Apthobonius habet de Thesi pertrahere vellem ea, quæ Cbrium, diligentia; esset mihi hîc differendum de ipsa Oratione, quæ perfecti Oratoris opus est. Exemplum enim quod habeo, An ducenda sit uxor, absolute orationis argumentum est, Atque non est nostri instituti de Oratione hic agere sed de præcipuis ejus partibus, ut ex singulorum efformatione, discant sensim Tyrones, Orationem integram perrexere, Dicamus ergo hic de Thesi pauca, & perspicua & quod caput est, appositè ad eorum caput, in quorum gratiam hæc elucubramus: Ac quaramus primum.

Quid est Thesis?

R. Est rei alicujus investigandæ per orationem consideratio, vel disquisitio, quam Cicero *Propositum*, & *Consultationem* vocat.

Quotuplex est Thesis?

R. Duplex: Alia *Civilis*, cujus finis est *Actio*, ut, An bellum sit gerendum; Alia *Speculativa*, cujus finis est sola cognitio, Ut; An Sol sit major terra.

Quid differt Thesis ab Hypothesi?

R. Quod Thesis sit propositio generalis seu infinita; Hypothesis verò sit particularis & finita, idest, circumscripta adjuncto quodam vel personæ, vel loci, vel  
tempo-

temporis &c. v. g. Quæstio hæc. *An Piger sint Plectendi*, Thesis est, quia est universalis, & infinita quæstio, At si quærat, *An Petrus qui piger est, plectendus sit*. Vel, *An sit multandus, publico in loco*. Vel, *An bodie; an vero cras, merita pena sit afficiendus*. Hujusmodi quæstiones omnes finitæ sunt, & proprio nomine dicuntur Hypotheses.

Quis est usus Theseos, seu Propositionis infinitæ?

R. Maximus quia orationes, quæ latissime vagantur, sunt orationes. Et quæ de universo genere dicuntur, valent ad iudicium ferendum de singulis: Et quæ de universo genere probantur, de parte etiam probari necesse est. Exempli causa! Si sermonem sim habiturus de Diligentia laudibus, excurram in laudem Virtutis; si vituperaturus Pigrum, Vitii generatim sumpti turpitudinem describam: Quod enim de Virtute dixerō, id de diligentia: & quod de Vitio, id de Pigrum dici quoque poterit: Quia Pigrum est pars Vitii, & Diligentia, pars seu species Virtutis.

Itaque, quoties tibi erit, de re quampiam, instituenda oratio, optimum erit, quæstionem illam particularem, & finitam, quæ dicitur Hypothesis, traducere ad generalem, & infinitam, quæ Thesis appellatur, ut demonstrabit hoc Exemplum.



E X E M P L U M  
T H E S I S.

Gratior est Puerorum Institutio,  
quàm Adolescentium.

*Hypothesis est hæc propositio, quia finita est, & ad certas personas contracta; Ut autem ejus probatio sit ornatior, illam revocabo ad hanc Thesim. Quia animalia omnia delectant, cum parva adhuc sunt, displicent autem, cum grandescunt, Postquam hanc Thesim tracta vero, ad Hypothesin, hæc est, ad ipsos Pueros, illam contrariam & afferam rationes, cur magis tenera illa ætas arrideat quàm provelletior. At nunc incipiamus à Præpositione quam hæc una Periodo sic circumscribo.*

[ *Propositio.* ] Voluptas, qua ducimur omnes, cum honesta est, quæ dulce condimentum est laboris, sinceraque virtutis illecebra, nec minus animorum quàm sensuum suavissima deprædatrix, longe purior ac limpidior à puerilis Informationis fonte dimanat, quam quæ fluit, si tamen ulla fluit, à severiori Institutione Adolescentium.

[ *Ad Thesim revocatur.* ] Quid ita? Quia ea ferme natura est earum rerum quæ vitam habent, caduntque sub oculos, ut nos eatenus miro quodam oblectamento demulceant: quatenus intra suæ velut infantiaë limites continentur, propriusque absunt ab ortu; incipiant verò tum displicere,

cere, cū natu provectiores grandescunt, tantoque magis displicere, quantò recedunt longiùs à vitæ cunis, acceduntque magis ad senium.

[ *Thesis probatur ab inductione.* ] Id vel in ipsis intueri licet brutis animantibus, quæ alimus domi. Nam, exempli causa, Catello quid Blandius; seu, dum secum ipse solus in aræ palestra lusat, aut Felli contribuli suæ, à tergo insidias struens, ex improvviso facit impetum, rixasque benevolas movet, bellumque gerit bellulum, sive cū venienti Heræ, salutatim adblandiens, modò vestis admordens tenero dente limbum, modò latratu querulo subiratus immurmurans, caudula pedes verberat, ac nunc assultat, resultatque, agitque se, versatque circum, quasi castrum obsidione cingeret, donec Hera, Catuli blandimento victa, deditionem faciens, gremio lassum suscipit, facitque sui per otium suaviorem copiam. Et Felicula quid festivius; quàm oculos jucundè pascit reficitque! ut hilaritatem aspergit intuentibus, dum se nunc torquet in sublime; nunc toto strata corpore, humi se in porrectum deiiciat, ac modò se cogit in cochleam, nunc evolvit se in anguillam, modò costulas fornicans, arcuanque in cameli gibbum, momento residente dorso, explicat exeritque se, ac velut in sagittam vibrat. Jam Agnellos Hoedillos Vitellos, Porcellos ( pudet nominare ) imò Pullos dicam.

dicamque? dicam, sed præfabor honorem, ipsos inquam Pullos Asininos, cæteramque turbam Catulorum, pullorumve, quid memorem? Quàm pulchelli, quàm venusti, quam politifunt, donec sunt pulli!

Verùm enim verò adolevitne ille Catulus? Excessit ne primos annos Felicula illa? Vervexne, Agnellus illè factus est? & Hædus ille, Caper? blandusque Porcellus immundus Sus? Et illa pulla, evasitne absolutus, & ex omni parte perfectus Asinus? Proh! quantum foeditatis, & cœni! quantum spurcitiei ac turpitudinis! quantum, inquam, horroris afferunt mole grandiores, qui olim pumiliones ita placuerant! Nimirum, abit, cum primoribus annis, læta illa vegetaque naturæ indoles; marcescit vividus ille flosculus, ornatuque genii vigor; Et languet illa vitæ flamma, & obsolescit ille formæ nitor, & illud omne, quodcumque est, quod sic alias arridebat oculis, annis venientibus evanescit.

[ *Thesis reducitur ad Hypothesein.* ] At quorùm hæc de belluinis Pullis disputatio pertinet? ut inferam videlicet, mirum accidere nemini debere, quod uberrimam jucunditatis liquidissimæ segetem Præceptores à Pueris colligant, quos excolendos susceperere, plenaque hauriant defœcatissimæ lætitiæ dolia; cum ex contrario, ab Adolescentibus quos erudiunt, per paucas oblectamenti guttulas vix eliciant? multorum

torum spatium annorum, raræque oppidum voluptatis spicas extorqueant.

[ *Hypothesis probatur* ] Inest siquidem, ut usu probamus, inest huic ætati, mellei dulcoris vis maxima, leporumque delicatiorum numerus ingens; venerumque tam grata copia, & risuum amœnitates ita festivæ, odorque ingenuitatis innocentissimæ, quem toto ore continenter exhalant, usque aded suave olens, ut non possint illos non ferre in oculis, & in delictis non habere, qui liberalibus eos disciplinis inficiunt. Quod enim, uti modo disputabam, in cæteris Natura brutis adumbravit, ut quamvis foediora finxerit, non nihil tamen resperferit venustatis, quæ se nobis commendant, dum parvula sunt, id ipsum, ut decuit, in pueris expressit longè solertiùs venustos efformans ad gratiam; (*Distributio*) elegantulos ad decorem, ad delicias mundulos, ad amœnitatem candidulos, ad amorem comptulos ore, capillo crispis, cute molles, oculis hilares, risu nectareos, moribus sacchareos, totosque ex amabiliori liberalitate coneretos. At non aliam certè ob rationem, ut non temerè suspicor, quàm ut his quasi ornamentorum blandimentis alliceretur erudita Magistri manus, quæ arte præceptisque perficeret, quod ipsa felici aded successu natura, in suis Pulsionibus inchoasset.

PROGYMNASMA X.  
DE LOCO  
COMMUNI.

*Deſtructione, & Confirmatione, Laude,  
& Vituperio.*

**R** Eliqua Aphthonii Progymnaſmata, in unum conſero; tum quòd minoris ſint momenti, & raro in uſu, tam quòd ex priorum tractatione, facile cuiuſerit intelligere, qua ratione quæ ſuperſunt, tractanda ſunt, modo præcepta teneat ab eodem Auctore tradita, quæ idcirco hîc explicanda eſſe duxi, quam clariffimè potero.

C A P U T I.

*De Loco Communi.*

**Q**uid eſt Locus communis?

**R.** Eſt oratio, laudes alicujus aut vitæ exaggerans.

Cur dicitur *Communis*?

**R.** Quòd communiter iis omnibus attribui poſſit, qui ejuſdem laudis aut vitii participes cum illo ſunt, quem laudamus aut vituperamus, v. g. ſi Dionyſium inſector ob Tyrannidem; quæcumque dicam  
de

de Tyrannide, ea in omnes pariter Tyrannos cadent.

Quodnam est Exordium Loci communis?

R. Nullum habet Exordium, nisi exercitationis causa; propterea quod Locus communis nihil aliud est, quam gravis quædam amplificatio, ad Perorationem propriè pertinens.

Quibus capitibus tractatur?

R. Sex istis.

*Contrario, Sententia, Expositione, Digressionem conjecturali, Comparatione, Exclusionem misericordiae.*

Et illa capita, sex aliis sequentibus terminantur.

*Legitimo,*

*Facili,*

*Iusto,*

*Honesto,*

*Utiles,*

*Eventuro.*

Ut hæc intelligas, adverte oculos in Exemplum quod sequitur, tametsi rudipennicillo delineatum: neque enim absolutiori, post tot alia, opus esse arbitror.

## E X E M P L U M

*Loci Communis.*

*Seditiosus.*

Fingendum est, te Seditiosum hominem accusare, & exagitare apud Judices; præmissoque brevi præmio, cujuscumque modilibuerit; quasi multa alia jam dixeris de illius facinoribus, & perorandi tempus sit, Seditionis crimen sic exaggerabis.

*A Con-*

*A Contrario.*

Ostendendo, quale quantumque sit bonum, Pax, & concordia, quæ antea vigeat, & vigeret etiam nunc magno omnium bono, nisi nefarius hic suis seditionibus illam violasset, &c.

*Ab Expositione.*

Exponet, non ad docendum (rem enim jam notam esse ponimus) sed ad concitandam maiorem in reum invidiam, quo pacto rebus novis studens sceleratus, seditionum procellas excitavit in republica suis coitionibus, ac dolis, multos primum pellexerit in fraudem, & ad suas partes pertraxerit, &c.

*A Comparatione.*

Comparabis hoc ejus crimen cum aliis, v. g. cum aliorum libidine, aut temulentia: ostendesque graviolem ab illo quam aliis omnibus, perniciem inferri reipublicæ.

*A Sententia.*

Hoc est, à consilio, & mente quo scilicet consilio, qua mente turbas moverit: quid sperarit: quid animo intenderit: voluit videlicet, inquit, leges rescindere, jura pervertere, occupare summum locum, &c.

*A Digressionē conjecturali.*

Digrediendum erit, & excurrendum in antea actam ejus vitam, & ex hoc uno crimine conjectura capienda de cæteris. Non nunc primum, inquit, capit moliri exitium

tium patriæ: ab ipsa infantia, sese exercuit in omni flagitiorum genere.

*Ab Exclusionē misericordiæ.*

Tantum illud dices esse crimen; ut sine majori crimine condonari nequeat; nullum veniæ relictum esse locum; misericordiam ei non esse tribuendum, &c.

Quæ postquam dixeris, impellendi erunt Judices ad sententiam adversus illum ferendam ostendendo his capitibus.

*A Legitimo.*

Nihil esse legibus magis congruum, quam ut, &c.

*Ab Justo.*

Justum id esse; ut pœnam ipse ferat, quæ omnis impositurus fuisset, &c.

*Ab Utili.*

Id saluti reipublicæ conducere, &c.

*A Facili.*

Nullo negotio, ejus furorem posse comprimere, &c.

*Ab Honesto.*

Nihil rationi convenientius esse; quam debitas exigere ab illo pœnas, &c.

*Ab Eventuro.*

Ex ejus supplicio, eventura civibus bona omnia; Remp. revocatum iri in statum felicitatis pristinæ, &c.

Hic observandum, quod de Seditioso diximus, idem de quovis alio facinoroso homine intelligendum esse; & quæ contra vitium, eadem illa capita valere omnia, si qua



qua virtus esset eruenda, singula, in contrarium sensum accipiendis; verum Locus hic Communis adhiberi tantum solet ad infectionem vitiorum.

## C A P U T II.

### *De Destructione, & Confirmatione.*

**Q**uid est Destructionio?

R. Destructionio, seu Subversio est propositæ alicujus rei reprehensio.

Quænam destruenda, seu subvertenda sunt?

R. Ea, quæ neque prorsus manifesta, neque incredibilia sunt, sed quæ dubia & obscura.

Qua arte fit ista Destructionio?

R. Primò, Reprehendendi, qui illius rei, quam infirmare ac labefactare volumus, sunt auctores, dicendo, illos nullius esse nominis, vel fidei parum probatæ, vel in illa re, de qua agitur, non bene versatos, &c. Deinde ipsamet res subruenda his capitibus, quasi totidem arietibus.

*Obscuro, Repugnante,*

*Incredibili, Indecoro,*

*Difficili, Inutili.*

Hoc est; probandum erit, Rem illam,  
1. *Obscuro*, & incerto capite manasse in vulgus. 2. *Incredibile*, id esse, fidemque superare omnem, &c. 3. *Difficile*, admo-  
dum

dum esse, potuisse fieri: 4. *Repugnare* illud naturæ. 5. *Indecorum* pariter ac rationi contrarium. 6. *Inutile*, denique futurum fuisse, &c.

Confirmatio, seu Asseveratio, quid est?

R. Est propositæ rei Comprobatio, sed illa res, ut de Destructione modò diximus: nec incredibilis, nec penitus perspecta esse debet.

Qua ratione, & quibus capitibus Confirmanda res est?

R. Eadem ratione, totidemque capitibus quibus destruenda; sed contrariis, omninoque oppositis: Videlicet, à

<i>Manifesta,</i>	<i>Convenienti,</i>
<i>Probabili,</i>	<i>Decente,</i>
<i>Facili,</i>	<i>Utili.</i>

Exemplum utriusque præclarum esse posset, vetus illa quorundam opinio, seu potius fabula, de Trajani Imperatoris anima, Sancti Gregorii Magni precibus, ab inferorum pœnis liberata, & in cœlum recepta. *Vide Baron. An. ad Ann. Chr. 119.*

## C A P U T U L T I M U M.

*De Laude, & Vituperatione.*

**Q**uid est Laus?

R. Est Oratio, bona alicujus enumerans.

Quibus rebus Laus tribui potest?

R. Excepto peccato, nihil est in hac terrarum

num universitate, cui non possit Laus concedi.

Quid illud autem est, quod maximè laudem meretur?

R. Ubi à Deo non discesseris, omnium laudum Fonte, quæ Virtus præcipuo quodam jure, Laudem tanquam sibi uni debitam vendicat; Præter autem Virtutem, omnes res creatæ laudari possunt, etiam inanimes, sed præ cæteris Homines laudare solemus.

Propter quæ Homines laudantur?

R. Propter bona, quibus ornantur.

Quæ bona illa sunt?

R. Alia sunt Bona fortunæ, ut opes, potentia, dignitas, nobilitas, patria: Alia Bona corporis, scilicet, pulchritudo, robur, sanitas. Alia sunt Animi Bona, ut Scientia & Virtus. Ex his omnibus bonis unicum est, quod semper laude dignum est, nimirum Virtus. Reliqua verò, eatenus merentur laudem, quatenus iis ad rectè laudabiliterque vivendum utimur: alioqui vituperationi sunt obnoxia.

Quid igitur est faciendum, ei qui laudare quempiam velit?

R. 1. Bona illa omnia quæ possidet, enumeranda, & verbis exornanda sunt, 2. Contrariorum oppositione augebitur Laudatio si ostendas, eum, quem ornas, immunem esse ab omni labe vitiorum, quæ alios dedecorant, 3. Comparatione quoque laus crescet,

crescet, si eum præclarissimis quibusque viris componas, atque etiam, si merebitur, anteponas.

Vituperatio, quæ oratio est mala alicujus enumerans, eodem prorsus modo fieri solet, quo Laudatio.

Exempla tam laudis quàm vituperii, plurima toto hoc libello sparsa reperies; nullum propterea hîc appono. Nec de Descriptione, quicquam ex Aphthonio subiiicio, non tantùm quia nullis præceptis continetur, eademque fermè Descriptioni, quæ Narrationi conveniunt, & cum Ethopœja, eadem prorsus est; sed etiam quia molior Opusculum, descriptionibus variis, & loquendi formulis, ad præcipuos quosque locos communes, ut ad Bellica, Nautica, Rustica &c. pertinentibus, contextendum, quo, haud scio an quicquam sit æque necessarium Rhetoricæ Candidatis. Alterum item, varia Orationum genera, præsertim in genere laudativo, complectens eadem, si Deo cordi fuerit, cui sit uni.

*Laus ab omnibus sine fine.*

MAG 2012/00

